



BIBLIOTECA NAZ.
Vittorio Emanuele III

XLVIII

E

25

NAPOLI

XLVIII

E

25



4

BEDÆ PRESBYTERI ET FREDEGARII SCHOLASTICI CONCORDIA

Ad senioris Dagoberti definiendam monarchiæ perio-
dum, atque ad primæ totius Regum Francorum
stirpis chronologiam stabiliendam.

IN DUAS PARTES DIVISA,

Quarum PRIOR continet Historiam Ecclesiasticam Gentis An-
glorum, cum Notis & Dissertatione de Auctore hujus Historiæ:
POSTERIOR Dissertationem de annis Dagoberti Francorum
Regis eo nomine primi.

ACCESSIT APPENDIX de S. Dionysio Arcopagita, & de S.
Genovefa, Parisiorum Patronis.

*Auctore PETRO FRANCISCO CHIFFLETIO,
Societatis Jesu Presbytero.*



PARISIIS,
Apud GABRIELEM MARTINUM, viâ Jacobrâ,
sub aureo Sole.

M. DC. LXXXI.
CUM PRIVILEGIO REGIS.

THE FIRST

FRANCIS

CONCORDIA

THE SECOND

THE THIRD

THE FOURTH

THE FIFTH

THE SIXTH

THE SEVENTH

THE EIGHTH

THE NINTH

THE TENTH

THE ELEVENTH

THE TWELFTH

THE THIRTEENTH

THE FOURTEENTH

THE FIFTEENTH

THE SIXTEENTH

THE SEVENTEENTH

THE EIGHTEENTH

THE NINETEENTH

THE TWENTIETH

THE TWENTY-FIRST

THE TWENTY-SECOND

THE TWENTY-THIRD

THE TWENTY-FOURTH

THE TWENTY-FIFTH

THE TWENTY-SIXTH

THE TWENTY-SEVENTH

THE TWENTY-EIGHTH

THE TWENTY-NINTH

THE THIRTIETH

THE THIRTY-FIRST

THE THIRTY-SECOND

THE THIRTY-THIRD

THE THIRTY-FOURTH

THE THIRTY-FIFTH

THE THIRTY-SIXTH

THE THIRTY-SEVENTH

THE THIRTY-EIGHTH

THE THIRTY-NINTH

THE FORTIETH

THE FORTY-FIRST

THE FORTY-SECOND

THE FORTY-THIRD

THE FORTY-FOURTH

THE FORTY-FIFTH

THE FORTY-SIXTH

THE FORTY-SEVENTH

THE FORTY-EIGHTH

THE FORTY-NINTH

THE FIFTIETH

THE FIFTY-FIRST

THE FIFTY-SECOND

THE FIFTY-THIRD

THE FIFTY-FOURTH

THE FIFTY-FIFTH

THE FIFTY-SIXTH

THE FIFTY-SEVENTH

THE FIFTY-EIGHTH

THE FIFTY-NINTH

THE SIXTIETH

THE SIXTY-FIRST

THE SIXTY-SECOND

THE SIXTY-THIRD

THE SIXTY-FOURTH

THE SIXTY-FIFTH

THE SIXTY-SIXTH

THE SIXTY-SEVENTH

THE SIXTY-EIGHTH

THE SIXTY-NINTH

THE SEVENTIETH

THE SEVENTY-FIRST

THE SEVENTY-SECOND

THE SEVENTY-THIRD

THE SEVENTY-FOURTH

THE SEVENTY-FIFTH

THE SEVENTY-SIXTH

THE SEVENTY-SEVENTH

THE SEVENTY-EIGHTH

THE SEVENTY-NINTH

THE EIGHTIETH

THE EIGHTY-FIRST

THE EIGHTY-SECOND

THE EIGHTY-THIRD

THE EIGHTY-FOURTH

THE EIGHTY-FIFTH

THE EIGHTY-SIXTH

THE EIGHTY-SEVENTH

THE EIGHTY-EIGHTH

THE EIGHTY-NINTH

THE NINETIETH

THE NINETY-FIRST

THE NINETY-SECOND

THE NINETY-THIRD

THE NINETY-FOURTH

THE NINETY-FIFTH

THE NINETY-SIXTH

THE NINETY-SEVENTH

THE NINETY-EIGHTH

THE HUNDRETH

THE HUNDRED-FIRST

THE HUNDRED-SECOND

THE HUNDRED-THIRD

THE HUNDRED-FOURTH

THE HUNDRED-FIFTH

THE HUNDRED-SIXTH

THE HUNDRED-SEVENTH

THE HUNDRED-EIGHTH

THE HUNDRED-NINTH

THE ONE HUNDRED

THE ONE HUNDRED-FIRST

THE ONE HUNDRED-SECOND

THE ONE HUNDRED-THIRD

THE ONE HUNDRED-FOURTH

THE ONE HUNDRED-FIFTH

THE ONE HUNDRED-SIXTH

THE ONE HUNDRED-SEVENTH

THE ONE HUNDRED-EIGHTH

THE ONE HUNDRED-NINTH

THE TWO HUNDRED

THE TWO HUNDRED-FIRST

THE TWO HUNDRED-SECOND

THE TWO HUNDRED-THIRD

THE TWO HUNDRED-FOURTH

THE TWO HUNDRED-FIFTH

THE TWO HUNDRED-SIXTH

THE TWO HUNDRED-SEVENTH

THE TWO HUNDRED-EIGHTH

THE TWO HUNDRED-NINTH

THE THREE HUNDRED

THE THREE HUNDRED-FIRST

THE THREE HUNDRED-SECOND

THE THREE HUNDRED-THIRD

THE THREE HUNDRED-FOURTH

THE THREE HUNDRED-FIFTH

THE THREE HUNDRED-SIXTH

THE THREE HUNDRED-SEVENTH

THE THREE HUNDRED-EIGHTH

THE THREE HUNDRED-NINTH

THE FOUR HUNDRED

THE FOUR HUNDRED-FIRST

THE FOUR HUNDRED-SECOND

THE FOUR HUNDRED-THIRD

THE FOUR HUNDRED-FOURTH

THE FOUR HUNDRED-FIFTH

THE FOUR HUNDRED-SIXTH

THE FOUR HUNDRED-SEVENTH

THE FOUR HUNDRED-EIGHTH

THE FOUR HUNDRED-NINTH

THE FIVE HUNDRED

THE FIVE HUNDRED-FIRST

THE FIVE HUNDRED-SECOND

THE FIVE HUNDRED-THIRD

THE FIVE HUNDRED-FOURTH

THE FIVE HUNDRED-FIFTH

THE FIVE HUNDRED-SIXTH

THE FIVE HUNDRED-SEVENTH

THE FIVE HUNDRED-EIGHTH

THE FIVE HUNDRED-NINTH

THE SIX HUNDRED

THE SIX HUNDRED-FIRST

THE SIX HUNDRED-SECOND

THE SIX HUNDRED-THIRD

THE SIX HUNDRED-FOURTH

THE SIX HUNDRED-FIFTH

THE SIX HUNDRED-SIXTH

THE SIX HUNDRED-SEVENTH

THE SIX HUNDRED-EIGHTH

THE SIX HUNDRED-NINTH

THE SEVEN HUNDRED

THE SEVEN HUNDRED-FIRST

THE SEVEN HUNDRED-SECOND

THE SEVEN HUNDRED-THIRD

THE SEVEN HUNDRED-FOURTH

THE SEVEN HUNDRED-FIFTH

THE SEVEN HUNDRED-SIXTH

THE SEVEN HUNDRED-SEVENTH

THE SEVEN HUNDRED-EIGHTH

THE SEVEN HUNDRED-NINTH

THE EIGHT HUNDRED

THE EIGHT HUNDRED-FIRST

THE EIGHT HUNDRED-SECOND

THE EIGHT HUNDRED-THIRD

THE EIGHT HUNDRED-FOURTH

THE EIGHT HUNDRED-FIFTH

THE EIGHT HUNDRED-SIXTH

THE EIGHT HUNDRED-SEVENTH

THE EIGHT HUNDRED-EIGHTH

THE EIGHT HUNDRED-NINTH

THE NINE HUNDRED

THE NINE HUNDRED-FIRST

THE NINE HUNDRED-SECOND

THE NINE HUNDRED-THIRD

THE NINE HUNDRED-FOURTH

THE NINE HUNDRED-FIFTH

THE NINE HUNDRED-SIXTH

THE NINE HUNDRED-SEVENTH

THE NINE HUNDRED-EIGHTH

THE NINE HUNDRED-NINTH

THE TEN HUNDRED

THE TEN HUNDRED-FIRST

THE TEN HUNDRED-SECOND

THE TEN HUNDRED-THIRD

THE TEN HUNDRED-FOURTH

THE TEN HUNDRED-FIFTH

THE TEN HUNDRED-SIXTH

THE TEN HUNDRED-SEVENTH

THE TEN HUNDRED-EIGHTH

THE TEN HUNDRED-NINTH

THE ELEVEN HUNDRED

THE ELEVEN HUNDRED-FIRST

THE ELEVEN HUNDRED-SECOND

THE ELEVEN HUNDRED-THIRD

THE ELEVEN HUNDRED-FOURTH

THE ELEVEN HUNDRED-FIFTH

THE ELEVEN HUNDRED-SIXTH

THE ELEVEN HUNDRED-SEVENTH

THE ELEVEN HUNDRED-EIGHTH

THE ELEVEN HUNDRED-NINTH

THE TWELVE HUNDRED

THE TWELVE HUNDRED-FIRST

THE TWELVE HUNDRED-SECOND

THE TWELVE HUNDRED-THIRD

THE TWELVE HUNDRED-FOURTH

THE TWELVE HUNDRED-FIFTH

THE TWELVE HUNDRED-SIXTH

THE TWELVE HUNDRED-SEVENTH

THE TWELVE HUNDRED-EIGHTH

THE TWELVE HUNDRED-NINTH

THE THIRTEEN HUNDRED

THE THIRTEEN HUNDRED-FIRST

THE THIRTEEN HUNDRED-SECOND

THE THIRTEEN HUNDRED-THIRD

THE THIRTEEN HUNDRED-FOURTH

THE THIRTEEN HUNDRED-FIFTH

THE THIRTEEN HUNDRED-SIXTH

THE THIRTEEN HUNDRED-SEVENTH

THE THIRTEEN HUNDRED-EIGHTH

THE THIRTEEN HUNDRED-NINTH

THE FOURTEEN HUNDRED

THE FOURTEEN HUNDRED-FIRST

THE FOURTEEN HUNDRED-SECOND

THE FOURTEEN HUNDRED-THIRD

THE FOURTEEN HUNDRED-FOURTH

THE FOURTEEN HUNDRED-FIFTH

THE FOURTEEN HUNDRED-SIXTH

THE FOURTEEN HUNDRED-SEVENTH

THE FOURTEEN HUNDRED-EIGHTH

THE FOURTEEN HUNDRED-NINTH

THE FIFTEEN HUNDRED

THE FIFTEEN HUNDRED-FIRST

THE FIFTEEN HUNDRED-SECOND

THE FIFTEEN HUNDRED-THIRD

THE FIFTEEN HUNDRED-FOURTH

THE FIFTEEN HUNDRED-FIFTH

THE FIFTEEN HUNDRED-SIXTH

THE FIFTEEN HUNDRED-SEVENTH

THE FIFTEEN HUNDRED-EIGHTH

THE FIFTEEN HUNDRED-NINTH

THE SIXTEEN HUNDRED

THE SIXTEEN HUNDRED-FIRST

THE SIXTEEN HUNDRED-SECOND

THE SIXTEEN HUNDRED-THIRD

THE SIXTEEN HUNDRED-FOURTH

THE SIXTEEN HUNDRED-FIFTH

THE SIXTEEN HUNDRED-SIXTH

THE SIXTEEN HUNDRED-SEVENTH

THE SIXTEEN HUNDRED-EIGHTH

THE SIXTEEN HUNDRED-NINTH

THE SEVENTEEN HUNDRED

THE SEVENTEEN HUNDRED-FIRST

THE SEVENTEEN HUNDRED-SECOND

THE SEVENTEEN HUNDRED-THIRD

THE SEVENTEEN HUNDRED-FOURTH

THE SEVENTEEN HUNDRED-FIFTH

THE SEVENTEEN HUNDRED-SIXTH

THE SEVENTEEN HUNDRED-SEVENTH

THE SEVENTEEN HUNDRED-EIGHTH

THE SEVENTEEN HUNDRED-NINTH

THE EIGHTEEN HUNDRED

THE EIGHTEEN HUNDRED-FIRST

THE EIGHTEEN HUNDRED-SECOND

THE EIGHTEEN HUNDRED-THIRD

THE EIGHTEEN HUNDRED-FOURTH

THE EIGHTEEN HUNDRED-FIFTH

THE EIGHTEEN HUNDRED-SIXTH

THE EIGHTEEN HUNDRED-SEVENTH

THE EIGHTEEN HUNDRED-EIGHTH

THE EIGHTEEN HUNDRED-NINTH



CELSISSIMO S. R. IMPERII PRINCIPI
FERDINANDO
FURSTEMBERGIO,
PADERBORNENSI ET MONASTERIENSI
EPISCOPO,
COMITI PYRMONTANO, &c.



ON ferret, opinor, Celsitudinis
Tuae auris erudita inconditos ac
tumultuariè subsultantes sonos; vel
oculus Tuus perspicax confusam
membrorum compagem, quæ non
tam hominem quàm rudem & indigestam mo-
lem repræsenteret. Idcirco mihi persuasum est,
neque illi placituram paucorum avi nostri Scri-
ptorum recens emergsam sententiam, qui sex an-
nis de Dagoberti Regis monarchiâ detractis,
Regum Francorum primæ stirpis universam
seriem miserandum in modum perturbarunt.
Hos ego Venerabili Bedâ & Fredegario Scho-
â ij

EPISTOLA.

lastico gravissimis arbitris consentientibus convictos, Tua Celsitudini represento; minime dubius quin illa quoque tam intempestiva novitas, Tuo iudicio ex Eruditorum omnium academiis eliminanda decernatur. His adjeci quasi pro corollario, sancta Genovesa Parisiensium Patrona, Virginis Theodidactæ, testimonium omni exceptione majus, quo suus Parisiensibus Areopagita, ante annos ferè mille & ducentos asseritur. Quod cum Tua Celsitudini perspectum ac probatum fuerit, non erit (opinor) posthac in orbe Christiano vel homo unus, qui suum Parisiensibus Dionysium Areopagitam, Apostolum & Martyrem abjudicare audeat. Vale, Lutetia Parisiorum, è Collegio Claromontano, pridie Nonas Maias, anno aere Christiana M. DC. LXXXI.

TUE CELSITUDINIS

Additissimus PETRUS FRANCISCUS
CHIFFLETIUS, Societatis Jesu Presbyter.

AD LECTOREM

PRÆFATIO.

*De causâ & utilitate Bedæ à nobis cum
Fredegario comparati.*

MIRARI possis (MI LECTOR) cur
Ego Dissertationi de annis Dagoberti,
Bedæ Historiam Ecclesiasticam Gentis An-
glorum cum Fredegarii Chronico compa-
randam adjunxerim; causam accipe. Nactus
ab aliquot annis è Sancti Maximini Trevi-
rensis Bibliothecâ manuscriptum codicem
adorandæ vetustatis, optimæque notæ, qui
mihi hanc Historiam repræsentabat, & in eâ
variantes plurimas lectiones, ad firmandam
Historiam, etiam Gallicanam necessarias:
non dubitavi quin haud exiguo reipublicæ
litterariæ bono hoc Opus ex illo exemplari
integritati suæ restitutum lucem aspecturum
esset. Et poterat quidem seorsim, sed non
nisi inglorium, seu certè minùs illustre,
quippe à multiplici suo fructu atque ornatu
avulsum. Cùm enim in Dissertatione de an-
nis Dagoberti Regis (quæ septimi ferè to-
tius post Christum sæculi civilem & eccle-
siasticam, immò & regiam Chronologiam
complectitur) necesse habuerim fulcire ra-

AD LECTOREM PRÆFATIO.

tiocinationes meas iis Anglicanæ hujus Historiæ locis, quæ in omnibus Germanicis, Gallicanis, immò & Britannicis editionibus corrupta legebantur, hinc mihi injecta mens est, hujus Dissertationis editioni hoc Bedæ opus, sic à me recensitum & emendatum, adnectendi, tanquam ejus probationem ac veluti fundamentum cui insisteret. Nec dubitavi quin ea Eruditis omnibus, Gallis præsertim ac Britannis grata accideret: cùm illi hac unâ operâ, vel res suas bene firmatas atque illustratas agnoscerent; hi porrò magni sui Doctoris verè auream lucubrationem, quam librariorum oscitantia infuscaverat, primævo suo nitore restitutam esse faterentur. Huic igitur Operi de gestis Anglorum sic emaculato præmissi de transitu Bedæ epistolam Cuthberti ejus discipuli, qui morienti adstans suprema ejus verba excepit. Adjeci & de Bedæ ætate, adeoque de obitus ejus vero die, veroque anno, addo &, verâ horâ Dissertationunculam: & in contraria abrepti Cardinalis Baronii lapsus causam aperui, productâ Bedæ sincerâ epistolâ de Æquinoctio juxta Anatolium; & ex Helperici libro de Computo nonnullis locis, quæ dictis nostris fidem faciant. Vale, è Collegio Claromontano, VII, Idus Octobris M. DC. LXXX.

INDEX CAPITUM.

PARS PRIMA.

DISSERTATIO DE AUCTORE HISTORIÆ ECCLESIASTICÆ GENTIS ANGLORUM.

- CAPUT DE Sancti BEDÆ**
I. Presbyteri ætate, adeoque vero die obitus, veròque anno. pag. 3
CAP. II. Epistola Cuthberti, oculatistæ, de transiit BEDÆ, II
CAP. III. BEDÆ Presbyteri, de Equinoctio juxta Anatolium, Epistola, cuius meminit Beda ipse in Catalogo Operum à se editorum ad calcem Historia Ecclesiasticæ Gentis Anglorum. 13
CAP. IV. HELPERICI Liber de Computo Lune. 18
Sequuntur Historia Ecclesiasticæ Gentis Anglorum Libri quinque, Auctore Sancto & Venerabili Beda Presbytero, longè quàm hactenus emendatiores, ex Codice S. Maximini Trevirensis, optima nota ac pervetustis, cum Notis. 23. & seqq.

PARS SECUNDA.

DISSERTATIO DE ANNIS DAGOBERTI.

- CAPUT DE exordio sedecimi annorum regni**
Dagoberti dua proponuntur sententia, toto fere sexennio inter se diversa. Quid in hac questione senserit quis vulgo existimatur Fredegarum. 329
CAP. II. Sanctus Arnulfus Metensem Episcopatum suscepit anno vulgaris æræ Christiana 619. obiit annis quindecim & decem diebus; abdicavit anno 634. Dagoberti monarchia sexto. 336
CAP. III. Dagoberto anni monarchia à Clotari patris obitu sedecim afferuntur, S. Audoini Rotomagensis Episcopi, ejus æqualis, testimonio. 340
CAP. IV. De Jona Abbatis natali solo, ætate, & libris ab eo conscriptis. 345
CAP. V. A characteribus translationis corporis S. Benedicti in Monasterium Floriacense, iidem anni regni à patris obitu sedecim Dagoberto firmantur. Indictionum & annorum Christi usui septimo post Christum saculo jam vigeat in Gallia, etsi haud ita frequens ac firmus, insequentibus saculo sui.
CAP. VI. Propugnantur Indictiones, & anni Christi ac Regum adnotati ab anonymo Scriptore Vita S. Babuleni Fossensis Abbatis. Cui accessere

INDEX CAPITUM.

- Vita & Miracula Sancti Babeleni Abbatis, ex ms. Codice Fossatenſi, cum Notis.* 356
- CAP. VII. Dagoberti eiusque filiorum ac nepotum chronologia lux affulget a cometa, qui anno Christi 677. à mense Augusta per tres menses orbe toto spectatus est.
- CAP. VIII. Ex principiis positis, Childerico anni monarchia tres, regni Austrasienſis quatuordecim, Clotario tertio anni XIV. Clodoveo secundo anni XVII. à Dagoberti patris obitu, & ab anno Christi 644 vindicantur. 393
- CAP. IX. Ex dictis consequentia nonnulla: ad septimi post Christum seculi rectam chronologiam deducuntur. Unus idemque est Lugdunensibus Annemundus Episcopus, qui Bado Dalsinus. 393
- CAP. X. Dalsinus sive Annemundus, ipse idem est in Vita sancta Balihildis Sigobrandus. 400
- CAP. XI. Dalsini sive Annemundi aut Sigobrandi eades ad annum ara vulgaris 663. referenda est; uti & qui eam proximè excepit, Balihildis Regina, abdicata regi administratione, in Kalense Monasterium secessit. 403
- CAP. XII. Satisſe nonnullis in primis S. Annemundi Lugdunensibus Episcopi & Martyris chronologiam obiectis. 409
- CAP. XIII. S. Sigiberti Austrasie Regis, Dagoberti filii, ex principiis positis ordinata chronologia. 413
- CAP. XIV. S. Eligii Novis-
- mensis Episcopi obitus anno suo redditur, eiusque regiminis episcopalis definitur periculus. 415
- CAP. XV. Theoderici III. Regis tria regnorum distincta exordia. Clotario ejus fratri cur annos regni tantum quatuor tribueris auctor Appendicis iussu Childebrandi Fredogario adjecta. 418
- CAP. XVI. S. Leodegarii Augustodunensis Episcopi tota martyris series explicata. 424
- CAP. XVII. S. Andoëni chronologia discussa. 428
- CAP. XVIII. Synodi seu Convocentis Rotomagensis verum tempus fuit autumnus anni Christi 689. Theoderici annus monarchia XIII. regni Neustrie XVI. regni Burgundia XXIV. Anſberti episcopatus annus primus. Waratonis in Neustria majordomatus, Pippini Herstelli principatus ex anno 687. inchoatus non fuit. 432
- CAP. XIX. S. Philiberti rerum gestarum dispositio. 438
- CAP. XX. Dagoberti secundus ex Hibernia reduciis restitutus in regnum. 439
- CAP. XXI. Theoderici III. ejusque filiorum Clodovei III. & Childeberti III. plura regnorum initia observata. 443
- CAP. XXII. Dissertationis hujus capita chronologica velut in indicem collecta. 447
- ACCESSIT APPENDIX. Vita sancta Genoveſe Virginis, ex codice pervenſo inclita Basilica, in qua illa monumentum habet: cum Notis. 453

HISTORIÆ
ECCLESIASTICÆ
GENTIS ANGLORUM
LIBRI QUINQUE,

Auctore Sancto & Venerabili Beda Presbytero.

HISTORICAL
ECCLESIASTICAL
GENEALOGY
OF THE
QUINCY

OF THE QUINCY

PRÆLIMINARIS DISSERTATIO
de Auctore
HISTORIÆ ECCLESIASTICÆ
Gentis Anglorum.

CAPUT I.

*De Sancti BEDÆ Presbyteri ætate, adeoque vero die obitus,
veroque anno.*



ON ingrata (opinor) accidet erudito Lectori hujus quæ-
stionis tractatio, cum in eâ explicandâ, ab octingentis
ferè annis ad hanc usque diem laboratum esse cognove-
rit, & adhuc litem esse sub judice. *Solem Occidentis*
Bedam scitè appellavit Cardinalis Bellarminus: ut verè
dici possit, Solis hujus luce nihil esse clarius, occasu nihil obscurius.
Scribit ipse de se Beda ad finem Historiæ suæ Anglicanæ, quam con-
cludit in anno Dominicæ Incarnationis septingentesimo trigésimo pri-
mo, se tunc egisse annum ætatis nonum supra quinquagesimum: unde
habetur natum esse illum anno Christi sexcentesimo septuagesimo
secundo. Sed de ejus ætate, deque anno ac die obitus tanta est opi-
nionum diversitas, ut mirum sit in tam illustri argumento, inter
Anglos, Italos, Germanos, Gallos, omniumque gentium Scripto-
res convenire hæcenus non potuisse. Ejus obitum anno ipso dccxxi.
quo Historiæ suæ finem imposuit, adscribunt Hermannus Contractus,
Chronicon Augiense, Annales sancti Nazarii, Anonymus Floriacen-
sis, Heppidannus, Sigebertus, & Conradus Abbas Urspergensis, ut
de cæteris taceam. Hos verò omnes redarguit ipse Beda, (cujus
obitum in mensem Maium vulgò referunt) cum ad finem Historiæ
suæ, meminit Tacuini eodem anno dccxxi, die mensis Junii
decimâ, in Dorovernensem Archiepiscopum consecrati. Willelmus
Malmesburiensis, & Matthæus Westmonasteriensis Bedam obiisse
scribunt anno dccxxiv. die Ascensionis Dominicæ, vii. Kalen-
das Junii. Sie & Continuator Historiæ Anglicanæ post Bedam, lib. 1.
cap. 6. & 8. quem anonymum proferens Commelinus in Editione
Heidelbergensi anni 1587. Scriptorum Britanniarum, visus est à Will-
mo Malmesburiensi distinguere: cum tamen ex illo totus constet,
exceptis libri tertii postremis tribus capitibus, quamvis totum illum
non contineat; unde meritò à Balæo in Catalogo Scriptorum Angliæ
est prætermisus. Sed hic dies huic anno non congruit, ut est evi-

731.

671.

731.

4 DISSERTATIO DE AUCTORE

dens ex computi regulis. Michaël Alfordus in Annalibus Anglo-Saxoniciis, Bedæ obitum eodem Christi anno dccxxxiv. adscribit: sed in alium quemdam diem refert; quod non satis explicat. Simeon Dunelmensis anno dccxxxv, die Ascensionis, vii. Kalendis Junii: cui adhæsit in Editione Heidelbergensi auctor recapitulationis chronice ad ealcem Historiæ à Beda conscriptæ: quibus lapis ascensionis fuisse videtur, quoddam verò anno illo dies Ascensionis incurrit in diem Maii xxvi, hoc est, vii. Kalendas Junii. Sed non præviderunt isti alia suæ sententiæ incommoda, de quibus constabit ex infra dicendis. Lambertus Scafnaburgensis in annum rejicit dccxxxvi. Et denique (ne hic omnes colligam) fluctuavit Baronius in ista chronologia: nam in Martyrologio, ad diem Maii xxvii. Bedæ vitam definivit annis xciv.; porro in Annalibus, anno Christi dccxxi. numero xix. pervenisse eum censuit ad annum ætatis centesimum quintum, Christi septingentesimum septuagesimum sextum. Rationes ejus infra expendam.

Mihi omnium instar est epistola Cuthberti ad Cuthwinum de transitu Bedæ, quam quidem ediderunt Surius & Baronius, sed longè emendatorem Simeon Dunelmensis libro i. Historiæ Dunelmensis, cap. 13. Ex hac epistola oculati testis concludo emigrasse de vitâ Bedam Presbyterum anno Christi dccxxi. ætatis suæ nonagesimo, die mensis Maii xxvi, feriâ quartâ, ad vesperam, in pervigilio Ascensionis dominicæ, ad eoque ipsâ die ecclesiasticâ Ascensionis, à primis vespers inchoatâ, non autem ipsâ die Ascensionis naturali à mediâ nocte deductâ.

Clara sunt ista ex ipsis verbis citatæ epistolæ Cuthberti, ubi disertè ait illum beatam animam exhalasse *quartâ feriâ ad vesperam, septimo Kalendas Junii*, sive die mensis Maii xxvi. Accuratè. Fuit enim anno Christi 762. Pascha xviii. Aprilis, Ascensio Maii xxvi. Quod ergo præmiserat Cuthbertus, vitam duxisse illum *usque ad diem Ascensionis dominicæ*, exclusivè intelligendus est, vel accipendus de die Ascensionis: (ut dixi) ecclesiastico, qui à primis vespers, ad eoque à feriâ quartâ exeunte incipiebat: Huic porro assertioni ex Cuthberti epistola depromptæ jungenda sunt veterum testimonia de Bedæ ætate nonagenariâ. Etenim annis Christi 751. & 773. fuit æquè Pascha xviii. Aprilis, idemque festorum mobilium, ad eoque Ascensionis cursus. Sed anno 751. erat Beda annorum lxxix. anno verò Christi 773. si adhuc in vivis fuisset Beda, ætatis annum centesimum primum. Nobis ergo incambit probare obiisse Bedam nonagenarium, ut ejus ex hac vita transitum in anno potius 762. quàm in duobus aliis constituamus.

Expressè id asseritur in epitaphio Bedæ, quod refert Wion in Ligno Vitæ, libro v. cap. 101. scitè admonens inditum fuisse illud sancti Bedæ sacris reliquiis, ex quo è Cirro, ubi primum sepultus

HIST. ECCL. GENTIS ANGLORUM.

fuerat, translata sunt in civitatem Dunelmensem, & eadem thecā cum S. Cuthberti corpore tunc adhuc incorrupto inclusæ ab Elfrēdo Presbytero: quod factum anno Christi circiter millesimo colligitur ex Simeone Dunelmensi, lib. 1. Hist. Dunelmensis, cap. 14. & lib. 3. cap. 7. & ex Richardo Priore, lib. 2. de Episcopis Hagustaldensibus, cap. 1. Est verò epitaphium hujusmodi, quod ad nostra usque tempora legebatur in ejus sarcophago, teste Possevino in Apparatu, referturque in editione Antuerpiensi Historiæ Gentis Anglorum anni 1750. & in Colonienſi anni 1601.

Beda Dei famulus, Monachorum nobile sydas,

Finibus è terra profuit Ecclesia.

Solers iste Patrum servando per omnia sensum,

Eloquio vixit & plurima composuit.

Annos in hac vitâ ter duxit vix triginta,

Presbyter officio, utilis ingenio.

Junii sepienis viduatus carne Kalendis

Angligena angelicam commernis patriam.

Aliud epitaphium quatuor dumtaxat hexametrorum versuum, Bedæ primo tumulo inscriptum refert, & pudendum prorsus, tantique viri mausoleo indignum meritò notat Continuator anonymus Historiæ Anglicanæ, lib. 1. cap. 8.

Hanc ipsam Bedæ ætatem nonagenariam confirmant Cartusiani Colonienſes in Additionibus ad Uluarđ Martyrologium anno 1521. editis, ad vii. Kalendas Junii, cujus natalem eodem die, vel secundum alios, sequenti, celebrari monent. Natæque videtur sacrorum Pastorum ea diversitas ex horâ obitus sancti Bedæ, quæ fuit feriâ quartâ ad vesp̄eram, adeoque xxvi. Maii, uti ex Cuthberto retulimus: sepultura verò, quam depositionem vulgò appellant, incidit in feriâ quintam, quæ fuit dies ipsamet Ascensionis Christi, & Maii mensis xxvii. Unde factum, ut in Necrologiis suprema Bedæ dies, modò xxvi. modò xxvii. Maii adnotaretur, priore calculo ad animæ egressum, posteriore ad sepulturæ officium exacto. Sic ergo Cartusiani Colonienſes septimo Kalendas Junii: Eodem die (vel secundum alios, sequenti) in Angliâ, depositio Venerabilis Bedæ Presbyteri & Confessoris, Doctoris precipui: qui, ut ipse de seipso refert. cum esset annorum septem in monasterio iraditus, inter observantiam disciplina regularis, & quotidianam cantandi in Ecclesiâ curam, semper aut discere, aut docere, aut scribere dulces habuit. Tandem plenus dierum & sanctorum, nonagenarius obiit die quo perierat, hoc est, die Ascensionis Domini. Illo eam die, altitatis sensu & hilari vultu, cum canasset antiphonam, O Rex gloriæ, &c. emisit spiritum.

Hic accedit auctor Viæ beati Alcuini, Bedæ quondam discipuli, ubi hæc legimus: Decemabilis Beda Presbyter, die quo voluit, & posuit, eo scilicet quo Rex gloriæ Christus, triumphator super omnes

ascendit celos, ab Incarnatione Domini dccxxxi. septimo Kal. Junii, à sancti obitu verò Gregorii cxxvii. anno consummatus, ad Dominum migravit nonagenarius, sicut quorundam affirmatio est. Nam nonedecimo ætatis sue anno *Levita*, trigesimo verò Sacerdos efficitur. A quo tempore, qui antè per triginta annos didicerat Ecclesia presutura, usque quinquagesimo nono, cum sudore non inerti, dignis memoriâ libris inferere proprio stylo studuit. Per alios autem triginta annos, servit ea quæ scripserat correxisse: discipulos quoque non mediocriter omnium liberalium artium studiis erudiisse. Scribebat hic auctor ante octingentos abhinc annos, ex iis quæ Sigulfo institutore suo, Alcuini perfructuoso discipulo referente cognoverat. Sic planè ut in editis, legi in codice M. S. sanctæ Mariæ Remensis, ne quis hic à typographo mendum suspicetur. Nec tamen vacat hic locus suspitione erroris ab antiquo librario inculcati: quomoddò enim scribitur Beda obiisse anno Christi dccxxxi. nonagenarius, qui anno eodem testatur fuisse se annorum non amplius quinquaginta novem: aut quomoddò scriptos à se libros, & anno 731. à se primùm editos, per triginta annos correxit, si ad annum ætatis nonagesimum non pervenit? Denique quomoddò dici potest obiisse Beda anno 731. die Ascensionis Domini, & septimo Kalendas Junii, cum ex veteris computi regulis certissimum sit, illo anno 731. Ascensionem Domini non vii. Kalendas Junii, sed vi. Idus Maii evenisse? Corruptus ergo est hic locus, non auctoris hallucinatione, sed librarii vitio: & pro dccxxxi. scripsit auctor absque dubio dccxxii. quo anno Beda triginta annis à primâ librorum suorum editione transactis nonagenarius fuit. Unde & pro anno ab obitu S. Gregorii Papæ cxxvii. reponendus est annus clxx. quia magnus Gregorius anno dc i v. Indictione v i i. die mensis Martii duodecimâ ad Superos evolarat.

Hanc porrò epocham de ætate Bedæ præclare confirmant quatuor Epistolæ inter Epistolas S. Bonifacii, quondam à Nicolao Serario seorsim editas, quæ in recentiores Bibliothecæ Patrum editiones postmodum translatae sunt, ad numeros 89. 95. 111. & 150.

Inter has prima est ordine temporis, ad numerum cxi. quæ est Lulli Archiepiscopi Moguntini ad Cuthbertum Abbatem, quâ mittit ad eum *pallam holofericam*: petens ab eo libros beata memoria Bedæ, de adificatione templi, vel in Cantica Cantorum, sive epigrammatum heroico metro sive elegiaco compositorum (si fieri potest) omnes: sin autem, de adificatione templi libros tres. Fortassis difficilis petitio; sed nihil arbitror esse difficile vera caritati.

In secundâ ordine temporis, quæ est numero lxxxi, significat Cuthbertus Abbas se accepisse à Lullo *pallam holofericam* ad reliquias beatae memoriæ Bedæ ab eo destinatas: mittitque ad eum ex Bedæ scriptis libellos duos de viro Dei Cuthberto (fuerat hic Lindisfarnensis Episcopus) metro & prosâ compositos: excusans,

plura se mittere non potuisset propter hiemis asperitatem, quâ scriptorum manus hebetatæ torpuerant : ac promittens , quæcumque de Bedæ opusculis ipsi deessent , se ad illam quamprimum ea parare licuisset , transmisissurum. Ejus hæc sunt verba : *Gratanter quidem munuscula tua caritatis suscepi , & eè gratamini quòd te hac intime devotienis affectu misere cognovi : id est , holosericam ad reliquias beata memorie Bedæ magistri nostri , et recordationem & illius venerationem destinasti. Et rectum quidem mihi videtur ut tota gens Anglorum in omnibus provinciis , ubicumque reperti sunt , gratias Deo referant , quia tam mirabilem virum , pradiatum diversis donis , tamque ad exercenda dona studiosum , similiterque in bonis moribus viventem Deus illis in suâ natione donavit : quia per experimentum , ad pedes ejus nutritus hoc quod narre didici , &c. Nunc verò , quia rogasti aliquid de opusculis beati Patris , cum meis pueris , juxta vires , quod potui tue dilectioni præparavi : libellos de viro Dei Cuthberto metro & prosâ compositos , tua voluntati direxi : & si plus potuisssem , libenter voluisssem : scia præsentia præterita hiemis multum horribiliter insulam nostram gentis in frigore & gelu , & ventorum & imbrum procellis diù latèque depreffis ; idèque scriptoris manus , ne in plurimorum librorum numerum pervenires , retardata est , &c. De opusculis verò beate recordationis Bedæ quæ adhuc descripta non habes , promitte , me , si vixerimus , tua voluntati adiuvaturum.*

In tertiâ Epistolâ , quæ est numero xciv. memor promissi Cuthbertus Abbas mittit ad Lullum Bedæ librum de ædificio templi. In quartâ Epistolâ petit auctor quicumque est , reliqua de opusculis Bedæ , quæ etiam nuper è vivis abiisse significat ; sic enim ait : *Interea regamus , ut reliqua de opusculis sagacissimi investigatoris Scripturarum Bedæ Monachi , quem nuper in domo Dei , vice candela Ecclesiæ , scientiâ Scripturarum fulsisse audivimus , conscripta nobis transmutere dignemini.* Hæc est Epistola numero cx. , quæ ex tomo ix. Annalium Baronii in Serarii Collectionem traducta est , & Bonifacio Moguntino Archiepiscopo malè adscripta , cum verè sit Lulli ejus successoris , quod geminâ ratione sic ostendo. Prior petitur ex tribus Epistolis suprà memoratis. Per primam petierat Lullus à Cuthberto omnia Bedæ opuscula , è quibus cum pauca obtinuisset , quorum mentio in Epistolis Cuthberti lxxxix. & xciv. supererat , ut reliqua quæ sibi deerant postularet. Hoc verò facit Epistola illâ cx. Altera ratio est , quòd constat Bedam Bonifacio fuisse superstitem. Etenim Bonifacius glorioso martyrio vitam sibi in cælum stravit anno Christi 755. secundum Serarii accuratos calculos. Porro Lullus post Bonifacium jam Episcopus milit pallam holosericam ad cohonestandas Bedæ recens extincti reliquias. Eiusdem ergo Lulli est Epistola illa ad Cuthbertum Abbatem , quæ est in collectione centesimâ quinquagesimâ ; in quâ Bedæ nuper in Ecclesiâ lucentis , adeoque tunc vitâ jam perfuncti , mentionem facit.

Cùm igitur ex his liquidò appareat, Bedam in vivis fuisse ultra ænum Christi 755. examissim ætas ejus nonagenaria, quam ex ejus epitaphio aliisque argumentis adstruximus, obitum ejus defigat in anno 762. qui fuit Lulli post Bonifacium sedentis septimus. Lullus ad annum ætatis pervenit LXXV. episcopatus post Bonifacium XXXI.

Mirum corè est ab Alfordo in Annalibus suis referri has Epistolas de obitu Bedæ ad annum 734. nec attendisse illum ad Bonifacii & Lulli chronologiam, quam ex Nicolai Serarii Moguntiæ potuerat habere perspicuam. Nec minùs mirum est in anno obitus Bedæ tam longè aberratum esse à Wilhelmo Malmesburiensi, aliisque eum secutis Anglicanarum rerum Scriptoribus: cujus rei rationem ipse attingit Malmesburiensis, cùm ait lib. 1. Reg. cap. 3. *sepultam cum Beda omnem penè gestorum notitiam, usque ad sua tempora.*

Addit Alfordus in Annalibus Ecclesiæ Anglo-Saxonice, ad annum 734. quod scimus & lugemus verum esse: nam primus post Bedam, in rerum gestarum narratione ipse omnino meritò censetur Malmesburiensis. Porro obitum Willelmi Malmesburiensis refert Balzus in annum Christi 1142. Scribere cœperit triginta antè annis: ex hac hypothesi fluxerint ab obitu Bedæ ad Malmesburiensis librorum editionem anni ferè trecenti & quinquaginta. Tanto intervallo sopita apud Anglos temporum scientià, quid mirum si in somniorum quædam phantasmata evigilarit, & à vero ipsomet Bedæ obitu triginta ferè annis aberraverit? Id evenisse certis argumentis demonstravimus.

Nunc restat ut doctissimi Baronii objectioni sub initium propositæ satisficiam. Is anno Christi 731. numero XXI. asserit, aut pervenisse Bedam ad annum ætatis suæ centesimum quintum, aut illius non esse Epistolam ad Wicthedam Presbyterum, de æquinoctio juxta Anatolium; quam tamen ipse ad finem Historiæ Anglicanæ scriptis suis annumerare videtur: quia scilicet in eà Epistolà exemplum profert de Paschate anni quo scribebat, Christi 776. & sequentis 777. quorum annorum epactas, regulares, concurrentes, Lunas quartasdecimas primi mensis, earumque ferias, Dominicas denique paschales accuratè designat, prout in Bedæ Cyclo decemnovennali tertio-decimo continentur. Tùm hæc prudenter subjicit: *Quod si hæc de longa Beda ætate non placent, ut nova & hactenus inaudita; tunc incumbit labor his qui negant, non esse Beda citatam nuper Epistolam, falsoque recenseri inter ipsius scripta monstrare: & nos veriora promissi haud invidi acquiescimus, parati semper sequi firmiora tradentem.*

Ad hæc ego, agnoscere me, ut verum & germanum Bedæ opus; Epistolam illam de æquinoctio juxta Anatolium, quæ incipit: *Libenter accipi litteras tua benignitatis;* finit autem in his verbis, *ante æquinoctium fuisse confirmet:* appendicem verò illam quæ incipit *Primo anno circuli decemnovennalis,* & annorum 776. & 777. mentionem facit,

facit, tanquam spuriam rejicio. Illam Bedæ Epistolam de æquinoctio, vidi in codice veteri Bibliothecæ Genevensis, vulgatâ longè emendatorem : quam proximè sequebatur, ex libro de ratione temporum caput xxix. *de concordia maris & Lunæ*. Aberrat enim citata appendix tanquam ad propositum nihil pertinens : quam videre est tanquam in proprio loco, in libro de argumentis Lunæ, tomo primo inter Opera Bedæ. Unde apparet non esse illam Bedæ, sed Auctoris incerti qui scribebat anno 776. adeoque annis quatuordecim post obitum ipsius Bedæ. Quod verò in eodem tractatu de argumentis Lunæ laudatur Ulpericus, id à recentiore manu glossema esse ne dubita. Longè enim post annum Christi 776. vivit Ulpericus, sive Helpericus, cujus Computi vidimus in manuscriptis duas editiones; priorum anni 903. posteriorem anni 930. his enim annis scribere se proficitur eo capite, cui titulus est, *Qualiter inveniantur anni ab Incarnatione Domini*. Unde & redarguas Josiam Simlerum, qui in suo Gesneri Bibliothecæ Breviario Ulpericum claruisse dicit anno Domini 1069. Quod verò addit fuisse illum sancti Galli monachum, vix probari nobis potest, cum ex ejus Computi præfatione colligi videatur, fuisse ipsum potius Autisiodorenses. Quia tamen in eâ præfatione, instabilitatis se ipse accusat, ac per plura monasteria vagatum se esse significat, negare non ausim quin inter S. Galli monachos etiam aliquando versatus sit. Hujus præfationis velut probationes hic subijcio Epistolam Cuthberti de obitu sancti Bedæ : hujus Epistolam de æquinoctio juxta Anatolium ex codice Genevensi multis locis meliorem redditam : & Computi Helperici Præfationem ad Asprum, quem *Patrem sanctissimum* nuncupat, fortasse monasterii S. Germani Autisiodorensis Abbatem, aut Coabbatem : & alteram Præfationem cum Epilogo.

Addam pro corollario, loco fabulæ quæ circumfertur de titulo *Venerabilis* angelicâ manu descripto in epitaphii ejus versu : *Hæc sunt in festâ Bedæ Venerabilis ossa*, hujus nomenclaturæ ipsammet originem, ex Gabrielis Bucelini Menologio Benedictino ad sextum Kalendas Junii : *Scriptorum ejus*, inquit, *tanta fuit auctoritas, ut ex ordinatione Episcoporum Britannia in Ecclesiis publicè legeretur. Cumque in Lectionibus Homiliarum, ejus nomen ex more, auctoris Venerabilis Bedæ Presbyteri præfigeretur, aliter eum dum viveret predicare non præsumentes; obtinuit in hodiernam usque dignitatem, ut qui à principio, dum viveret, non Sanctus, sed Venerabilis nuncupabatur, ob ipsam tam illustrem nomenclaturam rationem, Venerabilis deinceps perperuò diceretur.*

Restat ut de sancti Bedæ sepulturâ, tumulis, ac reliquiis, quæ à me hinc inde observata sunt, hunc in locum concijiam. Monui suprà sepultum primò ejus corpus in Girvo, unde evolans felix anima intraverat in gaudium Domini sui, ætæ Christianæ anno 762. Inde translatum fuisse post annos circiter 238. in sacram ædem Dunelmensem,

cum sancti Cuthberti corpore tum adhuc incorrupto. Lego deinde apud Helinandum Frigidi Montis monachum, libro 48. Chronicorum, Clericos Laudunenses, igne consumptâ Ecclesiâ suâ, ut ad eam reparandam aliquid subsidii colligerent, supplicationem decrevisse per Galliam & Angliam, in quâ nonnullas sanctæ Mariz Laudunensis reliquias miraculis inelytas circumferebant. Hi de Saresberiâ, inquit, venerunt ad *Abbatem Sanctimonialium quæ dicitur Wiltoniâ*, (vix ad tria milliaria, ut addit Albericus hæc referens in Chronico ad annum 1115.) ubi ostensa est eis sepultura Venerabilis Bedæ Presbyteri juxta quem sepulta est mulier illa versificatrix inelyta. Ibi jacebas quidam longo jam tempore febricitans, ad sepulcrum Venerabilis Bedæ Presbyteri, quia plures ibi consueverant sanari. His addit de suo Albericus: *Hic oritur quæstio utrum requirendum sit quid sis veritas de sepultura Venerabilis Bedæ: vel si utrumque stare potest. & quod hic dicitur, & quod in Legendâ translationis beati Cuthberti de corpore Venerabilis Bedæ scribitur. Sed dicunt quidam quod fuerint duo Bedæ; primus qui fecit homilia; & ipse de Wiltoniâ, juxta quem sepulta est mulier versificatrix inelyta. In Monastico Anglicano, tomo 1. parte 1. pag. 4. lego quodd in Ecclesia Glastoniensi requiescunt ossa Venerabilis Bedæ sagacissimi Doctoris. At Volaterranus libro 14. in Anthropologiâ; Deposum, inquit, Bedæ Genua visitur.*

Tertium Bedam duobus aliis priorem indicat Beda ipse Venerabilis in Vitâ S. Cuthberti apud Surium & Henschenium x x. Martii, cap. 57. *Non audebam, inquit, interrogare (S. Cuthbertum) quæ essent tentationes de quibus dixerat: tantum rogavi ut ministros susceperet. Annuit ille, & quosdam nostrum secum retinuit, in quibus erat major Beda Presbyter, qui ministerio ejus familiariter semper adesse consueverat, idemque donationum acceptionumque ejus conscius erat indubium: quem ob id maxime secum manere voluit, ut si cuiuslibet acceptis muneribus dignâ recompensatione non respondisset, admonitione recoleret, & prorsquam obiret, sua cuique restitueret. De majore hoc, seu seniore Bedâ libens acceperim quod de ejus sepulcro refert Helinandus, & quod ait Hermannus, & alii plerique, obiisse illum anno 431. Sic Beda minor majori illi totis uno & quadraginta annis fuerit superstes, quippe mortuus, ut ostendimus, anno Christi 762. die Maii mensis xx vii. Hos duos Bedas Girvenses, majorem & minorem, qui non distinxerunt, in varijs prochronismos incurrisse necesse est.*



CAPUT II.

De transitu BEDÆ, & ejus conversatione.

Epistola Cuthberti ejus discipuli, & oculati testis, ad Cuthwinum condiscipulum.

Ex Historiâ Ecclesiæ Dunelmensis, Simeone Dunelmensi monacho auctore, lib. 1. cap. 15. Nos tamen pauca quadam vel supplevimus, vel emendavimus ex Epistola hujus editione jam olim vulgata cum Operibus Bedæ, & apud Surium, & Baronium in Annalibus.

DILECTISSIMO in Christo Collectori Cuthwino, Cuthbertus condiscipulus in Deo æternam salutem. Munusculum quod missisti, multum libenter accepi, multumque grater litteras tuas devotæ eruditionis legi : in quibus (quod maximè desiderabam) Missas videlicet, & orationes sacrosanctas, pro Deo dilecto Patre, ac nostro Magistro Bedâ, à vobis diligenter celebrari reperi. Unde delectat magis pro ejus caritate, quantum fruor ingenio, paucis sermonibus dicere quo ordine migravit è sæculo; cum etiam hoc te desiderasse & poposcisse intellexi. Gravatus quidem est infirmitate maximè creberimi anhelitus, sine dolore tamen, ante diem Resurrectionis Dominicæ, id est, serè duabus hebdomadibus : & sic postea lætus & gaudens, gratiasque agens omnipotenti Deo omni die & nocte, immò horis omnibus, usque ad diem Ascensionis Dominicæ, id est, septimâ Kal. Junii, vitam ducebat; & nobis suis discipulis quotidie lectiones dabat; & quicquid reliquum erat dici, in psalmorum decantatione occupabat : totam quoque noctem in lætitiâ & gratiarum actione pervigil ducebat, nisi tantum modicus somnus imp. diret. Evigilans autem statim consueta repetivit, & expansis manibus Deo gratias agere non est oblitus. Verè fateor quia neminem alium unquam oculis meis vidi, nec auribus audivi, tam diligentes gratias Deo vivo referre. O verè beatus vir! Canebat sententiam Beati Pauli Apostoli : *Hon- Meir. 10.*
rendum est incidere in manus Dei viventis; & multa alia de sanctâ Scripturâ, in quibus nos à somno animæ exurgere, præcogitando horam ultimam, admonerat. Et in nostrâ quoque linguâ, hoc est, Anglicâ, ut erat doctus in nostris carminibus, nonnulla dixit. Nam & tunc hoc Anglico carmine componens, multum compunctus aiebat; (*Sequuntur apud Simeonem quatuor circiter versus Anglicâ* linguâ & Anglico charactere descripti) quod ita Latine sonat: *Ante* necessarium exitum prudentior quàm opus fuerit, nemo existit; ad cogitandum videlicet aequam hinc proficiscatur anima, quid boni vel mali egerit, qualiter post exitum iudicanda fuerit. Cantabat etiam antipho-

nas secundum nostram consuetudinem, & suam, quarum una est : *O Rex gloria, Domine Virinum, qui triumphator hodie super omnes calos ascendisti, ne derelinquas nos orphanos, sed mune promissum Patriis in nos Spiritum veritatis, Alleluia.* Et cum venisset ad illud verbum, *ne derelinquas nos orphanos*, prorupit in lacrymas, & multum flevit : & post horam cepit repetere quæ inchoaverat, & sic per totum diem faciebat. Et nos hæc audientes luximus cum illo : alterâ vice legimus, alterâ ploravimus ; immò semper cum fletu legimus. In tali lætitiâ quinquagesimales dies usque ad diem præfatum deduximus : & ille multum gaudebat, Deoque gratias agebat, quia sic meruisset infirmari. Referebat & sæpè dicebat : *Flagellat Deus omnem filium quem recipit* : & multa alia de sanctâ Scripturâ. Sententiam quoque Sancti Ambrosii : *Non sic vixi, ut me pudeat inter vos vivere : sed nec mori timeo, quia bonum Dominum habemus.* In istis autem diebus duo opuscula multum memoriâ digna (exceptis Lectionibus quas accepimus ab eo, & cantu Psalmorum) facere studebat. Evangelium scilicet Sancti Johannis, usque ad eum locum in quo dicitur, *Sed hæc quid inter tantos?* in nostram linguam ad utilitatem Ecclesiæ convertit : & de libris Rotarum Isidori Episcopi excerptiones quasdam, dicens : *Nolo ut discipuli mei mendacium legant, & in hoc post obitum meum sine fructu laborent.* Cum venisset autem tertia feria ante Ascensionem Domini, cepit vehementius ægrotare in anhelitu, & modicus tumor in pedibus ejus apparuit. Totum autem illum diem docebat, & hilariter dictabat, & nonnunquam inter alia dixit : *Discite cum festinatione ; nescio quamdiu subsitam, & si post modicum tollat me factor meus.* Nobis autem videbatur quoddam suum obitum benè scire. Et sic noctem in gratiarum actione pervigil duxit. Et manè illucescente, id est, quartâ feriâ, præcepit diligenter scribi quæ ceperamus. Et hoc facto usque ad tertiam horam, ambulavimus deinde cum reliquiis Sanctorum, ut consuetudo illius diei postulat. Unus verò erat ex nobis cum illo, qui dixit illi : *Adhuc, Magister dilectissime, capitulum unum deest : videtur tibi difficile, plus te interrogari?* At ille : *Facile est, inquit, accipe tuum calamum, & tempera, & festinanter scribe.* Quod ille fecit. Non autem horâ dixit mihi : *Quædam pretiosa in meâ capsellâ habeo ; id est, piperem, oraria, & incensa : sed curre velociter, & Præbyteros nostri monasterii adduc ad me, ut & ego munuscula, qualia Deus donavit, illis distribuam.* Divites autem in hoc sæculo, autum, argentum, & alia quæque pretiosa dare student ; ego autem cum multâ caritate & gaudio fratribus meis dabo quod Deus dederat. Et allocutus est unumquemque, monens & obsecrans pro eo Missas & orationes diligenter facere : quod illi libenter se facturos sponponderunt. Lugebant autem & flebant omnes, maximè quoddam dixerat quia amplius faciem suam in hoc sæculo non essent visuri. Gaudebant autem

Hæc. 2.

Boninus in
Pud. 5. Am-
brusio.

quia dixit : Tempus est ut revertar ad eum qui me fecit, qui me creavit, qui me ex nihilo formavit. Multum tempus vixi : bene mihi pius Juxta vitam meam prœvidit. Tempus resolutionis meæ instat, quia cupio dissolvi & esse cum Christo. Sic & alia multa utilitatis causa ad nostram ædificationem locutus, in lætitiâ diem usque ad vesp̄erum duxit. Et prœfatus puer nomine Wilberch dixit : Adhuc una sententia, Magister dilectio, non est descripta. At ille : Scribe, inquit. eisd. Post modicum dixit puer : Modò sententia descripta est. At ille : Bene, inquit, veritatem dixisti : consummatum est. Accipe meum caput in manus tuas, quia multùm me delectat sedere ex adverso, loco sancto meo in quo orare solebam, ut & ego sedens possim invocare Patrem meum. Et sic in pavimento suæ casulæ, decantans *Gloria Patri, & Filio, & Spiritui sancto*, cùm Spiritum sanctum nominasset, spiritum de corpore exhalavit ultimum, ac sic regna migravit ad cœlestia. Omnes autem qui viderunt beati Patris obitum, nunquàm se vidisse ullum alium in tam magnâ devotione atque tranquillitate vitam finisse dicebant : quia (sicut audisti) quousque anima ejus in corpore fuit, *Gloria Patri*, & alia quedam ad gloriam Dei cecinit, & expansis manibus Deo vivo & vero gratias agere non cessabat. Scito autem, frater carissime, quodd multa narrare possem de eo; sed brevitatem sermonis ineruditio linguæ facit. Attamen cogito, Deo adjuvante, ex tempore plenius de eo scribere quæ oculis vidi, & auribus audiui.

CAPUT III.

BEDÆ Presbyteri, de *Æquinoctio juxta Anatolium*, Epistola :
cujus meminit Beda ipse in catalogo Operum à se editorum, ad
calcem *Historiæ Ecclesiasticæ Gentis Anglorum*.

Ex codice Genevensi emendatior eâ qua hactenus prodiit sub finem tomi
secundi Operum Bedæ.

REVERENTISSIMO ac sanctissimo fratri WICTHEDÆ Presbytero BEDÆ optabilem in Domino salutem. Libenter accepi litteras tuæ benignitatis, (amantissime in Christo frater) & capitula quæ rogasti, promptus describere ac tibi dirigere acceleravi, memor familiaritatis ac dulcedinis quâ cum illo advenirem, me suscepisti. Sed & quæstionem illam merito famosam de *Historiâ Ecclesiasticâ*, super quâ me interrogasti præsentem, & cui tunc breviter, ut potui respondi, nunc latius etiam explanare studui : hoc est, de *Æquinoctio* vero, quod in libro præfato Anatolius Antistes Reverentissimus in undecimo Kalendarum Aprilium die perhibetur adnotasse, cùm cæteri *Ægyptiorum* Magistri hoc magis in duodecimo Kalendarum earum-

dem die adnotandum esse decernant. Dicit namque sanctus Proterius Alexandrinæ Antistes Ecclesiæ, ad beatissimum Papam Leonem scribens de Pascha: Et manifestè quidem secundum cursum Solis, xxv. die mensis Famenoth, qui est xii. Kalendas Aprilis, æquinoctium esse cognoscitur. Sed non oportet ab hoc æquinoctio, primi mensis exordium juxta cursum Lunæ prorsus asfigere; alioquin per omnia Solis circulo Lunæ discursus concordare debuerat. Dicit & sanctus Cyrillus ejusdem Præsul Ecclesiæ: Sol enim ipse quotidie terrâ marique pariter, & clauditur in fine diei, & in diei initio aperitur, & finit Sol cursum totius anni in duodecimo Kalendas Aprilis. Unde te meritò sicut & cæteros moyet studiosos, quomoddò Anatolius cum sit & ipse eruditione ac genere Ægyptius, quasi contrarius Ægypti Doctores scribat, æquinoctium idem in undecimo Kalendas Aprilis occurrere solere: Est ergo, inquiens, in primo anno initium primi mensis, quod est novemdecim annorum circuli initium, secundum Ægyptios quidem mensis Famenoth xxvi. die; secundum Macedones Dultri mensis xxi. secundum verò Romanos undecimo Kalendas Aprilis: in quâ die invenitur Sol non solum conscendisse primam partem, verum etiam quadram jam in eâ die habere, id est, in primâ ex duodecim partibus. Hæc autem particula prima vernale est æquinoctium, & ipsa est initium mensium, & caput circuli, & absolutio cursûs stellarum quæ planetæ, id est, vagæ dicuntur, ac finis duodecimæ particula, & totius circuli terminus. Sed facillimâ ratione credo posse doceri non cum cæteris Ægypti & Orientis Præceptoribus in hoc esse contrarium. Facit enim ratio quadrantis, (quem bisextum vocant) ut Sol æquinoctialem sui cursûs locum in signifero circulo, nunc in primo exortu suo, nunc in meridie, nunc in occasu, nunc in mediâ nocte comprehendat: & quotiens manè vel meridie fieri æquinoctium contigerit, ad duodecimum Kalendarum Aprilium; quotiens autem vesperi, vel mediâ nocte, ad undecimum Kalendarum earundem diem pertinet. Absque enim contradictione nox omnis, ex quo Dominus à mortuis resurrexit, sequentis diei temporibus antepositur, non autem præcedentis adponitur. Unde consultè Anatolius non vetat in undecimum, sed ante undecimum Kalendarum Aprilium Pascha celebrari. Nam post illa quæ posuimus ejus verba, continud subjungit: Et idèd non parùm delinquere dicimus eos, qui ante initium hoc novi anni, Pascha putant esse celebrandum. Non ergo in hoc initio, in quo æquinoctium esse dicunt; sed ante hoc initium novi anni, Pascha prohibet celebrari, cum ipse in eodem libro diligenter ex antiquorum pariter & novorum Patrum scriptis adfirmet, ante transcensum æquinoctij Pascha agi non posse. Ipse enim sibi testis erat quodd scribens, non prima sedis æquinoctialis tempora, sed ultima signavit, hoc est, ea à quibus Paschæ celebrationem incipere posse noverat. Cum enim secundo vel tertio anno post bisextum, Paschæ dies Do-

minicus in undecimo Kalendarum Aprilium die incurrerit, constat nimirum quod cum æquinoctio Paschæ tempus inchoatur, cujus ceremoniarum quæ celebrantur ejusdem primæ noctis: quamvis illâ median- te, vel etiam inchoante perfici æquinoctium nullus ambigit: eò quod profectò ipsam Dominicæ Resurrectionis ritè celebrari horam, quæ diluculo facta est. Et ut patenter animadvertas quod Anatolius vespertinum specialiter æquinoctium scribat, à quo Pascha incipere potest, quodque ad .xj. Kalendarum Aprilium regulariter respicit, adtende quid in sequentibus ex antiquorum sententiâ Patrum adnectat: cum enim duo sint æquinoctia, veris & autumnii, æquis spatiis dirempta, & quartadecimâ die primi mensis sit statuta solemnitas post vesperam, quando Luna Soli opposita, è regione deprehenditur, sicut etiam oculis probare licet, invenitur utique vernalis æquinoctii partem Sol obtinens, Luna verò autumnalis. Quid ergo mirandum si in .xj. Kalendarum Aprilium æquinoctium fieri dicat, cum de illâ loqui se horâ delectet, quando occidente ad vespem Sole, Luna è contrario suum adtollet exortum? Ubi pariter intuendum, quod æquinoctia veris & autumnii æquis spatiis dixit esse dirempta. Et inde colligendum, quod ab æquinoctio ad æquinoctium, dimidium anni computare debeamus: atque autumnale .xiiij. Kalendarum Octobrium adnotare, centum videlicet & octoginta duobus diebus à vernali discre- tum. Quod esse verissimum etiam horologica docet inspectio: maxime cum hanc æquissimam anni inter æquinoctiorum diremptionem, antiquissimi Doctoris Aristoboli verbis adstruat, qui fuit unus ex illis .xx. illustribus Scripturæ sacræ Interpretibus. Quod autem ait idem Anatolius, in quâ die invenitur Sol, non solum conscendisse primam partem, verum etiam quadram jam habere in eâ die, id est, in primâ ex duodecim partibus. Duodecim partes, duodecim signa horoscopi nominat, quæ tricenis diebus & paucis insuper horis Solem singula tenent: unde & Maro de iisdem dicit:

Ideirò certis dimensum partibus orbem

Per duodena regis mundi Sol aureus astra.

Quarum videlicet partium, & juxta naturam à loco æquinoctii vernalis incipit. Hæc autem prima ex duodecim vernale est æquinoctium; quia nimirum partis ejusdem initium, scilicet ubi Sol primò positus est, ipsum tenet æquinoctium, rectè præmittit, Solem in eâ die non solum conscendisse primam partem, verum etiam quadram jam in eâ die habere: quæ quotiens æquinoctiale tempus juxta rationem præfata, in undecimum Kalendarum Aprilium incidit, toties in ipso temporis momento illa quarta pars diei, quæ annuatim ad crescere solet, secundum naturam profecta esse dignoscitur. Nam cum undecimo Kalendarum earundem die contingit æquinoctium, tum in ipso æquæ die, & in ipsâ æquinoctiali horâ quadrans idem expletur. Ideò autem addimus Naturaliter, quia consuetudinis est humanæ,

variis illum temporibus anni, prout cuilibet genti complacuit, influere. Naturalis verò est rationis, in completionem circuli Solaris adjici: quod & Cyrillus signavit in eà quam & suprà posuimus, sententià, dicens: Et finit Sol cursum totius anni in duodecimo Kalendarum Aprilium. Et ne quis fortè contendat, nos non in hac Anatolii sententià, hoc quod ipse sensit, intelligere potuisse, libet paucis adnectere quæ de iisdem partibus & æquinoctio vir doctissimus Capuanæ urbis Victor Antistes describebat. Cælestis, inquit, circulus, per quem Sol, & Luna, & stellæ quæ planetæ appellantur, contra impetum totius cæli proprio motu feruntur, per duodecim partes judicio est Sapientia distributus: quibus peractis, trecentesimo sexagesimo quinto die, quo toto tempore annus expletur, dum Sol repetierit circuli supradicti primæ partis initium, oritur anni principium, quod fit à duodecimo Kalendarum Aprilium die usque ad undecimum. Sæpe enim vespere, interdum nocte, nonnunquam ipso x. i. Kalendarum Aprilium die provenire deprehenditur. Vicecimâ igitur quintâ aut sextâ die Martii mensis secundum Alexandrinos, hoc est, juxta Latinos duodecimo vel undecimo Kalendarum Aprilium die, fit juxta Solis cursum, primi mensis initium. Ne quis autem nos inconstantie velit arguere, quod velut sub ambiguo fluctuantes, diem primi mensis minimè definiamus, hujusmodi objurgator, aut potius inquisitor sciat, quicquid est, quod sollertissima Ægyptiorum investigatio, & admodum subtilissima, à septimâ horâ diei, horam primam alterius diei docet incipere: & cum sit xxv. dies Martii mensis. xii. Kalendarum Aprilium, si vespere ejusdem diei Sol spatium primæ partis illustret, jam xxvi. dies ascribitur, Ægyptiacâ, ut diximus, ratione subtili, & sine dubitatione probabili. Et post pauca: Igitur Luna, inquit, si xiv. reperitur Sole in primâ parte sui circuli constituto, jure primi mensis ascribitur. Si verò priùs xiv. Luna hoc pleno lumine orbis effulserit, quàm Sol memoratam primam partem circuli sui contigerit, xii. mensis esse reputabitur. Et idè quotiens ita contingit, sollemnitas Paschæ differtur ad alterum plenilunium, quam evenire necesse est, adhuc Sole in primâ parte de duodecim circuli partibus constituto. Hæc de verbis beati Victoris adsumere placuit, quatenus sententiâ sancti Patris Anatolii, quæ & in ipsius opere Paschali, & in Historiâ Ecclesiasticâ plerisque obscura est, per ejus tibi dicta clarior redderetur. Sed neque hoc prætereundum, quod sunt qui contendunt Anatolium in hac sententiâ nequaquam undecimum, sed octavum Kalendarum Aprilium diem posuisse, dicentes Eusebium, cum hanc sententiam in Historiâ Ecclesiasticâ poneret, diem pro die mutasse, & quod cætera benè ac philosophicè posita videret, uno verbo corrigere voluisse quod in eà minùs perfectè dictum conspexerit; hæc illum videlicet quem laudare disposuerat, palàm notabile monstraret, si ejus pura verba, & ut ipse scripserat, suis inderet historiis.

Sed mirum si Eusebius tam circumscriptus sermone & sensu scriptor, in tantum laudis aliorum potuit esse cupidus, ut eorum scripturas de-
 flagrans, ea quæ non dixerant, illos scripsisse sinxerit, nec for-
 midari argui, postquam lectores sui ad integra eorum opera perven-
 sent, atque quæ ipse de his adsumperat, aliter in suis auctoribus po-
 sita offendissent. Mirum si Victoreni, cuius dicta posuimus, virum
 æquæ eruditionis eximæ, talis impostura latuit, qui in alio opere
 scribens de Pascha, hanc eandem sententiam Anatoli de Historiâ
 Ecclesiasticâ, quasi jure laudabilem ac memorabilem adsumens, ubi
 opportunum rebatur, inseruit, & ipse undecimum in eâ, non octavum
 Kalendarum Aprilium scribens diem. Sed & Dionysius cognomento
 Exiguus, scientiâ præcipuus mirum quare vel ipse in Epistolis suis
 Paschalibus, Anatoli suffragium, de Historiâ Ecclesiasticâ flagitaret,
 si ejus ibi dicta sciret falsata, quem ut Græcæ etiam linguæ peritissi-
 mum, qualiter hæc sint primò edita latere non potuit adtentio. Sed
 quia mensis hic unde sumat exordium, vel ubi terminetur, eviden-
 ter ibi, id est, in Moyli scriptis non colligitur, præfati venerabiles
 cccxviii. Pontifices, antiqui moris observantiam, & exinde à sancto
 Moyse traditam (sicut in septimo libro Ecclesiasticæ Historiæ refertur)
 solleter investigantes, ab octavo Iduum Martiarum usque in diem
 Nonarum Aprilium natam Lunam facere dixerunt primi mensis in-
 itium: & à duodecimo Kalendarum Aprilium usque ad xiv. Kalendarum
 Martiarum Lunam xiv. solertiùs inquirendam. Itaque verisimile videtur,
 Eusebium quidem quod in Græcâ auctoritate invenerat, fideliter suis
 indidisse historiis: ipsum verò libellum Anatoli postmodum in aliqui-
 bus Latinorum exemplaribus ab aliquibus esse corruptum, eorum ni-
 mirum fraude qui verum Paschæ tempus ignorantes, errorem jam
 suum tanti Patris auctoritate defendere gestirent. Sed quaerunt illi qui
 Eusebium magis unam emendasse sententiam, quàm alios quoslibet
 totum Anatoli putant infalsasse libellum, quomodo in eodem libello
 sit scriptum. Sed quid mirum si in xxi. Lunam erraverint, qui tres dies
 addiderunt ante æquinoctium, in quibus Pascha immolari posse de-
 finiunt, quod certum omnimodis etiam putari absurdum? Quibus
 respondendum quod Anatolius potuerit nosse plurimos eorum qui sic
 vel sic de Paschâ senserint, nec tamen ad nostram noticiam pervene-
 rint. Et è contrâ quaerendum ab eis quomodo in ipso libello sit scri-
 ptum. Est ergo in primo anno initium primi mensis, quod est xix.
 annorum circuli principium, secundum Egyptios quidem mensis Fa-
 minoth xvi. die, juxta Macedones verò Distri mensis xxi. secun-
 dum Romanos verò Martii mensis xxv. die, id est, octavo Kendas-
 Aprilis: cùm xvi. dies mensis Egyptiorum Faminoth, & xxi. dies
 mensis Macedonum Distri non sit viii. Kalendarum Aprilium, sed xi.
 Kalendarum Aprilium. Nonne verisimillimum apparet quod sit infal-
 sata sententia, ubi ipse qui viii. Kalendarum Aprilium pro xi. Kalendarum

darum Aprilium mutavit, oblitus est etiam Ægyptiorum vel Græcorum mensium statum mutare; sed his quæ minus nota erant, manere permittis ut fuerunt, illud solummodò quod sibi, suisque erat visibile, mutavit. Quid sanè horum sit veriùs, illi potiùs qui Annotolium Græcum legunt, videant. Verùm live Eusebius unam sententiam, seu alius quilibet totum ipsum libellum à suo statu transvertit; constat tamen absque ullà dubietate, quamvis plurima verterit verba, æquinoctium octavâ Kalendarum Aprilium die nequaquam posse reperiri. Quid & inspectione horologicâ, & apertâ ratione probabitur. Regula enim tenet Ecclesiasticæ observationis, quæ & edictis Patrum priorum, & clariùs est Nicæno confirmata Concilio, ut Paschæ dies Dominicus ab undecimo Kalendarum Aprilium, usque in septimum Kalendarum Maiarum diem quaratur. Item Catholicæ institutionis regula præcipit, ut ante vernalis æquinoctii transcendens Pascha non celebretur. Qui ergo viii. Kalendarum Aprilium putat esse æquinoctium, necesse est idem ut ante æquinoctium Pascha celebrari licitum dicat, aut ante viii. Kalendarum Aprilium diem Pascha celebrari licitum neget. Ipsum quoque Pascha quod Dominus pridè quàm patetur, cum discipulis suis fecit, aut viii. Kalendarum Aprilium die non fuisse, aut ante æquinoctium fuisse confirmet.

CAPUT IV.

HELPERICI *Liber de Computo Lunæ.*

PÆFATIO PRIOR.

DOMINO Patri sanctissimo, nomine quidem Aspro, moribus autem placidissimo, Helpericus humilis vernula, æternæ prosperitatis adminicula. Dùm paternitatis vestræ jussionibus libens pareo, multorum ridiculis me lacerandum expono: unde vestram submissis exoro paternitatem, ut meam super hoc, benigno favore excusetis temeritatem. Ingitis enim ut opusculum, quod nuper rogatu fratrum nostrorum juniorum, de arte Computi edideram rusticano sermone, quòdque eis solis legendum dederam, uni præcipuè eorum qui me pertinaciori importunitate ad hoc præsumendum impulerat, & cui illud jam Grandivalle posito direxeram: hoc, inquam, præcepistis, cum anno præterito, legatione fratrum nostrorum Grandivalle degentium, ad vos Autisiodoriungeretur, ut transcriptum vestræ paternitati examinandum dirigam, ut hoc factò ac si forex meo miser indicio per eam. Ego enim decreveram nugarum mearum ineptias dignis oculare tenebris; ne cùm prodire cœperint, multorum in me fel commoveant, jure caufantium, vanissimis nœniis occupari membranas. Sed quis vestris non obtemperet jussis, etiam cum detrimento sui? Ego præ-

cipue quæ me vestris obsequiis ita manciparim, ut quod vobis ratum cognovero, quamlibet arduum, aggrediendum mihi esse non ambigam. Unum ergo à vestrà paternitate deprecor, ut quod vestrà iustitiæ coactus aggredior, vestro munimine fretus indemnis evadam. Quod ita fieri poterit, si fastidiosis quibusque, & qui alios tantum reprehendere volunt, hujus lectio subtrahatur: & vobis, vestrique similibus, qui sine livore, oculo (ut ita dicam) columbino cuncta respicitis, examinandus præbeat. Verum hoc criticus quisque quomodo volet, accipiat; mihi vestrum iudicium satis idoneum constat, cui superna pietas hoc anno perspicue dignata est manifestare, quam sit inutile sanctissimis vestræ paternitatis imperiis repugnare. Evenire autem iustissime solet, ut qui Patris salubria spreverit consilia, debita pertinaciæ suæ luat quandoque supplicia: quod ed veritus possum fateri, quod sæpius, & hoc anno crebrius atque acerbius, immo & iustius non desino experiri. Nec immerito: cum enim divina pietas me loco illi restituit, quomæ jamdudum ad sibi serviendum delegerat, & unde ego infelix instabilitatis solummodo causâ exieram, (cum omnibus ibidem bonis abundante; quodque ego super omnia duco, dulcissimâ sanctorum Patrum dilectione fovetur:) cum, inquam, me superna clementia post diutinam evagationem illuc revocasset, vestræque erga me solied flagrans paternitas retinere secum voluisset, ad versâ (ut patet) impellente fortuna non adquivi; sed pristina usque levitate, redii quod me & multa passum recalebam, & deteriora passurum non ignorabam. Quo facto, & illud didici, multum apud Deum valere preces, quas illi ex animo funditis, cum unâ eademque leviter fusa oratione tantum adversum me obtinueritis. Reminiscor enim, vos cum me retinere nequireretis, imprecatum mihi ut invenirem aliquem qui me acerrime verberaret in loco ad quem tantoperè festinabam. Quam orationis effectus est è vestigio consecutus. Quanta enim contumeliarum verbera, quot probrorum ludibria, quæ & qualia derisionum tormenta deinceps patiar, ab his præcipue qui erant quondam pacifici mei, quosque ego apud vos summis laudibus extuli, lingua non valet effari. Quod quia obulciscendam in me levitatem jure obigitillè cognosco, divinam super his laudans æquitate: ut ab his tandem eripi queam, vestrarum obnixè postulo suffragia precum: ut quem licet nolo, tanto malorum fasces gravasti orando, tanto jam relevetis ab onere, dexterioris manum orationis porrigendo. Verum hæc plenius, si Dominus cupit nobis præbuerit colloquium, vivo sermone expedientur. Quod ut citius fieri valeat, vestra exorabilis oratio precibus crebris obtineat.

PRÆFATIO POSTERIOR.

CUM quibusdam è fratribus nostris adolescentioribus quædam calculatoris artis rudimenta communi sermone explicare cœpisset

fem, quò eis hujusce non contemnendæ (ut multi arbitrantur) scientiæ aliquid impertirem, quos in arte grammaticâ, prout divina auxiliata est munificentia, aliquatenus introduxeram : nescio quo accensû desiderio, invitare vehementer cõperunt, quatinus ea quæ vivâ voce deprompseram, multorum utilitati profutura, qualitercumque scripto ederem : ut si quando hæc (ut solet mens humana diversis dedita curis multa oblivisci) memoriâ exciderent, litterarum suffragiis ea quoquo modo reparari valerent. Quibus cùm obnixius renitens id quod erat, obtenderem ; superesse scilicet libros de hac eadem re tùm dilucidè, tùm venustè majorum lepore editos, præcipuè venerabilis viri domni Bedæ Presbyteri, qui tùm in aliis, tùm & in hoc, sanctæ Ecclesiæ utilitatibus plurimùm desudavit, illorum lectioni insisterent, illos diutinâ meditatione perdiscere studerent, à me intentionem averterent, nec me aggredi cogerent opus omnium sputis obnoxium, cunctorum deridiculis dignum : præsertim cùm ingenio rudis, sermone impeditus, & ne rusticano quidem eloquio balbutire sufficiam, nedùm litteris quippiam committere præsumam. Cùm hæc, hujusque modi plura exultationis obtentu objicerem, tùm verò pertinaciùs insistere : & non novum, inquit, aliquid te cudere petimus, quippè qui nihil jam reperiri posse remur quod ab aliis non dictum inveniat ; sed ex his quæ ab aliis asseris sparsim copiosèque tractata : poscimus, utiliora quæque, nobis que necessària tuo studio decerpta in unum colligi, & veluti sertum quoddam ex diversis floribus compingi : in quo opere non pompaticas verborum sileras, aut urbanitatis exigimus vences, quas, ut ais, in antiquis est invenire commentariis : enim verò quæ ab aliis obscuriùs sunt prolata, tuo, quæsumus, manifestiora fiant relatu. Hac evictus importunitate, & de divinâ præsumens largitiâ bonitate, studiosâ nihilominus provocatus fratrum caritate ; quæ utiliter eos postulare sensi, eo tenore tentare præsumpsi, ut præter se nulli unquàm legenda præbere, vel auctorem operis publicare polliceantur. Sed & si cujus peritiorum hæc aures offenderint, ne me temeritatis noter elogio, sed noverit caritatis paruisse imperio, ac fraternæ utilitatis deservisse (prout fuit possibile) studio. Quotidiana igitur, annuâque Compositi argumenta vulgaria, & quæ nec laicus quidem, nedùm clericus impunè ignoraverit, undecumque collecta, & planiore quàm sunt ab aliis sermone edita, congesti : de meo nihil addens, sed quæ ab aliis ed obscuriùs quòd sunt prolata venustiùs, rusticano sermone enucleatiùs edisserens : ut si quis ita ab omni fuerit serio feriatus, ut legere ista dignetur, faciliùs illa Doctõrum sublimiora rimetur.

INCIPIUNT CAPITULA.

- I. **K**ALENDÆ quare constituta sunt, & unde dicuntur. II. Unde dicuntur Nona. III. Quare alii menses quatuor

- Nonas & alii sex habent Nonas.*
- IV. Unde Idus dicitur.
- V. Unde conficiatur annus Solaris, & de ratione bissexii.
- VI. Physica signorum ratio: & de solstitiis & equinoctiis.
- VII. Quomodo Sol in aliquo signo esse dicatur, cum signa in celo, Sol autem in aere feratur.
- VIII. Contra eos qui dicunt planetas contra mundum ferri.
- IX. Unde inveniuntur regulares ad feriam Kalendarum inveniendam.
- X. Unde concurrentes.
- XI. Qualiter inveniatur quaque feria Kalendarum.
- XII. Quomodo quotidie feria inveniatur per dies mensis vel anni.
- XIII. Cur praefati regulares à Martio sumant exordium.
- XIV. Unde alii regulares ad Kalendarum Lunam inveniendam.
- XV. Unde epacta.
- XVI. Ad quid valeant.
- XVII. Cur à Septembri incipiant epacta.
- XVIII. Cur in initio nulla pronuncietur.
- XIX. Quomodo quotidie Luna inveniatur.
- XX. Cur Luna nunc trigesima, nunc vicecima-nona pronuncietur: vel quantum in unoquoque signo vel in toto Zodiaco moretur.
- XXI. Cur à veteribus Lunarum tantum observatus sit annus, & cur modo communem annum dicamus, & embolismarem.
- XXII. Unde conficiatur saltus Luna, vel ubi rectius intermitatur.
- XXIII. Quot horis Luna luceat singulis noctibus.
- XXIV. Quam causam eclipsis Luna & Solis proveniat.
- XXV. In quo signo sit Luna.
- XXVI. Quam horam accendatur, vel quam in sua accensione mutet etatem.
- XXVII. Qualiter inveniuntur anni ab Incarnatione Domini.
- XXVIII. Origo Indictionum, & qualiter singulis annis inveniuntur.
- XXIX. Qualiter epacta cuiusque anni inveniuntur.
- XXX. Quo modo cycli Solaris inveniatur: & cur per xxviii. annos recurat.
- XXXI. Ad inveniendos concurrentes cuiusque anni.
- XXXII. Quotus sit annus à bissexto.
- XXXIII. Quomodo inveniatur cycli Luna: & qua sit differentia inter ipsum & decemnovennalem.
- XXXIV. Quid sit terminus Pasche, vel quando observetur.
- XXXV. De equinoctiis & solstitiis, qualiter etiam corporali intuitu deprehendantur: & de ascensu & descensu per Zodiacum.
- XXXVI. Repetitur de termino Paschali: & cur ipsa festivitas non nisi Dominica celebretur.
- XXXVII. Quomodo inveniatur ipse terminus per singulos annos.
- XXXVIII. Ad inveniendos regulares ipsius termini.
- XXXIX. Qualiter per Paschalem terminum ceteri repetantur.
- XL. De tribus annis cycli decemnovennalis, in quibus Luna epac

*clarum non servat ordinem : vel XLI. De ceteris embolismis qui
qualiter Pascha, vel Luna et- epactis non repugnant, brevis com-
mune.* *memoratio.*

Scribebat Helpericus anno Dominicæ Incarnationis 903: Indictione vi. ut ipse apertè profiteatur cap. 27. sui Computi. At cum in alio exemplari scribere se profiteatur anno Christi 930. videri hæc potest hujus Computi secunda editio, ab Helperico jam tùm seniore; nisi est interpolatio alicujus recentioris, qui Helperici opus tempori suo aptaverit: quod primum est existimare de Magistro qui Hupericum ipsum suis discipulis prælegeret. Hunc esse Bedæ abbreviatorem, tùm ex præfatione ejus posteriori colligitur, tùm etiam ex Epilogo, qui talis est:

Cætera de embolismis, annisque communibus, deque ogdoade & endecade, vel de omnibus ad Paschæ rationem pertinentibus qui plenius nosse desiderat, librum Venerabilis Bedæ de his elegantè editum sedulò perlegat: ibi copiosissimè de his omnibus quicquid quæsierit, proculdubio reperturus. Nos enim scholasticorum nostrorum rogatu, quæ introducendis ad hanc artem pueris necessaria judicavimus, pro captu ingenio nostri undecumque collecta congestimus. In quibus congruendis si aliquantulum verbosius evagati sumus, quicumque legerit, eo nos studio fecisse cognoscat, ut quæ dicebantur, manifestiora legentibus forent. Unde & luculentiores pompas verborum evitavimus, cum fortasse hæc nobis aliquatenus suppeterent; quia, sicut ait Beatus Augustinus, qui eleganter aliqua loquitur, nec auditorem instruit; sed sibi tantum, & non illi quem erudiendum suscepit, loquitur. Rogamus autem quicumque hæc legere dignabitur, ut si qua in his utilitati suæ concupiscibilia repererit, omnium bonorum largitori referat. Quid si secus e venerit, non illicò nostrum laborem inanem esse cauteat: quia sæpe eveniet ut ibi alius erudiat, ubi alius nihil utile suspicatur: ac si pretiosus est aureum poculum, non idè tamen omni utilitate caret famiolum poterium. Immo nonnunquam vasa fictilia tantò solent esse utiliora quantò & viliora: quia gemmis in scrinio jacentibus, & solis Regibus his utentibus, hæc plurium subserviunt usibus. Sciat autem quisquis ista fastidierit, non sibi esse edita, sed his tantum qui majora adhuc penetrare nequeunt; ut his primum quasi quibusdam alphabeti characteribus introducti, illa deinceps faciliùs assequantur..



HISTORIÆ
ECCLESIASTICÆ
GENTIS ANGLORUM
LIBRI QUINQUE,

Auctore Sancto & Venerabili Beda Presbytero.

*Nunc prodeunt longè quàm hætenùs emendatiore, ex codice
S. Maximini Trevirensis, optima nota ac pervetusto.*



P R Æ F A T I O.

Gloriosissimo Regi CEOLWLF Beda famulus Christi,
& Presbyter.



ISTORIAM gentis Anglorum Ecclesiasticam, quam nuper edideram, libentissimè tibi desideranti (Rex) & ptiùs ad legendum ac probandum transmissi, & nunc ad transcribendum ac plenius ex tempore meditandum retransmitto : satísque studium tuæ sinceritatis amplector, quo non solùm audiendis Scripturæ sanctæ verbis aurem sedulus accommodas, verùm etiam noscendis priorum gestis, sive dictis, & maximè nostræ gentis virorum illustrium, curam vigilanter impendis. Sive enim Historia de

bonis bona referat, ad imitandum bonum auditor sollicitus instigatur: seu mala commemoret, de pravis nihilominus religiosus ac pius auditor sive lector, devitando quod noxium est ac perversum, ipse solertiùs ad exequenda ea quæ bona ac Deo digna esse cognoverit, accenditur. Quod ipsum tu quoque vigilantissimè deprehendens, Historiam memoratam in noticiam tibi, simulque eis quibus regendis te divina præfecit auctoritas, ob generalis curam salutis latiùs propagari desideras. Ut autem in his quæ scripsi, vel tibi, vel cæteris auditoribus sive lectoribus hujus Historiæ, occasionem dubitandi subtraham, quibus hæc maximè auctoribus didicerim, breviter intimare curabo. Auctor ante omnes, atque adjutor opusculi hujus, Albinus Abba reverentissimus, vir per omnia doctissimus extitit, qui in Ecclesiâ Cantuariorum à beatæ memoriæ Theodoro Archiepiscopo, & Hadriano Abbate viris venerabilibus atque eruditissimis institutus diligenter, omnia quæ in ipsâ Cantuariorum provinciâ, vel etiam in contiguis eidem regionibus à discipulis beati Papæ Gregorii gesta fuere, vel monumentis litterarum, vel seniorum traditione cognoverat: & ea mihi de his quæ memoriâ digna videbantur, per religiosum Lundeniensis Ecclesiæ Presbyterum Nothelmum sive litteris mandata, sive ipsius Nothelmi vivâ voce referenda transmisit. Qui videlicet Nothelmus postea Romam veniens, nonnullas ibi Gregorii Papæ, simul & aliorum Pontificum epistolas, perscrutato ejusdem sanctæ Ecclesiæ Romanæ scrinio, permisso ejus qui nunc ipsi Ecclesiæ præest, Gregorii Pontificis invenit: reversusque, nobis nostræ Historiæ inferendas, cum consilio præfati Albini reverentissimi Patris adtulit. A principio itaque voluminis hujus, usque ad tempus quo gens Anglorum fidem Christi percepit, ex priorum maximè scriptis inde collectis, ea quæ promeremus, didicimus. Exinde autem usque ad tempora præsentia, quæ in Ecclesiâ Cantuariorum per discipulos beati Papæ Gregorii, sive successores eorum, vel sub quibus Regibus gesta sint, memorati Abbatis Albini industriâ Nothelmo, ut diximus, perferente cognovimus. Qui etiam provinciæ Orientalium simul & Occidentalium Saxonum, necnon & Orientalium Anglorum, atque Nordanlymbro-

rum à quibus Præfulibus, vel quorum tempore Regum, gratiam Evangelii perceperint, nonnullâ mihi ex parte prodiderunt. Denique hortatu præcipuè ipsius Albini, ut hoc opus adgredi auderem, provocatus sum. Sed & Danihel reverentissimus Occidentalium Saxonum Episcopus, qui nunc usque superest, nonnulla mihi de Historiâ Ecclesiasticâ provinciæ ipsius, simul & proxima illius Australium Saxonum, necnon & Vestræ insulæ, litteris mandata declaravit. Qualiter verò per ministerium Ceddi, & Ceadda religiosorum Christi Sacerdotum, vel provincia Merciorum ad fidem Christi quam non noverat, pervenerit, vel provincia Orientalium Saxonum, fidem quam olim exsufflaverat, recuperaverit: qualis etiam ipsorum Patrum vita vel obitus extiterit, diligenter à fratribus monasterii, quod ab ipsis conditum *Lestingacu* cognominatur, agnovimus. Porro in provincia Orientalium Anglorum quæ fuerint gesta ecclesiastica, partim ex scriptis vel traditione priorum, partim reverentissimi Abbatis Esi relatione comperimus. At verò in provinciâ *Lindissi* quæ sint gesta erga fidem Christi, quæve successio sacerdotalis extiterit, vel litteris reverentissimi Antistitis Cyniberti, vel aliorum fidelium virorum viva voce didicimus. Quæ autem in Nordanhymbrorum provinciâ, ex quo tempore fidem Christi perceperunt, usque ad præsens per diversas regiones in Ecclesiâ sint acta, non uno quolibet auctore, sed fidei innumerorum testium qui hæc scire vel meminisse poterant, adsertione cognovi, exceptis his quæ per meipsum nosse poteram. Inter quæ notandum quodd ea quæ de sanctissimo Patre & Antistite Cudbercto, vel in hoc volumine, vel in libello gestorum ipsius conscripti, partim ex eis quæ de illo prius à fratribus Ecclesiæ Lindisfarnensis scripta reperi, adsumpsi, simpliciter fidem Historiæ quam legebam, accommodans; partim verò ea quæ certissimâ fidelium virorum adtestatione per memetipsum cognoscere potui, solerter adicere curavi. Lectoremque suppliciter obsecro, ut si quàm in his quæ scripsimus, aliter quàm se veritas habet, posita repererit, non hoc nobis imputet, qui (quod vera lex Historiæ est) simpliciter ea quæ famâ vulgante collegimus, ad instructionem posteritatis litteris mandare studuimus. Prætercà omnes

ad quos hæc eadem Historia pervenire potuerit nostræ nationis, legentes sive audientes suppliciter precor, ut pro meis infirmis & mentis & corporis, apud supernam patriam sapius intervenire meminerint: & in suis quique provinciis hanc mihi suæ remunerationis vicem rependant, ut qui de singulis provinciis, sive locis sublimioribus quæ memoratu digna atque incolis grata credideram, diligenter adnotare curavi, apud omnes fructum piæ intercessionis inveniam.

LIBER PRIMUS.

CAPUT I.

De situ Britanniae vel Hiberniae, & priscais earum incolis.

B R I T T A N I A Oceani insula, cui quondam Albion nomen fuit, inter Septentrionem & Occidentem locata est, Germaniæ, Galliae, Hispaniæ, maximis Europæ partibus multo intervallo adversa. Quæ per millia passuum octingenta in Boream longa, latitudinis habet millia ducenta, exceptis dumtaxat prolixioribus diversorum promonteriorum tractibus, quibus efficitur ut circuitus ejus quadragies octies septuaginta quinque millia compleat. Habet à Meridie Galliam Belgicam, cujus proximum littus transmeantibus aperit civitas quæ dicitur Ruthubi portus, à gente Anglorum nunc corruptè *Reptacaestir* vocata, interpolito mari à Gessoriaci Morinorum gentis littore proximo, trajectu millium quinquaginta, sive, ut quidam Scriptorum, stadiorum quadringentorum quinquaginta. A tergo autem, unde Oceano infinito patet, Orcadas insulas habet. Optima frugibus arque arboribus insula, & alendis apta pecoribus ac jumentis: vineas etiam quibusdam in locis germinans: sed & avium ferax terrâ marique generis diversi, fluviis quoque multum piscosis, ac fontibus præclara copiosis. Et quidem præcipue officio abundat & anguillâ. Capiuntur autem sapilline & vituli marini, & delphines, necnon & ballenæ: exceptis variorum generibus conchiliorum: in quibus sunt & musculæ, quibus

inclusam saepe margaritam, omnis quidem coloris optimam inveniunt: id est, & rubicundi, & purpurei, & hyacinthini & prasini, sed maximè candidi. Sunt & cochleæ satis superque abundantes, quibus tinctura coccinei coloris conficitur, cujus rubor pulcherrimus nullo unquam Solis ardore, nullà valet pluviarum injuriâ pallescere; sed quò vetustior est, eò solet esse venustior. Habet fontes salinarum, habet & fontes calidos, & ex eis fluvios balnearum calidarum, omni ætati & sexui per distincta loca, juxta suum cuique modum accommodos. Aqua enim (ut sanctus Basilius dicit) fervidam qualitatem recipit, quum per certa quædam metalla transcurrit, & fit non solum calida, sed & ardens. Quæ etiam venis metallorum, æris, ferri, plumbi & argenti sæcunda. Gignit & lapidem gagatem plurimum optimumque: est autem nigrogemmeus & ardens igni admotus: incensus serpentes fugat: adritu calefactus adplicita detinet æquè ut succinum. Erat civitatibus quondam viginti & octo nobilissimis insignita, præter castella innumera, quæ & ipsa muris, turribus, portis, ac sepibus erant instructa firmissimis. Et quia propè sub ipso Septemtrionali vertice mundi jacet, lucidas æstate noctes habet; itaut medio sæpe tempore noctis in quaestionem veniar intuentibus, utrum crepusculum adhuc permaneat vespertinum, an jam advenerit matutinum, utpotè nocturno Sole non longè sub terris ad Orientem Boreales per plagas redeunte: unde etiam plurimæ longitudinis habet dies æstate, sicut & noctes contrà in brumâ, Sole nimirum tunc Lybicas in partes secedente, id est, horarum decem & octo: plurimæ item brevitatis noctes æstate & dies habet in brumâ, hoc est, sex solummodò æquinoctialium horarum: cum in Armeniâ, Macedoniâ, Italiâ, cæterisque ejusdem linearum regionibus longissima dies sive nox quindecim, brevissima novem compleat horas. Hæc in præsentia, juxta numerum librorum quibus lex divina scripta est, quinque gentium linguis, unam eandemque summæ veritatis & veræ sublimitatis scientiam scrutatur & conficitur; Anglorum videlicet, Brittonum, Scottorum, Pictorum & Latinorum, quæ meditatione scripturarum cæteris omnibus est facta communis. In primis autem hæc insula Brittones solum, à quibus

nomē accepit, incolas habuit, qui de tractu Armorico (ut f rtur) Britanniam advekti, Australes sibi partes illius vindicarunt. Et cōm plurimam insulæ partem (incipientes ab Austro) possedissent, contigit gentem Pictorum de Scythiâ (ut perhibent) longis navibus non multis Oceanum ingressam, circumagente flatu ventorum, extra fines omnes Britanniæ Hiberniam pervenisse, ejusque Septentrionales oras intrasse, atque inventâ ibi gente Scottorum, sibi quoque in partibus illius sedes petisse, nec impetrare potuisse. Est autem Hibernia insula omnium post Britanniam maxima, ad Occidentem quidem Britanniæ sita; sed sicut contra Aquilonem ea brevior, ita in Meridiem se trans illius fines plurimum protendens, usque contra Hispaniæ Septentrionalia, quamvis magno æquore interjacente pervenit. Ad hanc ergo usque pervenientes navigio Picti (ut diximus) petierunt in eâ sibi quoque sedes & habitationem donari. Responderunt Scotti, quia non ambo eos caperet insula: sed possumus (inquiunt) salubre vobis dare consilium, quid agere valeatis. Novimus insulam aliam esse non procul à nostrâ, contra ortum Solis, quam sæpe lucidioribus diebus de longè aspicere solemus. Hanc adire si vultis, habitabilem vobis facere valeis: vel si qui restiterint, nobis auxiliariis utimini. Itaque petentes Britanniam Picti, habitare per Septentrionales insulæ partes ceperunt: nam Austrina Brittones occupaverant. Cūque uxores Picti non habentes, peterent à Scottis, eâ solūm conditione dare consenserunt, ut ubi res perveniret in dubium, magis de femineâ Regum proficiat, quàm de masculinâ Regem sibi eligerent: quod usque hodie apud Pictos constat esse servatum. Procedente autem tempore Brittaniam præter Brittones & Pictos tertiam Scottorum nationem in Pictorum parte recepit, qui duce Reudâ de Hiberniâ progressi, vel amicitia, vel ferro sibimet inter eos sedes quas hæcenus habent, vindicarunt: à quo videlicet duce usque hodie Dalreudini vocantur: nam linguâ eorum *daal* partem significat. Hibernia autem & latitudine sui status, & salubritate, ac serenitate ærum multum Britanniæ præstat, itaut rarò ibi nix plusquàm triduana remaneat: nemo propter hiemem aut sæna secet æstate, aut stabula fabricet jumentis: nullum ibi

reptile videri soleat, nullus vivere serpens valeat: nam sæpe illò de Britanniâ adlati serpentes, mox ut proximante terris navigio, odore aëris illius ad tacti fuerint, intereunt: quin potius omnia penè quæ de eadem insula sunt, contra venenum valent. Denique vidimus quibusdam à serpente percussis, rasa folia codicum, qui de Hiberniâ fuerant, & ipsam rasuram aquæ immixtam, ac potui datam, talibus protinus totam vim veneni grassantis, totum inflati corporis absumpsisse ac sedasse tumorem. Dives lactis ac mellis insula, nec vinearum expertis, piscium volucrumque, sed & cervorum caprearumque venatu insignis. Hæc autem propriè patria Scottorum est: ab hac egressi (ut diximus) tertiam in Britanniâ Brittonibus & Pictis gentem addiderunt. Est autem sinus maris permaximus, qui antiquitus gentem Brittonum à Pictis secernebat: qui ab Occidente in terras longo spatio erumpit, ubi est civitas Brittonum munitissima usque hodie quæ vocatur *Alcluth*: ad cujus videlicet sinûs partem Septentrionalem Scotti, quos diximus, advenientes, sibi locum patriæ fecerunt.

CAPUT II.

Ut Britanniam primus Romanorum Gaius Julius adierit.

VERUM eadem Britanniæ Romanis usque ad Gaium Julium Cæsarem inaccessa atque incognita fuit: qui anno ab Urbe condita sexcentesimo nonagesimo tertio, ante verò Incarnationis Dominicæ tempus anno sexagesimo, fundus gradu Consulatus cum Lucio Bibulo, dum contra Germanorum Gallorumque gentes, qui Rheno tantum flumine dirimebantur, bellum gereret, venit ad Morinos, unde in Britanniam proximus & brevissimus transitus est, & navibus onerariis atque ætuariis circiter octoginta præparatis, in Britanniam transvehitur, ubi acerbâ primùm pugna fatigatus, deinde adversâ tempestate correptus, plurimam classis partem, & non parvum numerum milicum; equitum verò penè omnem disperdidit. Regressus in Galliam, legiones in Hiberniâ

dimisit, ac sexcentas naves utriusque commodi fieri imperavit: quibus iterum in Britanniam transvectus, dum ipse in hostem cum ingenti exercitu pergit, naves in anchoris stantes, tempestate correptæ, vel confisæ inter se, vel arenis infixæ ac dissolutæ sunt: ex quibus quadraginta perierunt, cæteræ cum magnâ difficultate reparatæ sunt. Cæsaris equitatus primo congressu à Brittanis victus, ibidem Labienus Tribunus occisus est: secundo prælio cum magno suorum discrimine victos Brittanos in fugam vertit: inde ad flumen Thamesium profectus est, quem uno tantum loco vadis transmeabilem ferunt. In hujus ulteriore ripâ Cassobellauno duce, immensa hostium multitudo confederat, ripamque fluminis, ac penè totum sub aquâ vadum acutissimis sudibus præstruxerat: quarum vestigia sudium ibidem usque hodie visuntur, & videtur inspectantibus, quòd singulæ earum ad modum humani femoris grossæ, & circumfusæ plumbo immobiliter hæreant, in profundum fluminis infixæ: quod ubi à Romanis deprehensum ac vitatum est, Barbari legionum impetum non ferentes, silvis sese abdidere, unde crebris irruptionibus Romanos graviter ac sæpe lacerabant. Interea Trinovantum firmissima civitas cum Androgio duce datis quadraginta obsidibus Cæsari sese dedit: quod exemplum secutæ urbes aliæ complures in fœdus Romanorum venerunt. Iisdem demonstrantibus, Cæsar oppidum Cassobellauni inter duas paludes situm, obtentu insuper silvarum munitum, omnibusque rebus confertissimum, tandem gravi pugnam cepit. Exin Cæsar à Britannia reversus in Galliam, postquam legiones in Hiberna misit, repentinis bellorum tumultibus undique circumventus & confictatus est.



CAPUT III.

Ut eandem secundus Romanorum Claudius adiens, Orcadas etiam Romano insulas adjecerit Imperio. Sed & Vespasianus ab eo missus, Vectam quoque insulam Romanis subdidit.

ANNO autem ab Urbe condita septingentesimo nonagesimo nono Claudius Imperator, ab Augusto quartus, cupiens utilem se reipublice ostentare Principem, bellum ubique, & victoriam undecumque quaesivit. Itaque expeditionem in Britanniam movit, quae excitata in tumultum propter non redhibitos transfugas videbatur. Transvectus in insulam est, quam neque ante Julium Caesarem, neque post eum quisquam adire ausus fuerat, ibique sine ullo praelio ac sanguine intra paucissimos dies plurimam insulae partem in ditionem recipit. Orcadas etiam insulas ultra Britanniam in Oceano positas Romano adjecit Imperio, ac sexto quam profectus erat mense Romam rediit, filioque suo Britannici nomen imposuit. Hoc autem bellum quarto imperii sui anno complevit, qui est annus ab Incarnatione Domini quadagesimus sextus: quo etiam anno fames gravissima per Syriam facta est, quae in Actibus Apostolorum per Prophetam Agabum praedicta esse memoratur. Ab eodem Claudio Vespasianus, qui post Neronem imperavit, in Britanniam missus, etiam Vectam insulam Britanniae proximam à Meridie, Romanorum ditioni subjugavit; quae habet ab Oriente ad Occidentem triginta circiter millia passuum ab Austro in Boream duodecim, in Orientalibus suis partibus mari sex millium, in Occidentalibus trium à Meridiano Britanniae littore distans. Succedens autem Claudio in Imperium Nero, nihil omnino in re militari ausus est. Unde inter alia Romani regni detrimenta innumera Britanniam penè amisit: nam duo sub eo nobilissima oppida illic capta atque subversa sunt.

CAPUT IV.

Ut Lucius Brittanorum Rex missis ad Eleutherium Papam litteris Christianum se fieri petierit.

ANNO ab Incarnatione Domini centesimo quinquagesimo sexto Marcus Antoninus Verus, decimus-quartus ab Augusto, regnum cum Aurelio Commodio fratre suscepit: quorum temporibus cum Eleutherius vir sanctus Pontificatui Romanæ Ecclesiæ præesset; misit ad eum Lucius Brittaniarum Rex epistolam, obsecrans ut per ejus mandatum Christianus efficeretur: & mox effectum piæ postulationis consecutus est, susceptamque fidem Britanni usque in tempora Diocletiani Principis inviolatam integramque quietâ in pace servabant.

CAPUT V.

Ut Severus receptam Britannia partem vallo à cæterâ distinxerit.

ANNO ab Incarnatione Domini centesimo octogesimo nono, Severus genere Afer Tripolitanus, ab oppido *Lepti*, decimus-septimus ab Augusto Imperium adeptus, decem & septem annis tenuit. Hic naturâ sævus, multis semper bellis lacescit, fortissimè quidem rempublicam, sed laboriosissimè rexit. Victor ergo civilium bellorum, quæ ei gravissima occurrerant, in Britannias defectu penè omnium sociorum trahitur, ubi magnis gravibusque præliis sæpe gestis, receptam partem insulæ à cæteris indomitis gentibus, non muro, (ut quidam æstimant) sed vallo distinguendam putavit. Murus etenim de lapidibus, vallum verò (quo ad vim hostium repellendam castra muniuntur) sit de cespitibus, quibus circumcis, è terrâ velut murus extruitur supra terram, itaut antè sit fossa, de quâ levati sunt cespites, supra quam fudes de lignis fortissimis præfiguntur. Itaque Severus magnam fossam, firmis-

firmissimūque vallum, crebris insuper turribus communitum, à mari ad mare dedit: ibique apud Eboracum oppidum morbo obiit, relinquens duos filios, Bassianum & Geta: quorum Geta hostis publicus iudicatus interiit; Bassianus verò Antonini cognomine adsumpro, regno potitus est.

CAPUT VI.

De Imperio Diocletiani, & ut Christianos persecutus sit.

ANNO Incarnationis Dominicæ ducentesimo octogesimo sexto, Diocletianus tricesimus tertius ab Augusto Imperator ab exercitu electus, annis viginti fuit, Maximianūque cognomento Herculium socium creavit Imperii. Quorum tempore Carausius quidam, genere quidem infimus, sed consilio & manu promptus, cum ad observanda Oceani littora (quæ tunc Franci & Saxones infestabant) positus, plus in perniciem quàm in prædictum reipublicæ ageret, creptam prædonibus prædam nimiam ex parte restituendo dominis, sed sibi soli vindicando, accendens suspicionem, quia ipsos quoque hostes ad incurfandos fines artificii negligentiam permetteret. Quamobrem à Maximiano iussus occidi, purpuram sumpsit, ac Britannias occupavit, quibus sibi per septem annos fortissimè vindicatis ac retentis, tandem fraude Alesti socii sui interfectus est. Alestus verò postea creptam Carausio insulam per triennium tenuit, quem Asclepiodotus Præfectus Prætorum oppressit, Britanniamque post decem annos recepit. Interea Diocletianus in Oriente, Maximianus Herculius in Occidente, vastari Ecclesias, affligi interficique Christianos decimo post Neronem loco præceperunt: quæ persecutio omnibus ferè antè actis diuturnior atque immānior fuit. Nam per decem annos, incendiis Ecclesiarum, proscriptionibus innocentum, cædibus Martyrum incessabiliter acta est. Denique etiam Britanniam complurimā confessionis Deo devotæ gloriæ sublimavit.

CAPUT VII.

Passio Sancti Albani & sociorum ejus, qui eo tempore pro Domino sanguinem fuderunt.

SIQUIDEM in eâ passus est Sanctus Albanus, de quo Presbyter Fortunatus in Laude Virginum, cùm beatorum Martyrum, qui de toto orbe ad Dominum venirent, mentionem faceret, ait: *Albanum egregium fecunda Britannia presert.* qui videlicet Albanus paganus adhuc, cùm perfidorum Principum mandata adversum Christianos sævirent, Clericum quemdam persecutores fugientem hospitio recepit: quem dum orationibus continuis ac vigiliis diu nocturne studere conspiceret, subito divinâ gratiâ respectus, exemplum fidei ac pietatis illius cœpit æmulari, & salutaribus ejus exhortationibus paulatim edoctus, relictis idolatriæ tenebris, Christianus integre ex corde factus est. Cùmque præfatus Clericus aliquot diebus apud eum hospitaretur, pervenit ad aures nefandi Principis, Confessorem Christi, cui necdum fuerat locus martyrii deputatus, penes Albanum latere. Unde statim jussit milites eum diligentius perquirere. Qui cùm ad tugurium Martyris pervenissent, mox se Sanctus Albanus pro hospite suo ac magistro, ipsius habitu, id est, caracallâ quâ vestiebatur, indutus, militibus exhibuit, atque ad Judicem victus perductus est. Contigit autem, Judicem eâ horâ quâ ad eum Albanus adducebatur, aris adsistere, ac dæmonibus hostias offerre. Cùmque vidisset Albanum, mox irâ succensus nimîa, quòd se ille ultrò pro hospite quem susceperat, militibus offerre, ac discrimini dare præsumpisset, ad simulacra dæmonum, quibus adsistebat, eum jussit pertrahere. Quia rebellem, inquiens, ac sacrilegum celare, quàm militibus reddere, maluisti, ut contemptor Divûm meritam blasphemix suæ pœnam lucret, quæcunque illi debebantur supplicia, tu solvere habes, si à cultu nostræ religionis discedere tentas. At Sanctus Albanus, qui se ultrò persecutoribus fidei Christianum esse prodiderat, nequaquam minas.

Principis metuit; sed accinctus armis militiæ spiritualis, palam jussis illius parere nolle pronunciabat. Tum Judex: Cujus, inquit, familiæ vel generis es? Albanus respondit: Quid ad te refert quâ sim stirpe genitus? sed si veritatem religionis audire desideras, Christianum jam me esse, Christianisque officiis vacare cognosce. Ait Judex: Nomen tuum quaero, quod sine morâ mihi insinua. At ille: Albanus, inquit, à parentibus vocor, & Deum verum ac vivum qui universa creavit, adoto semper & colo. Tum Judex repletus iracundiâ dixit: Si vis perennis vitæ felicitate perfrui, Diis magnis sacrificare ne differas. Albanus respondit: Sacrificia hæc quæ à vobis redduntur dæmonibus, nec auxiliari subjectis possunt, nec supplicantium sibi desideria vel vota complere. Quinimmò quicumque his sacrificia simulacris obtulerit, æternas inferni pœnas pro mercede recipiet. His auditis Judex nimio furore commotus, cædi sanctum Dei Confessorem à tortoribus præcepit, autumans se verberibus, quam verbis non poterat, cordis ejus emollire constantiam. Qui cum tormentis afficeretur acerrimis, patienter hæc pro Domino, immò gaudenter ferebat. At ubi Judex tormentis illum superari, vel à cultu Christianæ religionis revocari non posse persensit, capite eum plecti jussit. Cùmque ad mortem duceretur, pervenit ad flumen quod muro & arenâ, ubi feriendus erat, meatu rapidissimo dividebatur: viditque ibi non parvam hominum multitudinem utriusque sexûs, conditionis diversæ, & ætatis, quæ sine dubio, divinitatis instinctu ad obsequium beatissimi Confessoris ac Martyris vocabatur, & ità fluminis ipsius occupabat pontem, ut intra vesperam transire vix posset. Denique cunctis penè egressis Judex sine obsequio in civitate substiterat. Igitur Sanctus Albanus, cui ardens erat devotio mentis ad martyrium, oculis pervenire accessit ad torrentem, & dirigens ad cælum oculos, illic siccato alveo, vidit undam suis cessisse, ac viam dedisse vestigiis. Quod cum inter alios etiam ipse carnifex, qui eum percussurus erat, vidisset, festinavit ei ubi ad locum destinatum morti venerat, occurrere: divino nimirum admonitus instinctu, projectoque ense, quem strictum tenebat, pedibus ejus advolvitur, multum desiderans ut eum

Martyre, vel pro Martyre quem percutere jubebatur, ipse potius mereretur percuti. Dum ergo is ex persecutore factus esset collega veritatis & fidei, ac jacente ferro esset inter carnifices iusta cunctatio, montem cum turbis reverentissimus Dei Confessor ascendit: qui opportunè latus, gratiâ decentissimus, quingentis ferè passibus ab arenâ situs est, variis herbarum floribus depictus, immò usquequaque vestitus, in quo nihil repente arduum, nihil præceps, nihil abruptum, quem lateribus longè latèque deducum in modum æquoris natura complanat, dignum videlicet eum pro insitâ sibi specie venustatis jam olim reddens, qui beati Martyris cruore dicaretur. In hujus ergo vertice Sanctus Albanus dari sibi à Deo aquam rogavit, statimque incluso meatu ante pedes ejus fons perennis exortus est, ut omnes agnoscerent, etiam torrentem Martyri obsequium detulisse: neque enim fieri poterat ut in arduo montis cacumine Martyr aquam quam in fluvio non reliquerat, peteret, si hoc opportunum esse non videret. Qui videlicet fluvius ministerio persoluto, devotione completâ officii testimonium relinquens, reversus est ad naturam. Decollatus itaque Martyr fortissimus, ibidem accepit coronam vitæ, quam repromisit Deus diligentibus se. Sed ille qui piis cervicibus impias intulit manus, gaudere super mortuum non est permisus: namque oculi ejus in terram unâ cum beati Martyris capite deciderunt. Decollatus est ibi tum etiam miles ille, qui antea superno nutu correptus, sanctum Dei Confessorem ferire recusavit: de quo nimirum constat, quia etsi fonte baptismatis non est ablutus, sui tamen est sanguinis lavacro mundatus, ac regni cælestis factus est dignus ingressu. Tunc Judex tantâ miraculorum cælestium novitate percussus, cessari mox à persecutione præcepit, incipiens honorem referre cædi Sanctorum, per quâ eam opinabatur prius à Christianæ fidei posse devotione cessare. Passus est autem beatus Albanus die decimo Kalendarum Juliarum, juxta civitatem Verolanium, quæ nunc à gente Anglorum *Verlamiacæstir*, sive *Varlingacæstir* appellatur, ubi postea redeunte temporum Christianorum serenitate Ecclesia est mirandi operis, atque ejus martyrio condigna exstructa. In quo videlicet loco usque ad hanc

diem curatio infirmorum, & frequentium operatio virtutum celebrati non desinit. Passi sunt eâ tempestate Aaron & Julius, Legionum urbis cives, aliique utriusque sexûs, diversis in locis perplures, qui diversis cruciatibus torti, & inaudita membrorum dissectione lacerati, animas ad supernæ civitatis gaudia perfectæ agone miserunt.

CAPUT VIII.

Ut hac cessante persecutione, Ecclesia in Britannia aliquantulum usque ad tempora Arrianæ vesaniæ pacem habuerit.

AT ubi turbo persecutionis quievit, progressi in publicum fideles Christi, qui se tempore discriminis silvis ac desertis abditivæ speluncis occultaverant, renovant Ecclesias ad solum usque destructas, basilicas sanctorum Martyrum fundant, construunt, perficiunt, ac veluti victoricia signa passim propalant, dies festos celebrant, sacra mundo corde atque ore consciunt: manseruntque hæc in Ecclesiis Christi quæ erant in Britannia, pax usque ad tempora Arrianæ vesaniæ, quæ corrupto orbe toto, hanc etiam insulam, extra orbem tam longè remotam, veneno sui infecti erroris: & hac quasi viâ pestilentia trans Oceanum patefactâ, (non mora) omnis se duces hæreseos cujusque, insulæ novi semper aliquid audire gaudenti, & nihil certi firmiter obtinenti infudit. His temporibus Constantius, qui vivente Diocletiano Galliam Hispaniamque regebat, vir summæ mansuetudinis & civilitatis, in Britannia mortem obiit. Hic Constantinum filium ex concubina Helenâ procreatum, Imperatorem Galliarum reliquit. Scribit autem Eutropius, quod Constantinus in Britannia creatus Imperator, patri in regnum successerit: cuius temporibus Arriana hæresis exorta, & in Nicænâ Synodo detecta, atque damnata, nihilominus exitiabile perfidiæ suæ virus (ut diximus) non solum orbis totius, sed & insulatum Ecclesiis aspersit.

CAPUT IX.

*ut regnante Gratiano Maximus in Britannia Imperator creatus,
cum magno exercitu in Galliam redierit.*

ANNO ab Incarnatione Domini trecentesimo septuagesimo septimo Gratianus quadragesimus ab Augusto, post mortem Valentis, sex annis Imperium tenuit; quamvis jamdudum antea cum Patruo Valente, & cum Valentiniano fratre regnaret: qui cum adfectum & penè collapsum reipublicæ itatum videret, Theodosium virum Hispanum, restituendæ reipublicæ necessitate apud Sirmium purpurâ induit, Orientisque & Thraciæ simul præfecit Imperio. Quæ tempestate Maximus, vir quidem strenuus & probus, atque Augusto dignus, nisi contra sacramenti fidem per tyrannidem emerisisset, in Britannia invitus propemodum ab exercitu Imperator creatus, in Galliam transiit, ubi Gratianum Augustum subita incursione perterritum, atque in Italiam transire meditantem, dolis circumventum interfecit, fratremque ejus Valentinianum Augustum Italiâ expulit. Valentinianus in Orientem refugiens, à Theodosio paternâ pietate susceptus, mox etiam Imperio restitutus est: clauso videlicet intra muros Aquileiæ, & capto atque occiso ab eis Maximo Tyranno.

CAPUT X.

*ut Arcadio regnante, Pelagius Britto contra gratiam Dei
superba bella suscepit.*

ANNO ab Incarnatione Domini trecentesimo nonagesimo quarto, Arcadius filius Theodosii cum fratre Honorio, quadragesimus tertius ab Augusto, regnum suscipiens, tenuit annos tredecim. Cujus temporibus Pelagius Britto contra auxilium gratiæ superbi, venena suæ perfidiæ longè

latéque disperfit, utens cooperatore Juliano de Campaniâ, quem dudum amissi Episcopatus intemperans cupido exagittabat: quibus sanctus Augustinus, sicut & cæteri Patres orthodoxi multis sententiarum catholicarum millibus responderunt; nec eorum tamen dementiam corrigere valebant: sed (quod gravius est) correpta eorum vesania, magis augescere contradicendo, quàm favendo veritati voluit emendati: quod pulchrè verbis heroïcis Prosper Rhetor insinuat, cum ait:

*Contra Augustinum narratur serpere quidam
Scriptor, quem dudum licet orator aduvsit edux-
Quis caput obscuris contextum utcurque cavernis
Tollere humo miserrum propulit anguiculum?
Aut hunc fruge sua agnor. i. povere Britanni,
Aut hic Campano gramine corda tuncet.*

CAPUT XI.

*Ut regnante Honorio Gratianus & Constantinus in Britannia
Tyranni creati, & mox prior in Britannia, secundus
in Gallia sint intercepti.*

ANNO ab Incarnatione Domini quadringentesimo septimo, tenente Imperium Honorio Augusto, filio Theodori minore, loco ab Augusto quadragésimo quarto, ante biennium Romanæ inruptionis, quæ per Alanicum Regem Gothorum facta est, cum gentes Alanotum, Suevotum, Vandalorum, multæque cum his aliæ, protritis Francis, transito Rheno, totas per Gallias sævirent, apud Britannias Gratianus municeps Tyrannus creatur & occiditur. Hujus loco Constantinus ex infimâ militiâ, propter solam spem nominis, sine merito virtutis eligitur: qui continuò ut invasit Imperium, in Gallias transit, ubi sæpe à barbaris incertis fœderibus inlusus, detrimento magis reipublicæ fuit: unde mox jubente Honorio Constantius Comes in Galliam cum exercitu profectus, apud Arelatem civitatem cum clausit, cepit, occidit: Constantemque filium ejus, quem ex

Monacho Cæsarem fecerat, Gerontius Comes suus apud Viennam interfecit. Fracta est autem Roma à Gothis anno millesimo centesimo sexagesimo-quarto suæ conditionis. Ex quo tempore Romani in Britannia regnare cessarunt, post annos ferme quadringentos septuaginta, ex quo Gaius Julius Cæsar eandem insulam adiit. Habitabant autem intra val- lum quod Severum trans insulam fecisse commemoravimus, ad plagam Meridianam, quod civitates, farus, pontes, & strata ibidem factæ, usque hodie restantur: cæterum ulte- riores Britanniae partes, vel eas etiam quæ ultra Britanniam sunt, insulas jure dominandi possidebant.

CAPUT XII.

Ut Brittones à Scottis vastati Pictisque, Romanorum auxilia quaesierint, qui secundo venientes, murum trans insulam fece- rint: sed hoc confestim à prefatis hostibus interrupto, majore sint calamitate depressi.

EX IN Britannia in parte Brittonum, omni armato milite, militaribus universis copiis, totâ floridâ juventutis ala- critate spoliata, quæ Tyrannorum temeritate obducta, nus- quàm ultrâ domum rediit, prædæ tantum patuit, utpote om- nis bellici usus prorsus ignara: denique subitò duabus gen- tibus transmarinis vehementer sævis, Scottorum à Circio, Pictorum ab Aquilone, multos stupet gemitque per annos. Transmarinas autem dicimus has gentes, non quòd extra Britanniam essent positæ; sed quia à parte Brittonum erant remotæ, duobus sinibus maris interjacentibus, quorum unus ab Orientali mari, alter ab Occidentali, Britanniae terras lon- gè latèque intrumpit, quamvis ad se invicem pertingere non possint. Orientalis habet in medio sui urbem *Gnidi*; Occi- dentalis supra se, hoc est, ad dexteram sui habet urbem *Al- cluith*, quod linguâ eorum significat petram *Cluith*: est enim juxta fluvium nominis illius. Ob harum ergo infestationem gentium, Brittones Legatos Romam cum epistolis mittentes, lacrymosis precibus auxilia flagitabant, subjectionemque eorum

eorum continuam, dummodò hostis imminens longiùs arceretur, permittebant. Quibus mox legio destinatur armata, quæ ubi in insulam adveſta, & congreſſa eſt cum hoſtibus, magnam eorum multitudinem ſternens, cæteros ſociorum finibus expulit: eòſque interim à diſſimâ depreſſione liberatos hortata eſt, inſtruere inter duo maria trans inſulam murum, qui arcendis hoſtibus poſſet eſſe præſidio: ſicque domum cum triumpho magno reverſa eſt. At inſulani murum quem juſſi fuerant, non tam lapidibus quàm ceſpitibus conſtruentes, (utpote nullum tanti operis artificem habentes) ad nihil utilem ſtatuunt. Fecerunt autem eum inter duo freta, vel ſinus (de quibus diximus) maris, per millia paſſuum plurima: ut ubi aquarum munitio deerat, ibi præſidio valli ſines ſuos ab hoſtium inruptione defenderent. Cujus operis ibidem facti, id eſt, valli latiffimi & altiffimi, uſque hodie certiffima veſtigia cernere licet. Incipit autem duorum ſermè millium ſpatio à Monafterio *Abercurnig*, ad Occidentem, in loco qui ſermone Piſtorum *Peanſabel*, linguâ autem Anglorum *Pennellum* appellatur; & tendens contra Occidentem terminatur juxta urbem *Alclwith*. Verùm priores inimici ut Romanum militem abiſſe conſpexerant, mox adveſti navibus inrumpunt terminos, caduntque omnia, & quaſi maturam ſegetem obvia quæque metunt, calcant, tranſeunt: unde ruſſum mittuntur Romam Legati, flebili voce auxilium implorantes, ne penitus miſera patria deleteretur, ne nomen Romanæ provinciæ, quod apud eos tam diu claruerat, exterarum gentium improbitate obrutum vileſceret. Ruſſum mittitur legio, quæ inopinata tempore autumnî adveniens, magnas hoſtium ſtrages dedit, eòſque qui evadere poterant, omnes trans maria fugavit, qui priùs anniverſarias prædas trans maria nullo obſiſtente cogere ſolebant. Tum Romani denunciavere Brittonibus, non ſe ultrà ob eorum deſenſionem tam laborioſis expeditionibus poſſe fatigari: ipſos potiùs monent arma corripere, & certandi cum hoſtibus ſtudium ſubire, qui non aliam ob cauſam quàm ſi ipſi inertiâ ſolverentur, eis poſſent eſſe fortiores. Quin etiam, quòd & hoc ſociis quos derelinquere cogeantur; aliquiſd com-

modi adlaturum putabant , murum à mari ad mare recto tramite inter urbes , quæ ibidem ob metum hostium factæ fuerant , (ubi & Severus quondam vallum fecerat) firmo de lapide conlocarunt. quem vidimus hætenus famosum atque conspicuum , sumptu publico privatoque , adjunctâ secum Romanorum manu construebant , octo pedes latum , & duodecim altum , rectâ ab Oriente in Occasum lineâ , ut usque hodie intuentibus clarum est : quo mox condito dant fortia segni populo monita , præbent instruendorum exemplaria armorum. Sed & in littore Oceani ad Meridiem , quo naves eorum habebantur , quia & inde Barbarorum inruptio timebatur , turres per intervalla ad prospectum maris collocant , & valedicunt sociis tanquàm ultrâ non reversuri. Quibus ad sua remeantibus , cognitâ Scotti , Pictique reditûs denegatione , redeunt confestim ipsi , & solito confidentiores facti , omnem Aquilonarem extremâque insulæ partem pro indigenis ad murum usque capeßunt. Statuitur ad hæc in edito arcis acies segnis , ubi trementi corde stupida diu noctûque marcebat. At contra non cessant uncinata hostium tela. Ignavi propugnatores miserrimè de muris tracti solo allidebantur. Quid plura ? relictis civitatibus ac muro , fugiunt ac disperguntur. Insequitur hostis , accelerantur strages cunctis crudeliores prioribus. Sicut enim agni à feris , ità miseri cives discerpuntur ab hostibus ; unde à mansionibus ac possessiunculis suis ejecti , imminens sibi famis periculum latrocinio , ac rapacitate mutuâ temperabant , augentes externas domesticis motibus clades , donec omnis regio totius cibi sustentaculo , excepto venandi solatio , vacuaretur.



CAPUT XIII.

Ut regnante Theodosio minore, cujus tempore Palladius ad Scottos in Christum credentes missus est, Brittones ab Aëtio Consule auxilium flagitantes, non impetraverint.

ANNO Dominicæ Incarnationis quadringentesimo vigesimo-tertio, Theodosius junior post Honorium, quadragesimus quintus ab Augusto regnum suscipiens, viginti & sex annos tenuit; cujus anno Imperii octavo Palladius ad Scottos in Christum credentes à Pontifice Romanæ Ecclesiæ Cælestino primus mittitur Episcopus. Anno autem regni ejus vigesimo tertio, Aëtius, vir illustris, qui & Patricius fuit, tertium cum Symmacho gessit Consulatum. Ad hunc pauperculæ Brittonum reliquiæ mittunt epistolam, cujus principium hoc est: *Aëtio, ter Consuli gemitus Brittanorum*, & in processu epistolæ, ita suas calamitates explicant: Repellunt Barbari ad mare, repellit mare ad Barbaros; inter se oriuntur duo genera funerum; aut jugulamur, aut mergimur. Neque hæc tamen agentes quicquam ab illo auxilii impetrare quiverunt, utpote qui gravissimis eo tempore, bellis cum Bledlâ & Attilâ Regibus Hunnorum erat occupatus. Et quamvis anno ante hunc proximo Bledlâ Attilæ fratris sui sit interemptus insidiis, Attila tamen ipse aded intolerabilis reipublicæ remansit hostis, ut totam penè Europam, excisis invasisque civitatibus atque castellis conroderet. Quin & iisdem temporibus fames Constantinopolim invasit: nec mora, pestis secuta est; sed & plurimi ejusdem urbis muri cum quinquaginta septem turribus corruerunt; multis quoque civitatibus conlapsis, fames, & ærùm pestifer odor plurima hominum millia, jumentorumque delevit.



CAPUT XIV.

*Ut Brittones fame coacti, Barbaros suis à finibus repulerint;
nec mora, frugum copia, pestilentia, & exterminium
gentis secutum sit.*

INTEREA Brittones famæ præfata magis magisque afficiens, ac famam suæ malitiæ posteris diuturnam relinquens, multos eorum coëgit victas infestis prædonibus dare manus; alios verò nunquam, quin potiùs confidentes in divinum, ubi humanum cessabat auxilium, de ipsis montibus, saltibus, ac speluncis continuè rebellabant: & tum primùm inimicis, quæ per multos annos prædas in terrâ agebant, strages dare cœperunt. Revertuntur ergo imprudentes grassatores Hiberni domus, pòst non longum tempus reversuri. Picti in extremâ parte insulæ tunc primùm & deinceps quieverunt, prædas tamen nonnunquam exinde & contritiones de Brittonum gente agere non cessarunt. Cessante autem vastatione hostili, tantis frugum copiis insula, quantis nulla retrò ætas meminit, affluere cœpit: cum quibus & luxuria crescere, & hanc continuè omnium lues scelerum comitati acceleravit; crudelitas præcipuè, & odium veritatis, amorque mendacii, itaut si quis eorum mitior, & veritati aliquatenus propior videretur, in hunc quasi Britannia subversorem omnium odia, telæque sine respectu contorquerentur. Et non solùm hæc sæculares viri, sed etiam ipse græx Domini, ejusque Pastores egerunt, ebrietati, animositati, litigio, contentioni, invidiæ, cæterisque hujusmodi facinoribus sua colla, abjecto levi jugo Christi, subdentes. Interea subitò corruptæ mentis homines acerba pestis corripuit, quæ in brevi tantam ejus multitudinem stravit, ut ne sepeliendis quidem mortuis vivi sufficerent: sed ne morte quidem suorum, nec timore mortis, hi qui supererant, à morte animæ, quâ peccando sternebantur, revocari poterant: unde non multò pòst acrior gentem peccatricem ultio diri sceleris secuta est. Initum namque est confi-

lium, quid agendum, ubi quarendum esset præsidium, ad evitandas vel repellendas tam feras, tamque creberrimas gentium Aquilonariarum irruptiones: placuitque omnibus cum suo Rege Vurtigerno, ut Saxonum gentem de transmarinis partibus in auxilium vocarent: quod Domini nutu dispositum esse constat, ut veniret contra improbos malum, sicut evidentiùs rerum exitus probavit.

CAPUT XV.

Ut invitata in Britanniam gens Anglorum, primò quidem adversarios longiùs abire compulerit; sed non multò post juncto cum his fœdere, in socios arma verterit.

ANNO ab Incarnatione Domini quadringentesimo nono, Marcianus cum Valentiniano quadragessimus sextus ab Augusto, Regnum adeptus, septem annis tenuit. Tunc Anglorum sive Saxonum gens, invitata à Rege præfato; in Britanniam tribus longis navibus advehitur, & in Orientali parte insulæ jubente eodem Rege locum manendi, quasi pro patriâ pugnatura, re autem verà hanc expugnatura suscepit. Initio ergo certamine cum hostibus, quæ ab Aquilone ad aciem venerant, victoriam sumpserunt Saxones. Quod ubi domi nunciatum est, simul & insulæ fertilitas, ac legnitia Brittonum: mittitur confestim illò classis prolixior armorum, ferens manum fortiozem, quæ præmissæ adjuncta cohorti, invincibilem fecit exercitum. Susceperunt ergo qui advenerant, donantibus Brittanis, locum habitationis inter eos, eâ conditione ut hi pro patriæ pace & salute contra adversarios militarent, illi militantibus debita stipendia conferrent. Advenerant autem de tribus Germaniæ populis fortioribus, id est, Saxonibus, Anglis, Vitis. De Vitarum origine sunt Cantuarii & Vestuarii; hoc est, ea gens quæ Vêtam tenet insulam, & ea quæ usque hodie in provinciâ Occidentalium Saxonum, Vitarum natio nominatur, posita contra ipsam insulam Vêtam. De Saxonibus, id est, eâ regione quæ nunc antiquorum Saxonum cognominatur,

venere Orientales Saxones , Meridiani Saxones , Occidui Saxones. Porro de Anglis, hoc est, de illâ patriâ quæ Angulus dicitur , & ab eo tempore usque hodie manere desertus inter provincias Vitarum & Saxonum perhibetur, Orientales Angli; Mercii, tota Nordanhymbrorum progenies, id est, illarum gentium quæ ad Boream Humbri fluminis inhabitant, cæterique Anglorum populi sunt orti. Duces fuisse perhibentur eorum primi duo fratres Hengist & Horfa; è quibus Horfa postea occisus in bello à Brittonibus, hætenus in Orientalibus Cantæ partibus monumentum habet suo nomine insigne. Erant autem filii Viðgilsf, cujus pater Vitta, cujus pater Vesta, cujus pater Voden, de cujus stirpe multarum provinciarum regum genus originem duxit. Non mora ergo, confluentibus cætatim in insulam gentium memoratarum catervis, grandescere populus cæpit advenarum, itaut ipsi quoque qui eos advocaverant, indigenis essent terrori. Tum subito inito ad tempus fœdere cum Pictis, quos longius jam bellando pepulerant, in socios arma vertere incipiunt. Et primum quidem annonas sibi eos affluentius ministrare cogunt, quærentesque occasionem divortii, protestantur, nisi profusior sibi alimentorum copia daretur, se cuncta insulæ loca rupto fœdere vastaturos. Neque aliquando segnius minas effectibus prosequitur: siquidem (ut breviter dicam) accensus manibus paganorum ignis, justas de sceleribus populi, Dei ultiones expetiit, non illius impar qui quondam à Chaldæis succensus Hierosolymorum mœnia, immò & ædificia cuncta consumpsit. Sic enim & hinc agente impio victore, immò disponente justo Judice, proximas quasque civitates, agrôsque depopulans, ab Orientali mari usque ad Occidentale, nullo prohibente, suum continuavit incendium, totamque propè insulæ pereuntis superficiem obtexit. Ruebant ædificia publica, simul & privata; passim Sacerdotes inter altaria trucidabantur; Præsules cum populis, sine ullo respectu honoris, ferro pariter & flammis absumebantur; nec erat qui crudeliter interemptos sepulturæ traderet. Itaque nonnulli de miserandis reliquiis in montibus comprehensi catervatim jugulabantur: alii fame con-

fecti, præcedentes manus hostibus dabant, pro accipiendis alimentorum subsidiiis æternum subituri servitium; si tamen non continuò trucidarentur: alii transmarinas regiones dolentes petebant; alii perstantes in patriâ trepidi pauperem vitam montibus, silvis, vel rupibus arduis, suspectâ semper mente agebant.

CAPUT XVI.

Ut Brittones primam de gente Anglorum victoriam, duce Ambrosio Romano homine, sumpserint.

AT ubi hostilis exercitus, exterminatis dispersisque insulæ indigenis, domum reversus est, cœperunt & illi paulatim vires animosque resumere, emergentes de latibulis quibus abditi fuerant, & unanimo consensu auxilium cœleste precantes, ne usque ad internecionem usquequaque delerentur. Utebantur eo tempore duce Ambrosio Aureliano, viro modesto, qui solus fortè Romanæ gentis præfata tempestate superfuera, occisis in eadem parentibus regium nomen & insigne ferentibus. Hoc ergo duce vires capessunt Brittones, & victores provocantes ad prælium, victoriam (ipsi Deo favente) suscipiunt. Et ex eo tempore nunc cives, nunc hostes vincebant, usque ad annum obsessionis Badonici montis, quando non minimas eisdem hostibus strages dabant, quadragesimo circiter & quarto anno adventus eorum in Britanniam. Sed hæc postmodum.

CAPUT XVII.

Ut Germanus Episcopus cum Lupo in Britanniam navigans, & primò maris, & postmodum Pelagianorum tempestatem divinâ virtute sedaverit.

ANTE paucos sanè adventus eorum annos hæresis Pelagiana per Agricolam inlata, Severiani Episcopi

filium, fidem Britanniarum scdâ peste commaculaverat. Verùm Britanni cùm neque suscipere dogma perversum, gratiam Christi blasphemando, ullatenus vellent, neque versutiam nefariæ persuasionis refutare verbis certando sufficerent; inveniunt salubre consilium, ut à Gallicanis Antistitibus auxilium belli spiritualis inquirant. Quam ob causam collectâ magnâ Synodo quærebatur in commune, qui illuc ad succurrendum fidei mitti deberent: atque omnium iudicio eligebantur apostolici Sacerdotes Germanus Autissiodorensis, & Lupus Treassinæ civitatis Episcopi, qui ad confirmandam fidem gratiæ cælestis, in Britanniam venirent. Qui cùm promptâ devotione preces & iussa sanctæ Ecclesiæ suscepissent, intrant Oceanum, & usque ad medium itineris, quo à Gallico sinu in Britanniam usque tenditur, secundis flatibus navis tuta volabat. Tum subitò occurrit inimica vis dæmonum, qui tantos talésque viros ad recuperandam tendere populis salutem inviderent: concitant procellas, cælum diémque nubium nocte subducunt; ventorum furores vela non sustinent; cedebant ministeria victa naturarum; ferebatur navigium oratione, non viribus: & casu dux ipse vel Pontifex fractus corpore, lassitudine ac sopore resolutus est. Tum verò quasi repugnatore cessante, tempestas excitata convaluit, & jam navigium superfusis fluctibus mergebatur. Tum Beatus Lupus, omnesque turbati excitant seniore elementis furentibus opponendum; qui periculi immanitate constantior, Christum invocat, & adsumpto in nomine sanctissimæ Trinitatis levi aquæ aspergine, fluctus fævientes opprimit, collegam commoner, hortatur universos, oratio uno ore & clamore profunditur: adest divinitas, fugantur inimici, tranquillitas serena subsequitur, venti è contrario ad itineris ministeria revertuntur, decursisque brevî spatiis pelagi, optati littoris quiete potiuntur. Ibi conveniens ex diversis partibus multitudo excepit Sacerdotes, quos venturos etiam vaticinatio adversa prædixerat. Nunciabant enim sinistri spiritus quod timebant, qui imperio Sacerdotum dum ab obsessis corporibus detruduntur, & tempestatis ordinem, & pericula quæ intulerant, fatebantur, victorūque se eorum meritis & imperio
non

non negabant. Interèa Britanniæ insulam apostolici Sacerdotes raptim opinione, prædicatione, virtutibus impleverunt: divinûsque per eos sermo, quotidie non solum in Ecclesiis, verum etiam per trivia & per rura prædicabatur; itaut passim & fideles Catholici firmarentur, & depravati viam correctionis agnoscerent. Erat illis Apostolorum instar, & gloria & auctoritas per conscientiam, doctrina per litteras, virtutes ex meritis. Itaque regionis universitas in eorum sententiam prompta transierat. Latebant abditi sinistræ persuasionis auctores, & more maligni spiritûs, gemebant perire sibi populos evadentes, ad extremum diuturnâ meditatione conceptâ præsumunt inire conflictum. Proce-
dunt conspicui divitiis, veste fulgentes, circumdati adser-
tatione multorum discrimenque certaminis subire malue-
runt, quàm in populo, quem subverterant, pudorem taci-
turnitatis incurrere, nè viderentur se ipsi silentio damnavisse. Illic planè immensa multitudo, etiam cum conjugibus ac li-
beris excita convenerat, aderat populus & spectator futurus
& iudex, astabant partes dispari conditione dissimiles; hinc
divina fides, inde humana præsumptio; hinc pietas, inde
superbia; inde Pelagius auctor, hinc Christus. Primo in loco
beatissimi Sacerdotes Germanus atque Lupus præbuerunt
adversariis copiam disputandi, quæ solâ nuditate verborum,
diu inaniter & aures occupavit & tempora: deinde Antisti-
tes venerandi, torrentes eloquii sui cum apostolicis & evan-
gelicis imbribus profuderunt: miscebatur sermo proprius
cum divino, & adserciones modestissimas, lectionum testi-
monia sequebantur: convincitur vanitas, perfidia confuta-
tur; itaut ad singulas verborum objectiones errare se, dum
respondere nequivit, fateretur: populus arbiter vix manus
continet; iudicium tamen clamore testatur.



CAPUT XVIII.

Ut idem filiam Tribuni cæcam inluminaverit, ac deinde ad sanctum Albanum perveniens, reliquias ibidem & ipsius acceperit, & beatorum Apostolorum, sive aliorum Martyrum posuerit.

TUM subito quidam Tribuniciz potestatis cum conjugē procedit in medium, filiam decem annorum cæcam curandam Sacerdotibus offerens, quam illi adversariis offerri præceperunt: sed hi conscientia puniente deterriti, jungunt cum parentibus preces, & curationem parvulæ à Sacerdotibus deprecantur: qui inclinatos animo adversarios intuentes, orationem breviter fundunt: ac deinde Germanus plenus Spiritu sancto, invocat Trinitatem; nec mora, adhaerentem lateri suo capsulam cum Sanctorum reliquiis collo avulsam manibus comprehendit, eamque in conspectu omnium puellæ oculis applicuit, quos statim evacuatos tenebris lumen veritatis implevit. Exultant parentes, miraculum populus contremiscit: postquam diem ira ex animis omnium suasio iniqua deleta est, ut Sacerdotum doctrinam sitientibus desiderii sectarentur. Comprensa itaque perversitate damnabili, ejusque auctoribus confutatis, atque animis omnium fidei puritate compositis, Sacerdotes beati Albanum Martyrem, auctori Deo per ipsum gratias acturi petierunt, ubi Germanus omnium Apostolorum, diversorumque Martyrum secum reliquias habens, factâ oratione jussit revelli sepulcrum, pretiosa ibidem munera conditurus; arbitrans opportunum, ut membra Sanctorum ex diversis regionibus collecta, quos paribus meritis receperat cælum, sepulcri quoque unius teneret hospitium. Quibus depositis honorificè, atque sociatis, de loco ipso, ubi beati Martyris effusus erat sanguis, massam pulveris secum portaturus abstulit, in quâ apparebat, cruore servato, rubuisse Martyrum cædem persecutore pallente. Quibus ita gestis, innumera hominum eodem die ad Dominum turba conversa est.

CAPUT XIX.

Ut idem causâ infirmitatis ibidem detentus, & incendia domorum orando restinxeris; & ipse per visionem à suo sit languore curatus.

U NDE dum redeunt, insidiator inimicus casualibus laqueis præparatis, Germani pedem lapsus occasione contrivit, ignorans, merita illius, sicut Job beatissimi, afflictione corporis propaganda: & dum aliquandiu uno in loco infirmitatis necessitate teneretur, in vicinâ quâ manebat casulâ exarsit incendium: quod consumptis domibus quæ illuc palustri arundine tegebantur, ad illud habitaculum in quo idem jacebat, flabris stimulantibus ferebatur. Concussus omnium ad Antistitem convolvavit, ut elatus manibus, periculum quod imminebat, evaderet: quibus increpatis, moveri se, fidei præsumptione non passus est. At multitudo omnis desperatione perterrita, obviam currit incendio. Sed ut Dei potentia manifestior appareret, quidquid custodire tentaverat turba, consumitur; quod verò jacens, & infirmus defenderat, reseraro hospitio sancti viri, expavescens flamma transilivit, ultrâ citràque desævians, & inter globos flammantis incendii, incolume tabernaculum, quod habitator inclusus servabat, emicuit. Exultat turba miraculo, & victam se divinis virtutibus gratulatur. Excubabat diebus ac noctibus ante tugurium pauperis vulgus sine numero; hi animas curare cupientes, hi corpora. Refertur nequeunt quæ Christus operabatur in famulo, qui virtutes faciebat infirmus: & cum debilitati suæ nihil remedii pateretur adhiberi, quadam nocte candentem niveis vestibus vidit sibi adesse personam, quæ manu extensâ jacentem videretur ad tollere, eumque consistere firmis vestigiis imperabat: post quam horam ita fugatis doloribus recepit pristinam sanitatem, ut die reddito itineris laborem subiret intrepidus.

CAPUT XX.

Ut iidem Episcopi Brittonibus in pugna auxilium caleste tulerint, sisque domum reversi sint.

INTEREA Saxones, Pictique bellum adversum Brittones junctis viribus susceperunt, quos eadem necessitas in castra contraxerat: & cum trepidi partes suas penè impares judicarent, sanctorum Antistitum auxilium petierunt: qui promissum maturantes adventum, tantum paventibus fiducia contulerunt, ut accessisse maximus crederetur exercitus. Itaque Apostolicis ducibus Christus militabat in castris. Aderant etiam Quadragesimæ venerabiles dies, quos religiosiores reddebat præsentia Sacerdotum in tantum, ut quotidianis prædicationibus instituti certatim populi, ad gratiam baptismatis convolarent. Nam maxima exercitus multitudo undam lavacri salutaris expetiit, & Ecclesia ad diem Resurrectionis Dominicæ frondibus contexta componitur, atque in expeditione campestris instar civitatis aptatur. Madidus baptisinate procedit exercitus, fides fervet in populo, & contempto armorum præsidio, divinitatis expectatur auxilium. Institutio vel forma castrorum hostibus nunciatur, qui victoriam quasi de inermi exercitu præsumentes, adsumptâ alacritate festinant; quorum tamen adveptus exploratione cognoscitur: cumque emensâ Tollemnitate Paschali, recens de lavacro pars major exercitus arma capere, & bellum parare tentaret. Germanus ducem se prælii proficetur, eligit expeditos, circumjecta percurrit, & è regione quâ hostium sperabatur adventus, vallem circumdatam mediis montibus intuetur. Quo in loco novum componit exercitum, ipse dux agminis. Et jam aderat ferox hostium multitudo, quam adpropinquare intuebantur in insidiis constituti. Tunc subito Germanus signifer universos admonet & prædicat, ut voci suæ uno clamore respondeant; securisque hostibus qui se insperatos adesse confiderent, *Alleluia* tertio repetitum Sacerdotes exclamant. Sequitur una vox omnium, & elatum

clamorem repercusso aëre montium conclusa multiplicant : hostile agmen terrore prosternitur , ut super se non solum rupes circumdatas , sed etiam ipsam cæli machinam contremiscunt , trepidationique injectæ vix sufficere pedum pernicitas credebatur. Passim fugiunt , arma projiciunt , gaudentes vel nuda corpora eripuisse discrimini. Plures etiam timore præcipientes , flumen quod mensi erant , devoravit. Ultionem suam innocens exercitus intuetur , & victoriæ concessæ oriofus spectator efficitur. Spolia colliguntur exposita , & cælestis palmæ gaudia miles religiosus amplectitur. Triumphant Pontifices hostibus suis sine sanguine , triumphant victoriâ fide obtentâ , non viribus. Composita itaque insula , securitate multiplici , superatisque hostibus , vel invisibilibus , vel carne conspicuis , reditum moliuntur Pontifices. Quibus tranquillam navigationem , & merita propria & intercessio beati Martyris Albani paraverunt , quietosque eos suorum desideriis felix carina restituit.

CAPUT XXI.

Ut renascentibus virgultis Pelagiana pestis Germanus cum Severo Britanniam reversus , prius claudo juveni incessum , deinde & populo Dei , condemnatis sive emendatis hæreticis , gressum recuperavit fidei.

NEc multo interposito tempore , nunciatur ex eadem insulâ , Pelagianam perversitatem iteratò paucis auctoribus dilatari : rursusque ad beatissimum virum preces Sacerdotum omnium deferuntur , ut causam Dei , quam prius obtinuerat , tutaretur. Quorum petitioni festinus obtemperat. Namque adjuncto sibi Severo totius sanctitatis viro , (qui erat discipulus beatissimi Patris Lupi , Treccassinorum Episcopi , & tunc Treviris ordinatus Episcopus , gentibus primæ Germaniæ verbum Dei prædicabat) mare conscendit , & consentientibus elementis tranquillo navigio Britannias petiit. Interea sinistri spiritus pervolantes totam insulam , Germanum venire invitis vaticinationibus nunciabant ; in tantum

ut Elafius quidam regionis illius primus, ut in occursum Sanctorum sine ullâ manifesti nuncii relatione properaret, exhibens secum filium quem in ipso flore adolescentiæ debilitas dolenda damnaverat. Erat enim arescentibus nervis contracto poplite, cui per siccitatem cruris usus vestigii negabatur. Hunc Elafium provincia tota subsequitur: veniunt Sacerdotes, occurrit infcia multitudo, confestim benedictio, & sermonis divini doctrina profunditur. Recognoscunt populum in eâ quâ illum reliquerant credulitate durantem: intellegunt culpam esse paucorum, inquirunt auctores, inventosque condemnant. Cum subito Elafius pedibus advolvitur Sacerdotum, offerens filium, cujus necessitatem ipsâ debilitas etiam sine precibus adlegabat: fit communis omnium dolor, præcipuè Sacerdotum, qui conceptam misericordiam ad divinam clementiam contulerunt: statimque adolescentem beatus Getmanus sedere compulit, adtrestat poplitem debilitate curvatum, & per tota infirmitatis spatia medicabilis dextra pecturrit, salubremque tactum sanitas festina subsequitur, ariditas succum, nervi officia receperunt, & in conspectu omnium filio incolumitas, patri filius restituitur. Implentur populi stupore miraculi, & in pectoribus omnium fides Catholica inculcata firmatur. Prædicatio deinde ad plebem de prævaricationis emendatione convertitur. Omniumque sententiâ pravitatis auctores qui erant expulsi insulâ, Sacerdotibus adducuntur ad Mediterranea deferendi, ut & regio absolutione, & illi emendatione fruerentur. Factumque est ut in illis locis multo ex eo tempore, fides intemerata perduraret. Itaque compositis omnibus beati Sacerdotes eâ quâ venerat prosperitate redierunt. Porro Germanus post hæc ad Ravennam pro pace Armoricanæ gentis supplicaturus advenit, ibique à Valentiniano, & Placidia matre ipsius summâ reverentiâ susceptus, migravit ad Christum. Cujus corpus honorifico agmine comitantibus virtutum operibus, suam deferretur ad urbem. Nec multò post Valentinianus ab Aëtii Patricii quem occiderat, satellitibus interimitur, anno imperii Marciani sexto, cum quo simul Hesperium concidit Regnum.

CAPUT XXII.

Ut Brittones quiescentibus ad tempus exteris, civilibus sese bellis contriverint simul, & majoribus flagitiis submerferint.

INTEREA Britannia cessatum quidem est parumper ab externis, sed non à civilibus bellis. Manebant exterminia civitatum ab hoste dirutarum ac desertarum, pugnabant contra invicem qui hostem evaserant cives. Attamen recenti adhuc memoria calamitatis & cladis inflictae servabant utcumque Reges, Sacerdotes, privati, & Optimates suum quique ordinem. At illis decedentibus, cum successisset ætas tempestatis illius nescia, & præsentis solum serenitatis statum experta, ita cuncta veritatis ac justitiæ modamina concussa ac subversa sunt, ut earum non dicam vestigium, sed ne memoria quidem, præter in paucis, & valde paucis ulla appareret. Quin inter alia inenarrabilium scelerum facta, quæ Historicus eorum Gildas flebili sermone describit; & hoc addebant, ut nunquam genti Saxonum, sive Anglorum secum Britanniam incolenti, verbum fidei prædicando committerent. Sed non tamen divina pietas plebem suam, quam præscivit, deseruit, quin multo digniores genti memorata præcones veritatis, per quos crederet, destinavit.

CAPUT XXIII

Ut sanctus Papa Gregorius Augustinum cum Monachis ad prædicandum genti Anglorum mittens, epistolâ quoque illos exhortatoriâ ne à laborando cessarent, confortaverit.

SIQUIDEM anno ab Incarnatione Domini quingentesimo octogesimo secundo, Mauricius ab Augusto quinquagesimus quartus Imperium suscipiens, uno & viginti annis tenuit. Cujus anno regni decimo Gregorius, vir do-

Ætinâ & actione præcipuus, Pontificatum Romanæ & Apostolicæ sedis sortitus rexit annos tredecim, menses sex, & dies decem; qui divino admonitus instinctu anno decimo quarto ejusdem Principis, adventûs verò Anglorum in Britanniam anno circiter centesimo quinquagesimo, misit servum Dei Augustinum, & alios plures cum eo Monachos timentes Dominum, prædicare verbum Dei genti Anglorum. Qui cum jussis Pontificalibus obtemperantes, memoratum opus adgredi cœpissent, jamque aliquantum itineris confecissent, perculli timore inertî, redire domum potius, quàm barbaram, feram, incredulâque gentem, cujus ne linguam quidem nossent, adire cogitabant, & hoc esse tutius communi consilio decernebant. Nec mora, Augustinum, quem eis Episcopum ordinandum (si ab Anglis susciperentur) disposuerat, domum remittunt, qui à beato Gregorio humilî supplicatû obtineret ne tam periculosam, tam laboriosam, tam incertam peregrinationem adire deberent. Quibus ille exhortatorias mittens litteras, in opus eos verbi, divino confisos auxilio, proficisci suadet. Quorum videlicet litterarum ista est forma:

Gregorius servus servorum Dei, servis Domini nostri. Quia melius fuerat bona non incipere, quàm ab his quæ cœpta sunt, cogitatione retrorsum redire, summo studio (dilectissimi filii) oportet ut opus bonum, quod auxiliante Domino cœpistis, impleatis. Nec labor vos ergo itineris, nec male-dictorum hominum linguæ deterreant: sed omni instantiâ, omnique fervore, quæ inchoastis, Deo auctore peragite: scientes quòd laborem magnum major æternæ retributionis gloria sequitur. Remeanti autem Augustino Præposito vestro, quem & Abbatem vobis constituimus, in omnibus humiliter obedite: scientes hoc vestris animabus per omnia profuturum, quidquid à vobis fuerit in ejus admonitione completum. Omnipotens Deus suâ vos gratiâ protegat, & vestri laboris fructum in æternâ patriâ me videre concedat. Quatenus & si vobiscum laborare nequeo, simul in gaudio retributionis inveniar, quia laborare scilicet volo. Deus vos incolumes custodiat, dilectissimi filii. Data die decimâ Kalendarum Augustarum, imperante Domino nostro Mauricio
Tiberio

Tiberio piissimo Augusto anno decimo quarto, post Consulatum ejusdem Domini nostri anno decimo tertio, Indictione decimâ quartâ.

CAPUT XXIV.

Ut Arelatensi Episcopo epistolam pro eorum susceptione miserit.

MISTET etiam tuncisdem venerandus Pontifex ad Ethe-
rium Arelatensem Episcopum, ut Augustinum Brit-
tanniam pergentem benignè susciperet, litteras, quarum iste
est textus: Reverentissimo & sanctissimo fratri Etherio Co-
episcopo, Gregorius servus servorum Dei. Licet apud Sa-
cerdotes habentes Deo placitam caritatem religiosi viri nul-
lius commendatione indigeant; quia tamen aptum scriben-
di se tempus ingessit, fraternitati vestræ nostra mittere scri-
pta curavimus: insinuantes, latores præsentium Augustinum
servum Dei, de cujus certi sumus studio, cum aliis servis
Dei, illuc nos pro utilitate animarum, auxiliante Domino,
direxisse: quem necesse est ut sacerdotali studio Sanctitas
vestra adjuvare, & sua ei solaria præbere festinet. Cui etiam,
ut promptiores ad suffragandum possitis existere, causam vo-
bis injunximus subtiliter indicare. Scientes quod eâ cognitâ,
totâ vos propter Deum devotione ad solatiandum, quâ
res exigit, commodetis. Candidum præterea Presbyterum,
communem filium, quem ad gubernationem patrimoniali
Ecclesiæ nostræ transmissimus, caritati vestræ in omnibus
commendamus. Deus te incolumem custodiat, reverentissi-
me frater. Datâ die decimâ Kalendarum Augustarum, im-
perante Domino nostro Mauricio Tiberio piissimo Augusto,
anno decimo quarto, post Consulatum ejusdem Domini no-
stri anno decimo tertio, Indictione decimâ quartâ.



CAPUT XXV.

*Ut veniens Britanniam Augustinus, primò in insulâ Tanato,
Regi Cantuariorum predicarit; & sic acceptâ ab eo
licentiâ, Cantiam pradicaturus intraverit.*

ROBORATUS ergo confirmatione beati Patris Gregorii Augustinus cum famulis Christi, qui erant cum eo, rediit in opus verbi, pervenitque Britanniam. Erat eo tempore Rex Ædilbertus in Cantia potentissimus, qui ad confinium usque Humbri fluminis maximi, quo Meridiani & Septentrionales Anglorum populi dirimuntur, fines Imperii tetenderat. Est autem ad Orientalem Cantix plagam Tanatos insula non modica, id est, magnitudinis juxta consuetudinem æstimationis Anglorum, familiarum sexcentarum, quam à continenti terrâ secernit fluvius *Vantsum*, qui est latitudinis circiter trium stadiorum, & duobus tantum in locis est transieabilis. Utrumque enim caput protendit in mare. In hac ergo adplicuit servus Domini Augustinus, & socii ejus viri (ut ferunt) ferme quadraginta. Acceperunt autem, præcipiente beato Papâ Gregorio, de gente Francorum interpretes, & mittens ad Ædilbertum, mandavit se venisse de Româ, ac nuncium ferre optimum, qui sibi obtemperantibus, æterna in cælis gaudia, & regnum sine fine cum Deo vivo & vero futurum, sine ullâ dubitatione promitteret. Qui hæc audiens, manere illos in eâ quam adierant insulâ, & eis necessaria ministrari, donec videret quid eis faceret, jussit. Nam & antea fama ad eum Christianæ religionis pervenerat, utpote qui & uxorem habebat Christianam de gente Francorum regiâ, nomine Beretham, quam eâ conditione à parentibus acceperat, ut ritum fidei ac religionis suæ cum Episcopo, quem ei adiutorem fidei dederant, nomine Liudhardo, inviolatam servare licentiam haberet. Post dies ergo aliquot, venit ad insulam Rex, & residens sub divo, jussit Augustinum cum sociis ad suum ibidem advenire colloquium. Caverat autem ne in aliquam

domum ad se introirent, veteri usus augurio, ne superventu suo, si quid maleficæ artis habuissent, eum superando deciperent. At illi non dæmoniacæ, sed divinæ virtute præditi veniebant, crucem pro vexillo ferentes argenteam, & imaginem Domini Salvatoris in tabulâ depictam, lætantiisque canentes, pro suâ simul & eorum propter quos & ad quos venerant, salute æternâ, Domino supplicabant. Cùmque ad jussionem Regis residentes, verbum ei vitæ, unâ cum omnibus qui aderant, ejus comitibus prædicarent; respondit ille dicens: Pulchra sunt quidem verba & promissa quæ adfertis; sed quia nova sunt, & incertâ, non his possum ad sensum tribuere, relictis eis quæ tanto tempore cum omni Anglorum gente servavi. Verùm quia de longè huc peregrini venistis, & ut ego mihi videor perspexisse, ea quæ vos vera & optima credebatis, nobis quoque communicare desiderastis; nolumus molesti esse vobis: quin potius benigno vos hospitio recipere, & quæ victui vestro sunt necessaria, ministrare curamus: nec prohibemus quin omnes quos potestis fidei vestræ religionis prædicando societis. Dedit ergo eis mansionem in civitate Dorovernensi, (quæ Imperii sui totius erat metropolis) eisque, ut promiserat, cum administratione victûs temporalis, licentiam quoque prædicandi non abstulit. Fertur autem quoddam adpropinquantes civitati, more suo cum cruce sanctâ, & imagine magni Regis Domini nostri JESU CHRISTI, hanc lætantiâ consonâ voce modularentur: Deprecamur te, Domine, in omni misericordiâ tuâ, ut auferatur furor tuus & ira tua à civitate istâ, & de domo sanctâ tuâ, quoniam peccavimus. Alleluia:

CAPUT XXVI.

Ut idem in Cantia primitivæ Ecclesiæ & doctrinæ sit imitatus, & vitam, atque in urbe Regis, sedem Episcopatus acceperit.

AT ubi datam sibi mansionem intraverunt, cœperunt Apostolicam primitivæ Ecclesiæ vitam imitari, orationibus videlicet assiduâ, vigiliis, ac jejuniis serviendi, ver-

bum vitæ quibus poterant prædicando, cuncta hujus mundi velut aliena spernendo, ea tantum quæ victui necessaria videbantur, ab eis quos docebant, accipiendo, secundum ea quæ docebant, ipsi per omnia vivendo, & paratum ad patiendum adversa quæque, vel etiam ad moriendum pro eâ quam prædicabant veritate, animum habendo. Quid mora? crediderunt nonnulli, & baptizabantur, mirantes simplicitatem innocentis vitæ, ac dulcedinem doctrinæ eorum cælestis. Erat autem prope ipsam civitatem ad Orientem Ecclesia in honorem sancti Martini antiquitus facta, dum adhuc Romani Britanniam incolerent, in quâ Regina, quam Christianam fuisse prædiximus, orare consueverat. In hac ergo & ipsi primò convenire, psallere, orare, Missas facere, prædicare & baptizare cœperunt; donec Rege ad fidem converso, majorem prædicandi per omnia, & Ecclesias fabricandi vel restaurandi licentiam acciperent. At ubi ipse etiam inter alios delectatus vitâ mundissimâ Sanctorum, & promissis eorum suavissimis, quæ vera esse miraculorum quoque multorum ostensione firmaverant, credens baptizatus est; cœpere plures ad audiendum verbum confluere, ac relicto gentilitatis ritu, unitati se sanctæ Christi Ecclesiæ credendo sociare. Quorum fidei & conversioni ita congratulatus esse Rex perhibetur, ut nullum tamen cogeret ad Christianismum; sed tantummodò credentes arctiori dilectione, quasi concives sibi regni cælestis, amplecteretur. Dixerat enim à doctoribus auctoribusque suæ salutis, servitium Christi voluntarium, non coactitium debere esse. Nec distulit, quin etiam ipsis doctoribus suis locum sedis, eorum gradui congruum, in Dorovetniâ metropoli suâ donaret, simul & necessarias in diversis speciebus possessiones confetret.



CAPUT XXVII.

Ut idem Episcopus factus, Gregorio Papa, quæ sint Britannia gesta mandavit, & de necessariis ejus responsa petens acceperit.

INTEREA vir Domini Augustinus venit Arelas, & ab Archiepiscopo ejusdem civitatis Ætherio, juxta quòd jussu sancti Patris Gregorii acceperant, Archiepiscopus genti Anglorum ordinatus est, reversusque in Britanniam, misit continuò Romani Laurentium Presbyterum, & Petrum Monachum, qui beato Pontifici Gregorio gentem Anglorum fidem Christi suscepisse, ac se Episcopum factum esse referrent: simul & de eis quæ necessariæ videbantur, quæstionibus, ejus consulta flagitans. Nec mora, congrua quæsitui responsa recepit; quæ etiam huic Historiæ nostræ commodum duximus indere. *I. Interrogatio Augustini Episcopi Cantuariorum Ecclesie.* De Episcopis, qualiter cum suis Clericis conversentur, vel de his quæ fidelium oblationibus accedunt altari; quantæ debeant fieri portiones, & qualiter Episcopus agere in Ecclesiâ debeat. *Responsio Gregorii Papæ urbis Romæ.* Sacra Scriptura testatur, (quam te benè nosse dubium non est) & specialiter beati Pauli ad Timotheum Epistolæ, in quibus eum erudire studuit qualiter in domo Dei conversari debuisset. Mos autem sedis Apostolicæ est, ordinatis Episcopis præcepta tradere, ut in omni stipendio quod accedit, quatuor debeant fieri portiones; una videlicet Episcopo & familiæ propter hospitalitatem, atque susceptionem; alia Clero; tertia pauperibus; quarta Ecclesiis reparandis. Sed quia tua fraternitas Monasterii regulis erudita, seorsum fieri non debet à Clericis suis, in Ecclesiâ Anglorum, quæ auctore Deo nuper adhuc ad fidem adducta est, hanc debet conversationem instituere, quæ initio nascentis Ecclesiæ fuit patribus nostris; in quibus nullus eorum ex his quæ possidebant, aliquid suum esse dicebat, sed erant eis omnia communia. Si quiverò sunt Clerici extra sacros Ordines constituti,

qui se continere non possunt, sortiri uxores debent, & stipendia sua externis accipere. Quia & de iisdem partibus de quibus præfati sumus, novimus scriptum, quod dividebatur singulis prout cuique opus erat, de eorum quoque stipendio cogitandum atque providendum est, & sub Ecclesiasticâ regulâ sunt tenendi, ut bonis moribus vivant, & canendis psalmis invigilent, & ab omnibus illicitis & cor & linguam & corpus Deo auctore conservent. Communi autem vitâ viventibus jam de faciendis portionibus, vel exhibendâ hospitalitate, & adimplendâ misericordiâ, nobis quid erit loquendum? Cùm omne quod superest, in causis piis ac religiosis erogandum est. Domino omnium magistro docente; quod superest, date eleemosynam, & ecce omnia munda sunt vobis. *II. Interrogatio Augustini.* Cùm una sit fides, cur sunt Ecclesiarum diversæ consuetudines, & altera consuetudo Missarum in sanctâ Romanâ Ecclesiâ, atque altera in Galliarum tenetur? *Responsio Gregorii Pape.* Novit fraternitas tua Romanæ Ecclesiæ consuetudinem, in quâ se meminit nutritam. Sed mihi placet, ut sive in Romanâ, sive in Galliarum, seu in qualibet Ecclesiâ, aliquid invenisti quod plus omnipotenti Deo possit placere, sollicitè eligas, & in Anglorum Ecclesiâ, quæ adhuc ad fidera nova est, institutione præcipuâ, quæ de multis Ecclesiis colligere potuisti, infundas. Non enim pro locis res, sed pro bonis rebus loca amanda sunt. Ex singulis ergo quibusque Ecclesiis, quæ pia, quæ religiosa, quæ recta sunt elige, & hæc quasi in fasciculum collecta, apud Anglorum mentes in consuetudinem deponne. *III. Interrogatio Augustini.* Obsecro quid pati debeat, si quis aliquid de Ecclesiâ furto abstulerit? *Responsio Gregorii.* Hoc tua fraternitas ex personâ furis pensare potest, qualiter valeat corrigi. Sunt enim quidam qui habentes subsidia, furtum perpetrant; & sunt alii qui hac in re ex inopiâ delinquant; unde necesse est ut quidam damnis, quidam verò verberibus; & quidam strictiùs, quidam autem leviùs corrigantur. Et cùm paulò districtiùs agitur, ex caritate agendum est, non ex furore: quia ipsi hoc præstatur qui corrigitur, ne gehennæ ignibus tradatur. Sic enim nos fidelibus tenere disciplinam debemus, sicut boni patres carnalibus filiis so-

lent, quos & pro culpis verberibus feriunt, & tamen ipsos quos doloribus affligunt, habere heredes quarunt; & quæ possident, ipsis servant, quos irati insequi videntur. Hæc ergo caritas in mente tenenda est, & ipsa modum correptionis dicet, itaut mens extra rationis regulam omnino nihil faciat. Adde etiam, quomodo ea, quæ furto de Ecclesiis abstulerint, reddere debeant. Sed absit ut Ecclesia cum augmento recipiat quod de terrenis rebus videtur amittere, & lucra de vanis quærere: sed propriis acceptis rebus, ampliora non requirat Ecclesia. *IV. Interrogatio Augustini.* Si debeant duo germani fratres singulas sorores accipere, quæ sunt ab illis longâ progenie generatæ? *Responsio Gregorii.* Hoc fieri modis omnibus licet: nequaquam enim in sacris eloquiis invenitur, quod huic capitulo contradicere videatur. *V. Interrogatio Augustini.* Usque ad quam generationem debeant fideles cum propinquis sibi conjugio copulari? & novercis & cognatis si liceat copulari conjugio? *Responsio Gregorii.* Quædam terrena lex in Romanâ republicâ permittit, ut si frater & soror, seu duorum fratrum germanorum, vel duarum sororum filius & filia misceantur. Sed experimento didicimus, ex tali conjugio sobolem non posse succrescere. Et sacra lex prohibet cognationis turpitudinem revelare. Unde necesse est ut jam tertia vel quarta generatio fidelium licenter sibi jungi debeat: nam secunda quam prædiximus, à se omni modo debet abstinere. Cum novercâ autem misceri grave est facinus, quia & in lege scriptum est: Turpitudinem patris tui non revelabis. Neque enim patris turpitudinem filius revelare potest. Sed quia scriptum est: Erunt duo in carne unâ; qui turpitudinem novercæ, quæ una caro cum patre fuit, revelare præsumpserit, profecto patris turpitudinem revelavit. Cum cognatâ quoque misceri prohibitum est, quia per conjunctionem priorem caro fratris fuerat facta. Pro quâ re etiam Johannes Baptista capite truncatus est, & sancto martyrio consummatus. cui non est dictum ut Christum negaret, & tamen pro Christi confessione occisus est; sed quia isdem Dominus noster Jesus Christus dixerat, Ego sum veritas; quia pro veritate Johannes occisus est, videlicet & pro Christo sanguinem fudit. Quia verò sunt multi in Anglorum

gente, qui dum adhuc in infidelitate essent, huic nefando conjugio dicuntur admixti, ad fidem venientes admonendi sunt ut se abstineant, & grave hoc esse peccatum cognoscant. Tremendum Dei iudicium timeant, ne pro carnali dilectione tormenta æterni cruciatûs incurrant. Non tamen pro hac re, sacri corporis & sanguinis Domini communione privandi sunt, ne in eis illa ulcisci videantur, in quibus se per ignorantiam ante lavacrum baptismatis adstrinxerunt. In hoc enim tempore sancta Ecclesia quædam per fervorem corrigit, quædam per mansuetudinem tolerat, quædam per considerationem dissimulat, atque ita portat & dissimulat, ut sæpe malum quod adversatur, portando & dissimulando compescat. Omnes autem qui ad fidem veniunt, admonendi sunt, ne tale aliquod audeant perpetrare. Si qui autem perpetraverint, corporis & sanguinis Domini communione privandi sunt: quia sicut in his qui per ignorantiam fecerunt, culpa aliquatenus toleranda est, ita in his fortiter insequenda est, qui non metuunt sciendo peccare. *I. I. Interrogatio Augustini.* Si longinquitas itineris magna interjaceat, ut Episcopi non facile valeant convenire, an debeat sine aliorum Episcoporum præsentia Episcopus ordinari? *Responsio Gregorii.* Et quidem in Anglorum Ecclesiâ, in quâ adhuc tu solus Episcopus invenitis, ordinare Episcopum non aliter nisi sine Episcopis potes. Nam quando de Gallis Episcopi veniant, qui in ordinatione Episcopi testes adstant? Sed fraternitatem tuam ita volumus Episcopos ordinare, ut ipsi sibi Episcopi longo intervallo minimè disjungantur: quatenus nulla sit necessitas, ut in ordinatione Episcopi, Pastores quoque alii, quorum præsentia valde est utilis, facile debeant convenire. Cum igitur auctore Deo ita fuerint Episcopi in propinquis sibi locis ordinati, per omnia Episcoporum ordinatio sine aggregatis tribus vel quatuor Episcopis fieri non debet. Nam in ipsis rebus spiritualibus ut sapienter & maturè disponantur, exemplum trahere à rebus etiam carnalibus possumus. Certè enim dum conjugia in mundo celebrantur, conjugati quique convocantur, ut qui in viâ jam conjugii præcesserunt, in subsequenti quoque copulæ gaudio misceantur. Cur non ergo & in hac spirituali ordinatione, quâ per sacrum ministerium

ministerium homo Deo conjungitur, tales conveniant, qui vel in provectu ordinati Episcopi gaudeant, vel pro ejus custodia omnipotenti Deo preces pariter fundant. *VII. Interrogatio Augustini.* Qualiter debemus cum Galliarum & Britaniarum Episcopis agere? *Responsio Gregorii.* In Galliarum Episcopis nullam tibi auctoritatem tribuimus: quia ab antiquis prædecessorum hæc temporibus Pallium Arelatensis Episcopus accepit, quem nos privare auctoritate præcepta minimè debemus. Si igitur contingat ut fraternitas tua ad Galliarum provinciam transeat, cum eodem Arelatense Episcopo debet agere qualiter, si qua sunt in Episcopis vitia, corrigantur. Qui si fortè in disciplina vigore tepidus existat, tuæ fraternitatis zelo accendendus est. Cui etiam epistolas fecimus, ut cum tuæ sanctitatis præsentia in Galliis, & ipse tota mente subveniat, & quæ sunt Creatoris nostri jussioni contraria, ab Episcoporum moribus compescat. Ipse autem ex auctoritate propria Episcopos Galliarum judicare non poteris, sed suadendo, blandiendo, bona quoque opera eorum imitationi monstrando, pravorum mentes ad sanctitatis studia reforma: quia scriptum est in lege: Per alienam messem transiens, falcem mittere non debet, sed manu spicas conterere & manducare. Falcem enim judicii mittere non potes in eam segete, quæ alteri videtur esse commissa; sed per effectum boni operis, frumenta dominica vitiorum suorum paleis exspolia, & in Ecclesiæ corpore monendo & persuadendo quasi mandendo converte. Quidquid verò ex auctoritate agendum est, cum prædicto Arelatense Episcopo agatur, ne prætermitti possit hoc, quod antiqua Patrum institutio invenit. Britaniarum verò omnes Episcopos tuæ fraternitati committimus, ut indocti doceantur, infirmi persuasionibus roborentur, perversi auctoritate corrigantur. *III. Interrogatio Augustini.* Si prægnans mulier debeat baptizari? aut postquam genuerit, post quantum tempus possit Ecclesiam intrare? aut etiam ne morte preoccupetur quod genuerit, post quot dies hoc liceat sacri baptismatis Sacramenta præcipere? aut post quantum temporis huic vir suus possit in carnis copulatione conjungi? aut si menstruâ consuetudine tenetur, an Ecclesiam intrare

ei liceat, aut sacræ communionis Sacramenta percipere? aut vir suæ conjugii permixtus, priusquàm lavetur aquâ, si Ecclesiam possit intrare? vel etiam ad mysterium sacræ communionis accedere? Quæ omnia rudi Anglorum genti oportet habere comperta. *Responsio Gregorii.* Hoc non ambigo fraternitatem tuam esse requisitam, cui jam & responsum reddidisse me arbitror. Sed hoc quod ipse dicere & sentire potuisti, credo quia meâ apud te volueris responsione firmari. Mulier etenim prægnans cur non debeat baptizari, cum non sit ante omnipotentis Dei oculos culpa aliqua secunditas carnis? Nam cum primi parentes nostri in paradiso deliquissent, immortalitatem quam acceperant, recto Dei iudicio perdiderunt. Quia itaque isdem omnipotens Deus humanum genus pro culpâ suâ funditus exstinguere noluit, immortalitatem homini pro peccato suo abstulit; & tamen pro benignitate suæ pietatis, secunditatem ei sobolis referavit. Quod ergo naturæ humanæ ex omnipotentis Dei dono servatum est, quâ ratione poterit à sacri baptismatis gratiâ prohiberi? In illo quippe mysterio, in quo omnis culpa funditus exstinguitur, valde stultum est, si donum gratiæ contradicere posse videatur. Cum verò enixa fuerit mulier, post quot dies debeat Ecclesiam intrare, Testamenti veteris præcepto manifestum est, quod ita habet: Mulier si suscepto semine pepererit masculum, triginta tribus diebus manebit in sanguine purificationis suæ: omne sanctum non tanget, nec ingreditur in sanctuarium, donec impleantur dies purificationis suæ. Sin autem feminam pepererit, sexaginta sex diebus manebit in sanguine purificationis suæ. Quod tamen sciendum est quia in mysterio accipitur. Nam si horâ eâdem quâ genuerit, actura gratias intret Ecclesiam, nullo peccati pondere gravatur: voluptas etenim carnis, non dolor in culpa est. In carnis autem commixtione voluptas est: nam in prolis prolatione gemitus. Unde & ipsi primæ matri omnium, Dei præceptum transgressæ, dictum est: Multiplicabo ærumnas tuas & conceptus tuos, & in doloribus paries. Itaque si enixam mulierem prohibemus Ecclesiam intrare, ipsam ei poenam suam in culpam deputamus. Baptizare autem vel enixam mulierem, vel hoc quod

genuerit, si mortis periculo urgetur, vel ipsâ horâ eâdem quâ genuit, vel hoc quod gignitur, eâdem quâ natum est, nullo modo prohibetur: quia sancti mysterii gratia sicut viventibus atque discernentibus, cum magnâ discretione providenda est; itâ his quibus mors imminet, sine ullâ dilatione proferenda; ne dum adhuc tempus ad præbendum redemptionis mysterium quæritur, interveniente paululum morâ inveniri non valeat qui redimatur. Ad ejus verò concubitum vir suus accedere non debet, quoadusque qui gignitur, ablaçetur. Prava autem in conjugatorum moribus consuetudo surrexit, ut mulieres, quos gignunt filios, alere contemnant, eosque aliis mulieribus ad nutriendum tradant, quod videlicet ex solâ causâ incontinentiæ videtur inventum: quia dum se continere nolunt, despiciunt lactare quos gignunt. Hæ itaque quæ filios suos pravâ ex consuetudine aliis ad nutriendum tradunt, nisi purgationis tempus transierit, viris suis non debent admisceri: quippe quia & sine partûs causâ, cum in consuetis suis menstruis detinentur, viris suis misceri prohibentur; itaut morte lex sacra feriat, si quis vir ad menstruatam mulierem accedat. Quæ tamen mulier dum consuetudinem menstruam patitur, prohiberi Ecclesiam intrare non debet; quia ei naturæ superfluitas in culpam non valet reputari: & pro hoc quod invita patitur, justum non est ut ingressu Ecclesiæ privetur. Novimus namque quòd mulier quæ fluxum patiebatur sanguinis, post tergum Domini humiliter veniens, vestimentis ejus simbriam tetigit, atque ab eâ statim sua infirmitas recessit. Si ergo in fluxu sanguinis posita, laudabiliter potuit vestimentum Domini tangere: cur quæ menstruum sanguinis patitur, ei non liceat Domini Ecclesiam intrare? Sed dicis: Illam infirmitas compulit; has verò de quibus loquimur, consuetudo constringit. Perpende autem (frater carissime) quia omne quod in hac mortali carne patimur ex infirmitate naturæ, est digno Dei judicio post culpam ordinatum. Esurire namque, sitire, æstare, algere, lassescere, ex infirmitate naturæ est. Et quid est aliud, contra famem alimenta, contra sitim potum, contra æstum auras, contra frigus vestem, contra lassitudinem requiem quærere, nisi medica-

mentum quoddam contra ægritudines explorare : Feminae itaque & menstruus sui sanguinis fluxus ægritudo est. Si igitur benè præsumsit quæ vestimentum Domini in languore posita tetigit, quod uni personæ infirmanti conceditur, cur non concedatur cunctis mulieribus, quæ naturæ suæ vitio infirmantur ? Sanctæ autem communionis mysteria in iisdem diebus percipere non debet prohiberi. Si autem ex veneratione magnâ percipere non præsumit, laudanda est, sed si perceperit, non judicanda. Bonarum quippe mentium est, & ibi aliquo modo culpas suas agnoscere, ubi culpa non est; quia sæpe sine culpâ agitur quod venit ex culpâ : unde etiam cum esurimus, sine culpâ comedimus, quibus ex culpâ primi hominis factum est ut esuriamus. Menstrua enim consuetudo mulieribus non aliqua culpa est, videlicet quia naturaliter accidit. Sed tamen quia natura ipsa ita vitata est, ut etiam sine voluntatis studio videatur esse polluta, ex culpâ venit vitium, in quo seipsa, qualis per iudicium facta sit, humana natura cognoscat. Et homo qui culpam sponte perpetravit, reatum culpæ portet invitus. Atque idem feminae cum semetipsis considerent, & si in menstruâ consuetudine ad sacramentum Dominici corporis & sanguinis accedere non præsumunt, de suâ rectâ consideratione laudanda sunt; dum verò percipiendo ex religiosæ vitæ consuetudine, ejusdem mysterii amore rapiuntur, reprimendæ (sicut prædiximus) non sunt. Sicut enim in Testamento veteri exteriora opera observantur, ita in Testamento novo, non tam quod exterius agitur, quam id quod interiùs cogitatur, sollicitâ intentione adtenditur, ut subtili sententiâ puniatur. Nam cum multa lex velut immunda manducare prohibeat, in Evangelio tamen Dominus dicit : Non quod intrat in os, coinquinat hominem; sed quæ exeunt de ore, illa sunt quæ coinquinant. Atque paulò post subjecit exponens : Ex corde exeunt cogitationes malæ. Ubi ubertim indicatum est, quia illud ab omnipotente Deo pollutum esse in opere ostenditur, quod ex pollutæ cogitationis radice generatur. Unde Paulus quoque Apostolus dicit : Omnia munda mundis, coinquinatis autem & infidelibus nihil est mundum. Atque mox ejusdem cau-

sam coinquinationis adnuncians subjungit : Coinquinata sunt enim & mens eorum & conscientia. Si ergo ei cibus immundus non est, cui mens immunda non fuerit : cur quod mundâ mente mulier ex naturâ patitur, & in immunditiam reputetur ? Vir autem cum propriâ conjuge dormiens, nisi lotus aquâ, intrare Ecclesiam non debet ; sed neque lotus intrare statim debet. Lex autem veteri populo præcipit, ut mixtus vir mulieri, & lavari aquâ debeat, & ante Solis occasum Ecclesiam non intrare : quod tamen intellegi spiritaliter potest. Quia mulieri vir miscetur, quando illicitæ concupiscentiæ animus in cogitatione per delectationem conjungitur ; quia nisi prius ignis concupiscentiæ à mente deferbeat, dignum se congregationi fratrum æstimare non debet, qui se gravari per nequitiam prævæ voluntatis videt. Quamvis de hac re diversæ hominum nationes diversa sentiant, atque alia custodire videantur ; Romanorum tamen semper ab antiquioribus usus fuit, post admixtionem propriæ conjugis, & lavaeri purificationem quærere, & ab Ecclesiæ ingressu paululum reverenter abstinere. Nec hæc dicentes, culpam deputamus esse conjugium ; sed quia ista licita admixtio conjugis sine voluptate carnis fieri non potest, à sacri loci ingressu abstinendum est ; quia voluptas ipsa esse sine culpâ nullatenus potest. Non enim de adulterio, sive fornicatione, sed de legitimo conjugio natus fuerat qui dicebat : Ecce enim in iniquitatibus conceptus sum, & in peccatis concepit me mater mea. Qui enim in iniquitatibus conceptum se noverat, à delicto se natum gemebat : quia portat arbor in ramo humorem vitii, quem traxit ex radice. In quibus tamen non admixtionem conjugum iniquitatem nominat, sed ipsam videlicet voluptatem admixtionis. Sunt etenim multa quæ licita probantur esse ac legitima ; & tamen in eorum actu aliquatenus sædamur ; sicut sæpe irascendo culpas insequimur, & tranquillitatem animi in nobis perturbamus : & cum rectum sit quod agitur, non est tamen adprobabile quod in eo animus perturbatur. Contra vitia quippe delinquentium iratus fuerat qui dicebat : Turbatus est à furore oculus meus. Quia enim non valet nisi tranquilla mens in contemplationis se lucem

suspendere, in irâ suam oculum turbatum dolebat: quia dum malè acta deorsum insequitur, confundi atque turbari à summorum contemplatione cogebatur. Et laudabilis ergo est ira contra vitium, & tamen molesta, quia turbatum se aliquem reatum incurrisse æstimat. Oportet itaque legitima carnis copula, ut causa prolis sit, non voluptatis; & carnis commixtio, creandorum liberorum sit gratia, non satisfactio vitiorum. Si quis verò suâ conjugē, non cupidine voluptatis raptus, sed solummodò creandorum liberorum gratiâ utitur, iste profectò sive de ingressu Ecclesiæ, sive de sumendo Dominici corporis sanguinisque mysterio, suo est iudicio relinquendus; quia à nobis prohiberi non debet accipere, qui in igne positus nescit ardere. Cùm verò non amor procreandæ sobolis, sed voluptas dominatur in opere commixtionis: habent conjuges etiam de suâ commixtione quod desinant. Hoc enim eis concedit sancta prædicatio; & tamen de ipsâ concessione metu animum concutit. Nam cùm Paulus Apostolus Corinthiis scribens diceret: Qui se continere non potest, habeat uxorem suam; statim subjungere curavit: Hoc autem dico secundum indulgentiam, non secundum imperium. Non enim indulgetur quod licet, quia justum est. Quod igitur indulgere dixit, culpam esse demonstravit. Vigilanti verò mente pensandum est, quòd in Sinâ monte Dominus locuturus ad populum, priùs eundem populum abstinere à mulieribus præcepit. Et si illuc ubi Dominus per creaturam subditam hominibus loquebatur, tantâ provisione est munditia corporis requisita, ut qui verba Dei perciperent, mulieribus mixti non essent; quantò magis mulieres, quæ corpus Domini omnipotentis accipiunt, custodire in se carnis munditiam debent, ne ipsâ inæstimabilis mysterii magnitudine graventur? Hinc etenim ad David de pueris suis per Sacerdotem dicitur, ut si à mulieribus mundi essent, panes propositionis acciperent, quos omninò non acciperent, nisi priùs mundos eos David à mulieribus fateretur? Tunc autem vir qui post admixtionē conjugis lotus aquâ fuerit, etiam sacræ communionis mysterium valet accipere, cùm ei juxta præfinitam sententiam, etiam Ecclesiam licuerit intrare. *Interrogatio Augustini.* Si post inlusionem quæ per somnium

solet accidere, vel corpus Domini quilibet accipere valeat; vel, si Sacerdos sit, sacra mysteria celebrare? *Responsio Gregorii.* Hunc quidem Testamentum veteris legis, sicut & in superiori capitulo jam diximus, pollurum dicit, & nisi lotum aquâ, ei usque ad vesperam intrare Ecclesiam non concedit. Quod tamen aliter populus spiritalis intellegens, sub eodem intellectu accipiet quo præfati sumus: quia quasi per somnium inluditur qui tentatus immunditiâ, veris imaginibus in cogitatione inquinatur; sed lavandus est aquâ, ut culpas cogitationis lacrymis abluat: & nisi prius ighis tentationis recefferit, reum se quasi usque ad vesperum cognoscat. Sed est in eâdem inlusione valde necessaria discretio, quæ subtiliter pensari debet, ex quâ re accidat menti dormientis: aliquando enim ex crapulâ, aliquando ex naturæ superfluitate & infirmitate, aliquando ex cogitatione contingit ita. Et quidem cum ex naturæ superfluitate & infirmitate evenerit, omnimodò hæc inlusio non est timenda; quia hanc animus nesciens pertulisse magis dolendus est, quàm fecisse. Cum verò ultra modum appetitus gulæ in sumendis alimentis rapitur, atque idcirco humorum receptacula gravantur, habet exinde animus aliquem reatum, non tamen usque ad prohibitionem percipiendi sancti mysterii, vel Missarum sollempnia celebrandi: cum fortasse aut festus dies exigit, aut exhiberi mysterium (pro eo quod Sacerdos alius in loco deest) ipsa necessitas compellit. Nam si adsunt alii qui implere ministerium valeant, inlusio pro crapulâ facta, à perceptione sacri mysterii prohibere non debet; sed ab immolatione sacri mysterii abstinere (ut arbitror) humiliter debet: si tamen dormientis mentem turpi imaginatione non concusserit. Nam sunt quibus ita plerumque inlusio nascitur, ut eorum animus, etiam in somno corporis positus, turpibus imaginationibus non fœdetur: quâ in re unum ibi ostenditur, ipsa mens rea, non tamen vel suo iudicio libera, cum se, etsi dormienti corpore, nihil meminit vidisse, tamen in vigiliis corporis, meminit in ingluviem cecidisse. Si verò ex turpi cogitatione vigilantis oritur inlusio dormientis, patet animo suus reatus: videt enim à quâ radice inquinatio illa processerit, quia quod co-

gitavit sciens, hoc pertulit nesciens. Sed pensandum est, ipsa cogitatio utrum suggestione, an delectatione, vel (quod majus est) peccati consensu acciderit. Tribus etenim modis impletur omne peccatum; videlicet suggestione, delectatione, consensu. Suggestio quippe fit per diabolum, delectatio per carnem, consensus per spiritum: quia & primam culpam serpens suggessit, Eva velut caro delectata est, Adam verò velut spiritus consentit: & necessaria est magna discretio, ut inter suggestionem atque delectationem, inter delectationem & consensum, judex sui animus præsideat. Cum enim malignus spiritus peccatum suggerit in mente, si nulla peccati delectatio sequatur, peccatum omnimodò perpetratum non est; cum verò delectari caro cœperit, tunc peccatum incipit nasci: si autem ex deliberatione consentit, tunc peccatum cognoscitur perfici. In suggestione igitur peccati initium est, in delectatione fit nutrimentum, in consensu perfectio. Et sæpe contingit ut hoc quod malignus spiritus seminat in suggestione, caro in delectationem trahat; nec tamen anima eidem delectationi consentiat. Et cum caro sine animâ nequeat, ipse tamen animus carnis voluptatibus reluctans, in delectatione carnali aliquo modo ligatur invitus, ut ei ex ratione contradicat, ne consentiat; & tamen delectatione ligatus sit, sed ligatum se ingemiscat. Unde & ille cælestis exercitus præcipuus miles gemebat dicens: Video aliam legem in membris meis repugnantem legi mentis meæ, & captivum me ducentem in lege peccati, quæ est in membris meis. Si autem captivus erat, minimè pugnabat; sed & pugnabat: quapropter & captivus erat, & pugnabat. Repugnabat igitur legi mentis, cui lex quæ in membris est, repugnabat. Si autem pugnabat, captivus non erat. Ecce itaque homo est (ut ita dixerim) captivus & liber, liber ex justitiâ quam diligit, captivus ex delectatione quam portat invitus.

Hucusque responsiones beati Papæ Gregorii ad consulta reverentissimi Antistitis Augustini. Epistolam verò quam se Arelateni Episcopo fecisse commemorat, ad Virgilium Etherii successorem dederat: cujus hæc forma est.

CAPUT XXVIII.

Ut Papa Gregorius epistolam Arelatensi Episcopo, pro adjuvando in opere Dei Augustino, miserit.

REVERENTISSIMO & sanctissimo Fratri Virgilio Coepiscopo, Gregorius servus servorum Dei. Quantus sit affectus venientibus sponte fratribus impendendus, ex eo quòd plerumque solent caritatis causâ invitari, cognoscitur. Et ideò si communem fratrem Augustinum Episcopum ad vos venire contigerit, ità illum dilectio vestra, sicut decet, affectuosè dulciterque suscipiat, ut & ipsum consolationis suæ honore foveat, & alios, qualiter fraterna caritas colenda sit, doceat. Et quoniam sæpius evenit, ut hi qui longè sunt positi, priùs ab aliis quæ sunt emendanda, cognoscant: si quas fortassè fraternitati vestræ Sacerdotum vel aliorum culpas intulerit, unà cum eo residentes subtili cuncta investigatione perquirite, & ità vos in ea quæ Deum offendunt, & ad iracundiam provocant, districtos ac sollicitos exhibete, ut ad aliorum emendationem & vindicta culpabilem feriat, & innocentem falsa opinio non adfligat. Deus te incolumem custodiat, reverentissime Frater. Data die decimâ Kalendarum Juliarum, imperante Domino nostro Mauricio Tiberio piissimo Augusto, anno decimo nono, post Consulatum ejusdem Domini nostri anno decimo octavo, Indictione quartâ.

CAPUT XXIX.

Ut idem Augustino Pallium, & epistolam, & plures verbi ministros miserit.

PRÆTEREA idem Papa Gregorius Augustino Episcopo (quia suggesserat ei multam quidem ibi esse messem, sed operarios paucos) misit cum præfatis legatariis suis plures cooperatores, ac verbi ministros: in quibus primi & præ-

cipui erant, Mellitus, Justus, Paulinus, Rufinianus; & per eos generaliter universa quæ ad cultum erant ac ministerium Ecclesiæ necessaria, vasa videlicet sacra, & vestimenta altarium, ornamenta quoque Ecclesiarum, & sacerdotalia vel clericalia indumenta; Sanctorum etiam Apostolorum ac Martyrum reliquias, & codices plurimos. Misit etiam litteras, in quibus significat se ei Pallium direxisse: simul & insinuat qualiter Episcopos in Britannia constituere debuisset; quarum litterarum iste est textus.

Reverentissimo & sanctissimo fratri Augustino Coëpiscopo Gregorius servus servorum Dei. Cùm certum sit pro omnipotente Deo laborantibus ineffabilia æterni regni præmia reservari; nobis tamen eis necesse est honorum beneficia tribuere, ut in spiritalis operis studio ex remuneratione valeant multipliciùs insudare. Et quia nova Anglorum Ecclesia ad omnipotentis Dei gratiam eodem Domino largiente, & te laborante perducta est, usum tibi Pallii in eà, ad sola Missarum sollemnia agenda concedimus: itaut per loca singula duodecim Episcopos ordines, qui tuæ subiaceant ditioni, quatenus Londoniensis civitatis Episcopus semper in posterum à Synodo proprià debeat consecrari, atque honoris Pallium ab hac sanctà & Apostolicà, (cuj Deo auctore deservio) Sede percipiat. Ad Eboracam verò civitatem te volumus Episcopum mittere, quem ipse judicaveris ordinare; ità dumtaxat, ut si eadem civitas cum finitimis locis verbum Dei receperit, ipse quoque duodecim Episcopos ordinet, & Metropolitani honore perfruatur, quia ei quoque (si vita comes fuerit) Pallium tribuere Domino faciente disponimus: quem tamen fraternitatis tuæ volumus dispositioni subjacere: post obitum verò tuum, ità Episcopis quos ordinaverit, præsit, ut Londoniensis Episcopi nullo modò ditioni subjacet. Sit verò inter Londoniensis & Eboracensis civitatis Episcopos in posterum honoris ista distinctio, ut ipse prior habeatur qui prius fuerit ordinatus: communi autem consilio & concordia actione quæque sunt pro Christi zelo agenda, disponent unanimiter, rectè sentiant, & ea quæ senserint, non sibi met discrepando perficiant. Tua verò fraternitas non solum eos Episcopos quos ordinaverit, neque hos tantummodò

qui per Eboracæ Episcopum fuerint ordinati, sed etiam omnes Britanniæ Sacerdotes habeat Deo Domino nostro Jesu Christo auctore subiectos : quatenus ex linguâ & vitâ tuâ sanctitatis, & rectè credendi & benè vivendi normam percipiant : atque officium suum fide ac moribus exsequentes, ad cælestia, cum Dominus voluerit, regna pertingant. Deus te incolumem custodiat, reverentissime Frater. Data die decimâ Kalendarum Juliatum, imperante Domino nostro Mauricio Tiberio piissimo Augusto anno decimo nono, post Consulatum ejusdem Domini anno decimo octavo, Indictione quartâ.

CAPUT XXX.

*Exemplar epistolæ quam Mellito Abbati Britanniam
pergenti misit.*

ABEUNTIBUS autem præfatis legatariis, misit post eos beatus Pater Gregorius litteras memoratu dignas, in quibus apertè quàm studiosè erga salvationem nostræ gentis invigilaverit, ostendit, ita scribens : Dilectissimo filio Mellito Abbati Gregorius servus servorum Dei. Post discessum congregationis nostræ quæ tecum est, valde sumus suspensi rediti, quia nihil de prosperitate vestri itineris audisse nos contigit. Cum ergo Deus omnipotens vos ad reverentissimum Fratrem nostrum Augustinum Episcopum perduxerit, dicite ei, quid diù mecum de causâ Anglorum cogitans tractavi : videlicet quòd fana idolorum destrui in eadem gente minimè debeant; sed ipsa quæ in eis sunt, idola destruantur; aqua benedicta fiat, in eisdem fanis aspergatur, altaria construuntur, reliquæ ponantur : quia si fana eadem benè constructa sunt, necesse est ut à cultu dæmonum in obsequia veri Dei debeant commutari; ut dum gens ipsa eadem fana sua non videt destrui, de corde errorem deponat, & Deum verum cognoscens ac adorans, ad loca quæ consuevit, familiarius concurrat. Et quia boves solent in sacrificio dæmonum multos occidere, debet eis etiam hac de re aliqua sollemnitas

immutari : ut die dedicationis, vel natalitiis sanctorum Martyrum, quorum illic reliquæ ponuntur, tabernacula sibi circa eandem Ecclesias quæ ex fanis commutate sunt, de ramis arborum faciant, & religiosis convivis sollempnitatem celebrent; nec diabolo jam animalia immolent, sed ad laudem Dei in esu suo animalia occidant, & donatori omnium de satietate suâ gratias referant : ut dum eis aliqua exterius gaudia reservantur, ad interiora gaudia consentire facilius valeant. Nam duris mentibus simul omnia abscidere impossibile esse non dubium est, quia & is qui summum locum ascendere nititur, gradibus vel passibus, non autem saltibus elevatur. Sic Israëlítico populo Dominus in Ægypto se quidem innotuit, sed tamen eis sacrificiorum usus quæ diabolo solebat exhibere, in cultu proprio reservavit, ut eis in suo sacrificio animalia immolare præciperet; quatenus cor mutantes, aliud de sacrificio amitterent, aliud retinerent : ut etsi ipsa essent animalia quæ offerre consueverant, vero tamen Deo hæc, & non idolis immolantes, jam sacrificia ipsa non essent. Hæc igitur dilectionem tuam prædicto Fratri necesse est dicere, ut ipse in præsentem illuc positus perpendat, qualiter omnia debeat dispensare. Deus te incolumem custodiat, dilectissime Fili. Data die decimâ quintâ Kalendarum Juliarum, imperante Domino nostro Mauricio Tiberio piissimo Augusto anno decimo nono, post Consulatum ejusdem Domini anno decimo octavo, Indictione quartâ.

CAPUT XXXI.

Ut Augustinum per litteras, ne de virtutibus suis gloriaretur, hortatus sit.

QUO in tempore misit etiam Augustino epistolam super miraculis quæ per eum facta esse agnoverat, in quâ cum, ne per illorum copiam periculum elationis incurreret, his verbis hortatur : Scio, Frater carissime, quia omnipotens Deus per dilectionem tuam in gentem quam eligi voluit, magna miracula ostendit : unde necesse est ut de eodem dono

cælesti & timendo gaudeas, & gaudendo pertimescas. Gaudeas videlicet, quia Anglorum animæ per exteriora miracula ad interiorem gratiam pertrahuntur: pertimescas verò, ne inter signa quæ sunt, infirmus animus in sui præsumptione se eleuet, & upde foris in honorem tollitur, inde per inanem gloriam intus cadat. Meminisse etenim debemus quòd discipuli cum gaudio à prædicatione redeuntes, dum cælesti Magistro dicerent: Domine, in nomine tuo etiam dæmonia nobis subiecta sunt; protinus audierunt: Nolite gaudere super hoc, sed potius gaudete quia nomina vestra scripta sunt in cælo. In privatâ enim & temporali latitiâ mentem posuerant qui de miraculis gaudebant; sed de privato ad communem, & de temporali ad æternam latitiâ revocantur quibus dicitur: In hoc gaudete quia nomina vestra scripta sunt in cælo. Non enim omnes electi miracula faciunt; sed tamen eorum nomina omnium in cælo tenentur adscripta. Veritatis etenim discipulis esse gaudium non debet, nisi de eo bono quod commune cum omnibus habent, & in quo finem latitiæ non habent. Restat itaque, Frater carissime, ut inter ea quæ operante Domino exterius facis, semper te interiùs subtiliter iudices, ac subtiliter intellegas, & temetipsum quis sis, & quanta sit in eadem gente gratia, pro cuius conversione etiam faciendorum signorum dona percepisti. Et si quando te Creatori nostro seu per linguam, seu per opera reminisceris deliquisse, semper hæc ad memoriâ revoces, ut surgentem cordis gloriam memoriâ reatûs premat. Et quidquid de faciendis signis acceperis, vel accepisti, hæc non tibi, sed eis deputes donata, pro quorum tibi salute donata sunt.

CAPUT XXXII.

Ut Edilbertho Regi litteras & dona miserit.

MISIT & idem beatus Papa Gregorius eodem tempore etiam Regi Edilbertho epistolam, simul & dona in diversis speciebus perpulcra: temporalibus quoque hono-

ribus Regem glorificare satagens, cui gloriæ cælestis suo labore & industria noticiam provenisse gaudebat. Exemplar autem præfatæ epistolæ hoc est:

Domino gloriosissimo atque præcellentissimo filio Edibertho Regi Anglorum, Gregorius Episcopus. Propter hoc omnipotens Deus bonos quosque ad populorum regimina perducit, ut per eos omnibus quibus prælati fuerint, donæ suæ pietatis impendat. Quod in Anglorum gente factum cognovimus: cui vestra gloria idcirco est præposita, ut per bona quæ vobis concessa sunt, etiam subiectæ vobis genti superna beneficia præstarentur. Et idcirco, gloriose Fili, tam quam accepisti divinitus gratiam, sollicita mente custodi, Christianam fidem in populis tibi subditis extendere festina, zelum rectitudinis tuæ in eorum conversione multiplica, idolorum cultus insequere, sanorum ædificia evertre, subditorum mores ex magnâ vitæ munditiâ, exhortando, terrendo, blandiendo, corrigendo, & boni operis exempla monstrando ædifica: ut illum retributorem invenias in cælo, cujus nomen atque cognitionem dilataveris in terrâ. Ipse enim vestræ quoque gloriæ nomen etiam posteris gloriosius reddet, cujus vos honorem quæritis & servatis in gentibus. Sic etenim Constantinus quondam piissimus Imperator, Romanam rempublicam à perversis idolorum cultibus revocans, omnipotenti Deo Domino nostro Jesu Christo secum subdidit, seque cum subiectis populis totâ ad Deum mente convertit. Unde factum est ut antiquorum Principum nomen suis vir ille laudibus vinceret, & tantò in opinione præcessores suos, quantò & in bono opere superaret. Et nunc itaque vestra gloria cognitionem unius Dei, Patris, & Filii, & Spiritûs sancti, Regibus ac populis sibi subiectis festinet infundere, ut & antiquos gentis suæ Reges laudibus ac meritis transeat, & quantò in subiectis suis etiam aliena deterferit, tantò etiam de peccatis propriis ante omnipotentis Dei terribile examen securior fiat. Reverentissimus Frater noster Augustinus Episcopus, in Monasterii regulâ doctus, sacræ Scripturæ scientiâ repletus, bonis auctore Deo operibus præditus, quæque vos admonet, libenter audite, devotè petagite, studiosè in memoriâ reservate: quia si vos cum in eo quod

pro omnipotenti Domino loquitur, auditis, isdem omnipotens Deus hunc pro vobis exorantem celerius exaudiet. Si enim (quod absit) verba ejus postponitis, quomodo eum omnipotens Deus poterit audire pro vobis, quem vos negligitis audire pro Deo? Totâ igitur mentē cum eo vos in fervore fidei stringite, atque adnissum illius virtute quam vobis divinitas tribuit, adjuvate, ut regni sui vos ipse faciat esse participes, cujus vos fidem in regno vestro recipi faciatis & custodiri. Præterea scire vestram gloriam volumus, quia sicut in Scripturâ sacrâ ex verbis Domini omnipotentis agnoscimus, præsentis mundi jam terminus juxta est, & Sanctorum regnum venturum est, quod nullo unquam poterit sine terminari. Adpropinquante autem eodem mundi termino, multa imminēt quæ antea non fuerunt: videlicet immutationes aëris, terroresque de cælo, & contra ordinem temporum tempestates, bella, fames, pestilentia, terræ motus per loca; quæ tamen non omnia nostris diebus ventura sunt, sed post nostros dies omnia subsequētur. Vos itaque, si qua ex his evenire in terrâ vestrâ cognoscitis, nullo modo animum vestrum perturbetis; quia idcirco hæc signa de fine sæculi præmittuntur, ut de animabus nostris debeamus esse solliciti, de mortis horâ suspecti, & venturo judici in bonis actibus inveniamur esse præparati. Hæc nunc, gloriose Fili, in paucis locutus sum, ut cum Christiana fides in regno vestro excreverit, nostra quoque locutio apud vos latior excreseat, & tantò plus loqui libeat, quantò se in mente nostrâ gaudia de gentis vestræ perfectâ conversione multiplicant. Parva autem xenia transmissi, quæ vobis parva non erunt, cum à vobis ex beati Petri Apostoli fuerint benedictione suscepta. Omnipotens itaque Deus in vobis gratiam suam quam cæpit, perficiat, atque vitam vestram, & hic per multorum annorum curricula extendat, & post longa tempora in cælestis vos patriæ congregatione recipiat. Incolumem excellentiam vestram gratia superna custodiat, Domine Fili. Data diē decimâ Kalendarum Juliarum, imperante Domino Mauricio Tiberio piissimo Augusto anno decimo nono, post Consulatum ejusdem anno decimo octavo, Indictione quartâ.

CAPUT XXXIII.

Ut Augustinus Ecclesiam Salvatoris instauraverit, & Monasterium beati Petri Apostoli fecerit; & de primo ejus Abbate Petro.

AT Augustinus, ubi in regiâ civitate sedem Episcopalem, ut prædiximus, accepit, recuperavit in eâ, regio fultus adminiculo, Ecclesiam quam inibi Romanorum antiquorum fidelium opere factam fuisse didicerat, & eam in nomine sancti Salvatoris Dei & Domini nostri Jesu Christi sacravit, atque ibidem sibi habitationem statuit, & cunctis successoribus suis. Fecit autem & Monasterium non longè ab ipsâ civitate ad Orientem, in quo, ejus hortatu, Edilbercthus Ecclesiam beatorum Apostolorum Petri & Pauli à fundamentis construxit, ac diversis donis dotavit, in quâ & ipsius Augustini, & omnium Episcoporum Dorovernensium, simul & Regum Cantix poni corpora possent. Quam tamen Ecclesiam non ipse Augustinus, sed successor ejus Laurentius consecravit. Primus autem ejusdem Monasterii Abbas Petrus Presbyter fuit, qui legatus Galliam missus, demersus est in sinu maris qui vocatur *Amsleat*, & ab incolis loci ignobili traditus sepulturæ: sed omnipotens Deus ut qualis meriti vir fuerit demonstraret, omni nocte supra sepulcrum ejus lux cælestis apparuit, donec animadvertentes vicini, qui videbant sanctum fuisse virum qui ibi esset sepultus, & investigantes unde vel quis esset, abstulissent corpus, & in Bononiâ civitate juxta honorem tanto viro congruum in Ecclesiâ posuerunt.



CAPUT XXXIV.

Ut Edilfredus Rex Nordanhymbrorum, Scottorum gentes praelio conterens, ab Anglorum finibus expulerit.

HIS temporibus regno Nordanhymbrorum præfuit Rex fortissimus, & gloriæ cupidissimus Edilfredus, qui plus omnibus Anglorum Primatibus gentem vastavit Brittonum, itaut Saüli quondam Regi Israëlitiæ gentis comparandus videretur, excepto dumtaxat hoc, quod divinæ religionis erat ignarus. Nemo enim in Tribunis, nemo in Regibus plures eorum terras, exterminatis vel subjugatis indigenis, aut tributarias genti Anglotum, aut habitabiles fecit. Cui merito poterat illud quod benedicens filium Patriarcha in personam Saülis dicebat, aptari: Benjamin lupus tapax, mauè comedet prædam, & vesperè dividet spolia. Unde motus ejus profectibus Edam Rex Scottorum qui Britanniam inhabitant, venit contra eum cum immenso & forti exercitu; sed cum paucis aufugit victus. Siquidem in loco celeberrimo qui dicitur *Degfastan*, id est, Degsa lapis, omnis penè cæsus est ejus exercitus. In quâ etiam pugnâ Theobaldus frater Edilfredi, cum omni illo, quem ipse ducebat, exercitu peremptus est. Quod videlicet bellum Edilfredus anno ab Incarnatione Domini sexcentesimo tertio, regni autem sui, quod viginti quatuor annis tenuit, anno undecimo perfecit: potè anno Focatis, qui tùm regni Romani apicem tenebat, primo. Neque ex eo tempore quisquam Regum Scottorum in Britanniam adversus gentem Anglorum usque ad hanc diem in prælium venire audebat.



LIBER SECUNDUS.

CAPUT I.

De obitu beati Gregorii Papa.

His temporibus, id est, anno Dominicæ Incarnationis sexcentesimo quinto, beatus Papa Gregorius, postquam sedem Romanæ & Apostolicæ Ecclesiæ tredecim annos, menses sex, & dies decem gloriosissime rexit, defunctus est, atque ad æternam regni cælestis sedem translatus. De quo nos convenit (quia nostram, id est, Anglorum gentem de potestate Satanz ad fidem Christi suâ industriâ convertit) latiore in nostrâ Historiâ Ecclesiasticâ facere sermonem, quem rectè nostrum appellare possumus & debemus Apostolum. Quia cum primum in toto orbe gereret Pontificatum, & conversis jamdudum ad fidem veritatis esset prælatus Ecclesiis, nostram gentem eatenus idolis mancipatam, Christi fecit Ecclesiam, itaut Apostolicum illum de eo liceat nobis proferre sermonem, quia etsi aliis non est Apostolus, sed tamen nobis est: nam signaculum Apostolatus ejus nos sumus in Domino. Erat autem natione Romanus, ex patre Gordiano, genus à proavis non solum nobile, sed religiosum ducens. Deinde Felix ejusdem sedis Apostolicæ quondam Episcopus, vir magnæ gloriæ in Christo & Ecclesiâ, ejus fuit avus. Sed & ipse nobilitatem religionis, non minore quàm parentes & cognati, virtute devotionis exercuit. Nobilitatem verò illam, quam ad sæculum videbatur habere, totam ad nanciscendam supernæ gloriæ dignitatis divinâ gratiâ largiente convertit. Nam mutato repentè sæculari habitu, Monasterium petiit, in quo tantâ perfectionis gratiâ cæpit conversari, ut (sicut ipse postea flendo solebat adtestari) animo illius labentia cuncta subter essent, ut rebus omnibus quæ voluntur, emineret, ut nulla nisi cælestia cogitare soleret; ut etiam retentus cor-

pore, ipsa jam carnis claustra contemplatione transiteret; ut mortem quoque, quæ penè cunctis pœna est; videlicet ut ingressum vitæ & laboris sui præmium amaret. Hæc autem ipse de se, non profectum jactando virtutum, sed desclendo potiùs defectum, quem sibi per curam pastorem incurrisse videbatur, referte consueverat. Denique tempore quodam secreto, cum Diacono suo Petro conloquens, enumeratis animi sui virtutibus priscis, mox dolendo subjunxit: At nunc ex occasione curæ pastoralis sæcularium hominum negotia patitur, & post tam pulcræ quietis suæ speciem, terreni actûs pulvere fœdatur. Cùmque se pro condescensione multorum ad exteriora sparserit, etiam cùm interiora appetit, ad hæc procul dubio minor redit. Perpendo itaque quid tolero; perpendo quid amisi: dùmque intueor illud quod perdididi, sit hoc gravius quod porto. Hæc quidem sanctus vir ex magnæ humilitatis intentione dicebat: sed nos credere decet, nihil eum perfectionis monachicæ perdidisse, occasione curæ pastoralis, immò potiorem tunc sumpsisse profectum de labore conversionis multorum, quàm de propriæ quondam quiete conversationis habuerat: maximè quia & Pontificali functus officio domum suam Monasterium facere curavit; & dum primò de Monasterio abstractus, ad ministerium altaris ordinatus, atque Constantinopolim Apocriarius ab Apostolicâ sede directus est, non tamen in terreno conversatus palatio propositum vitæ cælestis intermisit. Nam quosdam Fratrum ex Monasterio suo, qui cum gratiâ germanæ caritatis ad regiam urbem secuti sunt, in tutamentum cœpit observantiæ regulatis habere; videlicet ut eorum semper exemplo (sicut ipse scribit) ad orationis placidum litus, quasi anchoræ fune restringeretur, cùm incessabili causarum sæcularium impulsu fluctuaret, concussamque sæculi actibus mentem inter eos quotidie per studiosæ lectionis roboraret alloquium. Horum ergo consortio non solum à terrenis est munitus incurribus, verum etiam ad cælestis vitæ exercitia magis magisque succensus. Nam hortati sunt eum, ut librum beati Job, magnis involutum obscuritatibus, mysticâ interpretatione discuteret: neque negare potuit opus quod sibi fraternus amor multis utile futurum imponebat.

Sed eundem librum, quomodo juxta litteram intellegendus, qualiter ad Christi & Ecclesiæ Sacramenta referendus, quo sensu unicuique fidelium sit aptandus, per triginta & quinque libros expositionis mirandâ ratione perdocuit. Quod videlicet opus in regiâ quidem urbe Apocrisarius inchoavit; Romæ autem jam Pontifex factus implevit. Qui cùm esset adhuc regiâ in urbe positus, nascentem ibi novam hæresim de statu nostræ resurrectionis, cum ipso ex quo orta est, initio, juvante se gratiâ Catholicæ veritatis, attrivit. Siquidem Eutychius, ejusdem urbis Episcopus, corpus nostrum in illâ resurrectionis gloriâ impalpabile, ventis aëréque subtilius esse futurum: quod ille audiens, & ratione veritatis, & exemplo Dominicæ resurrectionis probavit hoc dogma orthodoxæ fidei omnimodis esse contrarium. Catholica etenim fides habet, quodd corpus nostrum in illâ immortalitatis gloriâ sublimatum, subtile quidem sit per effectum spiritualis potentia, sed palpabile per veritatem naturæ: juxta exemplum Domini corporis, de quo à mortuis suscitato, dicit ipse discipulis: Palpate & videte quia spiritus carnis & ossa non habet, sicut me videtis habere. In cujus adsertione fidei venerabilis Pater Gregorius in tantum contra nascentem hæresim novam laborare contendit, tantâ hanc instantiâ, juvante etiam piissimo Impettore Tiberio Constantino, comminuit, ut nullus exinde sit inventus qui ejus resuscitator existeret. Alium quoque librum composuit egregium, qui vocatur *Pastoralis*, in quo manifestâ luce patefecit, quales ad Ecclesiæ regimen adsumi, qualiter ipsi rectores vivere, quâ discretione singulas quasque audientium instruere personas, & quantâ consideratione propriam quotidie debeant fragilitatem pensare. Sed & Homilias Evangelii numero quadraginta composuit, quas in duobus codicibus æquâ sorte distinxit. Libros etiam Dialogorum quatuor fecit, in quibus rogatu Petri Diaconi sui, virtutes Sanctorum quos in Italiâ clariores nosse vel audire poterat, ad exemplum vivendi posteris collegit: ut sicut in libris Expositionum suarum quibus sit virtutibus insudandum, edocuit, ita etiam descriptis Sanctorum miraculis, quæ virtutum earundem sit claritas, ostenderet. Primam quoque & ultimam Ezechielis Prophetæ

partem, quæ videbantur obscuriores, per Homilias viginti & duas, quantum lucis intus habeant, demonstravit. Excepit libello Responsionum, quem ad interrogationes sancti Augustini, primum Anglorum gentis Episcopi scripsit, ut supra docuimus, totum ipsum libellum his inferentes historiis, libello quoque Synodico, quem cum Episcopis Italix de necessariis Ecclesiæ causis utilissimum composuit, & familiaribus ad quosdam litteris. Quod eò magis mirum est, tot cum actanta condere volumina potuisse, quod penè omni juventutis suæ tempore (ut verbis ipsius loquar) crebris viscerum doloribus cruciabatur, horis momentisque omnibus fractâ virtute stomachi lassescibat, lentis quoque, sed tamen continuis febribus anhelabat. Verum inter hæc, dum sollicitus pensaret quia Scripturâ teste, omnis filius qui recipitur, flagellatur; quod malis præsentibus durius deprimebatur, eò de æternâ certius præsumptione respirabat. Hæc quidem de immortali ejus sint dicta ingenio, quod nec tanto corporis potuit dolore restingui. Nam alii quidem Pontifices construendis ornandisque auro vel argento Ecclesiis operam dabant: hic autem totus erga animarum lucra vacabat. Quidquid pecuniæ habuerat, hoc sedulus dispergere ac dare pauperibus curabat, ut justitia ejus maneret in sæculum sæculi, & cornu ejus exaltaretur in gloriâ: ita ut illud beati Job veraciter dicere posset: Auris audiens beatificabat me, & oculus videns testimonium reddebat mihi, eò quod liberassem pauperem vociferantem & pupillum cui non esset adjutor. Benedictio perituri super me veniebat, & cor viduæ consolatus sum. Justitiâ inquitus sum, & vestivit me sicut vestimento & diademate, judicio meo. Oculus fui cæco, & pes claudò. Pater eram pauperum, & causam quam nesciebam, diligentissimè investigabam. Conterebam molas iniqui, & de dentibus illius auferebam prædam. Et paulò post: Si negavi, inquit, quod volebant pauperibus, & oculos viduæ expectare feci. Si comedi buccellam meam solus, & non comedit pupillus ex eâ. Quia ab infantiâ meâ crevit mecum miseratione, & de utero matris meæ egressa est mecum. Ad cujus pietatis & justitiæ opus pertinet etiam hoc, quod nostram gentem per Prædicatores, quos huc direxit, de denti-

bus antiqui hostis eripiens, æternæ libertatis fecit esse particeps: cujus fidei & saluti congaudens, quàmque dignâ laude commendans, ipse dixit in expositione beati Job: Ecce lingua Britanniae, quæ nihil aliud noverat quàm barbarum frindere, jamdudum in divinis laudibus Hebræum cœpit *Alleluia* resonare. Ecce quondam tumidus, jam substratus Sanctorum pedibus servit Oceanus, ejusque barbaros motus, quos terreni Principes edomare ferro nequiverant, hos pro divinâ formidine Sacerdotum ora simplicibus verbis ligant, & qui catervas pugnantium infidelis nequaquam metueret, jam nunc fidelis linguas humilium timet. Quia enim perceptis cælestibus verbis, clarescentibus quoque miraculis, virtus ei divinæ cognitionis infunditur, ejusdem divinitatis terrore refrænatur, ut pravè agere metuat, ac totis desideriis ad æternitatis gloriam venire concupiscat. Quibus verbis beatus Gregorius hoc quoque declarat, quod sanctus Augustinus & loci ejus, non solâ prædicatione verborum, sed etiam cælestium ostensione signorum, gentem Anglorum ad agnitionem veritatis perducebant. Fecit inter alia beatus Papa Gregorius, ut in Ecclesiis sanctorum Apostolorum Petri & Pauli super corpora eorum Missæ celebrarentur. Sed & in ipsâ Missarum celebratione tria verba maximæ perfectionis plena superadjecit: Diēsque nostros in tuâ pace disponas, atque ab æternâ damnatione nos eripi, & in electorum tuorum jubeas grege numerari. Rexit autem Ecclesiam temporibus Mauricii & Focatis. Secundo autem ejusdem Focatis anno transiens ex hac vitâ migravit ad veram quæ in cælis est vitam. Sepultus verò est corpore in Ecclesiâ beati Petri Apostoli, ante Secretarium, die quarto Iduum Martiarum, quandoque in ipso cum cæteris sanctæ Ecclesiæ Pastoribus resurrecturus in gloriâ: scriptumque est in tumbâ ipsius Epitaphium hujusmodi:

Suscipe, terra, tuo corpus de corpore sumptum,

Reddere quod valeas vivificante Deo:

Spiritus astra petit, leti nil jura nocebunt,

Cui vita alterius more magis ipsa, via est.

Pontificis summi hoc clauduntur membra sepulcro,

Qui innumeris semper vivit ubique bonis.

*Efurient dapibus superavis, frigora veste,
 Atque animas monitis rexit ab hoste sacris.
 Implebatque actum, quicquid sermone docebat,
 Effet ut exemplum, mystica verba loquens.
 Ad Christum Anglos convertit pietate magistrâ,
 Adquirens fidei agmina gente nova.
 Hic labor, hoc studium, hæc tibi cura, hoc Pastor agebas,
 Ut Domino offerres plurima lucra gregis.
 Hisque Dei Consul factus latare triumphis:
 Nam mercedem operum jam sine fine tenes.*

Nec silentio prætereunda opinio quæ de beato Gregorio, traditione majorum ad nos, usque perlata est: quæ videlicet ex causâ admonitus, tam sedulam erga salutem nostræ gentis curam gesserit. Dicunt, quia die quadam cum audientibus nuper mercatoribus multa venalia in forum fuissent conlata, multique ad emendum confluxissent, & ipsum Gregorium inter alios advenisse, ac vidisse inter alia pueros venales positos, candidi corporis, ac venusti vultus, capillorum quoque formâ egregiâ. Quos cum aspiceret, interrogavit (ut aiunt) de quâ regione vel terrâ essent adlati. Dictumque est quòd de Britannia insulâ, cujus incolæ tales essent aspectus. Rursus interrogavit, utrum iidem insulani, Christiani, an paganis adhuc erroribus essent implicati. Dictum est quòd essent pagani. At ille intimo ex corde longa trahens suspiria: Heu, proh dolor! inquit, quòd tam lucidi vultus homines tenebrarum auctor possidet, tantâque gratia frontispicii mentem ab internâ gratiâ vacuam gestat! Rursus ergo interrogavit, quod esset vocabulum gentis illius. Respondum est, quòd Angli vocarentur. Benè, inquit: nam & angelicam habent faciem, & tales Angelorum in cælis decet esse cohetedes. Quod habet nomen ipsa provincia de quâ isti sunt, adlati? Respondum est, quòd *Deiri* vocarentur iidem provinciales. At ille: Benè, inquit, *Deiri*, de itâ eruti, & ad misericordiam Christi vocati. Rex provincie illius quomodò vocatur? Respondum est, quòd *Elle* diceretur. At ille adludens ad nomen ait: *Alleluia*, laudem Dei Creatoris illis in partibus oportet cantari. Accedensque ad Pontificem Romanæ & Apostolicæ Sedis, (nondum enim

erat ipse Pontifex factus) rogavit ut genti Anglorum in Britanniam aliquos verbi ministros, per quos ad Christum converteretur, mitteret; seipsum paratum esse in hoc opus Domino cooperante perficiendum, si tamen Apostolico Patre, hoc, ut fieret, placeret. Quod dum perficere non posset, (quia etsi Pontifex concedere illi quod petierat, voluit; non tamen cives Romani, ut tam longè ab urbe secederet, potuere permittere) mox ut ipse Pontificatus officio functus est, perfecit opus diù desideratum : alios quidem Prædicatorum mittens, sed ipse prædicationem ut fructificaret, suis exhortationibus ac precibus adjuvans. Hæc juxta opinionem quam ab antiquis accepimus, Historiæ nostræ Ecclesiasticæ inserere opportunum duximus.

CAPUT II.

141 Augustinus Brittonum Episcopos pro pace Catholicâ, etiam miraculo caelesti coram eis facto, monuerit; quare illos spernentes ultio secuta sit.

INTEREA Augustinus adjutorio usus Edilberti Regis, convocavit ad suum colloquium Episcopos sive Doctores proximæ Brittonum provincie, in loco qui usque hodie linguâ Anglorum *Augustineisac*, id est, robur Augustini, in confinio Huiusmodi & Occidentalium Saxonum, appellatur: cœpitque eis fraternali admonitione suadere, ut pace Catholica secum habitâ, communem evangelizandi gentibus pro Domino laborem susciperent. Non enim Paschæ Dominicum diem suo tempore, sed à decimâ quartâ usque ad vicissimam Lunam observabant: quæ computatio octoginta quatuor annorum circulo continetur. Sed & alia plurima unitati Ecclesiasticæ contraria faciebant. Qui cum longâ disputatione habitâ, neque precibus, neque hortamentis, neque increpationibus Augustini ac sociorum ejus adsensum præbere voluissent, sed suas potius traditiones universis, quæ per orbem sibi in Christo concordant, Ecclesiis præferrent, sanctus Pater Augustinus hunc laboriosi atque longi certaminis

minis finem fecit, ut diceret : Obsecremus Deum, qui habitare fecit unanimes in domo Patris sui, ut ipse nobis insinuare celestibus signis dignetur, quæ sequenda traditio, quibus sit viis ad ingressum regni illius properandum. Adducatur aliquis æger, & per cujus preces fuerit curatus, huius fides & operatio Deo devota atque omnibus sequenda credatur. Quod cum adversarii inviti licet concederent, adlatus est quidam de genere Anglorum, oculorum luce privatus : qui cum oblatus Brittonum Sacerdotibus, nil curationis vel sanationis horum ministerio perciperet; tandem Augustinus iustâ necessitate compulsus, flectit genua sua ad Patrem Domini nostri Jesu Christi, deprecans ut visum cæco, quem amiserat, restitueret, & per inluminationem unius hominis corporalem, in plurimorum cordibus fidelium spiritualis gratiæ lucem accenderet. Nec mora, inluminatur cæcus, ac verus summæ lucis præco ab omnibus prædicatur Augustinus. Tum Brittones confitentur quidem intellexisse se veram esse viam justitiæ quam prædicaret Augustinus : sed non se posse absque suorum consensu ac licentiâ priscis abdicare moribus. Unde postulabant ut secunda Synodus pluribus advenientibus fieret. Quod cum esset statutum, venerunt, ut perhibent, septem Brittonum Episcopi, & plures viri doctissimi, maximè de nobilissimo eorum Monasterio, quod vocatur linguâ Anglorum *Bancornaburg*, cui tempore illo Dinooth Abbas præfuisse narratur, qui ad præfatum ituri Concilium, venerunt primò ad quemdam virum sanctum ac prudentem, qui apud eos anachoreticam ducere vitam solebat, consulentes, an ad prædicationem Augustini suas deferere traditiones deberent. Qui respondebat : Si homo Dei est, sequimini illum. Dixerunt : Et unde hoc possumus probare ? At ille : Dominus (inquit) ait, Tollite jugum meum super vos, & discite à me quia mitis sum & humilis corde. Si ergo Augustinus ille mitis est & humilis corde, credibile est quia jugum Christi & ipse portet, & nobis portandum offerat : sin autem immitis ac superbus est, constat quia non est de Deo, neque nobis ejus sermo curandus est. Qui rursus aiebant : Et unde vel hoc dinoscere valemus ? Procurate, inquit, ut ipse

prior cum suis ad locum Synodi adveniat, & si vobis adpropinquantibus surrexerit, scientes quia famulus Christi est, obtemperanter illum audite: sin autem vos spreverit, nec coram vobis adsurgere voluerit, cum sitis numero plures, & ipse spernatur à vobis. Fecit ut dixerat. Factumque est, ut venientibus illis sederet Augustinus in sellâ. Quod illi videntes, mox in iram conversi sunt, eumque notantes superbix, cunctis quæ dicebat, contradicere laborabant. Dicebat autem eis, quod in multis quidem nostræ consuetudini, immò universalis Ecclesiæ contraria geritis: & tamen si in tribus his mihi obtemperare vultis; ut Pascha suo tempore celebretis; ut ministerium baptizandi, quo Deo renascimur, juxta morem sanctæ Romanæ & Apostolicæ Ecclesiæ compleatis; ut genti Anglorum unâ nobiscum verbum Domini prædicetis: cætera quæ agitis, quamvis moribus nostris contraria, æquanimiter cuncta tolerabimus. At illi nihil horum se facturos, neque illum pro Archiepiscopo habituros esse respondebant: conferentes adinvicem, quia si modò nobis adsurgere noluit, quantò magis si ei subdi cœperimus, jam nos pro nihilo contemnet. Quibus vir Domini Augustinus fertur minitans prædixisse, quod si pacem cum fratribus accipere nollent, bellum ab hostibus forent accepturi; & si nationi Anglorum nolissent viam vitæ prædicare, per horum manus ultionem essent mortis passuri. Quod ità per omnia (ut prædixerat) divino agente judicio patratum est. Siquidem post hæc ipse, de quo diximus, Rex Anglorum fortissimus Edilfridus, collecto grandi exercitu, ad civitatem Legionum, quæ à gente Anglorum *Legancestir*, à Brittonibus autem reatibus *Cyrligion* appellatur, maximam gentis perfidæ stragem dedit. Cùmque bellum acturus videret Sacerdotes eorum, qui ad exorandum Deum pro milite bellum agente convenerant, seorsum in tutiore loco consistere, seiscitabatur qui essent ii, quidve acturi illò convenissent. Erant autem plurimi eorum de Monasterio *Bancor*, in quo tantus fertur fuisse numerus Monachorum, ut cùm in septem portiones esset cum præpositis sibi Rectoribus Monasterium divisum, nulla harum portio minùs quàm trecentos homines haberet,

qui omnes de labore manuum suarum vivere solebant. Horum ergo plurimi ad memoratam aciem, peracto jejuni triduo, cum aliis orandi causâ convenerunt, habentes defensore nomine Brocmailum, qui eos intentos precibus à barbarorum gladiis protegeret. Quorum causam cum intellexisset Rex Edilfridus, ait: Ergo si adversum nos ad Deum suum clamant, profectò & ipsi quamvis arma non ferant, contra nos pugnant qui adversus nos imprecationibus persequuntur. Itaque in hos primum arma verti jubet, & sic ceteras nefandæ militiæ copias non sine magno exercitus sui damno delevit. Exstinctos in eâ pugna ferunt, de his qui ad orandum venerunt, viros circiter mille ducentos, & solum quinquaginta fugâ esse lapsos. Brocmailus ad primum hostium adventum cum suis terga vertens, eos quos defendere debuerat, inermes ac nudos ferientibus gladiis reliquit. Sicque completum est præsagium sancti Pontificis Augustini, quamvis ipso jam multo antè tempore ad cælestia regna sublato, ut etiam temporalis interitus ultionem sentirent perfidi, quòd oblata sibi perpetuæ salutis consilia spreverant.

CAPUT III.

*Ut idem Mellitum ac Justum Episcopos fecerit;
& de obitu ejus.*

ANNO Dominicæ Incarnationis sexcentesimo quarto Augustinus Britanniæ Archiepiscopus, ordinavit duos Episcopos, Mellitum videlicet & Justum: Mellitum quidem ad prædicandum provinciæ Orientalium Saxonum, qui Tamense fluvio dirimuntur à Cantia, & ipsi Orientali mari contigui, quorum Metropolis Lundonia civitas est, super ripam præfati fluminis posita, & ipsâ multorum emporium populorum terrâ marique venientium: in quâ videlicet gente tunc temporis Sæbercthus nepos Edelbercthi ex sorore Riculâ regnabat, quamvis sub potestate positus ejusdem Edelbercthi, qui omnibus (ut suprâ dictum est)

usque ad terminum Humbræ fluminis, Anglorum gentibus imperabat. Ubi verò & hæc provincia verbum veritatis prædicante Mellito accepit, fecit Rex Edelbercthus in civitate Lundoniâ Ecclesiam sancti Pauli Apostoli, in quâ locum sedis Episcopalis & ipse & successores ejus haberent. Justum verò in ipsâ Cantia Augustinus ordinavit Episcopum in civitate *Doroverni*, quam gens Anglorum à primario quondam illius qui dicebatur *Rhof*, *Rhofescestre* cognominat. Distat autem à *Doroverni* millibus passuum ferme viginti quatuor ad Occidentem, in quâ Rex Edelbercthus Ecclesiam beati Andreæ Apostoli fecit, qui etiam Episcopis utriusque hujus Ecclesiæ dona multa, sicut & Doroverniensis, obtulit: sed & territoria ac possessiones in usum eorum qui erant cum Episcopis, adjecit. Defunctus est autem Deo dilectus Pater Augustinus, & positum corpus ejus foras, juxta Ecclesiam beatorum Apostolorum Petri & Pauli, cujus supra meminimus, quia ea necdum fuerat perfecta, nec dedicata. Mox verò ut dedicata est, intrò inlatum, in porticu illius Aquilonari decenter sepultum est: in quâ etiam sequentium Archiepiscoporum omnium sunt corpora tumulata, præter duorum tantummodò, id est, Theodori & Berthualdi, quorum corpora in ipsâ Ecclesiâ posita sunt, eò quòd prædicta porticus plura capere nequivit. Habet hæc in medio penè sui, altare in honorem beati Gregorii Papæ dedicatum, in quo per omnesabbatum, à Presbytero loci illius agendæ eorum solemniter celebrantur. Scriptum verò est in tumbâ ejusdem Augustini epitaphium hujuscemodi:

Hic requiescit Dominus Augustinus Dorovernensis Archiepiscopus primus, qui olim hæc à beato Gregorio Romanæ urbis Pontifice, directus, & à Deo operatione miraculorum suffultus, Edelbercthum Regem, ac gentem illius ab idolorum cultu ad Christi fidem perduxit, & completis in pace diebus officii sui, defunctus est septimo Kalendas Junias, eodem Rege regnante.

CAPUT IV.

*Ut Laurentius cum Episcopis suis Scottis unitatem sanctæ Ecclesiæ,
& maximè in Pascha observando sequi monerit,
& ut Mellitus Romam venerit.*

SUCCESSIT autem Augustino in Episcopatum Laurentius, quem ipse idcirco adhuc vivens ordinaverat, ne se defuncto status Ecclesiæ tam rudis vel ad horam pastore destitutus vacillare inciperet. In quo & exemplum sequebatur primi Pastoris Ecclesiæ, hoc est, beatissimi Apostolorum Principis Petri, qui fundatâ Romæ Ecclesiâ Christi Clementem sibi adiutorem evangelizandi, simul & successorem consecrassè perhibetur. Laurentius Archiepiscopatus gradu potitus strenuissimè fundamenta Ecclesiæ, quæ nobiliter jacta vidit, augmentare, atque ad perfectum debiti culminis, & crebrâ voce sanctæ exhortationis, & continuis piæ operationis exemplis provehere curavit. Denique non solum novæ quæ de Anglis erat collecta, Ecclesiæ curam gerebat, sed & veterum Britanniæ incolarum, necnon & Scottorum, qui Hiberniam insulam Britanniæ proximam incolunt, populis pastorem impendere sollicitudinem curabat. Siquidem ubi Scottorum in præfatâ ipsorum patriâ, quomodò & Brittonum in ipsâ Britanniâ vitam ac professionem minùs Ecclesiasticam in multis esse cognovit, maximè quòd Paschæ solemnitatem non suo tempore celebrarent, sed (ut suprâ docuimus) à decimâ-quartâ Lunâ usque ad vicessimam Dominicæ Resurrectionis diem observandum esse putarent; scripsit cum Cœpiscopis suis, exhortatoriam ad eos epistolam: obsecrans eos, & contestans unitatem pacis & Catholicæ observationis cum eâ quæ toto orbe diffusa est Christi Ecclesiâ, tenere; cujus videlicet epistolæ principium hoc est:

Dominis carissimis fratribus Episcopis, vel Abbatibus per universam Scottiam, Laurentius, Mellitus, & Justus Episcopi, servi servorum Dei. Dum nos Sedes Apostolica

more suo, sicut in universo orbe terrarum in his Occiduis partibus ad prædicandum gentibus paganis dirigeret, atque in hanc insulam, quæ Brittania nuncupatur, contigit introisse antequàm cognosceremus: credentes quòd juxta morem universalis Ecclesiæ Ingredierentur, in magnâ reverentiâ sanctitatis tam Brittones quàm Scottos venerati sumus; sed cognoscentes Brittones, Scottos meliores putavimus. Scottos verò per Daganum Episcopum in hanc, quàm superius memoravimus, insulam, & Columbanum Abbatem in Galliis venientem, nihil discrepare à Brittonibus in eorum conversatione didicimus. Nam Daganus Episcopus ad nos veniens, non solum cibum nobiscum, sed nec in eodem hospitio quo vesebamur, sumere voluit. Misit idem Laurentius cum Coëpiscopis suis, etiam Brittonum Sacerdotibus litteras suo gradui condignas, quibus eas in unitate Catholicâ confirmare sategit. Sed quantum hæc agendo profecerit, adhuc præsentia tempora declarant. His temporibus venit Mellitus, Londoniæ Episcopus, Romam, de necessariis Ecclesiæ Anglorum cum Apostolico Papâ Bonifacio tractaturus. Et cum idem Papa reverentissimus cogeret Synodum Episcoporum Italiæ, de vitâ Monachorum & quiete ordinaturus, & ipse Mellitus inter eos adsedit anno octavo Imperii Focatis Principis, Indictione decimâ tertiâ, tertiâ die Kalendarum Martiarum: ut quæque erant regulariter decreta, suâ quoque auctoritate subscribens confirmaret, ac Britanniam rediens, secum Anglorum Ecclesiis mandanda atque servanda deferret; unâ cum epistolis quas idem Pontifex Deo dilecto Archiepiscopo Laurentio, & Clero universo, similiter & Edilberctho Regi atque genti Anglorum direxit. Hic est Bonifacius, quartus à beato Gregorio Romanæ urbis Episcopus, qui impetravit à Focate Principe, donari Ecclesiæ Christi templum Romæ quod *Pantheon* vocabatur ab antiquis, quasi simulacrum esset omnium deorum: in quo ipse eliminatâ omni spurcitiâ, fecit Ecclesiam sanctæ Dei Genitricis, atque omnium Martyrum Christi; ut exclusâ multitudine dæmonum, multitudo ibi Sanctorum memoriam haberet.

CAPUT V.

*Ut defunctis Edilbertho & Sabertho Regibus, successores eorum
 • idolatriam resuscitarent, ob quod & Mellitus ac Iustus à
 Britanniâ discesserint.*

ANNO ab Incarnatione Dominicâ sexcentesimo decimo septimo (qui est annus vicesimus primus, ex quo Augustinus Episcopus cum sociis ad prædicandum genti Anglorum missus est) Edilberthus Rex Cantuariorum, post regnum temporale, quod quinquaginta & sex annis gloriosissimè tenuerat, æterna cælestis regni gaudia subiit: qui tertius quidem in Regibus gentis Anglorum, cunctis Australibus, eorum provinciis qui Humbræ fluvio & contiguis ei terminis sequestrantur à Borealibus, imperavit; sed primus omnium cæli regna conscendit. Nam primus Imperium huiusmodi *Ell* Rex Australium Saxonum; secundus *Celin* Rex Occidentalium Saxonum, qui linguâ eorum *Ceanlin* vocabatur; tertius, ut dixi, Edilberthus Rex Cantuariorum; quartus *Reduals* Rex Orientalium Anglorum, qui etiam vivente Edilbertho eidem suæ genti ducatum præbebat, obtinuit; quintus Eduinus Rex Nordanhymbrorum gentis, id est, ejus quæ ad Borealem Humbræ fluminis plagam inhabitat, majore potentiâ cunctis qui Britanniam incolunt, Anglorum pariter & Brittonum populis præfuit, præter Cantuariis tantum; necnon & Mevanias Brittonum insulas, quæ inter Hiberniam & Britanniam sitæ sunt, Anglorum subjecit Imperio; sextus Oswaldus & ipse Nordanhymbrorum Rex Christianissimus, iisdem finibus regnum tenuit; septimus Oswi frater ejus, æqualibus penè terminis regnum nonnullo tempore coercens, Pictorum quoque atque Scottorum gentes, quæ Septentrionales Britanniae fines tenent, maximâ ex parte prædomuit, ac tributarias fecit. Sed hæc postmodum. Defunctus verò est Rex Edilberthus die vigesima quartâ mensis Februarii, post viginti & unum annos acceptæ fidei, atque in porticu sancti Martini, intra Ecclesiam

beatorum Apostolorum Petri & Pauli sepultus, ubi & Bercta Regina condita est. Qui inter cætera bona, quæ genti suæ consulendo conferebat, etiam decreta illi iudiciorum, juxta exempla Romanorum, cum consilio sapientium constituit: quæ conscripta Anglorum sermone hætenus habentur, & observantur ab eâ: in quibus primitus posuit, qualiter id emendare deberet, qui aliquid rerum vel Ecclesiæ, vel Episcopi, vel reliquorum ordinum furto auferret: volens scilicet tuitionem eis, quos & quorum doctrinam susceperat, præstare. Erat autem idem Edilbercthus filius Hirminici, cujus pater Osta, cujus pater Orric, cognomento *Oise*, à quo Reges Cantuariorum solent *Oisingas* cognominari. Cujus pater *Hengist*, qui cum filio suo *Oise* invitatus à Vurtigerio Britanniam primus intravit, ut suprâ retulimus. At verò post mortem Edilbercthi, cum filius ejus Eadbaldu regni gubernacula suscepisset, magno tenellis adhuc ibi Ecclesiæ crementis detrimento fuit. Siquidem non solum Christi fidem recipere noluerat, sed & fornicatione pollutus est tali, qualem nec inter gentes auditam Apostolus testatur, ita ut uxorem patris haberet. Quo utroque scelere occasionem dedit ad priorem vomitum revertendi, iis qui sub imperio sui parentis vel favore, vel timore regio, fidei & castimonie jura susceperant. Nec supernæ flagella districtiōis perfido Regi castigando & corrigendo defuere. Nam crebrâ mentis vesaniâ, & spiritûs immundi invasione premebatur. Auxit autem procellam hujusce perturbationis, etiam mors Sabercti Regis Orientalium Saxonum, qui ubi regna perennia petens, tres filios suos, qui pagani perduraverant, regni temporalis heredes reliquit, cæperunt illi mox idolatriæ, quam vivente eo aliquantulum intermisisse videbantur, palàm servire, subjectisque populis idola colendi liberam dare licentiam. Cùmque viderent Pontificem celebratis in Ecclesiâ Missarum sollempniis, Eucharistiam populo dare, dicebant (ut vulgò fertur) ad eum barbarâ inflatâ stultitiâ: Quare non & nobis porrigis panem nitidum, quem & Patri nostro Saba (sic namque eum appellare consueverant) dabas, & populo adhuc dare in Ecclesiâ non desistis? Quibus ille respondebat: Si vultis ablui illo fonte salutari

salutari quo pater vester ablatus est, potestis etiam panis sancti, cui ille participabat, esse participes: sin autem lavacrum vitæ contemnitis, nullatenus valeatis panem vitæ percipere. At illi, Nolumus, inquit, fontem illum intrare, quia nec opus illo nos habere novimus, sed tamen pane illo refici volumus. Cumque diligenter ac sæpe ab illo essent admoniti, nequaquam fieri posse ut absque purgatione sacrosancta quis oblationi sacrosanctæ communicaret, ad ultimum furore commoti aiebant. Si non vis adfentiri nobis in tam facili causâ quam petimus, non poteris jam in nostrâ provinciâ demorari. Et expulerunt eum, ac de suo regno cum suis abire iusserunt. Qui expulsus inde, venit Cantiam, tractaturus cum Laurentio & Justo Coëpiscopis, quid in his esset agendum. Decretumque est communi consilio, quia sapius esset ut omnes patriam redeuntes, liberâ ibi mente Domino deservirent, quàm inter rebelles fidei barbaros sine fructu residerent. Discessere itaque primò Mellitus ac Justus, atque ad partes Galliarum excessere, ibi rerum finem expectare disponentes. Sed non multo tempore Reges qui præconem veritatis à se depulerant, dæmoniacis cultibus impunè serviebant. Nam egressi contra gentem Genissorum in prælium, omnes pariter cum suâ militiâ corruerunt, nec (licet auctoribus perditis) excitatum ad scelera vulgus potuit corrigi, atque ad simplicitatem fidei & caritatis quæ est in Christo, revocari.

CAPUT VI.

*Uti correptus ab Apostolo Petro Laurentius Eodaldum Regem
ad Christum converteris, qui mox Mellitum & Iustum
ad predicanum revocaverit.*

CUM verò & Laurentius Mellitum Justumque secuturus, ac Britanniam esset relicturus, iussit ipsâ sibi nocte in Ecclesiâ beatorum Apostolorum Petri & Pauli, de quâ frequenter jam diximus, stratum parari, in quo cum post multas preces ac lacrymas ad Dominum pro statu Ecclesiæ fufas,

ad quiescendum membra posuisset, atque obdormisset, apparuit ei beatissimus Apostolorum Princeps, & multo illum tempore secretæ noctis flagellis acrioribus afficiens, suscitabatur Apostolicâ districtione; quare gregem quem sibi ipse crediderat, relinqueret, vel cui Pastorum oves Christi in medio lporum positas fugiens ipse dimitteret. An mei, inquit, oblitus es exempli, qui pro parvulis Christi, quos mihi in indicium suæ dilectionis commendaverat, vincula, verbera, carceres, afflictiones, ipsam postremò mortem, mortem autem crucis, ab infidelibus & inimicis Christi ipse cum Christo coronandus pertuli. His beati Petri flagellis simul & exhortationibus animatus famulus Christi Laurentius, mox manè factò venit ad Regem, & resecto vestimento, quantis esset verberibus laceratus, ostendit. Qui multùm miratus, & inquirens quis tanto viro tales ausus esset plagas infligere: ut audivit, quia causâ suæ salutis Episcopus ab Apostolo Christi tanta esset tormenta plagasque perperius, extimuit multùm; atque anathematizato omni idolatriæ cultu, abdicato connubio non legitimo, suscepit fidem Christi, & baptizatus, Ecclesiæ rebus quantùm valuit, in omnibus consulere ac favere curavit. Misit etiam Galliam, & revocavit Mellitum & Justum, eosque ad suas Ecclesias liberè restituendas redire præcepit: qui post annum ex quo abierant, reversi sunt; & Justus quidem ad civitatem *Rhosi*, cui præfuerat, rediit; Mellitum verò Londonienses Episcopum recipere noluerunt, idolatris magis Pontificibus servire gaudentes. Non enim tanta erat ei, quanta patri ipsius regni potestas, ut etiam nolentibus ac contradicentibus paganis Antistitem suæ posset Ecclesiæ reddere. Verumtamen ipse cum suâ gente, ex quo ad Dominum conversus est, divinis se studuit mancipare præceptis. Denique & in Monasterio beatissimi Apostolorum Principis, Ecclesiam sanctæ Dei Genitricis fecit, quam consecravit Archiepiscopus Mellitus.



CAPUT VII.

*Us Mellitus Episcopus flammis ardentis suæ civitatis
orando restinxerit.*

HOc enim regnante Rege beatus Archiepiscopus Laurentius regnum cæleste conscendit, atque in Ecclesiâ & Monasterio sancti Apostoli Petri juxta prædecessorem suum Augustinum sepultus est die quarto Nonarum Februariarum: postquàm * Mellitus, qui erat Lundoniæ Episcopus, sedem Dorovernensis Ecclesiæ tertius ab Augustino suscepit: Justus autem adhuc superstes Rhofensem regebat Ecclesiam, qui cùm magnâ Ecclesiam Anglorum curâ ac labore gubernarent, susceperunt scripta exhortatoria à Pontifice Romanæ & Apostolicæ Sedis Bonifacio, qui post Deusdedit Ecclesiæ præfuit, anno Incarnationis Dominicæ sexcentesimo decimo nono. * Erat autem Mellitus corporis quidem infirmitate, id est, podagrâ gravatus, sed mentis gressibus sanus alacriter terrena quæque transiliens, atque ad cælestia semper amanda, petenda, & quærenda pervolans. Erat carnis origine nobilis, sed culmine mentis nobilior. Denique ut unum virtutis ejus (unde cætera intellegi possint) testimonium referam; tempore quodam civitas Dorovernensis per culpam incurrit igne correpta, crebrescentibus cæpit flammis consumi: quibus cùm nullo aquarum injectu posset aliquis obsistere, jamque civitatis esset pars vastata non minima, atque ad episcopium furens se flamma dilataret, confidens Episcopus in divinum, ubi humanum deerat, auxilium, jussit se obviam sævientibus, & huc illucque volantibus ignium globis efferri. Erat autem eò loci ubi flammarum impetus maximè incumberebat, martyrium beatorum quatuor Coronatorum. Ibi perlatus obsequentium manibus Episcopus, cæpit orando periculum infirmus abigere, quod firma fortium manus multùm laborando nequiverat. Nec mora, ventus qui à meridie flans, ubi incendia sparserat, contra meridiem reflexus, primò vim sui futuri à rione loco-

* *ut. leg.*
post quædam.

* *Labbanus*
legit 618.
ut opinor,
malè.

rum quæ contra erant, abstraxit, ac mox funditus quiescendo, flammis pariter sopitis atque extinctis compescuit. Et quia vir Dei igne divinæ caritatis fortiter ardebat, qui tempestates æriarum potestatum à suâ suorumque læsione crebris orationibus vel exhortationibus repellere consueverat, merito ventis flammisque mundialibus prævalere, & ne sibi suisque nocerent, obtinere poterat. Et hic ergo postquam annis quinque rexit Ecclesiam; Eodbaldo regnante migravit ad cælos, sepultusque est cum patribus suis in supradicto Monasterio & Ecclesiâ beatissimi Apostolorum Principis, anno ab Incarnatione Domini sexcentesimo vicesimo quarto, die octavo Kalendarum Martiarum.

CAPUT VIII.

*Ut Bonifacius Papa Justo successori ejus Pallium
& epistolam miseris.*

CUR statim successit in Pontificatum Justus, qui erat Rhofensis Ecclesiæ Episcopus. Illi autem Ecclesiæ Romanum propè consecravit Episcopum, datâ sibi ordinandi Episcopos auctoritate à Pontifice Bonifacio, quem successorem fuisse Deus dedit suprâ meminimus; cujus auctoritatis ista est forma: Dilectissimo fratri Justo, Bonifacius. Quàm devotè, quàmque etiam vigilanter pro Christi Evangelio elaboraverit vestra Fraternitas, non solum epistolæ à vobis directæ tenor, immò indulta desuper operi vestro perfectio indicavit. Nec enim omnipotens Deus, aut sui nominis sacramentum, aut vestri fructum laboris deseruit, dum ipse Prædicatoribus Evangelii fideliter repromisit: Ecce ego vobiscum sum omnibus diebus usque ad consummationem sæculi. Quod specialiter injuncto vobis ministerio ejus clementia demonstravit, aperiens corda gentilium ad suscipiendum prædicationis vestræ singulare mystrium. Magno enim præmio fatigiorum vestrorum delectabilem cursum, bonitatis suæ suffragiis inlustravit, dum creditorum vobis talentorum fidelissimæ negotiationis officiis, uberem fructum impendens,

ci, quod signare possitis multiplicatis generationibus præparavit. Hócque etiam illâ vobis repentinâ conlatum est, quâ injuncto ministerio jugiter persistentes, laudabili patientiâ redemptionem gentis illius expectatis, & vestris ut proficerent meritis, eorum est salvatio propinata, dicente Domino: Qui perseveraverit usque in finem, hic salvus erit. Salvati ergo estis spe patientiæ, & tolerantæ virtute, ut infidelium corda naturali ac superstitioso morbo purgata, sui consequerentur misericordiam Salvatoris. Susceptis namque apicibus filii nostri Adulvaldi Regis, reperimus quantâ sacri eloquii eruditione, ejus animum ad veræ conversionis, & indubitatæ fidei credulitatem, Fraternitas vestra perduxerit. Quâ ex re de longanimitate clementiæ cælestis certam adsumentes fiduciam, non solum suppositarum ei gentium plenissimam salutem, immò quoque vicinarum, vestræ prædicationis ministerio credimus subsequendum: quatenus (sicut scriptum est) consummati operis vobis merces à retributore omnium bonorum Domino tribuatur. Et verè per omnem terram exisse sonum eorum, & in fines orbis terræ verba eorum, universalis gentium confessio suscepto Christianæ sacramento fidei protestetur. Pallium præterea per latorem præsentium Fraternitati tuæ, benignitatis studiis invitati direximus, quod videlicet tantum in sacrosanctis mysteriis celebrandis licentiam utendi imperavimus: concedentes etiam tibi, ordinationes Episcoporum, exigente opportunitate, Domini præveniente misericordiâ celebrate: itaut Christi Evangelium plurimorum adnunciatione, in omnibus gentibus quæ necdum conversæ sunt, dilatetur. Studeat ergo tua Fraternitas, hoc quod Sedis Apostolicæ humanitatis percepit, intemeratâ mentis sinceritate servare. Intendens cujus rei similitudine tam præcipuum indumentum humeris tuis bajulandum susceperis. Talémque te Domini imploratâ clementiâ exhibendum stude, ut indulti muneris præmia cum cæcitate, sed cum commodis animarum, ante tribunal summi & venturi Judicis repræsentantes. Deus te incolumem custodiat, dilectissime Frater.



CAPUT IX.

*De Imperio Regis Eduini , & ut veniens ad evangelizandum
ei Paulinus , primo filiam ejus cum aliis , fidei Christianæ
Sacramentis imbuerit.*

QUo tempore etiam gens Nordanhymbrorum, hoc est, ea natio Anglorum, quæ ad Aquilonarem Humbræ fluminis plagam habitabat, cum Rege suo Eduino, verbum fidei prædicante Paulino, cujus supra meminimus, suscepit. Cui videlicet Regi in auspiciis suscipiendæ fidei, & regni cælestis, potestas etiam terreni creverat Imperii: itaut, quod nemo Anglorum ante eum, omnes Brittaniz fines, quæ vel ipsorum, vel Brittonum provinciæ habitant, sub ditione acceperit. Quin & Mevanias insulas (sicut & supra docuimus) imperio subjugavit Anglorum: quarum prior quæ ad Austrum est, & situ amplior, & frugum proventu atque ubertate felicior, nongentarum sexaginta familiarum mensuram, juxta æstimationem Anglorum; secunda trecentorum & ultra spatium tenet. Huic autem genti occasio fuit percipiendæ fidei, quod præfatus Rex ejus, cognatione junctus est Regibus Cantuariorum, acceptâ in conjugem Edilburge filiâ Edilbercthi Regis, quæ alio nomine *Tate* vocabatur. Hujus consortium cum primò ipse missis procis à fratre ejus Eodbaldo, qui tunc regno Cantuariorum præerat, petierat: responsum est, non esse licitum, Christianam virginem pagano in conjugem dari, ne fides & Sacramenta cælestis Regis, consortio profanarentur Regis, qui veri Dei cultus esset prorsus ignarus. Quæ cum Eduino verba nuncii referrent, promissit se nihil omnimodis contrarium Christianæ fidei, quam virgo colebat, esse facturum: quin potius permissurum ut fidem cultumque suæ religionis cum omnibus qui secum venissent, viris sive feminis, Sacerdotibus seu ministris more Christiano servaret. Neque abnegavit se etiam eandem subiturum esse religionem; si tamen examinata à prudentibus sanctior ac Deo dignior posset inveniri. Itaque promittitur

virgo, atque Eduino mittitur, & juxta quod dispositum fuerat, ordinatur Episcopus vir Deo dilectus Paulinus, qui cum illâ veniret; eamque, & comites ejus, ne paganorum possent societate pollui, quotidianâ exhortatione, & Sacramentorum celestium celebratione confirmaret. Ordinatus est autem Paulinus Episcopus à Justo Archiepiscopo, sub die duodecimâ Kalendarum Augustarum, anno ab Incarnatione Domini sexcentesimo vicesimo quinto: & sic cum præfatâ virgine ad Regem Eduinum quasi comes copulæ carnalis advenit. Sed ipse potius toto animo intendens, ut gentem quam adibat, ad agnitionem veritatis advocans, juxta vocem Apostoli, uni viro sponso virginem castam exhiberet Christo. Cumque in provinciam venisset, laboravit multum, ut eos qui secum venerant, ne à fide discederent, Domino adjuvante contineret, & aliquos (si fortè posset) de paganis ad fidei gratiam prædicando converteret. Sed sicut Apostolus ait: Quamvis multo tempore illo laborante in verbo Deus sæculi hujus excæcavit mentes infidelium, ne eis fulgeret illuminatio Evangelii gloriæ Christi. Anno autem sequente venit in provinciam quidam sicarius, vocabulo *Eumernus*, missus à Rege Occidentalium Saxonum, nomine *Guichelmo*, sperans se Regem Eduinum regno simul & vitâ privaturum: qui habebat sicam bicipitem toxicatam; ut si ferri vulnus minùs ad mortem Regis sufficeret, peste juvaretur veneni. Pervenit autem ad Regem primo die Paschæ, juxta amnem Doruventionem, ubi tunc erat villa regalis; intravitque quasi nuncium domini sui referens: & cum simulatam legationem ore astuto volveret, exsurrexit repente, & evaginatâ sub veste sicâ, impetum fecit in Regem. Quod cum videret Lilla minister Regis amicissimus, non habens scutum ad manum quo Regem à nece defenderet, mox interposuit corpus suum ante ictum pungentis: sed tantâ vi hostis ferrum infixit, ut per corpus militis occisi etiam Regem vulneraret. Qui cum mox undique gladiis impeteretur, in ipso tumultu etiam alium de militibus, cui nomen erat *Frodheri*, sicâ nefaria peremit. Eâdem autem nocte sanctâ Dominicæ Paschæ pepeterat Regina filiam Regi, cui nomen *Eanfred*. Cumque idem Rex præsentem

Paulino Episcopo, gratias ageret diis suis pro natâ sibi filiâ, contrâ Episcopus gratias cœpit agere Domino Christo, Regique adstruere, quodd ipse precibus suis apud illum obtinuerit, ut Regina sospes & absque dolore gravi sobolem procrearet. Cujus verbis delectatus Rex, promisit se abrenunciari idolis Christo servitutum, si vitam sibi & victoriam donaret pugnanti adversus Regem, à quo homicida ille, qui eum vulneraverat, missus est: & in pignus promissionis implendæ, eandem filiam Christo consecrandam Paulino Episcopo assignavit; quæ baptizata est die sancto Pentecostes, prima de gente Nordanhymbrorum, cum duodecim aliis de familiâ ejus. Quo tempore curatus à vulnere sibi pridem inflicto, Rex collecto exercitu venit adversus Regem Occidentalium Saxonum, ac bello inito, universos quos in necem suam conspirasse didicerat, aut occidit, aut in deditionem recepit. Sicque victor in patriam reversus, non statim & inconsultè sacramenta fidei Christianæ percipere voluit: quamvis nec idolis ultrâ servivit, ex quo se Christo servitutum esse promiserat. Verùm primò diligentius ex eo tempore, & ab ipso venerabili viro Paulino rationem fidei ediscere, & cum suis Primatibus quos sapientiores noverat, curavit conferre, quid de iis agendum arbitrantur. Sed & ipse cùm esset vir naturâ sagacissimus, sæpe diù solus residens, ore quidem tacito, sed in intimis cordis multa secum conloquens, quid sibi esset faciendum, quæ religio servanda tractabat.

CAPUT X.

Ut Papa Bonifacius eundem Regem missis litteris sit hortatus ad fidem.

117.

QUO tempore exhortatorias ad fidem litteras à Pontifice Sedis Apostolicæ Bonifacio accepit, quarum ista est forma:

Exemplar

*Exemplar epistole beatissimi & Apostolici Papæ urbis Romæ
Bonifacii, directæ viro glorioso Eduino Regi Anglorum.*

VIRO glorioso Eduino Regi Anglorum, Bonifacius Episcopus servus servorum Dei. Licet summæ divinitatis potentia humanæ locutionis officiis explanari non valeat, quippe quæ sui magnitudine ita invisibili atque investigabili æternitate consistit, ut eam nulla ingenii sagacitas, quanta sit, comprehendere discretæque sufficiat: quia tamen ejus humanitas ad insinuationem sui reſeratis cordis januis, quæ de ſemetipsâ proferantur, secretâ humanis mentibus inspiratione clementer infundit; ad adnunciandam vobis plenitudinem fidei Christianæ, sacerdotalem curavimus sollicitudinem prærogare, ut perinde Christi Evangelium, quod Salvator noster omnibus præcepit gentibus prædicari, vestris quoque sensibus inferentes, salutis vestræ remedio propinquentur. Supernæ igitur majestatis clementiæ, quæ cuncta solo verbo præceptionis suæ condidit & creavit, cælum videlicet & terram, mare & omnia quæ in eis sunt, dispositis ordinibus quibus subsisterent, coæterni Verbi sui consilio, & sancti Spiritûs unitate dispensans, hominem ad imaginem & similitudinem suam ex limo terræ plasmatum constituit, eique tantam præmii prærogativam indulſit, ut cum cunctis præponeret, atque servato tempore præceptionis, æternitatis subsistentiâ præmuniret. Hunc ergo Deum Patrem, & Filium, & Spiritum sanctum, quod est individua Trinitas, ab ortu Solis usque ad occasum, humanum genus, quippe ut creatorem omnium, atque factorem suum salutiferâ confessione fide veneratur & colit: cui etiam summitates imperii rerumque potestates submissæ sunt, quia ejus dispositione omnium prælatio regnorum conceditur. Ejus ergo bonitatis misericordia totius creaturæ suæ dilatandæ subsidio, etiam in extremitate terræ, positarum gentium corda frigida, sancti Spiritus fervore in sui quoque agnitione mirabiliter est dignata succendere. Quæ enim in gloriosi filii nostri Audobaldi Regis, gentibusque ei subpositis inlustratione, cle-

mentia Redemptoris fuerit operata, plenius ex vicinitate locorum vestram gloriam conjicimus cognovisse. Ejus ergo mirabile donum, & in vobis certâ spe, celesti longanimitate conferri confidimus. Cum profectò gloriosam conjugem vestram, quæ vestri corporis pars esse dignoscitur, æternitatis præmio per sacri baptismatis regenerationem inluminatam agnovimus. Unde præsentî stylo gloriosius vos adhortandos cum omni affectu intimæ caritatis curavimus; quatenus abominatis idolis, eorûnque cultu, spretisque sanorum fatuitatibus, & auguriorum deceptibilibus blandimentis, credatis in Deum Patrem omnipotentem, ejusque Filium Jesum Christum, & Spiritum sanctum, & credentes, à diabolicæ captivitatis nexibus, sanctæ & individue Trinitatis cooperante potentiâ absoluti, æternæ vitæ pollicitis esse participes. Quantâ autem reatitudinis culpâ teneantur obstricti hi qui idolatriarum perniciosissimam suppositionem colentes amplectuntur, eorûnque quos colunt, exempla perditionis insinuant; unde de eis per Psalmistam dicitur: Omnes dii gentium dæmonia, Dominus autem cælos fecit. & iterum: Oculos habent, & non vident; aures habent, & non audiunt; nares habent, & non odorabunt; manus habent, & non palpabunt; pedes habent, & non ambulant: similes ergo efficiuntur his qui speciem confidentiæ ponunt in eis. Quomodò enim juvandi quemlibet possunt habere virtutem hi, qui ex corruptibili materiâ inferiorum etiam, subpositorûnque tibi manibus construuntur? quibus videlicet artificium humanum adcommodans eis inanimatam membrorum similitudinem contulisti? qui nisi à te moti fuerint, ambulare non poterunt; sed tanquam lapis in uno loco positus, ita constricti, nihilque intelligentiæ habentes, ipsæque insensibilitate obruti, nullam neque lædendi neque juvandi facultatem adepti sunt? Quâ ergo mentis deceptione eos, deos, quibus vos ipsi imaginem corporis tradidistis, colentes sequimini, judicio discreto reperire non possumus. Unde oportet vos suscepto signo sanctæ crucis, per quod humanum genus redemptum est, execrandam diabolicæ veritatis subplantationem, qui divinæ bonitatis operibus invidus æmulusque consistit, à cordibus vestris abjicere, injectisque manibus hos, quos

eatenus materiæ compage vobis deos fabricastis, confringen-
 dos diminuendosque summoperè procurare. Ipsa enim eo-
 rum dissolutio corruptioque, quæ nunquam viventem spiri-
 tum habuit, nec sensibilitatem à suis factoribus potuit quo-
 libet modo suscipere, vobis patenter insinuat quàm nihil
 erat quod eatenus colebatis: dum profectò meliores vos qui
 spiritum viventem à Domino percepistis, eorum constru-
 ctioni nihilominus existatis: quippe quos Deus omnipotens
 exprimi hominis quem plasmavit cognatione deductus, per
 sæcula innumerabilibus propagibus pullulare constituit.
 Accedite ergo ad agnitionem ejus qui vos creavit, qui in
 vobis vitæ insufflavit spiritum, qui pro vestrà redemptione
 Filium suum unigenitum misit, ut vos ab originali peccato
 eriperet, & ereptos de potestate diabolicæ nequitiae, cæ-
 lestibus præmiis numeraret. Suscipite verba Prædicatorum,
 & Evangelium Dei quod vobis adnunciant; quatenus cre-
 dentes (sicut sæpius dictum est) in Deum Patrem omni-
 potentem, & in Jesum Christum ejus Filium, & in Spi-
 ritum sanctum, & inseparabilem Trinitatem; fugatis dæ-
 moniorum sensibus, expulsæque à vobis sollicitatione ve-
 nenosi & deceptibilis hostis, per aquam & Spiritum san-
 ctum renati, ei cui credideritis, in splendore gloriæ sem-
 pternæ cohabitare, ejus opitulante munificentia valeatis.
 Præterea benedictionem protectoris vestri beati Petri Apo-
 stolorum Principis vobis direximus; id est, camisiam cum
 ornatūrā in auro unam, & lanam ancirianam unam: quod
 petimus, ut eo benignitatis animo gloria vestra suscipiat, quo
 à vobis noscitur destinatum.



CAPUT XI.

Ut conjugem ipsius, per epistolam, salutis illius sedulam agere curam monuerit.

AD conjugem quoque ejus Edilbergam ejusmodi litteras idem Pontifex misit,

Exemplar epistolæ beatissimi & Apostolici Bonifacii Papa urbis Roma, directæ Edilberga Reginae Eduini Regis.

DOMINÆ glorioſæ filix Edilbergæ Reginae, Bonifacius Episcopus ſervus ſervorum Dei. Redemptoris noſtri benignitas humano generi quod pretioſi ſanguinis ſui effuſione à vinculis diabolicæ captivitatis eripuit, multæ providentiæ quibus ſalvaretur, propinavit remedia; quatenus ſui nominis agnitionem diverſo modo gentibus innotefcens, Creatorem ſuum ſuſcepto Chriſtianæ fidei agnoſcerent ſacramento. Quod quidem in veſtræ gloriæ ſenſibus cæleſti conlatum munere myſtica regeneratio veſtræ purgationis patenter innuit. Magno ergo largitatis Dominicæ beneficio mens noſtra gaudio exultavit, quod ſcintillam orthodoxæ religionis in veſtri dignatus eſt converſione ſuccendere. Ex quâ re non ſolùm glorioſi conjugis veſtri, imò totius gentis ſubpoſitæ vobis intellegentiam in amorem ſui faciliùs inflammaret. Didicimus namque referentibus hiſ, qui ad nos glorioſi filii noſtri Audubaldi Regis laudabilem converſionem nunciantes pervenerunt, quòd etiam veſtra gloria Chriſtianæ fidei ſuſcepto mirabili ſacramento piis & Deo placitis operibus eniteſcat, ab idolorum etiam cultu, ſeu fanorum, auguriorumque inlecebris ſe diligenter abſtineat, & ita in amore ſui Redemptoris immutilatâ devotione perſiſtens invigilet, ut ad dilatandam Chriſtianam fidem inceſſabiliter non deſiſtat operam commodare: cùmque de glorioſo conjuge veſtro paterna caritas ſollicitè perquiſiſſet, quòd eatenus abominandis

idolis serviens, ad suscipiendam vocem Prædicatorum suam distulerit obedientiam exhibere. Quâ ex re non modica nobis amaritudo congesta est, ab eo quod pars corporis vestri ab agnitione summæ & individûe Trinitatis remansit extranea. Unde de paternis officiis vestræ gloriosæ Christianitati nostram commonitionem non distulimus conferendam; adhortantes, quatenus divinæ inspirationis imbuta subsidiis, importunè & opportunè agendum non differas: ut & ipse Salvatoris nostri Domini Jesu Christi cooperante potentiâ Christianorum numero copuletur; ut perinde intemerato societatis fœdere jura teneas maritalis consortii. Scriptum namque est: Erunt duo in carne unâ. Quomodo ergo unitas vobis conjunctionis inesse dici poterit, si à vestræ fidei splendore interpositis detestabilis erroris tenebris remanserit ille alienus? Unde orationi continuò insistens, à longanimitate cælestis clementiæ inluminatiōis illius beneficia impetrare non desinas: ut videlicet quos copulatio carnalis affectûs unum quodammodò corporis exhibuisse monstratur, hos quoque unitas fidei etiam post hujus vitæ transitum in perpetuâ societate conservet. Insiste ergo, gloriosa filia, & summis conatibus duritiâ cordis ipsius religiosâ divinorum præceptorum insinuatione mollire summoperè dematura: infundens sensibus ejus, quantum sit præclarum quod credendo suscepisti mysterium, quantumve sit admirabile quod renata præmium consequi meruisti. Frigiditatem cordis ipsius, sancti Spiritûs adnunciatione succende; quatenus amoto torpore perniciosissimi cultûs, divinæ fidei calor ejus intellegentiam tuarum exhortationum frequentatione succendat, ut profectò sacræ Scripturæ testimonium per te expletum indubitanter perclareat. Salvabitur vir infidelis per mulierem fidelem. Ad hoc enim misericordiam Dominicæ pietatis consecuta es, ut fructum fidei creditorumque tibi beneficiorum Redemptori tuo multiplicem resignares. Quod equidem suffragante præsidio benignitatis ipsius, ut explere valeas, assiduis non desistimus precibus postulare. His ergo præmissis, paternæ vobis dilectionis exhibentes officia, hortamur, ut nos, repertâ portitoris occasione, de his quæ per vos superna potentia mirabiliter in conversatione conjugis

vestri, submissæque vobis gentis, dignatus fuerit operari, prosperis quantocius nunciis reveletis: quatenus sollicitudo nostra, quæ de vestri vestrorumque omnium animæ salute optabilia desideranter expectat, vobis nunciantibus reveletur, inlustrationemque divinæ propitiationis in vobis diffusam opulentiùs agnoscentes, hilari confessione largitori omnium bonorum Deo & beato Petro Apostolorum Principi uberes meritò gratias exsolvamus. Præterea benedictionem protectoris vestri beati Petri Apostolorum Principis vobis direximus; id est, speculum argenteum, & pectinem ebo-
reum inauratum: quod petimus, ut eo benignitatis animo gloria vestra suscipiat, quo à nobis noscitur destinatum.

CAPUT XII.

Ut Eduinus per visionem quondam sibi exuli ostensam, sit ad credendum provocatus.

HÆc quidem memoratus Papa Bonifacius de salute Regis Eduini ac gentis ipsius, litteris agebat. Sed & oraculum cæleste quod illi quondam exulanti apud Redualdum Regem Anglorum pietas divina revelare dignata est, non minimùm ad suscipienda vel intellegenda doctrinæ monita salutaris sensum illius juvit. Cùm ergo videret Paulinus difficulter posse sublimitatem animi regalis, ad humilitatem viæ salutaris, & suscipiendum mysterium vivificæ crucis inclinari, ac pro salute ipsius, simul & gentis cui præerat, & verbo exhortationis apud homines, & apud divinam pietatem verbo deprecationis ageret, tandem (ut verisimile videtur) didicit in spiritu, quod vel quale esset oraculum Regi quondam cælitus ostensum. Nec exinde distulit quin continuò Regem ammoneret expleri votum, quod in oraculo sibi exhibito se facturum promiserat, si temporis illius ærumnis exemptus, ad regni fastigia perveniret. Erat autem oraculum huiusmodi: Cùm persequente illum Edilfrido, qui ante eum regnavit, per diversa occultus loca vel regna, multo annorum tempore profugus vagaretur; tandem venit

ad Regem Redualdum, obsecrans ut vitam suam à tanti persecutoris insidiis tutando servaret: qui libenter eum excipiens, promisit se quæ petebat, esse facturum. At postquam Edilfridus in hac eum provinciâ apparuisse, & apud Regem illius familiariter cum sociis habitare cognovit, misit nuncios, qui Redualdo pecuniam multam pro nece ejus offerrent: neque aliquid profecit. Misit secundo, misit tertio, & copiosiora auri & argenti dona offerens, & bellum insuper illi si contemneretur, indicens Qui vel minis fractus, vel corruptus muneribus, cessit deprecanti, ut sive occidere se Eduinum, seu legatariis tradere promisit. Quod ubi fidelissimus quidam amicus illius animadvertit, intravit cubiculum quo dormire disponebat; (erat enim prima hora noctis) & evocatum foras, quid erga eum agere Rex promississet, edocuit, & insuper adjecit: Si ergo vis, hac ipsâ horâ inducam te de hac provinciâ, & ea in loca te introducam, ubi nunquam te vel Redualdus vel Edilfridus invenire valeant. Qui ait: Gratias quidem ago benevolentiae tuæ; non tamen hoc facere possum quod suggeris, ut pactum quod cum tanto Rege inii, ipse primus irritum faciam, cum ille mihi nihil mali fecerit, nihil adhuc inimicitiarum intulerit. Quin potius, si moriturus sum, ille me magis quàm ignobilior quisquam me morti tradat. Quò enim nunc fugiam, qui per omnes Britanniæ provincias, tot annorum temporumque curriculis vagabundus, hostium vitabam insidias? Abeunte igitur amico remansit Eduinus solus foris, residensque mœstus ante palatium, multis cœpit cogitationum æstibus affici, quid ageret, quòve pedem verteret nescius. Cùmque diu tacitis mentis angoribus & cæco carperetur igne, vidit subito intempestæ noctis silentio appropinquantem sibi hominem vultus habitusque incogniti: quem videns ut ignotum & inopinatum, non parùm expavit. At ille accedens salutavit eum, & interrogavit, quare illâ hora, cæteris quiescentibus, & alto sopore pressis, solus ipse mœstus in lapide pervigil sederet. At ille vicissim sciscitabatur, quid ad eum pertineret, utrum ipse intus an foris noctem transigeret. Qui respondens ait: Ne me æstimes tuæ mœstitiæ & insomniorum, & forinsecæ & solitariae sessionis causam nescire: scio enim cer-

tissimè qui es, & quare mœres, & quæ ventura tibi in proximo mala formidas. Sed dicito mihi quid mercedis dare velis ei, si qui sit, qui his te mœroribus absolvat, & Redualdo suadeat, ut nec ipse tibi aliquid mali faciat, nec tuis te hostibus perimendum tradat. Qui cùm se omnia quæ posset, huic tali pro mercede beneficii daturum esse responderet, adjecit ille: Quid si etiam te Regem futurum extinctis hostibus in veritate promittat, itaut non solum omnes progenitores tuos, sed & omnes qui ante te Reges in gente Anglorum fuerant, potestate transcendas? At Eduinus constanter interrogando factus, non dubitavit promittere, quin ei qui tanta sibi beneficia donaret, dignis ipse gratiarum actionibus responderet. Tum ille tertio: Si autem, inquit, is qui tibi tanta taliaque dona veraciter adventura prædixerit, etiam consilium tibi tuæ salutis ac vitæ melius atque utilius quàm aliquis de tuis parentibus aut cognatis unquam audivit, ostendere potuerit, num ei obtemperare, & monita ejus salutaria suscipere consentis? Nec distulit Eduinus quin continuo polliceretur se in omnibus secuturum doctrinam illius, qui se tot ac tantis calamitatibus creptum, ad regni apicem proveheret. Quo accepto responso, confestim is qui loquebatur cum eo, imposuit dexteram suam capiti ejus, dicens: Cùm hoc ergo tibi advenerit, memento hujus temporis, ac loquelæ nostræ, & ea quæ nunc promittis, adimplere ne differas. Et his dictis (ut ferunt) repente disparuit, ut intellegeret non hominem esse qui sibi apparuisset, sed spiritum. Et cùm regius juvenis solus adhuc ibidem sederet, gavisus quidem de conlatâ sibi piâ ac benignâ consolatione, sed multum sollicitus, ac mente sedulâ cogitans quis ille esset, vel unde venisset qui hæc sibi loqueretur, venit ad eum præfatus amicus illius, lætôque vultu salutans eum: Surge, inquit, intra, & sopitis ac relictis curarum anxietatibus, quieti membra simul & animum compone, quia immutatum est cor Regis, nec tibi aliquid mali facere, sed fidem potius pollicitam servare disponit; postquàm enim cogitationem suam, de quâ tibi antè dixi, Reginæ in secreto revelavit, revocavit eum illa ab intentione, ammonens quia nullâ ratione conveniat tanto Regi amicum suum optimum in necessitate positum

positum auro vendere, immò fidem suam, quæ omnibus ornamentis pretiosior est, amore pecuniæ perdere. Quid plura? Fecit Rex ut dictum est: nec solum exulem nunciis hostilibus non tradidit, sed etiam eum ut in regnum perveniret, adjuvit. Nam mox redeuntibus domum nunciis, exercitum ad debellandum Edilfridum collegit copiosum, eumque sibi occurrentem cum exercitu multum impari (non enim dederat illi spatium quo totum suum congregaret atque adunaret exercitum) occidit in finibus gentis Merciorum ad Orientalem plagam amnis qui vocatur *Idle*: in quo certamine & filius Redualdi, vocabulo *Regenheri*, occisus est: ac sic Eduinus juxta oraculum quod acceperat, non tantum Regis sibi infesti insidias vitavit, verum etiam eidem preëmpto in regni gloriam successit. Cum ergo prædicante verbum Dei Paulino Rex credere differret, & per aliquod tempus, ut diximus, hostis competentibus solitarius sederet, & quid agendum sibi esset, & quæ religio sequenda, sedulus secum ipse scrutari consuesceret, ingrediens ad eum quâdam die vir Dei imposuit dexteram capiti ejus, & an hoc signum agnosceret requisivit. Qui cum tremens ad pedes ejus procidere vellet, levavit eum, & quasi familiari voce affatus: Ecce, inquit, hostium manus quos timuisti, Domino donante, evasisti; ecce, regnum quod desiderasti, ipso largiente percepisti. Memento ut tertium quod promissisti, facere ne differas, suscipiendo fidem ejus, & præcepta servando, qui te & à temporalibus adversis eripiens, temporalis regni honore sublimavit: & si deinceps voluntati ejus, quam per me tibi prædicat, obsecundare volueris, etiam à perpetuis malorum tormentis te liberans, æterni secum regni in cælis faciet esse participem.



CAPUT XIII.

Quale consilium idem cum Primatibus suis de percipiendâ Christi fide habuerit ; & ut Pontifex ejus suas aras profanaverit.

QUIBUS auditis, Rex suscipere quidem se fidem quæ docebat, & velle, & debere respondebat. Verum ad huc cum amicis Principibus, & Consiliariis suis sese de honoraturum esse dicebat, ut si & illi eadem cum illo sentire vellent, omnes pariter in fontem vitæ Christo consecrarentur. Et annuente Paulino, fecit ut dixerat. Habito enim cum sapientibus consilio, sciscitabatur singillatim ab omnibus, qualis sibi doctrina hæc eatenus inaudita, & novus divinitatis qui prædicabatur, cultus videretur. Cui primus Pontificum ipsius *Cosfi* continuò respondit : Tu vide Rex, quale sit hoc, quod nobis modò prædicatur : ego tibi verissimè quod certum didici, profiteor, quia nihil omnino virtutis habet religio illa quam hucusque tenuimus : nullus enim tuorum studiosius quàm ego cultura deorum nostrorum se subdidit, & nihilominus multi sunt qui ampliora à te beneficia quàm ego, & majores accipiunt dignitates, magisque prosperantur in omnibus quæ agenda vel acquirenda disponunt. Si autem dii aliquid valerent, me potius juvare vellent, qui illis impensius servire curavi. Unde restat, ut si ea quæ nunc nobis nova prædicantur, meliora esse & fortiora, habitâ examinatione perspexeris, absque ullo cunctamine suscipere illa festinemus. Cujus suasioni verbisque prudentibus alius Optimatum Regis tribuens assensum, continuò subdidit : Talis, inquit, mihi videtur, Rex, vita hominum præsens in terris, ad comparationem ejus quod nobis incertum est temporis, quale cum te residente ad cœnam cum Ducibus ac Ministris tuis, tempore brumali, accenso quidem foco in medio, & calido effecto cœnaculo, furentibus autem foris per omnia turbinibus hiemalium pluviarum vel nivium, adveniēisque unus

passerum domum citissimè pervolavit, qui cum per unum ostium ingrediens, mox per aliud exierit. Ipso quidem tempore quò intus est, hiemis tempestate non tangitur, sed tamen parvissimo spatio serenitatis ad momentum excussò, mox de hieme in hiemem regrediens, tuis oculis elabitur. Ita hæc vita hominum ad modicum apparet; quid autem sequatur, quidve præcesserit, prorsus ignoramus. Unde si hæc nova doctrina certiùs aliquid adtulerit, meritò sequenda esse videtur. His similia & cæteri majores natu ac Regis Consiliarii divinitus admoniti prosequabantur. Adjecit autem *Così*, quia vellet ipsum Paulinum diligentius audire de Deo quem prædicabat, verbum facientem. Quod cum jubente Rege faceret, exclamavit auditis ejus sermonibus dicens: Jam olim intellexeram nihil esse quod colebamus: quia videlicet quantò studiosius in eo cultu veritatem quærebam, tantò minùs inveniebam. Nunc autem apertè profiteor, quia in hac prædicatione veritas claret illa, quæ nobis vitæ, salutis & beatitudinis æternæ dona valet tribuere. Unde suggero, Rex, ut templa & altaria, quæ sine fructu utilitatis sacravimus, ociùs anathemati & igni tradamus. Quid plura? præbuit palàm adfensum evangelizandi beato Paulino Rex, & abrenunciatà idolatrià, fidem se Christi suscipere confessus est. Cùmque à præfato Pontifice sacrorum suorum quæreret, quis aras & fana idolorum cum septis quibus erant circumdata, primus profanare deberet; ille respondit: Ego. Quis enim ea quæ per stultitiam colui, nunc ad exemplum omnium aptius quàm ipse per sapientiam mihi à Deo vero donatam destruam? Statimque abjectà superstitione vanitatis, rogavit sibi Regem armadæ & equum emissarium, quem ascendens, ad idola destruenda venit. Non enim licuerat Pontificem sacrorum vel arma ferre, vel præter in equà equitare. Accinctus ergo gladio accepit lanceam in manu, & ascendens emissarium Regis, pergebat ad idola. Quod aspiciens vulgus, æstimabat eum insanire. Nec distulit ille, mox ut adpropinquabat ad fanum, profanare illud, injectà in eo lanceà quam tenebat: multùmque gavisus de agnitione veri Dei cultus, jussit sociis suis destruere ac succendere fanum cum omnibus

septis suis. Ostenditur autem locus ille quondam idolorum non longè ab Eboraco ad Orientem, ultra amnem Dorwentionem, & vocatur hodie *Gothmundin Gaham*, ubi Pontifex ille inspirante Deo vero polluit ac destruit eas quas ipse factaverat aras.

CAPUT XIV.

Ut idem Eduinus cum suâ gente fidelis sit factus; & ubi Paulinus illos baptizaverit.

IGITUR accepit Rex Eduinus cum cunctis gentis suæ Nobilibus, ac plebe per plurimâ fidem & lavacrum sanctæ regenerationis, anno regni sui undecimo, qui est annus Dominicæ Incarnationis sexcentessimus vicesimus septimus, ab adventu verò Anglorum in Britanniam annus circiter centessimus octogessimus. Baptizatus est autem Eboraci die sancto Paschæ, pridie Iduum Aprilium, in Ecclesiâ sancti Petri Apostoli, quam ibidem ipse de ligno cum catechizaretur, atque ad percipiendum baptismum imbueretur, citato opere construxit. In quâ etiam civitate ipse Doctori atque Antistiti suo Paulino sedem Episcopatus donavit. Mox autem ut baptismum consecutus est, curavit, docente eodem Paulino, majorem ipso in loco & augustiorem de lapide fabricare basilicam, in cujus medio ipsum quod prius fecerat, oratorium includeretur. Præparatis ergo fundamentis in gyro prioris oratorii per quadrum cœpit ædificare basilicam. Sed priusquam altitudo parietis esset consummata, Rex ipse impiâ nece occisus, idem opus successori suo Oswaldo perficiendum reliquit. Paulinus autem ex eo tempore sex annis continuis, id est, ad finem usque imperii Regis illius verbum Dei (annuente ac favente ipso) in eâ provinciâ prædicabat: credebantque & baptizabantur quotquot erant præordinati ad vitam æternam; in quibus erant Osfridus & Eadfridus filii Regis Eduini, qui ambo ei exuli nati sunt de Quoemburgâ filiâ Cearli Regis Merciorum. Baptizati sunt tempore sequente & alii liberi ejus de Edilbergâ Reginâ pro-

geniti, Edilhiunmus & Ediltridis filia, & alter filius *Vusfrea* quorum primi albatii adhuc rapti sunt de hac vitâ, & Eboraci in Ecclesiâ sepulti. Baptizatus est & *Iffi* filius Osfridi, sed & alii nobiles & egregii viri non pauci. Tantus autem fertur tunc fuisse fidei fervor ac desiderium lavacri salutaris gente Nordanhybrorum, ut quodam tempore Paulinus veniens cum Rege & Reginâ in villam quæ vocatur *Adgefrin*, triginta sex diebus ibidem cum eis catechizandi & baptizandi officio deditus moraretur: quibus diebus cunctis à manè usque ad vesperam nil aliud ageret quàm confluentem eò de cunctis viculis ac locis plebem Christi verbo salutis instruere, atque instructam in fluvio *Gleni*, qui proximus erat, lavacro remissionis abluere. Hæc villa tempore sequentium Regum deserta, & alia pro illo est facta in loco qui vocatur *Melmun*: hæc quidem in provinciâ Berniciorum, sed & in provinciâ Deirorum, ubi sæpius manere cum Rege solebat, baptizabat in fluvio *Sualicâ*, qui vicum juxta cataraetam præterfluit. Nondum enim oratoria vel baptisteria in ipso exordio nascentis ibi Ecclesiæ poterant edificari. Attamen in campo dono (ubi tunc etiam villa regia erat) fecit basilicam, quam postmodum pagani à quibus Eduinus Rex occisus, cum totâ eadem villâ succenderunt: pro quâ Reges posteriores fecere sibi villam in regione quæ vocatur *Loidis*. Evasisit autem ignem altare, quia lapideum erat: & servatur adhuc in monasterio Reverentissimi Abbaris ac Presbyteri Tridulfi, quod est in silvâ Elmete.

CAPUT XV.

Ut provincia Orientalium Anglorum Christi fidem susceperit.

TANTAM autem (ut fertur) devotionem Eduinus erga cultum veritatis habuit, ut etiam Regi Orientalium Anglorum Carualdo, filio Redualdi, persuaderet, relictis idolorum superstitionibus, fidem & sacramenta Christi cum suâ provinciâ suscipere. Et quidem pater ejus

Reduald, jamdudum in Cantiâ sacramentis Christianæ fidei imbutus est, sed frustrâ: nam rediens domum, ab uxore suâ, & à quibusdam perversis Doctoribus seductus est, atque à sinceritate fidei depravatus, habuit posteriora pejora prioribus; itaut in morem antiquorum Samaritanorum & Christo servire videretur, & diis quibus antea serviebat. Atque in eodem fano & altare haberet ad sacrificium Christi, & arulam ad victimas dæmoniorum. Quod videlicet fanum Rex ejusdem provincie *Aldorlf* (qui nostrâ ætate fuit) usque ad suum tempus perdurasse, & se in pueritiâ vidisse testabatur. Erat autem præfatus Rex Redualdus natu nobilis quamlibet actu ignobilis, filius Tytili, cujus pater fuit *Ruffa*, à quo Reges Orientalium Anglorum *Ruffingas* appellant. Verùm Carpualdus non multo postquàm fidem accepit tempore, occisus est à viro gentili, nomine *Richberto*; & exinde tribus annis provincia in errore versata est, donec accepit regnum frater ejusdem Carpualdi Sigbertus, vir per omnia doctissimus atque Christianissimus, qui vivente adhuc fratre cùm exularet in Galliâ, fidei sacramentis imbutus est, quorum participem, mox ubi regnare cœpit, totam suam provinciam facere curavit. Cujus studiis gloriosissimè favit Felix Episcopus, qui de Burgundionum partibus, ubi ortus & ordinatus est, cùm venisset ad Honorium Archiepiscopum, eique indicasset desiderium suum, misit eum ad prædicandum verbum vitæ præfatæ nationi Anglorum. Neq; vota ipsius in cassum cecidère; quin potius fructum in eâ multiplicem credentium populorum pius agri spiritalis cultor invenit. Siquidem totam illam provinciam juxta sui nominis sacramentum, à longâ iniquitate atque infelicitate liberatum, ad fidem & opera justitiæ, ac perpetuæ felicitatis dona perduxit, accepitque sedem Episcopatus in civitate *Dumnoc*: & cùm septemdecim annos eidem provincie pontificali regimine præfuisset, ibidem in pace vitam finivit.

CAPUT XVI.

*Ut Paulinus in provinciâ Lindissi predicaveris;
& de qualitate regni Eduini.*

PRÆDICABAT autem Paulinus verbum etiam provinciæ *Lindissi*, quæ est prima ad meridianam *Humbræ* fluminis ripam, pertingens usque ad mare, Præfectumque *Lindocolinæ* civitatis, cui nomen erat *Blecca*, primum cum domo suâ convertit ad Dominum. In quâ videlicet civitate & ecclesiâ operis egregii de lapide fecit: cujus tecto, vel longâ incuriâ, vel hostili manu dejecto, parietes hætenus stare videntur, & omnibus annis aliqua miracula sanitatum in eodem loco solent ad utilitatem eorum qui fideliter quærunt, ostendi. In quâ Ecclesiâ Paulinus, transeunte ad Christum Justo, Honorium pro eo consecravit Episcopum, ut in sequentibus suo loco dicemus. De hujus fide provinciæ narravit mihi Presbyter & Abbas quidam vir veracissimus de Monasterio *Peartauw*, vocabulo *Deda*, retulisse sibi quendam seniore, baptizatum se fuisse die mediâ à Paulino Episcopo, præsentē Rege Eduino, & multam populi turbam, in fluvio *Trehenta*, juxta civitatem quæ linguâ Anglorum *Tiorvulfingacesir* vocatur: qui etiam effigiem ejusdem Paulini referre esset solitus, quod esset longæ staturæ, paululum incurvus, nigro capillo, facie macilentâ, naso adunco pertenui, venerabilis simul & terribilis aspectû. Habuit autem secum in ministerio & Jacobum Diaconum, virum utique industrium ac nobilem in Christo & in Ecclesiâ, qui ad nostra usque tempora permansit. Tanta autem eo tempore pax in Brittaniâ, quaquaversum imperium Regis Eduini pervenerat, fuisse perhibetur: ut (sicut usque hodie in proverbio dicitur) etiam si mulier una cum recens nato parvulo veller totam perambulare insulam à mari ad mare, nullo se lædente valeret. Tantum quoque Rex utilitati suæ gentis consuluit, ut plerisque in locis ubi fontes lucidos juxta publicos viarum transitus construxit,

ibi ob refrigerium vianum erectis stipitibus, arcos caucos suspendi juberet, neque hos quisquam, nisi ad usum necessarium, contingere præ magnitudine, vel timoris ejus auderet, vel amoris vellet. Tantum verò in regno excellentiæ habuit, ut non solum in pugna ante illum vexilla gestarentur, sed & tempore pacis equitantem inter civitates sive villas aut provincias suas cum ministris, semper antecedere signifer consuevisset: necnon & incedente illo ubilibet per plateas, illud genus vexilli (quod Romani *Tusam*, Angli verò appellant *Thax*) ante eum ferri solebat.

CAPUT XVII.

Ut Eduinus ab Honorio Papâ exhortatorias litteras acceperit, qui etiam Paulino Pallium misit.

QUO tempore præsulatum Sedis Apostolicæ Honorius Bonifacii successor habebat, qui ubi gentem Nordanhymbrorum cum suo Rege ad fidem confessionemque Christi, Paulino evangelizante conversam esse didicit, misit eidem Paulino Pallium, misit & Regi Eduino litteras exhortatorias, paternâ illum caritate accendens, ut in fide veritatis quam acceperant, persistere semper ac proficere curarent. Quarum videlicet litterarum iste est ordo:

Domino excellentissimo atque præcellentissimo filio Eduino Regi Anglorum, Honorius Episcopus servus servorum Dei, salutem. Ita Christianitatis vestræ integritas circa Conditoris sui cultum, fidei est ardore succensa, ut longè latèque resplendeat, & in omni mundo adnunciata, vestri operis multipliciter referat fructum. Sic enim vos Reges esse cognoscitis, dum Regem & Creatorem vestrum orthodoxâ prædicatione edocti, Deum venerando creditis, eique quod humana valet conditio, mentis vestræ sinceram devotionem exsolvit. Quid enim Deo nostro aliud offerre valebimus, nisi ut in bonis actibus persistentes, ipsûmque auctorem humani generis confuentes, eum colere, eique vota nostra reddere festinemus? Et ided, excellentissime Fili, paternâ

vos

vos caritate quâ convenit, exhortamur, ut hoc quod vos divina misericordia ad suam gratiam vocare dignata est, sollicitâ intentione & assiduâ orationibus servare omnimodò festinetis; ut qui vos in præsentî sæculo ex omni errore absolutos, ad agnitionem sui nominis est dignatus perducere, & cælestis patriæ vobis præpararet mansionem. Prædicatoris igitur vestri Domini mei apostolicæ memoriæ Gregorii frequenter lætione occupati, præ oculis affectum doctrinæ ipsius, quem pro vestris animabus libenter exercuit, habetote; quatenus ejus oratio, & regnum vestrum, populûmque augeat, & vos omnipotenti Deo intreprensibiles repræsentet. Ea verò quæ à nobis pro vestris Sacerdotibus ordinanda sperastis, hæc pro fidei vestræ sinceritate, quæ nobis multimodâ relatione per præsentium portitores laudabiliter insinuata est, gratuito animo adtribuere illis sine ullâ dilatione prævidimus; & duo pallia utrorumque Metropolitanorum, id est, Honorio & Paulino direximus, ut dum quis eorum de hoc sæculo ad auctorem suum fuerit accersitus, in loco ipsius alter Episcopum ex hac nostrâ auctoritate debeat subrogare. Quod quidem tam pro vestræ caritatis affectu, quàm pro tantarum provinciarum spatiis, quæ inter nos & vos esse noscuntur, sumus invitati concedere, ut in omnibus devotioni vestræ nostrum concursum, & juxta vestra desideria præberemus. Incolumem excellentiam vestram gratia superna custodiat,

CAPUT XVIII.

Uti Honorius, qui Justo in Episcopatum Dorovernensis Ecclesiæ successit, ab Honorio Papâ Pallium & litteras accepit.

HÆc inter Justus Archiepiscopus ad cælestia regna sublatus est, quarto Iduum Novembrium die, & Honorius pro illo est in Præsulatum electus: qui ordinandus venit ad Paulinum, & occurrente sibi illo, in Londocolino quintus ab Augustino Dorovernensis Ecclesiæ consecratus est Antistes: cui etiam præfatus Papa Honorius misit Pal-

lium & litteras, in quibus decrevit hoc ipsum, quod in epistolâ ad Eduinum Regem missâ decreverat: scilicet ut cum Dorovemensis vel Eboracensis Antistes de hac vitâ transierit, is qui superest consortis ejusdem gradus, habeat potestatem alterum ordinandi in loco ejus qui transierit Sacerdotem; ne sit necesse ad Romanam usque civitatem per tam prolixa terrarum & maris spatia pro ordinando Archiepiscopo semper fatigari. Quatum etiam textum litterarum in nostrâ hac Historiâ ponere commodum duximus.

Dilectissimo fratri Honorio, Honorius. Inter plurima quæ Redemptoris nostri misericordia suis famulis dignatur bonorum munera prærogare, illud etiam clementer conlata suæ pietatis munificentiâ tribuit quotiens per fraternos assatus unianimam dilectionem quadam contemplatione alternis aspectibus repræsentat: pro quibus majestati ejus gratias indefinenter exsolvimus, cumque votis supplicibus exoramus, ut vestram dilectionem in prædicatione Evangelii elaborantem ac fructificantem, sectantemque magistri & capitis vestri sancti Gregorii regulam, perpeti stabilitate confirmet, & ad augmentum Ecclesiæ suæ, potiora per vos suscitaret incrementa, ut fide & opere, in timore Dei & caritate, vestra adquisitio decessorumque vestrorum, quæ per domini Gregorii exordia pullulat, convalescendo ampliùs extendatur; ut ipsa vos dominici eloquii promissa in futuro respiciant, vósque vox ista ad æternam festivitatem evocet: Venite ad me omnes qui laboratis, & onerati estis, & ego reficiam vos. Et iterum: Euge, serve bone & fidelis; quia super pauca fuisti fidelis, super multa te constituam: intra in gaudium Domini tui. Et nos equidem (Fratres carissimi) hæc vobis pro æternâ caritate exhortationis verba præmittentes, quæ rursus pro Ecclesiarum vestrarum privilegiis congruere posse conspiciamus, non desistimus impertire. Et jam juxta vestram petitionem, quam filiorum nostrorum Regum vobis per præsentem nostram præceptionem vice beati Petri Apostolorum Principis, auctoritatem tribuimus, ut quando unum ex vobis divina ad se jusserit gratia evocari, is qui superstes fuerit, alterum in loco defuncti debeat Episcopum ordinare. Pro quâ etiam te singula vestræ dilectioni Pallia pro eadem

ordinatione celebranda direximus, ut per nostræ præceptionis auctoritatem possitis Deo placitam ordinationem efficere; quia ut hæc vobis concederemus, longa terrarum marisque intervalla, quæ inter nos ac vos obstitunt, ad hæc nos condescendere coëgerunt, ut nulla possit Ecclesiarum vestrarum jactura per cujuslibet occasionis obtentum quoquo modo provenire; sed potius commissi vobis populi devotionem plenius propagare. Deus te incolumem custodiat, dilectissime Frater. Data die tertio Iduum Juniarum, imperantibus dominis nostris piissimis Augustis, Heraclio anno vicesimo quarto, post Consulatam ejusdem anno vicesimo tertio; atque Constantino filio ipsius, anno vicesimo tertio & Consulatus ejus anno tertio; sed & Heraclio felicissimo Cæsare item filio ejus anno tertio, Indictione septimâ, id est, anno Dominicæ Incarnationis sexcentesimo tricesimo quarto.

CAPUT XIX.

Ut primò idem Honorius, & post Iohannes litteras genti Scotorum pro Pascha observatione, simul & pro Pelagianâ hæresi misisset.

MISIT idem Papa Honorius litteras etiam genti Scotorum, quos in observatione sancti Paschæ errare compererat, juxta quod suprà docuimus; solleter exhortans, ne paucitatem suam in extremis terræ finibus constitutam, sapientiores antiquis sive modernis, quæ per orbem erant, Christi Ecclesiis ælimarent; nè contra Paschales computos, & decreta Synodalia totius orbis Pontificum, aliud Pascha celebrarent. Sed & Iohannes qui successori ejusdem Honorij Severino successit, cum adhuc esset electus in Pontificatum, pro eodem errore corrigendo litteras eis magnâ auctoritate atque eruditione plenas direxit; evidenter adstruens, quia dominicum Paschæ diem à quintâ decimâ lunâ usque ad vicesimam primam (quod in Nicænâ Synodo probatum est) oportet inquiri. Necnon & pro Pelagianâ hæresi (quam apud eos reviviscere didicerat) cavendâ ac repellendâ, in ea-

dem illos epistolâ admonere curavit ; cujus epistolæ principium hoc est : Dilectissimis & sanctissimis Thomiano , Columbano ; Chromano , Dinnano , & Baithano Episcopis ; Chromanno Hermianoque , Laistrano , Scellano , & Segiano Presbyteris ; Sarano , cæterisque Doctoribus seu Abbatibus Scottis , Hilarus Archipresbyter , & servans locum sanctæ Sedis Apostolicæ , Johannes Diaconus , & in Dei nomine electus : item Johannes Primicerius , & servans locum sanctæ Sedis Apostolicæ , & Johannes servus Dei , Consiliarius ejusdem Apostolicæ Sedis. Scripta quæ perlatores ad sanctæ memoriæ Severinum Papam adduxerunt , & eo de hac luce migrante , reciproca responsa ad ea quæ postulata fuerant , si luerunt. Quibus referatis , ne diù tantæ quæstionis caligo indiscussa remaneret , reperimus quosdam provinciæ vestræ contra orthodoxam fidem , novam ex veteri hæresim renovare conantes , Pascha nostrum in quo immolatus est Christus , nebulosâ caligine refutantes , & quartâ decimâ lunâ cum Hebræis celebrare nitentes. Quo epistolæ principio manifestè declaratur , & nuperrimè temporibus illis hanc apud eos hæresim coortam , & non totam eorum gentem , sed quosdam in eis hac fuisse implicitos. Expositâ autem ratione Paschalis observantiæ , ita de Pelagianis in eadem epistolâ subdunt : Et hoc quoque cognovimus , quòd virus Pelagianæ hæreseos apud vos denuò reviviscit : quod omninò hortamur ut à vestris mentibus hujusmodi venenatum superstitionis facinus auferatur. Nam qualiter ipsa quoque execranda hæresis damnata est , latere vos non debet ; quia non solum per istos ducentos annos abolita est , sed & quotidie à nobis perpetuo anathemate sepulta damnatur : & hortamur , ne quorum arma combusta sunt , apud vos eorum cineres suscitentur. Nam quis non execretur superbum eorum conamen & impium , dicentium posse sine peccato existere hominem ex propriâ voluntate , & non ex gratiâ Dei ? Et primum quidem blasphemix stultiloquium est , dicere esse hominem sine peccato ; quod omninò non potest , nisi unus mediator Dei & hominum homo Christus Jesus qui sine peccato est conceptus & partus. Nam cæteri homines cum peccato originali nascentes testimonium prævaricationis Adæ , etiam sine

actuali peccato existentes portare noscuntur; secundum Prophetam dicentem: Ecce enim in iniquitatibus conceptus sum, & in peccatis concepit me mater mea.

CAPUT XX.

Ut occiso Eduino Paulinus Cantiam rediens, Rhovensis Ecclesiæ Præfultum suscepit.

AT verò Eduinus cùm decem & septem annis genti Anglorum simul & Brittonum gloriosissimè præfesset, è quibus sex etiam ipse (ut duximus) Christi regno militavit, rebellavit adversus eum Cedualla, Rex Brittonum, auxilium præbente illi Pendà, viro strenuissimo, de regio genere Merciorum, qui & ipse eo tempore, gentis ejusdem regno annis viginti & duobus varià sorte præfuit: & conferto gravi prælio in campo qui vocatur *Heithfelth*, occisus est Eduinus die quartà Iduum Octobris, anno Dominicæ Incarnationis sexcentesimo tricesimo tertio, cùm esset annorum quadraginta & octo: ejusque totus vel interemptus, vel dispersus est exercitus. In quo etiam bello ante illum unus filius ejus *Osfrid*, juvenis bellicosus, cecidit, alter *Eatfrid* necessitate cogente ad Pendam Regem transfugit, & ab eo postmodum regnante Osualdo, contra fidem jurisjurandi peremptus est. Quo tempore maxima est facta strages in Ecclesià, vel gente Nordanhymbrorum, maximè quòd unus ex Ducibus à quibus acta est, paganus, alter quia barbarus erat, pagano sævior. Siquidem Penda cum omni Merciorum gente idolis deditus, & Christiani erat nominis ignarus. At verò Cedualla, quamvis nomen & professionem haberet Christiani, adeò tamen erat animo ac moribus barbarus, ut ne sexui quidem muliebri, vel innocuæ parvulorum parceret ætati, quin universos atrocitate ferinà morti per tormenta contraderet, multo tempore totas eorum provincias debacchando pervagatus, ac totum genus Anglorum Britannix finibus erasatum se esse deliberans. Sed nec Religioni Christianæ, quæ apud eos exorta erat, aliquid unpendebat honoris. Quippe cùm usque

hodie motis sit Brittonum, fidem religionemque Anglorum pro nihilo habere, neque in aliquo eis magis communicare quam paganis. Adlatum est autem caput Eduini Regis Eboracum, & inlatum postea in Ecclesiam beati Petri Apostoli, quam ipse cepit, sed successores ejus Osualdus perfecit, ut supra docuimus, positum est in porticu sancti Papæ Gregorii, à cujus ipse discipulis verbum vitæ susceperat. Turbatus itaque rebus Nordanhymbrorum hujus articulo cladis, cum nihil alicubi præsidii, nisi in fugâ esse videretur, Paulinus assumptâ secum Edelberge Reginâ, quam pridem adduxerat, rediit Cantiam navigio, atque ab Honorio Archiepiscopo, & Rege Eadbaldo multum honorificè susceptus est. Venit autem illuc duce Balfo, milite Regis Eduini fortissimo, habens secum Eanfredam filiam, & Vulfcrean filium Eduini, necnon & Iffi filium Osfridi filii ejus, quos postea mater metu Eadaldi & Osualdi Regum, misit in Galliam nutriendos Regi Dagberecto, ibique ambo in infantia defuncti, & juxta honorem vel regis pueris, vel innocentibus Christi congruum, in Ecclesiâ sepulti sunt. Attulit quoque secum vasa pretiosa Eduini Regis per plura, in quibus & crucem magnam auream, & calicem aureum consecratum ad ministerium altaris, quæ hætenus in Ecclesiâ Cantie conservata monstrantur. Quo in tempore, Rhosensis Ecclesia Pastorem minimè habebat, eo quod Romanus Præsul illius ad Honorium Papam à Justo Archiepiscopo legatarius missus, absorptus fuerat fluctibus Italici maris: ac per hoc curam illius præfatus Paulinus, invitatione Honorii Antistitis, & Eadaldi Regis suscepit, ac tenuit, usquedum & ipse suo tempore ad cælestia regna cum gloriosi fructu laboris ascendit. In quâ Ecclesiâ moriens, Pallium quoque, quod à Romano Papâ acceperat, reliquit. Reliquerat autem in Ecclesiâ suâ Eboracensi Jacobum Diaconum, vitum utique Ecclesiasticum & sanctum, qui multo ex hinc tempore in Ecclesiâ manens, magnas antiquo hosti prædas docendo & baptizando eripuit; cujus nomine vicus in quo maximè solebat habitare, juxta cataraclam, usque hodie cognominatur. Qui quoniam cantandi in Ecclesiâ erat peritissimus, recuperatâ postmodum pace in provinciâ, & crescente numero fidelium, etiam Ma-

gister Ecclesiasticæ cantionis juxta morem Romanorum seu Cantuariorum multis cœpit existerè : & ipse senex , & plenus dictum , juxta scripturas Patrum viam secutus est.

LIBER TERTIUS.

CAPUT I.

Ut primi successores Eduini Regis , & fidem suæ gentis prodiderunt , & regnum porro Osualdus Christianissimus Rex utrumque restauravit.

AT interfecto in pugna Eduino , suscepit pro illo regnum Deitorum (de quâ provinciâ ille generis prosapiam & primordia regni habuerat) filius patris ejus Elfrici , vocabulo *Ostrie* , qui ad prædicationem Paulini , fidei erat sacramentis imbutus. Porro regnum Berniciorum (nam in has duas provincias gens Nordanhymbrorum antiquitus divisâ erat) suscepit filius Edilfridi , qui de illâ provinciâ generis & regni originem duxerat , nomine *Eanfridus*. Siquidem tempore toto quo regnavit Eduinus , filii præfati Regis Edilfridi , qui ante eum regnaverant , cum magnâ nobilium juventute apud Scottos sive Pictos exulabant , ibique ad doctrinam Scottorum catechizati & baptismatis gratiâ sunt recreati : qui ut mortuo Rege inimico , patriam sunt redire permissi , accepit primus eorum (quem diximus) Ostrie regnum Deitorum. Secundus verò Eanfridus regnum Berniciorum. Qui uterque Rex ut terreni regni insulas sortitus est , sacramenta regni cælestis , quibus initiatus erat , anathematizando prodidit , ac se præcis idolatriæ sordibus polluumendum perdendumque restituit. Nec mora , utrumque Rex Brittonum Cedualla impiâ manu , sed justâ ultione peremit. Et primò quidem proximâ æstate Ostrie , dum se in oppido municipio temerariè obsedisset , erumpens subitò cum suis omnibus imparatum cum suo exercitu delevit. Deinde cum anno integro provincias Nordanhymbrorum non ut Rex victor

possideret, sed quasi tyrannus sæviens disperderet, ac tragicâ eadē dilaceraret, tandem Eanfridum inconsultè ad se cum duodecim electis miliribus, postulandæ pacis graniâ venientem simili sorte damnavit: Infaustus ille annus, & omnibus bonis exosus usque hodie permanet, tam propter apostasiam Regum Anglorum, quâ se fidei sacramentis exuciant, quàm propter vesaniam Brittonici Regis tyrannidein. Unde cunctis placuit Regum tempora computantibus, ut ablata de medio Regum perfidorum memoriâ, idem annis frequentis Regis, id est, Osualdi, viri Deo dilecti, regno assignaretur: quo post occisionem fratris Eanfridi, superveniente cum patavo exercitu, sed fide Christi munito, infandus Brittonum Dux, cum immensis illis copiis, quibus nihil resistere posse jactabar, interemptus est in loco, qui linguâ Anglorum *Denissesburna*, id est, oriens Denisi, vocatur.

CAPUT II.

Ut de ligno Crucis quod idem Rex contra Barbaros pugnaturus crexerat, inter innumera sanitatum miracula, quidam à dolentis brachii sit languore curatus.

OSTENDITUR autem usque hodie, & in magnâ veneratione habetur locus ille, ubi venturus ad hanc pugnam Osualdus signum sanctæ Crucis crexir, ac flexis genibus Dominum deprecatus est, ut in tantâ rerum necessitate suis cultoribus cælesti succurreret auxilio. Denique fertur quia factâ ciraro opere cruce, ac foveâ præparatâ in quâ statui deberet, ipse fide fervens hanc arripuerit, ac foveæ imposuerit, atque utraque manu erectam tenuerit, donec adgesto à militibus pulvere terræ figeretur. Et hoc factò, elatâ in altum voce cuncto exercitui proclamaverit: Fleamus omnes genua, & Dominum omnipotentem vivum ac verum in communi deprecemur, uti nos ab hoste superbo ac feroce suâ miseratione defendat: scit enim ipse quia iusta pro salute gentis nostræ bella suscepimus. Fecerunt omnes ut iusserat, sic incipiente diluculo in hostem progressi, juxta meritum suæ fidei

fidei victoriâ potiti sunt. In cujus loco orationis innumera virtutes sanitarum noscuntur esse patrata, ad indicium videlicet ac memoriam fidei Regis. Nam & usque hodie multi de ipso ligno sanctæ Crucis astulas excidere solent, quas cum in aquas miserint, eisque languentes homines aut pecudes potaverint sive asperferint, mox sanitati restituntur. Vocatur locus ille linguâ Anglorum *Hesensfelth*, quod dici potest Latine *caelestis campus*, quod certo utique præfatio futurorum antiquitus nomen accepit: significans nimirum quod cæleste ibidem erigendum trophæum, cælestis inchoanda victoria, cælestia usque hodie forent miracula celebranda. Est autem locus ille juxta murum illum, ad Aquilonem, quo Romani quondam ob arcendos Barbarorum impetus, totam à mari ad mare præcinxere Britanniam, ut supra docuimus. In quo videlicet loco consuetudinem multo jam tempore fecerant Augustaldensis Ecclesiæ (quæ non longè abest) advenientes omni anno pridie quàm postea idem Rex Osualdus occisus est, vigilias pro salute animæ ejus facere, plurimâque Psalmorum laude celebratâ victimam pro eo manè sacræ oblationis offerre. Qui etiam crescente bonâ consuetudine, nuper ibidem Ecclesiâ constructâ atque dedicatâ, sacratorem & cunctis honorabiliorem omnibus locum fecere. Nec immeritò, quia nullum, ut comperimus, fidei Christianæ signum, nulla Ecclesia, nullum altare in totâ Berniciorum gente creditum est, priusquàm hoc sacræ Crucis vexillum novus militiæ ductor distante fidei devotione contra hostem immanissimum pugnaturus statueret. Nec ab re est unum de pluribus quæ ad hanc Crucem patrata sunt, virtutis miraculum enarrare. Quidam de fratribus Augustaldensis Ecclesiæ, nomine *Bethelmus*, qui nunc usque superest ante paucos annos dum incautiùs fortè noctu in glacie incederet, repente corruens brachium contrivit, ac gravissimâ fracturæ ipsius cœpit molestiâ fatigari: itaut ne ad os quidem adducere ipsum brachium ullatenus dolore arcente valeret. Qui cum die quadam manè audiret unum de Fratribus ad locum ejusdem sanctæ Crucis ascendere disposuisse, rogavit ut aliquam sibi partem de illo ligno venerabili radiens adferret, credere se dicens quia per hoc, donante Domino,

salutem posset consequi. Fecit ille ut rogatus est, & reversus ad vesp̄eram, sedentibus jam ad mensam fratribus, obtulit ei aliquid de vetere musco, quo superficies ligni erat oblita. Qui cū sedens ad mensam, non haberet ad manum ubi oblatum sibi munus reponeret, misit hoc in sinum sibi. Et dum iret cubitum, oblitus hoc alicubi deponere, permisit hoc in sinu suo permanere. At medio noctis tempore, cū evigilaret, sensit nescio quid frigidi suo lateri adiacere, admotāque manu requirere quid esset, ita sanum brachium manūque reperit, ac si nihil unquam tantī languoris ha-
huisset.

CAPUT III.

Ut idem Rex postulans de gente Scottorum Antistitem, acceperit Aidanum, eidemque in insulā Lindisfarnensi sedem Episcopatus donaverit.

IDEM ergo Osualdus, mox ubi regnum suscepit, desiderans totam cui præesse cœpit gentem, fidei Christianæ gratiā imbui, cujus experimenta permaxima in expugnandis Barbaris jam cœperat, misit ad majores natu Scottorum, inter quos exulans ipse Baptismatis sacramenta cum his qui secum erant militibus, consecutus erat; petens ut sibi mitteretur Antistes, cujus doctrinā ac ministerio gens quam regebat Anglorum, Dominicæ fidei & dona disceret, & suscipere sacramenta. Neque aliquantō tardiū quod petiit, impetravit: accepit namque Pontificem Aidanum summæ mansuetudinis ac pietatis ac moderaminis virum, habentēque zelum Dei, quamvis non plene secundū scientiam. Namque diem Paschæ Dominicum more suæ gentis, cujus sæpe mentionem fecimus, à quartā decimā lunā usque ad vicesimam observare solebat. Hoc etenim ordine Septemtrionalis Scottorum provincia, & omnis natio Pictorum illo adhuc tempore Paschæ Dominicum celebrabat, æstimans se in hac observatione sancti ac laude digni Patris Anatolii scripta secutum. Quod quidem an verum sit, peritus quisque facil-

limè cognoscit. Porro gentes Scottorum, quæ in Australibus Hiberniæ insulæ partibus morabantur, jamdudum ad admonitionem Apostolicæ Sedis Antistitis Pascha canonico ritu observare didicerant. Veniente igitur ad se Episcopo, Rex locum sedis Episcopalis in insulâ Lindisfarnensi, ubi ipse petebat, tribuit. Qui videlicet locus accedente ac recedente rheumate bis quotidie instar insulæ maris circumluitur undis, bis renudato littore contiguus terræ redditur; atque ejus admonitionibus humiliter ac libenter in omnibus auscultans, Ecclesiam Christi in regno suo multum diligenter ædificare ac dilatare curavit. Ubi pulcherrimo sæpe spectaculo contigit, ut evangelizante Antistite, qui Anglorum linguam perfectè non noverat, ipse Rex suis Ducibus ac Ministris interpretis verbi existeret cælestis: quia nimirum tam longo exilii sui tempore linguam Scottorum jam plenè didicerat. Exinde cœpere plures per dies de Scottorum regione venire in Britanniam atque illis Anglorum provinciis quibus regnavit Rex Osualdus, magnâ devotione verbum fidei prædicare, & credentibus gratiam Baptismi, quicumque sacerdotali erant gradu præditi, ministrare. Construebantur ergo Ecclesiæ per loca, confluebant ad audiendum verbum Dei populi gaudentes, donabantur munere regio possessiones, & territoria ad instituenda Monasteria, imbuebantur præceptoribus Scottis parvuli Anglorum unâ cum majoribus studiis & observatione disciplinæ regularis. Nam Monachi erant, maximè qui ad prædicandum venerant. Monachus ipse Episcopus Aidanus, utpote de insulâ quæ vocatur *Hii*, destinatus: cujus Monasterium in cunctis penè Septentrionalium Scottorum, & omnium Pictorum Monasteriis non parvo tempore attem tenebat, regendisque eorum populis præerat: quæ videlicet insula ad jus quidem Britanniæ pertinet, non magno ab eâ freto discreta, sed donatione Pictorum, qui illas Britanniæ plagas incolunt, jamdudum Monachis Scottorum tradita, eo quòd illis prædicantibus fidem Christi perceperunt.



CAPUT IV.

Quando gens Pictorum fidem Christi perceperit.

SQUIDEM anno Incarnationis Dominicæ quingentesimo sexagesimo quinto (quo tempore gubernaculum Romani Imperii post Justinianum Justinus minor accepit) venit de Hiberniâ Presbyter & Abbas habitu & vita Monachi insignis, nomine *Columban*, Britanniam, prædicaturus verbum Dei provinciis Septentrionalium Pictorum, hoc est, eis quæ arduis atque horrentibus jugis montium jugis, ab Australibus eorum sunt regionibus sequestrata. Nanique ipsi Australes Picti, qui intra eosdem montes habent sedes multo antè tempore, (ut perhibent) relicto errore idolatriæ, fidem veritatis acceperant, prædicante eis verbum Ninia Episcopo reverentissimo & sanctissimo viro, de natione Brittonum, qui erat Romæ regulariter fidem & mysteria veritatis edoctus; cujus sedem Episcopalem sancti Martini Episcopi, nomine & Ecclesiâ insignem, (ubi etiam ipse corpore unâ cum pluribus Sanctis requiescit) jam Anglorum gens obtinet. Qui locus ad provinciam Berniciorum pertinens, vulgò vocatur *Ad candidam casam*, eò quod ibi Ecclesiam de lapide, insolito Brittonibus more fecerit. Venit autem in Britanniam *Columban*, regnante Pictis Buidio filio *Meilochon*, Rege potentissimo, nono anno regni ejus, gentemque illam verbo & exemplo ad fidem Christi convertit: unde & præfatam insulam ab eis in possessionem Monasterii faciendi accepit. Neque enim magna est, sed quasi familiarum quinque, juxta æstimationem Anglorum, quam successores ejus usque hodie tenent, ubi & ipse sepultus est, cum esset annorum septuaginta septem, post annos circiter triginta & duos, ex quo ipse Britanniam prædicaturus adiit. Fecerat autem, priusquam Britanniam veniret, Monasterium nobile in Hiberniâ, quod à copiâ roborum *Dearmach* linguâ Scottorum, hoc est, *Campus roborum*, cognominatur. Ex quo utroque Monasterio plurima exinde Monasteria per discipulos

ejus & in Britanniâ & in Hiberniâ propagata sunt: in quibus omnibus idem Monasterium insulanum, in quo ipse requiescit corpore, principatum tenet. Habere autem solet ipsa insula rectorem semper Abbatem Presbyterum, cujus juri & omnis provincia, & ipsi etiam Episcopi, ordine inusitato debeant esse subiecti, juxta exemplum primi Doctoris illius, qui non Episcopus, sed Presbyter existit & Monachus: de cujus vitâ & verbis nonnulla à discipulis ejus feruntur scripta haberi. Verùm qualiscumque fuerit ipse, nos hooe illo certum tenemus, quod reliquit successores magnâ continentia, ac divino amore regularique institutione insignes: in tempore quidem summæ festivitatis dubios circulos sequentes, utpote quibus longè ultra orbem positis, nemo synodalia Paschalis observantiæ decreta porrexerat, tantùm ea quæ in Prophetiis, Evangelicis & Apostolicis litteris discere poterant, pietatis & castitatis opera diligenter observantes. Permanit autem hujusmodi observantia Paschalis apud eos tempore non paucò, hoc est, usque ad annum Dominicæ Incarnationis septingentesimum decimum sextum, per annos centum quinquaginta. At tunc veniente ad eos reverentissimo ac sanctissimo Patre & Sacerdote Egberto, de natione Anglorum, qui in Hiberniâ diutius exulaverat pro Christo, eratque & doctissimus in Scripturis, & longæ vitæ perfectione eximius, correcti sunt per eum, & ad verum canonicumque Paschæ diem translati, quem tamen & antea non semper in Lunâ decimâ quartâ cum judæis, (ut quidam rebantur) sed in die quadam Dominicâ, aliâ tamen quàm decebat hebdomadâ celebrabant. Sciebant enim (ut Christiani) resurrectionem Dominicam quæ prima Sabbati facta est, prima Sabbati semper esse celebrandam: sed ut barbari & rustici, quando eadem prima Sabbati, quæ nunc Dominica dies nuncupatur, veniret, minime didicerant. Verùm quia gratiâ caritatis fervere non omiserunt, & hujus quoque rei notitiam ad perfectum percipere meruerunt, juxta promissum Apostoli dicentis: Et si quid aliter sapitis, & hoc quoque vobis Deus revelavit. De quo plenius in sequentibus suo loco dicendum est.



CAPUT V.

De vitâ Aidani Episcopi.

AB hac ergo insulâ ab horum collegio Monachorum ad provinciam Anglorum instruemdam in Christo missus est Aidanus, accepto gradu Episcopatus. Quo tempore eodem Monasterio Segenius Abbas & Presbyter præfuit. Unde inter alia vivendi documenra saluberrimum abstinentiæ vel continentiæ Clericis exemplum reliquit: cujus doctrinam id maximè commendabat omnibus, quòd non aliter quàm vivebar cum suis, ipse docebat. Nihil enim hujus mundi quærere, nihil amare curabar. Cuncta quæ sibi à Regibus vel divitibus sæculi donabantur, mox pauperibus qui occurrerent, erogare gaudebar. Discurrere per cuncta & urbana & rustica loca, non equorum dorso, sed pedum incessu vêtus, nisi si major forrè necessitas compulisset, solebat: quatenus ubicumque aliquos vel divites vel pauperes incedens aspexisset, confestim ad hos divertens, vel ad fidei suscipiendæ sacramentum, si infideles essent, inviraret; vel si fideles, in ipsâ eos fide confortaret, arque ad eleemosynas, bonorumque operum executionem & verbis excitaret & factis. In tantum aurem vira illius à nostri temporis segnitia distabar, ut omnes qui cum eo incedebant, sive adronsi, sive laici, meditari deberent; id est, aut legendis Scripturis, aut Psalmis discendis operam dare. Hoc erat quotidianum opus illius, & omnium qui cum eo erant, ubicumque locorum devenissent. Et si forrè evenisset (quod tamen rarò evenit) ut ad Regis convivium vocaretur, intrabat cum uno Clerico, aut duobus; & ubi paululùm reficiebarur, adcelerabat ociùs ad legendum cum suis, sive ad orandum egredi: cujus exemplis informari tempore illo religiosi quique viri, ac feminae, consuetudinem fecerunt per totum annum, exceptâ remissione quinquagesimæ Paschalis, quarrâ & sexrâ Sabbati jejunium ad nonam usque horam prorelare. Nunquam divitibus honoris sive timoris gratiâ, si qua deliquissent, reticebat; sed asperâ illos

inveſtione corrigebat. Nullam potentibus ſæculi pecuniam, excepta ſolummodò eſcâ, ſi quos hoſpitiſus ſuſcepiffet, unquam dare ſolebat, ſed ea potiùs quæ ſibi à divitibus donaria pecuniarum largiebantur, vel in uſus pauperum (ut diximus) diſpergebat, vel ad redemptionem eorum qui injuſtè fuerant venditi, diſpensabat. Denique multos quos pretio dato redemerat, redemptos poſtmodum ſuos diſcipulos fecit, atque ad Sacerdotalem uſque gradum erudiendo atque inſtituendo provexit. Ferunt autem quia cùm de provincia Scottorum Rex Oſualdus poſtulaffet Antiſtitem, qui ſibi ſuæque genti verbum fidei miniſtraret, miſſus fuerit primò alius auſterioris animi vir, qui cùm aliquandiù genti Anglorum prædicans nihil proficeret, nec libenter à populo audiretur, redierit patriam, atque in conventu ſeniorum retulerit, quia nihil prodeſſe docendo genti ad quam miſſus erat, potuiſſet, eò quòd eſſent homines indomâbiles, & duræ ac barbaræ mentis. At illi (ut perhibent) tractatum magnum in Concilio quid eſſet agendum, habere cœperunt; deſiderantes quidem genti quam petebantur, ſaluti eſſe, ſed de non recepto quem miſerant, Prædicatore dolentes. Tunc ait Aidanus (nam & ipſe Concilio intererat) ad eum de quo agebatur, Sacerdotem: Videtur mihi, frater, quia durior juſto indoctis auditoribus fuiſti, & non eis juxta Apoſtolicam doctrinam primò lac doctrinæ mollioris porrexiffi, donec paulatim enutriti verbo Dei, ad capiendâ perfectiora, & ad faciendâ ſublimiora Dei præcepta ſufficerent. Quo audito, omnium qui conſedebant, ad ipſum ora & oculi converſi, diligenter quid diceret, diſcutiebant, & ipſum eſſe dignum Epiſcopatu, ipſum ad erudiendos incredulos & indoctos mitti debere decernunt, qui gratiâ diſcretionis, quæ virtutum mater eſt, ante omnia probatur imbutus; ſicque illum ordinantes, ad prædicandum miſerunt. Qui ubi tempus accepit, ſicut priùs moderamine diſcretionis, ita poſtmodum & cæteris virtutibus ornatus apparuit.

CAPUT VI.

De religione ac pietate mirandâ Ofualdi Regis.

HUJUS igitur Antistitis doctrinâ Rex Ofualdus cum ea cui præerat, gente Anglorum institutus, non solum incognita progenitoribus suis regna cælorum sperare didicit; sed & regna terrarum plusquàm ulli majorum suorum, ab eodem uno omnipotenti Deo, qui fecit cælum & terram, consecutus est. Denique omnes nationes & provincias Britanniæ, quæ in quatuor linguas (id est, Brittonum, Pictorum, Scottorum & Anglorum) divisæ sunt, in ditione accepit. Quo regni culmine sublimatus, nihilominus (quod mirum dictum est) pauperibus & peregrinis semper humilis, benignus & largus fuit. Denique fertur quia tempore quodam cum die sancto Paschæ cum præfato Episcopo confedisset ad prandium, positusque esset in mensa coram eo discus argenteus regalibus epulis refertus, jamque essent manus ad panem benedicendum missuri, intrasse subito Ministrum ipsius, cui suscipiendorum inopum erat cura delegata, & indicasse Regi quia multitudo pauperum undecumque adveniens maxima per plateas sederet, postulans aliquid elemosynæ à Rege: qui mox dapes sibi met adpositas deferri pauperibus, & discum confringi, atque eisdem minutatim dividi præcepit. Quo viso, Pontifex qui adsidebat, delectatus tali facto pietatis, apprehendit dexteram ejus, & ait: Nunquam inveterascat hæc manus. Quod & ita juxta votum benedictionis ejus provenit. Nam cum interfecto illo in pugna, manus cum brachio à cætero essent corpore resectæ, contigit ut hæcenus incorruptæ perdurent. Denique in urbe regia, quæ à Regina quondam vocabulo *Bebbâ* cognominatur, loculo inclusæ argenteo in Ecclesiâ sancti Petri servantur, ac digno à cunctis honore venerantur. Hujus industria Regis, Deitorum & Berniciorum provinciæ, quæ eatenus ab invicem discordabant, in unam sunt pacem, & velut unum compaginatæ in populum. Erat autem nepos Eduini Regis ex sorore Achâ, dignumque

que fuit, ut tantus præcessor talem haberet de suâ consanguinitate & religionis heredem & regni.

CAPUT VII.

*Ut provincia Occidentalium Saxonum verbum Dei, prædicante
Birino, suscepit; & de successoribus ejus
Agilberto & Eleutherio.*

EO tempore gens Occidentalium Saxonum, qui antiquitus *Gevissæ* vocabantur, regnante Cynigillo, fidem Christi suscepit, prædicante illis verbum Bitino Episcopo, qui cum consilio Papæ Honorii venerat Britanniam; promittens quidem se illo præsentem in intimis ultrà Anglorum partibus, quò nullus Doctor præcessisset, sanctæ fidei semina esse sparsurum. Unde & jussu ejusdem Pontificis, per Asterium Genuensem Episcopum in Episcopatus consecratus est gradum. Sed Britanniam perveniens, ac primùm Gevissarum gentem ingrediens, cùm omnes ibidem paganissimos inveniret, utilius esse ratus est ibi potius verbum Dei prædicare, quàm ultrà progrediens, eos quibus prædicare deberet, inquirere. Itaque evangelizante illo in præfatâ provinciâ, cùm Rex ipse catechizatus, fonte Baptismi cum suâ gente ablueretur, contigit tunc temporis sanctissimum ac victoriosissimum Regem Nordanhymbrorum Osualdum adfuisse, eumque de lavacro exeuntem suscepisse, ac pulcherrimo prorsus & Deo digno consortio, cujus erat filiam accepturus in conjugem, ipsum prius secundâ generatione Deo dicatum sibi accepit in filium. Donaverunt autem ambo Reges eidem Episcopo civitatem quæ vocatur *Dorcic*, ad faciendam inibi sedem Episcopalem, ubi factis dedicatisque Ecclesiis, multisque ad Dominum pro ejus labore populis advocatis, migravit ad Dominum, sepultusque est in eâ civitate, & post annos multos, *Hedde* Episcopatum agente, translatus inde in Ventam civitatem, atque in Ecclesiâ beatorum Apostolorum Petri & Pauli positus est. Defuncto autem & Rege, successit in regnum filius ejus *Coinwalch*, qui & fidem

& sacramenta regni cælestis suscipere tenuit, & non multà post etiam regni terrestris potentiam perdidit. Repudiatà enim sorore *Pendan* Regis Merciorum quam duxerat, aliam accepit uxorem: ideòque bello petitus, ac regno privatus ab illo, secessit ad Regem Orientalium Anglorum, cui nomen erat *Anna*: apud quem triennio exulans fidem cognovit ac suscepit veritatis. Nam & ipse apud quem exulabat Rex, erat vir bonus, & bonà ac sanctâ sobole felix, ut in sequentibus docebimus. Cum verò restitutus esset in regnum *Coinvalch*, venit in provinciam de Hiberniâ Pontifex quidam, nomine *Agilbertus*, natione quidem Gallus, sed tamen legendarum gratiâ Scripturarum in Hiberniâ non parvo tempore demoratus, conjunxitque se Regi, sponte ministerium prædicandi adsumens: cujus eruditionem atque industriam videns Rex, rogavit eum, acceptâ ibi sede Episcopali, suæ genti manere Pontificem. Qui precibus ejus adnuens, multis annis eidem genti sacerdotali jure præfuit. Tandem Rex, qui Saxonum tantum linguam noverat, pertæsus barbaræ loquelæ, subintroduxit in provinciam alium suæ linguæ Episcopum vocabulo *Vini*, & ipsum in Galliâ ordinatum; dividensque in duas parochias provinciam, huic in civitate Ventâ, quæ à gente Saxonum *Vintacesstir* appellatur, sedem Episcopalem tribuit: unde offensus graviter Agilbertus, quòd hoc ipso inconsulto ageret Rex, rediit in Galliam, & accepto Episcopatu Patisiacæ civitatis, ibidem senex ac plenus dierum obiit. Non multis autem annis post abcessum ejus à Britanniâ transactis, pulsus est *Vini* ab eodem Rege de Episcopatu; qui secedens ad Regem Merciorum, vocabulo *Wlfheri*, emit pretio ab eodem sedem Lundoniæ civitatis, ejusque Episcopus usque ad vitæ suæ terminum mansit. Sicque provincia Occidentalium Saxonum tempore non paucò absque Præsule fuit. Quoriam tempore Rex præfatus ipsius gentis, gravissimis regni sui damnis sæpissime ab hostibus adstrictus, tandem ad memoriam reduxit, quòd eum pridem perfidia regno depulerit, fides agnita Christi in regnum revocaverit: intellexitque etiam quòd destituta tunc etiam Pontifice provincia, rectè pariter divino fuerit destituta præsidio. Misit ergo legatarios in Galliam ad

Agilbertum, summisâ illum satisfactione deprecans ad Episcopatum suæ gentis redire. At ille se excusans, & eò venite non posse contestans, quia Episcopatu propriæ civitatis ac parochiæ teneretur adstrictus. Ne tamen obnixè petenti nihil ferret auxilii, misit pro se illò Presbyterum Eleutherium, nepotem suum, qui ei, si vellet, ordinaretur Episcopus; dicens quodd ipse cum dignum esse Episcopatu iudicaret. Quo honorificè à populo & à Rege suscepto, rogaverunt Theodorum, tunc Archiepiscopum Dorovernensis Ecclesiæ, ipsum sibi Antistitem consecrari: qui consecratus in ipsâ civitate, multis annis Episcopatum Gevissarum, ex Synodicâ sanctione solus, sedulo moderamine gessit.

CAPUT VIII.

Ut Rex Cantuariorum Earconbertus idola destrui præceperit; & de filiâ ejus Earcongota, & propinquâ ejus Edilberge, sacratis Deo virginibus.

ANNO Dominicæ Incarnationis sexcentesimo quadragésimo, Eadbald Rex Cantuariorum transiens ex hac vitâ, Earconberto filio regni gubernacula reliquit: quæ ille suscepta viginti quatuor annis & aliquot mensibus nobilissimè tenuit. Hic primus Regum Anglorum in toto regno suo idola relinqui ac destrui, simul & jejunium quadraginta dierum observari principali auctoritate præcepit. Quæ ne facile à quopiam posset contemni, in transgressores dignas & competentes punitiones proposuit. Cujus filia Earcongota, ut condigna parenti soboles, magnarum fuit virgo virtutum, serviens Deo in Monasterio quod in regione Francorum constructum est ab Abbatissâ nobilissimâ, vocabulo Farâ, in loco qui dicitur Brige. Nam eo tempore necdum multis in regione Anglorum Monasteriis constructis, multi de Britannâ monasticæ conversationis gratiâ, Francorum vel Galliarum Monasteria adire solebant; sed & filias suas eisdem erudiendas, ac sponso cælesti copulandas mittebant; maximè in Brige & in Cate, & in Andilegum Monasterio: inter

quas erat *Sethryd*, filia uxoris Annæ Regis Orientalium Anglorum, cujus supra meminimus, & filia naturalis ejusdem Regis *Edelberg*: quæ utraque cum esset peregrina, præ merito virtutum, ejusdem Monasterii Brigenfis est Abbatissa constituta. Cujus Regis filia major *Sexburg*, uxor Earconberhti Regis Cantuariorum, habuit filiam Earcongotam, de quâ sumus dicturi. Hujus autem virginis Deo dedicatæ, multa quidem ab incolis loci illius solent opera virtutum & signa miraculorum usque hodie narrari. Verum nos de transitu tantum illius quo cælestia regna petiit, aliquid dicere breviter sufficiat. Imminente ergo die suæ vocationis, cœpit circumire in Monasterio casulas infirmarum Christi famularum, earumque vel maximè, quæ vel ætate provectæ, vel probitate morum erant insigniores: quarum se omnium precibus humiliter commendans, obitum proximè suum, quem revelatione didicerat, non celavit esse futurum: quam videlicet revelationem hujusmodi esse perhibebat; Vidisse se albarum catervam hominum idem Monasterium intrare; hosque à se interrogatos quid quærerent, aut quid ibi vellent, respondisse quod ob hoc illd fuerint destinati, ut aureum illud numisma quod eo de Cantia venerat, secum adsumerent. Ipsa autem nocte, in cujus ultimâ parte (id est, incipiente aurorâ) præsentis mundi tenebras transiens, supernam migravit ad lucem; multi de Fratribus ejusdem Monasterii, qui aliis erant in ædibus, jam manifestè se concentus Angelorum psallentium audisse referebant, & sonitum quasi plurimæ multitudinis Monasterium ingredientis: unde mox egressi dignoscere quid esset, viderunt lucem cælitus emissam fuisse permaximam, quæ sanctam illam animam carnis vinculis absolutam, ad æterna patriæ cælestis gaudia deducebat. Addunt & alia, quæ ipsâ nocte in Monasterio eodem divinitus fuerint ostensa miracula: sed hæc nos ad alia tendentes suis narrare permittimus. Sepultum est autem corpus venerabile virginis & sponsæ Christi, in Ecclesiâ beati Protomartyris Stephani: placuitque post diem tertium, ut lapis quo monumentum tegebatur, amoveretur, & altius ipso in loco reponeretur: quod dum fieret, tantæ fragrantia suavitatis ab imis bulli-

vit, ut cunctis qui aditabant Fratribus ac Sororibus, quasi opobalsami cellaria esse viderentur aperta. Sed & matertera ejus, de quâ diximus, Edilberga, & ipsa Deo dilectam perpetuæ virginitatis gloriam in magnâ corporis continentia servavit: quæ ejus esset virtutis, magis post mortem claruit. Cum enim esset Abbâtissa, cœpit facere in Monasterio suo Ecclesiam in honorem omnium Apostolorum, in quâ suum corpus sepeliri cupiebat. Sed cum opus idem ad medium fermè esset perductum, illa ne hoc perficeret, morte prærepta est, & in ipso Ecclesiæ loco, ubi desiderabat, condita. Post ejus mortem Fratribus alia magis curantibus intermissum est hoc ædificium annis septem, quibus completis, statuerunt ob nimietatem laboris, hujus structuram Ecclesiæ funditus relinquere; ossa verò Abbâtissæ illo de loco elevata in aliam Ecclesiam, quæ esset perfecta ac dedicata, transferre. Et aperientes sepulcrum ejus, ita intemeratum corpus invenère, ut à corruptione concupiscentiæ carnalis erat imminere: & ita denuò lotum, atque aliis vestibus indutum, transulerunt illud in Ecclesiam beati Stephani Martyris; ejus videlicet natalis ibi solet in magnâ gloriâ celebrari die Nonarum Juliarum.

CAPUT IX.

Ut in loco in quo occisus est Rex Osualdus, crebra sanitarum miracula facta; utque ibi primò jumentum cujusdam viantis, ac deinde puella paralytica sit curata.

REGNAVIT autem Osualdus Rex Christianissimus Nordanhymbrotum novem annis, adnumerato etiam illo anno, quem & feralis impietas Regis Brittonum, & apostasia demens Regum Anglorum detestabilem fecerat. Siquidem (ut suprâ docuimus) unanimo omnium consensu firmatum est, ut nomen & memoria apostatarum, de catalogo Regum Christianorum prorsus aboleri deberet, neque aliquis regno eorum annus adnotari. Quo completo annorum curriculo, occisus est commisso gravi prælio ab

eâdem paganâ gente, paganôque Rege Merciorum, à quo & prædecessor ejus Eduinus peremptus fuerat, in loco qui linguâ Anglorum nuncupatur *Maserfelth*, anno ætatis suæ trigésimo octavo, die quinto mensis Augusti. Cujus quantâ fides in Deum, quæ devotio mentis fuerit, etiam post mortem, virtutum miraculis claruit. Namque in loco ubi pro patriâ dimicans, à paganis interfectus est, usque hodie sanitates infirmorum & hominum & pecorum celebrari non desinunt. Unde contigit ut pulverem ipsum ubi corpus ejus in terram corruit, multi auferentes, & in aquam mittentes, suis per hæc infirmis multum commodi adferrent. Qui videlicet mos adeò increbuit, ut paulatim ablata exinde terrâ, fossam ad mensuram staturæ virilis reddiderit. Nec mirandum in loco mortis illius infirmos sanari, qui semper dum viveret, infirmis & pauperibus consulere, eleemosynas dare, opem ferre non cessabat. Et multa quidem in loco illo, vel de pulvere loci illius facta virtutum miracula narrantur: sed nos duo tantum quæ à majoribus audivimus, referre satis duximus. Non multo post interfectionem ejus exacto tempore, contigit ut quidam equo sedens iter juxta locum ageret illum; cujus equus subito lassescere, consistere, caput in terram declinare, spumas ex ore dimittere, & augescere dolore nimio, in terram cœpit ruere. Desiluit eques, & stramine substrato cœpit expectare horam, quâ aut melioratum reciperet jumentum, aut relinqueret mortuum. At ipsum diu gravi dolore vexatum, cum diversas in partes se torqueret, repentè volutando devenit in illud loci ubi Rex memorabilis occubuit. Nec mora, quiescente dolore cessabat ab insanis membrorum motibus, & consueti equorum more, quasi post lassitudinem in diversum latus vicissim sese volvere, statimque exsurgens quasi sanum per omnia, vireta herbarum avidius carpere cœpit. Quo ille viso, ut vir sagacis ingenii, intellexit aliquid miræ sanctitatis huic loco quo equus est curatus, inesse; & posito ibi signo, non multo post adscendit equum, atque ad hospitium quo proposuerat, accessit: quò dum adveniret, invenit puellam ibi, neptem patris-familias, longo paralytici morbo gravatam: & cum familiares domus illius, de acerbâ

puellæ infirmitate ipso præfente quererentur , cœpit dicere ille de loco ubi caballus suus eſſet curatus. Quid multa? imponentes eam carro , duxerunt ad locum illum , ibidémque depoſuerunt. At illa poſita in loco , obdormivit parumper ; & ubi evigilavit , ſanatam ſe ab illâ corporis diſſolutione ſentiens , poſtulatâ aquâ , ipſâ lavit faciem , crines compoſuit , caput linteo cooperuit , & cum his qui ſe adduxerant , ſana pedibus incedendo reverſa eſt.

CAPUT X.

ut pulvis loci illius contra ignem valuerit.

EO tempore venit alius quidam de natione Brittonum (ut ſerunt) iter faciens juxta ipſum locum , in quo præſata erat pugna completa ; & vidit unius loci ſpatium cætero campo viridius ac venuſtius : cœpitque ſagaci animo conjicere quòd nulla eſſet alia cauſa inſolitæ illo in loco viriditatis , niſi quia ibidem ſanctior cætero exercitu vir aliquis fuiſſet interfectus. Tulit itaque de pulvere terræ illius ſecum inligans in linteo , cogitans quòd futurum erat quia ad medelam infirmantium idem pulvis proficeret ; & pergens itinere ſuo pervenit ad vicum quandam veſperè , intravitque in domum , in quâ vicani cœnantes epulabantur ; & ſuſceptus à dominis domûs , reſedit & ipſe cum eis ad convivium , adpendens linteolum cum pulvere quem adtulerat , in unâ poſtâ parietis. Cùmque diutiùs epulis atque ebrietati vacarent , accenſo grandi igne in medio , contigit volantibus in altum ſcintillis , culmen domûs , quod erat virgis contextum , ac fœno tectum , ſubitaneis flammis impleri. Quod cùm repentè convivæ terrore confuſi reſpicerent , fugerunt foràs , nihil ardenti domui , jamjamque peritura prædeſſe valentes. Conſumptâ ergo domo flammis , poſta ſolummodò in quâ pulvis ille inclufus pendeſcit , tuta ab ignibus & intacta remanſit. Quâ viſâ virtute , mirati ſunt valde ; & perquirentes ſubtiliùs , invenerunt quia de illo loco adſumptus erat pulvis , ubi Regis Oſwaldi ſanguis erat

effusus. Quibus patefactis, ac diffamatis longè latèque miraculis, multi locum frequentare illum, & sanitatum ibi gratiam capere sibi suisque cœperunt.

CAPUT XI.

Ut super reliquias ejus lux cœlestis totâ nocte steterit; & ut per eas sint demoniaci curati.

INTER quæ nequaquam silentio præterendum reor, quid virtutis ac miraculi cœlestis fuerit ostensum, cum ossa ejus inventa, atque ad Ecclesiam in quâ nunc servantur, translata sunt. Factum est autem hoc per industriam Reginæ Merciorum *Hoftride*, quæ erat filia fratris ejus *Osin*, qui post illum regni apicem tenebat, ut in sequentibus dicemus. Et Monasterium nobile in provinciâ *Lindissi*, nomine *Beardaneu*, quod eadem Regina cum viro suo *Adilredo* multum diligebat, venerabatur, excolebat, in quo desiderabat honoranda patrui sui ossa recondere: cumque venisset carrum in quo eadem ossa ducebantur, incumbente vespërâ, in Monasterium præfatum, noluerunt ea qui erant in Monasterio, libenter excipere: quia etsi sanctum cum noverant, tamen quia de aliâ provinciâ ortus fuerat, & super eos regnum acceperat, veteranis cum odiis etiam mortuum insequabantur. Unde factum est ut ipsâ nocte reliquiæ adlatæ foris permanerent, tentorio tamen majore supra carrum in quo inerant, extenso. Sed miraculi cœlestis ostensio, quàm reverenter eæ suscipiendæ à cunctis fidelibus essent, patefecit. Nam totâ eâ nocte columna lucis à carro illo usque ad cælum porrecta, omnibus penè ejusdem *Lindissæ* provinciæ locis conspicua stabat. Unde manè facto Fratres Monasterii illius, qui pridie abnueran, diligenter ipsi petere cœperunt, ut apud se eadem sanctæ ac Deo dilectæ reliquiæ conderentur. Lota igitur ossa intulerunt in thecam, quam in hoc præparaverant, atque in Ecclesiâ juxta honorem congruum posuerunt: & ut regia viri sancti persona memoriam haberet æternam, vexillum ejus super tumbam

tumbam auro & purpurâ compositum adposuerunt, ipsamque, aquam in quâ laverunt ossa, in angulo sacrarii fuderunt. Ex quo tempore factum est, ut ipsa terra quæ lavacrum venerabile suscepit, ad abigendos ex obsessis corporibus demones, gratiæ salutaris haberet effectum. Denique tempore sequente, cum præfata Regina in eodem Monasterio moraretur, venit ad salutandam eam Abbatissa quædam venerabilis, quæ usque hodie superest, vocabulo *Edilbilda*, soror virorum sanctorum Edilwini & Aldewini, quorum prior Episcopus in provinciâ *Lindissi*, secundus erat Abbas in Monasterio quod vocatur *Pearlanen*, à quo non longè & illa Monasterium habebat. Cum ergo veniens illò, loqueretur eum Reginâ, atque inter alia, sermone de Osualdo exorto diceret, quòd & ipsa lucem nocte illâ supra reliquias ejus ad cælum usque altam vidiisset, adjecit Regina, quia de pulvere pavimenti in quo aqua lavacri illius effusa est, multi jam sanati essent infirmi. At illa petiit sibi portionem pulveris salutiferi dari: & accipiens, inligatum panno condidit in capsellâ, & rediit. Transacto autem tempore aliquanto, cum esset in suo Monasterio, venit illuc quidam hospes, qui solebat nocturnis sæpius horis repente ab immundo spiritu gravissimè vexari: qui cum benignè susceptus post cenam in lecto membra posuisset, subito à diabolo arreptus, clamarè, dentibus frendere, spumare, & diversis motibus cepit membra torquere. Cumque à nullo vel ligari, vel teneri potuisset, cucurrit Minister, & pulsans ad ostium, nuntiavit Abbatissæ. At illa aperiens januam Monasterii, exivit ipsa cum unâ sanctimonialium feminatum ad locum virorum, & evocans Presbyterum, rogavit secum venire ad patientem. Ubi cum venientes viderent multos adfuisse qui vexatum tenere, & motus ejus insanos comprimere conati, nequaquam valebant, dicebat Presbyter exorcismum, & quæque poterat pro sedando miseri furore agebat. Sed nec ipse, quamvis multum laborans, proficere aliquid valebat. Cumque nihil salutis furenti superesse videretur, repente venit in mentem Abbatissæ pulvis ille præfatus, statimque jussit ire Ministram, & capsellam in quâ erat, adducere. Et cum illa adferens quæ jussa est, intraret atrium domûs, in cujus in-

terioribus dæmoniosus torquebatur, conticuit ille subito, & quasi in somnum laxatus deposuit caput, membra in quietem, omnia composuit. Conticuere omnes intentique ora tenebant, quem res exitum haberet solliciti expectantes. Et post aliquantum horæ spatium, resedit qui vexabatur, & graviter suspirans: Modò, inquit, sanum sapio: recepi enim sensum animi mei. At illi sedulò sciscitabantur quomodò hoc contigisset. Qui ait: Mox ut virgo hæc cum capsellâ quam portabat, adpropinquavit atrio domûs hujus, discessere omnes qui me premebant spiritus maligni, & me relicto nusquam comparuerunt. Tunc dedit ei Abbâtissa portuinculam de pulvere illo; & sic datâ oratione à Pteribetero illo, noctem quietissimam duxit: neque aliquid ex toto nocturni timotis aut vexationis ab antiquo hoste pettulit.

CAPUT XII.

Ut ad tumbam ejus sit puerulus è febre curatus.

SEQUENTE dehinc tempore fuit in eodem Monasterio puerulus quidam longo febrium incommodo graviter vexatus: qui cum die quodam sollicitus horam accessionis expectaret, ingressus ad eum quidam de Fratribus: Vis, inquit, mi nate, doceam te quomodò cureris ab hujus molestiâ languoris? Surge, ingredere Ecclesiam, & accedens ad sepulcrum Osualdi, ibi reside, & quietus manens adhære tumbæ. Vide ne excas inde, nec de loco movearis, donec hora recessionis febrium transierit. Tunc ipse intrabo, & ducam te inde. Fecit ut ille suaserat, sedentemque ad tumbam Sancti, infirmitas tangere nequaquam præsumpsit; quin in tantum timens aufugit, ut nec secundâ die, nec tertiâ, neque unquam exinde eum auderet contingere. Quod ita esse gestum qui referebat mihi Frater inde adveniens adjecit, quòd eo adhuc tempore quo mecum loquebatur, supetesset in eodem Monasterio jam juvenis ille, in quo tunc puero factum erat hoc miraculum sanitatis. Nec mirandum preces Regis illius jam cum Domino regnantis, multum valere apud eum

qui temporalis regni quondam gubernacula tenens, magis pro æterno regno semper laborare ac deprecari solebat. Denique ferunt quia à tempore matutinæ laudis sæpius ad diem usque in orationibus persistet, atque ob crebrum morem orandi, sive gratias agendi Domino semper ubicumque sedens, supinas super genua sua manus habere solitus sit. Vulgatum est autem, & in consuetudinem proverbii versum, quoddam etiam inter verba orationis vitam finierit. Nam cum armis & hostibus circumseptus, jamjamque videret se esse perimendum, oravit ad Dominum pro animabus exercitus sui. Unde dicunt in proverbio: Deus miserere animabus, dixit Osualdus cadens in terram. Ossâ igitur illius translata & condita sunt in Monasterio quod diximus: porro caput & manus cum brachiis à corpore præcisas, jussit Rex qui occiderat, in stipitibus suspendi. Quod post annum veniens cum exercitu successit regni ejus Osuin, abstulit ea, & caput quidem in cœmeterio Lindisfarnensis Ecclesiæ: in regiâ verò civitate manus cum brachiis condidit.

CAPUT XIII.

Ut in Hiberniâ sit quidam à mortis articulo per ejus reliquias revocatus.

NEc solum inclyti fama viri Britanniæ fines lustravit universos, sed etiam trans Oceanum longè radios salutiferæ lucis spargens, Germaniæ simul & Hiberniæ partes attigit. Denique reverentissimus Antistes Acca solet referre, quia cum Romam vadens, apud sanctissimum Fresonum gentis Episcopum Wilbrordum cum suo Antistite Wilfrido moraretur, crebrò eum audierit, de mirandis quæ ad reliquias ejusdem reverentissimi Regis in illâ provinciâ gesta fuerint, narrare. Sed & in Hiberniâ cum Presbyter adhuc peregrinam pro æternâ patriâ duceret vitam, rumorem sanctitatis ejus in eâ quoque insulâ longè latèque jam percerebuisse ferebat: è quibus unum quod inter alia retulit miraculum, præsentî nostræ Historiæ inserendum credidimus. Tempore,

inquit, mortalitatis, quæ Britanniam Hiberniamque latâ strage vastavit, percussus est ejusdem clade pestis inter alios scholasticus quidam de gente Scottorum, doctus quidem vir studio literarum; sed erga curam perpetuæ suæ salvationis nihil omnino studii & industriæ gerens: qui cum se morti proximum videret, timere cœpit & pavere, ne mox mortuus, ob merita scelerum ad inferni claustra raperetur: clamavitque me, cum essem in vicino positus, & inter ægra tremens suspiria, flebili voce talia mecum querebatur: Vides, inquit, quia jamjamque crescente corporis molestiâ ad articulum subeundæ mortis compellor: nec dubito, me post mortem corporis statim ad perpetuam animæ mortem rapiendum, ac infernalibus subdendum esse tormentis: qui tempore non paucio inter studia divinæ lectionis, vitiorum potius implicamentis quàm divinis solebam servire mandatis. Inest autem animo (si mihi pietas superna aliqua vivendi spatia donaverit) vitiosos mores corrigere, atque ad imperium divinæ voluntatis totam ex integro mentem vitamque transferre. Verùm novi non hoc esse meriti mei, ut inducias vivendi vel accipiam, vel me accepturum esse confidam, nisi fortè miserò mihi & indigno veniâ, per auxilium eorum qui illi fideliter servierunt, propitiari dignatus fuerit. Audivimus autem, & famâ celeberrimâ, quodd fuerit in gente vestrà Rex mirandæ sanctitatis, vocabulo *Osualdus*, cujus excellentia fidei & virtutis, etiam post mortem, virtutum frequentium operatione claruerit: ptecorque, si aliquid reliquiarum illius penes te habes, adferas mihi, si fortè mihi Dominus per ejus meritum misereri voluerit. At ergo respondi: Habeo quidem de ligno, in quo caput ejus occisi à paganis infixum est; &, si firmo corde credideris, potest divina pietas per tanti meritum viri, & hujus vitæ spatia longiora concedere, & ingressu te vitæ perennis dignum reddere. Nec moratus ille, integram in hoc se habere fidem respondebat. Tunc benedixi aquam, & astulam roboris præfati immittens obtuli ægro potandam. Nec mora, meliùs habere cœpit, & convalescens ab infirmitate, multo deinceps tempore vixit: totòque ad Deum corde & opere conversus, omnibus ubicumque perveniebat, clementiam pii Conditoris, & fidelis ejus famuli gloriam prædicabat.

CAPUT XIV.

Ut de functo Paulino, Ithamar pro eo Rhofensis Ecclesiæ Præfatum susceperit; & de humilitate mirabili Osuini, qui ab Osuiu crudeli cade peremptus est.

TRANSLATO ergo ad cælestia regna Osualdo, suscepit regni terrestris sedem pro eo frater ejus *Osuia*, juvenis triginta circiter annorum; & per annos viginti octo laboriosissimè tenuit. Impugnatus videlicet à pagano Rege Pendâ, & ab eâ quæ fratrem ejus occiderat, paganâ gente Merciorum, & à filio quoque suo Alcfrido, necnon & à fratrui, id est, fratris sui, qui ante eum regnavit, filio Adilvaldo. Cujus anno secundo, hoc est, ab Incarnatione Dominicâ anno sexcentesimo quadragesimo quarto, reverentissimus Pater Paulinus, quondam Eboracensis, sed tunc Episcopus Rhofensis civitatis, transit ad Dominum sexto Iduum Octobrium die: qui decem & novem annos, menses duos, & dies viginti unum Episcopatum tenuit; sepultusque est in Secretario beati Apostoli Andreæ, quod Rex Edilbertus à fundamentis in eadem *Rhosi* civitate construxit. In cujus locum Honorius Archiepiscopus ordinavit *Ithamar*, oriundum quidem de gente Cantuariorum, sed virâ & eruditione antecessoribus suis æquandum. Habuit autem *Osuia* primis regni sui temporibus consortem regis dignitatis, vocabulo *Osuini*, de stirpe Regis Eduini, hoc est, filium Ofrici, de quo suprà retulimus, virum eximie pietatis & religionis: qui provincie Deirorum septem annis in maximâ omnium rerum affluentia, & ipse amabilis omnibus præfuit. Sed nec cum eo ille qui cæteram Transhumbranz gentis partem ab Aquilone, id est, Berniciorum provinciam regēbat, habere pacem potuit; quin potius ingravescētibz causis dissensionum miserrimâ hunc cæde peremit. Siquidem congregato contra invicem exercitu, cum videret se Osuinus cum illo qui plures haberet auxiliares, non posse bello configere, ratus est, utilius tunc dimissâ intentione bellandi, servare se ad tem-

pora meliora. Remisit ergo exercitum quem congegaverat, ac singulos domum redire præcepit, à loco qui vocatur *Wilsfaredun*, id est, *Mons Wilsfari*, & est à vico *Cataractone* decem fetinè millibus passuum contra solstitialem occasum secretus: divertitque ipse cum uno tantum milite sibi fidelissimo, nomine *Condberi*, celandus in domo Comitis Hunvaldi, quem etiam ipsum sibi amicissimum autumabat. Sed, heu, prohi dolor! longè aliter erat: nam ab eodem Comite proditum cum *Osuin*, cum præfato ipsius milite per Præfectum suum Ediluinum detestandâ omnibus morte interfecit. Quod factum est die decimâ tertiâ Kalendarum Septembrium, anno regni ejus nono, in loco qui dicitur *Ingestlingum*; ubi postmodum castigandi hujus facinoris gratiâ, Monasterium constructum est: in quo pro utriusque Regis (& occisi videlicet, & ejus qui occidere jussit) animæ redemptione quotidie Domino preces offerri deberent. Erat autem Rex *Osuinus* & aspectu venustus, & staturâ sublimis, & affatu jocundus, & moribus civilis, & manu omnibus, id est, nobilibus simul atque ignobilibus largus: unde contigit ut ob regiam ejus & animi, & vultûs, & meritorum dignitatem ab omnibus diligeretur, & undique ad ejus ministerium de cunctis propè provinciis viri etiam nobilissimi concurrerent. Cujus inter cæteras virtutis & modestiæ, & (ut ita dicam) specialis benedictionis glorias, etiam maxima fuisse fertur humilitas, ut uno probare sat erit exemplo. Donaverat equum optimum Antistiti *Aidano*, in quò ille quamvis ambulare solitus, vel amnium fluentia transire, vel si alia quælibet necessitas insisteret, viam peragere posset: cui cum parvo interjecto tempore pauper quidam occurreret eleemosynam petens, desiliens ille præcepit, equum, ita ut erat status regaliter, pauperi dari: erat enim multum misericors, & cultor pauperum, ac velut pater miserorum. Hoc cum Regi esset relatum, dicebat Episcopo, cum fortè ingressuri essent ad prandium: Quid voluisti, Domine Antistes, equum regium, quem te conveniebat habere, pauperi dare? Nunquid non habuimus equos viliores plurimos, vel alias species quæ ad pauperum dona sufficerent, quamvis illum eis equum non dares, quem tibi specialiter possiden-

dum elegi ? Cui statim Episcopus : Quid loqueris, inquit, Rex ? Num tibi carior est ille filius equæ, quàm ille filius Dei ? Quibus dictis intrabant ad prandendum. Et Episcopus quidem residebat in suo loco. Porro Rex (venerat enim de venatu) cœpit consistens ad focum calefieri cum Ministris : & repentinè inter calefaciendum recordans verbum quod dixerat illi Antistes, discinxit se gladio suo, & dedit illum Ministro, festinûsque accedens ante pedes Episcopi corruit, postulans ut sibi placatus esset, Quia nunquam (inquit) deinceps aliquid loquar de hoc, aut iudicabo quid vel quantum de pecuniâ nostrâ filiis Dei tribuas : Quod videns Episcopus, multum pettimuit, ac statim exsurgens levavit eum, promittens se multum illi esse placatum, dummodò ille residens ad epulas tristitiam deponeret. Dùmque Rex jubente ac postulante Episcopo, lætitiâ reciperet, cœpit e contrâ Episcopus tristis usque ad lacrymatum profusionem effici. Quem dum Presbyter suus linguâ suâ patriâ, quam Rex & domestici ejus non noverant, quare lacrymaretur, interrogasset : Scio, inquit, quia non multo tempore victurus est Rex : nunquam enim antehac vidi tam humilem Regem. Animadverto illum citius ex hac vitâ rapiendum. Non enim digna est hæc gens talem habere Rectorem. Nec multò post, dira Antistitis præsentia tristi Regis funere, de quo suprà diximus, impleta sunt. Sed & ipse Antistes Aidan non plus quàm duodecimo post occisionem Regis quem amabat, die, id est, pridie Kalendarum Septembrium, de sæculo ablatus, perpetua laborum suorum à Domino præmia recepit.

CAPUT XV.

*Ut Episcopus Aidan nautis & tempestatem futuram prædixisset,
& oleum sanctum quò hanc sedarent, dederit.*

QUI cujus metiri fuerit, etiam miraculorum signis inter-
ternus arbiter edocuit, è quibus tria memoriæ causâ
ponete satis sit. Presbyter quidam nomine Witta, multæ
gravitatis ac veritatis vir, & ob id omnibus etiam ipsi Pri-
ma-

cipibus sæculi honorabilis, cùm mitteretur Cantiam ob adducendam inde conjugem Regi Osuio, filiam videlicet Eduini Regis Eanfledam, quæ occiso patre illuc fuerat adducta: (qui terrestri quidem itinere illò venire, sed navigio cum virgine redire disponebar) accessit ad Episcopum Aidanum, oblectans eum, pro se suisque qui tantum iter erant aggressuri, Domino supplicare. Qui benedicens illos, ac Domino commendans, dedit etiam oleum sanctificatum; Scio, inquit, quia ubi navem ascenderitis, tempestas vobis & ventus contrarius superveniet: sed tu memento ut hoc oleum quod tibi do, mittas in mare; & statim quiescentibus ventis, serenitas maris vos læta prosequetur, & cupito itinere domum remitteret. Quæ cuncta ut prædixerat Antistes, ex ordine completa sunt: & quidem in primis fuerantibus undis pelagi, tentabant nautæ anchoris in mare missis navem retinere, neque hoc agentes, aliquid proficiebant: cùmque verrentibus undique & implere incipientibus navem fluctibus, mortem sibi omnes imminere, jamjamque adesse viderent, tandem Presbyter reminiscens verba Antistitis, adsumptâ ampullâ misit de oleo in pontum, & statim, ut prædictum erat, suo quievit à fervore. Sicque factum est, ut vir Dei per prophetiæ spiritum tempestatem prædixisset futuram, & per virtutem ejusdem spiritus, hanc exortam, quamvis corporaliter absens, sopiverit. Cujus ordinem miraculi non quilibet dubius relator, sed fidissimus mihi Ecclesiæ nostræ Presbyter, *Cynimund* vocabulo, narravit, qui se hoc ab ipso Wittâ Presbytero, in quo & per quem completum est, audisse perhibebat.

CAPUT XVI.

Ut idem admotum ab hostibus urbi regia ignem orando amoverit.

ALID ejusdem Patris memorabile miraculum ferunt multi qui nosse potuerunt. Nam cùm tempore Episcopatus ejus, hostilis Merciorum exercitus, Pendâ duce, Northanhymbrorum

danhymlorum regiones impiâ clade longè latèque devastans, pervenit ad urbem usque regiam, quæ ex Bebbæ quondam Regina vocabulo cognominatur, eamque quia neque armis, neque obsidione capere poterat, flammis absumere conatus est: discissisque viculis quos in vicinia urbis invenit, adduxit illò plurimam congeriem trabium, tignorum, parietum, virgeorum, & recti fenei, & his urbem in magnâ altitudine circumdedit à parre, quæ terræ est contigua: & dum ventum opportunum cerneret, inlato igne comburere urbem nissus est. Quo tempore reverentissimus Antistes Aidan in insulâ *Farne*, quæ duobus ferè passuum millibus ab urbe procul abest, morabatur. Illò enim sapius secreto orationis & silentii causâ secedere consuevit. Denique usque hodie locus sedis illius solitariæ in eadem insulâ solent ostendere. Qui cum ventis ferentibus globos ignis, ac fumum supra muros ignis exaltari conspiceret, fertur elevatis ad cælum oculis manibusque, cum lacrymis dixisse: Vide, Domine, quanta mala facit Penda. Quo dicto, statim mutari ab urbe veniri, in eos qui accenderant, flammarum incendia retorserunt, itaut aliquot læsi, omnes territi impugnare ultrâ urbem cessarent, quam divinitus servari cognoverant.

CAPUT XVII.

Est apposta Ecclesia, cui idem accumbens obierat, ardente caterâ domo, flammis absumi nequiverit; & de internâ vitâ illius.

HUNC cum dies mortis egredi è corpore cogeret, completis annis Episcopatus sui sexdecim, erat in villâ regiâ, non longè ab urbe de quâ præfati sumus. In hac enim habens Ecclesiam & cubiculum, sapius ibidem diverti ac manere, atque inde ad prædicandum circumquaque exire consueverat: quod ipsum & in aliis villis Regis facere solebat, utpote nihil propriæ possessionis, exceptâ Ecclesiâ suâ, & adjacentibus agellis habens. Tetenderunt ergo ei ægrotanti tentorium ad Occidentalem Ecclesiæ partem, itaut ipsum tentorium parieti hæteret Ecclesiæ. Unde factum est, ut adclinis destina, quæ extrinsecus Ecclesiæ pro munimine erat adposita,

spiritum vitæ exhalaret ultimum. Obiit autem septimo decimo Episcopatus sui anno, pridie Kalendarum Septembris. Cujus corpus mox inde translatus ad insulam Lindisfarnensium, atque in cœmeterio Fratrum sepultum est. At interjecto tempore aliquanto, cùm fabricata esset ibi basilica major, atque in honorem beatissimi Apostolorum Principis dedicata, illò ossa ejus translata, atque ad dexteram altaris juxta venerationem tanto Pontifice dignam condita sunt. Successit verò ei in Episcopatum *Finan*, & ipse illo ab *Hii* Scottorum insulâ ac Monasterio destinatus, ac tempore non paucò in Episcopatu permansit. Contigit autem post aliquot annos, ut Penda Merciorum Rex cum hostili exercitu hæc in loca perveniens, cum cuncta quæ poterat, ferro flammæque perderet, vicus quoque ille in quo Antistes obiit, unâ cum Ecclesiâ memoratâ flammis absumeretur. Sed mirum in modum illa destina cui incumbens obiit, ab ignibus circum cuncta vorantibus, absumi non potuit. Quo clarescente miraculo, mox ibidem Ecclesia restaurata, & hæc eadem destina in munimentum est parietis, ut antè fuerat, forinsecus adposita. Rursûmque peracto tempore aliquanto, evenit per culpam incuriæ, vicum eundem, & ipsam pariter Ecclesiam ignibus consumi. Sed ne tunc quidem eandem tangere flamma destinam valebat: & cùm magno utique miraculo ipsa ejus foramina ingrediens, quibus ædificio erat adfixa, perderet, ipsam tamen lædere nullatenus sinebatur. Unde tertio ædificatâ ibi Ecclesiâ, destinam illam non ut antè deforis in fulcimentum domûs adposuerunt; sed intrò ipsam Ecclesiam in memoriam miraculi posuerunt, ubi intrantes genu flectere, ac misericordiæ cælesti supplicare deberent. Constatque multos ex eo tempore gratiam sanitatis in eodem loco consecutos: quin etiam assulis ex ipsâ destinâ excisis & in aquam missis, plures sibi suisque languorum remedia conquisière. Scripsi autem hæc de personâ & operibus viri præfati; nequaquàm in eo laudans vel eligens hoc, quod de observatione Paschæ minùs perfectè sapiebat: immò hoc multùm detestans, (sicut in libro quem de Temporibus composui, manifestissimè probavi) sed quasi verax Historicus, simpliciter ea quæ de illo, sive per illum sunt gesta, describens,

& quæ laude sunt digna in ejus actibus, laudans, atque ad utilitatem legentium memoriæ commendans: studium videlicet pacis & caritatis, continentiae & humilitatis; animum iræ & avaritiæ victorem, superbiae simul & vanæ gloriæ contemprorem; industriam faciendi simul & docendi mandata caelestia, sollicitudinem lectionis & vigiliarum, auctoritatem Sacerdotis dignam, redarguendi superbos ac potentes, pariter & infirmos consolandi, ac pauperes recreandi, vel defendendi clementiam. Qui (ut breviter multa comprehendam) quantum ab eis qui illum novêre, didicimus, nihil ex omnibus quæ in Evangelicis, vel Apostolicis sive Propheticiis litteris facienda cognoverat, prætermittere, sed cuncta pro suis viribus operibus explere curabat. Hæc in præfato Antistite multum complector & amo, quia nimirum hæc Deo placuisse non ambigo. Quod autem Pascha non suo tempore observabar, vel canonicum ejus tempus ignorans, vel suæ gentis auctoritate, ne agnitionem sequeretur, devictus, non adprobo, nec laudo. In quo tamen hoc adprobo, quia in celebratione sui Paschæ non aliud corde tenebar, venerabarur, & prædicabat, quam quod nos, id est, redemptionem generis humani per passionem, resurrectionem, ascensionem in caelos mediatoris Dei & hominum Hominis Jesu Christi. Unde & hanc non (ut quidam falsò opinantur) quartâ decimâ Lunâ in quâlibet feriâ cum Judæis, sed die Dominicâ semper agebat, à Lunâ quartâ decimâ usque ad vicesimam; propter fidem videlicet Dominicæ resurrectionis quam unâ Sabbati factam, propter spem nostræ resurrectionis, quam eadem unâ Sabbati, quæ nunc Dominica dies dicitur, veraciter futuram cum sanctâ Ecclesiâ credebat.

C A P U T XVIII.

De vitâ vel morte religiosi Regis Sigberti.

His temporibus regno Orientalium Anglorum, post Erpualdum Redualdi successorem, Sigbertus frater

ejus præfuit, homo bonus ac religiosus : qui dudum in Galliâ, dum inimicitias Redualdi fugiens exularet, lavacrum Baptismi percepit, & in patriam reversus, ubi regno potitus est, mox ea quæ in Galliis bene disposita vidit, imitari cupiens instituit scholam, in quâ pueri litteris erudirentur : juvante se Episcopo Felice, quem de Cantriâ acceperat, eisque pædagogos ac magistros juxta morem Cantuariorum præbente. Tantumque Rex ille, cælestis regni amator factus est, ut ad ultimum relictis regni negotiis, & cognato suo Ecgrico commendatis, (qui & antea partem ejusdem regni tenebat) intraret Monasterium quod sibi fecerat, atque acceptâ tonsurâ pro æterno magis regno militare curaret. Quod dum multo tempore faceret, contigit gentem Merciorum duce Rege Pendâ adversus Orientales Anglos in bellum procedere, qui dum se inferiores in bello hostibus conspicerent, rogaverunt Sigbertum ad confirmandum militem secum venire in prælium. Illo nolente ac contradicente, invitum de Monasterio eruentes duxerunt in certamen, sperantes minus animos militum trepidare, minus præsentem duce quondam strenuissimo & eximio posse fugam meditari. Sed ipse profusionis suæ non immemor, dum optimo esset vallatus exercitu, nonnisi virgam tantum habere in manu voluit : occisusque est unâ cum Rege Ecgrico, & cunctis eorum, insistentibus paganis, cæsus sive dispersus exercitus. Successor autem regni eorum factus est Anna, filius *Eni*, de regio genere, vir optimus, atque optimæ genitor sobolis, de quibus in sequentibus suo tempore dicendum est : qui & ipse postea ab eodem pagano Merciorum duce, à quo & prædecessor ejus, occisus est.



CAPUT XIX.

*Ut Furseus apud Orientales Anglos Monasterium fecerit; & de
visionibus vel sanctitate ejus, cui etiam caro post mortem
imcorrupta testimonium perhibuerit.*

VERUM dum adhuc Sigbertus regni insulas teneret; supervenit de Hibernia vir sanctus, nomine *Furseus*, verbo & actibus clarus, sed egregiis insignis virtutibus, cupiens pro Domino, ubicunque sibi opportunum inveniret, peregrinam ducere vitam. Qui cum ad provinciam Orientalem pervenisset Anglorum, susceptus est honorifice à Rege præfato: & solitum sibi opus evangelizandi exsequens, multos & exemplo virtutis, & incitamento sermonis, vel incredulos ad Christum convertit, vel jam credentes, amplius in fide atque amore Christi confirmavit. Ubi quadam infirmitate corporis atreptus, angelica meruit visione perfrui, in qua admonitus est, cæpto verbi ministerio sedulus insistere, vigilisque consuetis & orationibus indefessus incumbere; cò quòd certus sibi exitus esset, sed incerta ejusdem exitus hora futura, dicente Domino: Vigilate itaque, quia nescitis diem neque horam. Quà visione confirmatus, curavit locum Monasterii, quem à præfato Rege Sigberto acceperat, velocissimè construere, ac regularibus instituere disciplinis. Erat autem Monasterium silvanum, & maris vicinitate amœnum, constructum in castro quodam, quod linguâ Anglorum *Cenobithesburg*, id est, *urbs Cnobheri* vocatur; quod deinde Rex provincie illius *Anna*, ac nobiles quique augustioribus ædificiis ac denariis adornarunt. Erat autem vir iste de nobilissimo genere Scottorum, sed longe animo quàm carne nobilior. Ab ipso tempore pueritiæ suæ curam non modicam lectionibus sacris simul & monasticis exhibebat disciplinis, & (quod maximè Sanctos decet) cuncta quæ agenda didicerat, sollicitus agere curabat. Quid multa? Procedente tempore & ipse sibi Monasterium in quo liberius cælestibus studiis vacaret, construxit: ubi correptus infirmi-

tate (sicut libellus de vitâ ejus conscriptus sufficienter edocet) raptus est è corpore : & à vespérâ usque ad galli cantum corpore exûtus , angelicorum agminum & aspectus intueri , & laudes beatas meruit audire. Referre autem erat solirus , quòd apertè eos inter alia resonare audiret : Ibunt Sancti de virtute in virtutem. Et iterùm : Videbitur Deus deorum in Sion. Qui reductus in corpore , & die tertiâ rursus eductus vidit non solùm majora beatorum gaudia , sed & maxima malignorum spirituum certamina , qui crebris accusationibus improbi , iter illi cæleste intercludere contendebant ; nec tamen protegentibus eum Angelis quicquam proficiebant : de quibus omnibus si quis plenius scire vult , id est , quantâ fraudis solertiâ dæmones & actus ejus & verba superflua , & ipsas etiam cogitationes , quasi in libro descriptas , replicaverint ; quæ ab Angelis , sanctisque ac viris justis sibi inter Angelos apparentibus læta vel tristia cognoverit , legat ipsùm , de quo dixi , libellum vitæ ejus , & multum ex illo (ut reor) profectus spiritualis accipiet. In quibus tamen unum est , quod & nos in hac hitoria ponere multis commodum duximus. Cùm ergo in altum esset elevatus , jussus est ab Angelis qui eum ducebant , respicere in mundum. At ille oculos in inferiora deflectens , vidit quasi vallem tenebrosam subrus se in imo positam. Vidit & quatuor ignes in aëre , non multo ab invicem spatio distantes. Et interrogans Angelos , qui essent hi ignes , audivit hos esse ignes qui mundum succedentes essent consumpturi. Unum mendacii , cùm hoc quod in Baptismo abrenunciare nos satanæ & omnibus operibus ejus promissimus , minimè implemus : alterum cupiditatis , cùm mundi divitias amori cælestium præponimus : tertium dissensionis , cùm animos proximorum , etiam in supervacuis rebus offendere non formidamus : quartum impietatis , cùm infirmiores spoliare , & eis fraudem facere pro nihilo ducimus. Crescentes verò paulatim ignes usque ad invicem sese extenderunt , atque in immensam adunati sunt flammam. Cùmque adpropinquassent , pertimescens ille dicit Angelo : Domine , ecce ignis mihi adpropinquat. At ille : Quod non incendisti , (inquit) non ardebit te : nam etsi terribilis iste & grandis esse rogus videtur ,

tamen juxta merita operum singulos examinât; quia uniuscujusque cupiditas in hoc igne ardebit. Sicut enim quis ardet in corpore per illicitam voluptatem, ita solutus corpore ardebit per debitam pœnam. Tunc vidit unum de tribus Angelis, qui sibi in rotâ utrâque visione ductores adfuerunt, præcedentem ignis flammam dividere, & duos ab utroque latere circumvolantes, ab ignium se periculo defendere. Vidit autem & dæmones per ignem volantes, incendia bellorum contra justos struere. Sequuntur adversus ipsum accusationes malignorum, defensiones spirituum bonorum, copiosior cælestium agminum visio; sed & vitotum de suâ natione Scottotum, quos olim Sacerdotii gradu non ignobiliter potiros, famâ jam vulgante, compererat; à quibus non pauca, quæ vel ipsi, vel omnibus qui audire vellet, multum salubria essent, audivit. Qui cum verba finissent, & cum angelicis spiritibus ipsi quoque ad cælos redirent, remanserunt cum beato Furleo tres Angeli, de quibus diximus, qui eum ad corpus referrent. Cumque præfato igni maximo adpropjaret, divisit quidem Angelus, sicut prius, ignem flammæ. Sed vir Dei ubi ad patefactam usque inter flammâs januam pervenit, arripientes immundi spiritus unum de eis, quos in ignibus torrebant, jactaverunt in eum, & contingentes humerum maxillamque ejus incenderunt: cognovitque hominem, & quia vestimentum ejus morientis acceperit, in memoriâ reduxit. Quem Angelus sanctus statim adprehendens, in ignem rejecit. Dicebatque hostis malignus: Nolite repellere quem antè suscepistis: nam sicut bona ejus peccatoris suscepistis, ita & de pœnis ejus participes esse debetis. Contradicens Angelus: Non, inquit, hoc propter avaritiam, sed propter salvandam ejus animam suscepit: cessavitque ignis. Et conversus ad eum Angelus: Quod incendiisti, inquit, hoc arsit in te. Si enim hujus viri in peccatis suis mortui pecuniam non accepisses, nec pœna ejus in te arderet. Et plura locutus, quid erga salutem eorum qui ad mortem pœniterent, esset agendum, salubri sermone edocuit. Qui postmodum in corpore testiturus, omni vitæ suæ tempore signum incendii quod in animâ pertulit, visibile cunctis in humero maxillaque portavit: mirumque

in modum quod anima in occulto passâ sit, caro palam omnibus præmonstrabat. Curabat autem semper, sicut & antea facere consueverat, omnibus opus virtutum & exemplis ostendere & prædicare sermonibus. Ordinem autem visionum suarum, illis solummodò qui propter desiderium compunctionis interrogabant, exponere volebat. Superest adhuc Frater quidam senior Monasterii nostri qui narrare solet, dixisse sibi quendam multum veracem ac religiosum hominem, quod ipsum Furseum viderit in provinciâ Orientalium Anglorum, illasque visiones ex ipsius ore audierit: adjiciens quod tempus hiemis fuerit acerrimum, & glacie constri-ctum, cum sedens in tenui veste vir iste, inter dicendum, propter multitudinem memorati timoris vel suavitatis, quasi in mediâ ætatis caumate sudaverit. Cum ergo (ut ad superiora redeamus) multis annis in Scotiâ verbum Dei omnibus adnuncians, tumultus inuentium turbatum non facile ferret, relictis omnibus quæ habere videbatur, ab ipsâ quoque insulâ patriâ discessit: & paucis cum fratribus per Brittones in provinciam Anglorum devenit, ibique prædicans verbum, ut diximus, Monasterium nobile construxit. Quibus ritè gestis, cupiens se ab omnibus sæculi hujus, & ipsius quoque Monasterii negotiis alienare, reliquit Monasterium, & animarum curam fratri suo Fullano, & Presbyteris Gabbano & Dicullo, & ipse ab omnibus mundi rebus liber, in Anachoretam conversus vitam finire disposuit. Habuit fratrem, vocabulo *Ulanum*, qui de Monasterii probatione diuturnâ, ad eremiticam perveniret vitam. Hunc ergo solus petens, annum totum cum eo in continentiâ & orationibus, in quotidianis manuum vixit laboribus. Dein turbatam incursionem Gentilium provinciam videns, & Monasteriis quoque periculum imminere prævidens, dimissis ordinatè omnibus, navigavit Galliam, ibique à Rege Francorum Chlodoveo, vel Patricio Erchenaldo honorificè susceptus, Monasterium construxit in loco Latiniaco nominato, ac non multò post infirmitate correptus, diem clausit ultimum. Cujus corpus idem Erchenaldus Patricius accipiens, servavit in porticu quadam Ecclesiæ, quam in villâ suâ, cui nomen erat *Perryona*, faciebat, donec ipsa Ecclesia dedicaretur.

Quod

Quod dum post dies viginti septem esset factum, & corpus ipsum de porticu ablatum, propter altare esset recondendum, inventum est ita illæsum, ac si eâdem horâ de hac luce fuisset egressus. Sed & post annos quatuor, constructâ domunculâ cultiore receptui corporis ejusdem, ad Orientem altaris adhuc sine maculâ corruptionis inventum, ibidem digno cum honore translatus est; ubi merita illius multis sæpe constat Deo operante claruisse virtutibus. Hæc de corporis ejus incorruptione* breviter attigimus, ut quanta esset viri sublimitas, legentibus notiùs existeret. Quæ cuncta in libello ejus sufficientiùs, & de aliis commilitonibus ipsius, quisquis legerit, inveniet.

CAPUT XX.

Ut defuncto Honorio, Pontificatu sit functus Deusdedit; & in tempore illo Orientalium Anglorum, qui Rhosensis Ecclesiæ fuerint Antistites.

INTEREA defuncto Felice, Orientalium Anglorum Episcopo, post decem & septem annos accepti Episcopatus, Honorius loco ejus ordinavit Thomam Diaconum ejus, de provinciâ Gyrviourum: & post quinque annos sui Episcopatus de hac vitâ subtrahito, Berægilsum, cognomine *Bonifacium*, de provinciâ Cantuariorum, loco ejus substituit. Et ipse quoque Honorius, postquàm metas sui cursûs implevit, migravit ex hac luce anno ab Incarnatione Domini sexcentesimo quinquagesimo tertio, pridie Kalendarum Octobrium: & cessante Episcopatu per annum & sex menses, electus est Archiepiscopus cathedræ Dorovernensis sextus Deusdedit, de gente Occidentalium Saxonum: quem ordinaturus venit illuc *Ithamar*, Antistes Ecclesiæ Rhosensis. Ordinatus est autem die septimo Kalendarum Aprilium, & rexit Ecclesiâ annos novem, menses septem, & duos dies; & ipse, defuncto *Ithamar*, consecravit pro eo Damianum, qui de genere Australium Saxonum erat oriundus.

CAPUT XXI

Ut provincia Mediterraneorum Anglorum sub Rege Pendâ Christiana sit facta.

HI s temporibus *Middilangli*, id est, Mediterranci Angli, sub Principe Pendâ, filio *Pendan* Regis, fidei et sacramenta veritatis perceperunt : qui cum esset juvenis optimus, ac Regis nomine ac personâ dignissimus, prælatus est à patre regno gentis illius ; venitque ad Regem *Nordanhymbrorum Osuin*, postulans filiam ejus *Alhfredam* sibi conjugem dari : neque aliter quod petebat, impetrare potuit, nisi fidem Christi, ac Baptisma, cum gente cui præerat, acciperet. At ille auditâ prædicatione veritatis, & promissione regni celestis, spæque resurrectionis, ac futuræ immortalitatis, libenter se Christianum fieri velle confessus est, etiam si virginem non acciperet : persuasus maximè ad percipiendam fidem à filio Regis *Osuin*, nomine *Alchfrido*, qui erat amicus & cognatus ejus, habens sororem ejus conjugem, vocabulo *Cyniburgam*, filiam *Pendan* Regis. Baptizatus est ergo à *Finano* Episcopo, cum omnibus qui secum venerant Comitibus ac militibus, eorûmque famulis universis, in vico Regis inlustri, qui vocatur *Admurum*. Et acceptis quatuor Presbyteris, qui ad docendam baptizandamque gentem illius, & eruditione & vitâ videbantur idonei, multo cum gaudio reversus est. Erant autem Presbyteri *Cedda* & *Adda*, & *Betti*, & *Diuma*, quorum ultimus natione Scottus, cæteri fuere de Anglis. *Adda* autem erat frater *Isttan*, Presbyteri inlustri, & Abbatis Monasterii quod vocatur *Ad Capræ caput*, cujus supra meminimus. Venientes igitur in provinciam memorati Sacerdotes cum Principe, prædabant verbum, & libenter auditi sunt, multique quotidie & nobilium & infimorum, abrenunciata torde idolatriæ, fidei sunt fonte abluti. Nec prohibuit *Penda* Rex, quin etiam in suâ, hoc est, Merciorum natione, verbum (si qui vellent audire) prædicaretur. Quin potius odio habebat, & despi-

ciebat eos, quos fide Christi imbutos, opera fidei non habere deprehendit, dicens contemnendos & miseros esse eos, qui Deo suo in quem crederent, obedire contemnerent. Cœpta sunt hæc biennio ante mortem Pendæ Regis. Ipso autem occiso, cum *Oswin* Rex Christianus regnum ejus acciperet, (ut in sequentibus dicemus) factus est *Diuna* unus ex præfatis quatuor Sacerdotibus, Episcopus Mediterraneo-rum Anglorum simul & Merciorum, ordinatus à Finano Episcopo. Paucitas enim Sacerdotum cogebat unum Antistitem duobus populis præfici. Qui cum paucis sub tempore non paucam Domino plebem adquisisset, defunctus est apud Mediterraneos Anglos, in regione quæ vocatur *Insebbingum* : suscepitque pro illo Episcopatum *Ceallach*, & ipse de natione Scottorum, qui non multò post, Episcopatu relicto, reversus est ad insulam *Hii*, ubi plurimorum caput & arcem Scotti habuere Cœnobiorum : succedente illi in Episcopatum *Trumhere* viro religioso, & monachicâ vitâ instituto, natione quidem Anglo, sed à Scottis ordinato Episcopo; quod temporibus Vulfheri Regis (de quo in sequentibus dicemus) factum est.

CAPUT XXII.

Ut Orientales Saxones fidem quam dudum abjecerant, sub Rege Sigbercto, prædicante Ceddo receperint.

Eo tempore etiam Orientales Saxones fidem quam olim expulso Mellito Antistite abjecerant, instantiâ Regis *Oswin* receperunt. Erat enim Rex ejusdem gentis *Sigberct*, qui post Sigberctum cognomento Parvum regnavit, amicus ejusdem *Oswin* Regis, qui cum frequenter ad eum in provinciam Nordanhymbrorum veniret, solebat eum hortari ad intellegendum Deos esse non posse qui hominum manibus facti essent; Deû creandi materiam lignum vel lapidem esse non posse, quorum recisuræ vel igni absumerentur, vel in vasa quælibet humani usus formarentur, vel certè conspectui habita foras projicerentur, & pedibus

conculcata in terram vetterentur. Deum potius intellegendum majestate incomprehensibilem, humanis oculis invisibilem, omnipotentem, æternum, qui cælum & terram & humanum genus creasset, regeret, & judicaturus esset orbem in æquitate; cujus sedes æterna non in vili & caduco metallo, sed in cælis esset credenda: meritoque intellegendum, quia omnes qui voluntatem ejus, à quo creati sunt, discerent & facerent, æterna ab illo præmia essent percepturi. Hæc & hujusmodi multa cum Rex *Oswin* Regi Sigbercto amicabili & quasi fraterno consilio sæpe inculcaret, tandem juvante amicorum consensu credidit, & facto cum suis consilio, cum exhortatione, faventibus cunctis, & advenientibus fidei, baptizatus est cum eis à Finano Episcopo in villâ regiâ, cujus suprà meminimus, quæ cognominatur *Admurrum*. Est enim juxta murum, quo olim Romani Britanniam insulam præinxere, duodecim millibus passuum à mari Orientali secreta. Igitur Rex *Sigbert* æterni regni jam civis effectus, temporalis sui regni sedem petiit, postulans ab *Oswin* Rege, ut aliquos sibi Doctores daret, qui gentem suam ad fidem Christi converterent, ac fonte salutari abluerent. At ille mittens ad provinciam Mediterraneorum Anglorum, clamavit ad se virum Dei *Cedd*, & dato illi socio altero quodam Presbytero, misit prædicare verbum genti Orientalium Saxonum. Ubi cum omnia perambulantes, multam Domino Ecclesiam congregassent, contigit quodam tempore eundem *Cedd* redire domum, ac pervenire ad Ecclesiam Lindisfarnensem, propter colloquium Finani Episcopi, qui ubi prosperatum ei opus Evangelii comperit, fecit eum Episcopum in gentem Orientalium Saxonum, vocatis ad se in ministerium ordinationis aliis duobus Episcopis: qui accepto gradu Episcopatus, rediit ad provinciam, & majori auctoritate cæptum opus explens, fecit per loca Ecclesias, Presbyteros & Diaconos ordinavit, qui se in verbo fidei & ministerio baptizandi adjuvarent, maximè in civitate quæ linguâ Saxonum *Isthancestir* appellatur. Sed & in illâ quæ *Tilaburg* cognominatur: quorum prior locus est in ripâ *Pente* amnis, secundus in ripâ *Tamen*sis: in quibus collecto examine famulorum Christi, disci-

plinam vitæ regularis, in quantum rudes adhuc capere poterant, custodite docuit. Cùmque tempore non paucò in prælatâ provinciâ gaudente Rege, congaudente universo populo, vitæ celestis institutio quotidianum fumeret augmentum, contigit ipsum Regem instigante omnium honorum inimico, propinquorum suorum manu interfici. Erant autem duo germani fratres, qui hoc facinus patiarunt, qui cùm interrogarentur quare hoc fecerint, nihil aliud respondere potuerunt, nisi ob hoc se iratos fuisse & inimicos Regi, quòd ille nimirum suis parcere soleset inimicis, & factas ab eis injurias mox obsecrantibus placidâ mente dimitteret. Talis erat culpa Regis, pro quâ occideretur, quòd Evangelica præcepta devoto corde servaret: in quâ tamen ejus morte innoxia juxta prædictum viri Dei, vera est ejus culpa punita. Habuerat enim unus ex his qui eum occiderunt Comitibus, inlicitum conjugium, quod cùm Episcopus prohibere & corrigere non posset, excommunicavit eum, atque omnibus qui se audire vellent, præcepit, ne domum ejus intrarent, neque de cibis illius acciperent. Contempsit autem hoc Rex præceptum, & rogatus à Comite, intravit epulaturus domum ejus: qui cùm abiisset, obviavit ei Antistes. At Rex intuens eum mox tremefactus desiluit de equo, ceciditque ante pedes ejus, veniam reatûs postulans. Nam & Episcopus pariter desiluit: sederat enim & ipse in equo. Iratus autem tetigit Regem jacentem virgâ quam tenebat manu, & Pontificali auctoritate protestans: Dico tibi, inquit, quia noluisti te continere à domo perdiri & damnati illius, tu in ipsâ domo mori habes. Sed credendum est quia talis mors viri religiosi, non solum talem culpam diluerit, sed etiam meritum ejus auxerit: quia nimirum ob causam pietatis, quia propter observantiam mandatorum Christi contigit. Successit autem Sigbercto in regnum Suidhelmus, filius Sexhaldi, qui baptizatus est ab ipso *Cedde* in provincia Orientalium Anglorum, in vico regio qui dicitur *Rendlesham*, id est, *Mansio Rendili*; suscepitque eum ascendentem de fonte sancto Edilvaldus Rex ipsius gentis Orientalium Anglorum, frater Annæ Regis eorundem.

CAPUT XXIII.

Ut idem Episcopus Cedd locum Monasterii construendi ab Oidilvaldo Rege accipiens, orationibus ac jejuniis Domino consecraverit; & de obitu ipsius.

SOLEBAT autem idem vir Domini, cum apud Orientales Saxones Episcopus officio fungeretur, sæpius etiam suam, id est, Nordanthymbrorum provinciam exhortandi gratiâ revivere: quem cum Oidilvaldus filius Osualdi Regis, qui in Deirorum partibus regnum habebat, virum sanctum & sapientem, probumque moribus videret, postulavit eum possessionem terræ aliquam à se ad construendum Monasterium accipere, in quo ipse Rex & frequentius ad deprecandum Dominum, verbumque audiendum advenire, & defunctus sepeliri deberet. Nam & seipsum fideliter credidit multum juvari eorum orationibus quotidianis, qui illo in loco Domino servirent. Habuerat autem idem Rex secum fratrem germanum ejusdem Episcopi, vocabulo *Celim*, virum æquè Deo devotum, qui & ipsi & familiæ ipsius verbum & sacramenta fidei (erat enim Presbyter) ministrare solebat, per cujus noticiam maximè ad diligendum noscendumque Episcopum pervenit. Favens ergo votis Regis Antistes, elegit sibi locum Monasterii construendi in montibus arduis ac remotis, in quibus latronum magis latibula, ac lustra ferarum, quàm habitacula fuisse videbantur hominum: ut juxta prophetiam Isaïæ, in cubilibus, in quibus prius dracones habitabant, oriretur viror calami & junci, id est, fructus bonorum operum ibi nascerentur, ubi prius vel bestię commorari, vel homines bestialiter vivere consueverant. Studens autem vir Domini acceptum Monasterii locum primò precibus ac jejuniis à pristina flagitiorum sorde purgare, & sic in eo Monasterii fundamenta jacere, postulavit à Rege, ut sibi totum Quadragesimæ tempus quod instabat, facultatem ac licentiam ibidem orationis causâ demorandi concederet. Quibus die-

bus cunctis, exceptâ Dominicâ, jejunium ad vesperam usque juxta morem protelans, ne tunc quidem nisi panis permodicum, & unum ovum gallinaceum cum parvo lacte aquâ mixto percipiebat. Dicebat enim hanc esse consuetudinem eorum, à quibus normam disciplinæ regularis didicerat, ut accepta nuper loca ad faciendum Monasterium vel Ecclesiam, prius orationibus ac jejniis Domino consecrent. Cùmque decem dies Quadragesimæ restarent, venit qui clamaret eum ad Regem. At ille, ne opus religiosum negotiorum regalium causâ intermitteretur, petiit Presbyterum suum Cynibillum, qui etiam frater germanus erat ipsius, pia cœpta complere. Cui cum ille libenter adquiesceret, expleto studio jejuniorum & orationis, fecit ibi Monasterium, quod nunc *Leffingaen* vocatur, & religiosi moribus, juxta ritum Lindisfarnensium, ubi educatus erat, instituit. Qui cùm annis multis in præfatâ provinciâ Episcopatum administraret, & hujus quoque Monasterii statutis propositis curam gereret, casu contigit ut ad ipsum Monasterium tempore mortalitatis adveniens, tactus ibidem infirmitate corporis, obiret: qui primò quidem foris sepultus est; tempore autem procedente, in Monasterio Ecclesia est in honorem beatæ Dei Genitricis de lapide facta, & in illâ corpus ipsius ad dexteram altaris reconditum. Dedit autem Episcopus regendum post se Monasterium fratri suo *Ceadda*, qui postea Episcopus factus est, ut in sequentibus dicemus. Quatuor siquidem hi quos diximus, germani fratres, *Cedd* & *Cenibil* & *Celin* & *Ceadda*, (quod rarò invenitur) omnes Sacerdotes Domini fuere præclari, & duo ex eis etiam summi Sacerdotii gradu functi sunt. Cùm ergo Episcopum defunctum ac sepultum in provinciâ Nordanhymbrorum audissent fratres qui in Monasterio ejus erant in provinciâ Orientalium Saxonum, venerunt illò de suo Monasterio homines circiter triginta, cupientes ad corpus sui Patris, aut vivere, (si sic Deo placeret) aut morientes ibi sepeliri: qui libenter à suis fratribus & commilitonibus suscepti, omnes ibidem superveniente præfata pestilentia clade defuncti sunt, excepto uno puerulo, quem orationibus Patris sui à morte constat esse servatum. Nam cùm multo post hæc tempore viveret, & Scri-

pturis legendis operam daret, tandem didicit se aquâ Baptismatis non esse regeneratum, & mox fonte lavacris salutaris ablutus, etiam postmodum ad ordinem Presbyterii promotus est, multisque in Ecclesiâ utilis fuit: de quo dubitandum non crediderim, quin intercessionibus (ut dixi) sui Patris, ad cuius corpus dilectionis ipsius gratiâ venerat, sic ab articulo mortis retentus, ut & ipse sic mortem evaderet æternam, & aliis quoque fratribus ministerium vitæ ac salutis docendo exhiberet.

CAPUT XXIV.

ut provincia Merciorum, occiso Rege Pendâ, fidem Christi suscepit: & Osuii pro adeptâ victoriâ, possessiones & territoria ad construenda Monasteria dederit.

His temporibus Rex *Osuii* cum acerbas & intolerabiles pateretur inruptiones sæpediti Regis Merciorum, qui fratrem ejus occiderat, ad ultimum necessitate cogente promisit, se ei innumera & majora quàm credi potest, ornamenta regia vel donaria in pretium pacis largiturum, dummodò ille domum rediret, & provincias regni ejus usque ad internecionem vastare desineret. Cumque Rex perfidus nullatenus precibus illius assensum præberet, qui totam ejus gentem à parvo usque ad magnum delere atque exterminare decreverat, respexit ille ad divinæ auxilium pietatis, quo ab impietate barbaricâ posset eripi: votoque se obligans: Si paganus, inquit, nescit accipere nostra donaria, offeramus ei qui novit, Domino Deo nostro. Vivit ergo quoddam si victor existeret, filiam suam Domino sacrâ virginitate sacrandam offerret; simul & duodecim possessiones prædiorum ad construenda Monasteria donaret: & sic cum paucissimo exercitu se certamini dedit. Denique fertur quoddam tricies majorem pagani habuerint exercitum; siquidem ipsi triginta legiones Ducibus nobilissimis instructas in bello habuere, quibus *Osuii* Rex cum Alchfrido filio, perparvum (ut dixi) habens exercitum, sed Christo
duce

duce confusus occurrit. Nam alius filius ejus *Eggfrid* eo tempore in provinciâ Merciorum apud Reginam *Cynwif* obses tenebatur. Filius autem *Osualdi* Regis *Oidilwald*, qui eis auxilio esse debuerat, in parte erat adversariorum, eisdemque contra patriam & patruum suum pugnaturus ductor exstiterat, quamvis ipso tempore pugnandi sese pugne subtraxerat, eventumque discriminis tuto in loco expectabat. Inito ergo certamine fugati sunt & cæsi pagani, Duces regii triginta, & qui ad auxilium venerant, penè omnes interfecti: in quibus *Edilberi* frater *Annæ* Regis Orientalium Anglorum, qui post eum regnavit, auctor ipse belli, perditis militibus sive auxiliis interemptus est: & quia prope fluvium *Vinnæd* pugnatum est, qui tunc præ inundantiâ pluviarum, latè alveum suum, immò omnes ripas suas transierat, contigit ut multò plures aqua fugièntes, quàm bellantes perderet ensis. Tunc Rex *Osui*, juxta quod Domino voverat, pro collatâ sibi victoriâ gratias Deo referens, dedit filiam suam *Elfredam*, quæ vixdum unius anni ætatem impleverat, perpetuâ ei virginitate consecrandam: donatis insuper duodecim possessiunculis terrarum, in quibus ablato studio militiæ terrestreis, ad exercendam militiam cælestem, supplicandumque pro pace gentis ejus, æternâ devotione sedulè Monachorum locus facultasque suppeteret: è quibus videlicet possessiunculis, sex in provinciâ Deiorum, sex in Bernicionum dedit. Singulæ verò possessiones, decem erant familiarum, id est, simul omnes centum viginti. Intravit autem præfata *Osui* filia Deo dicanda Monasterium quod nuncupatur *Heruteu*, id est, *Insula cervi*, cui tunc *Hild* Abbatissa præfuit: quæ post biennium comparatâ possessione decem familiarum in loco qui dicitur *Streaneshalch*, ibi Monasterium construxit; in quo memotatâ Regis filia, primò discipula vitæ regularis, deinde etiam magistra exstitit, donec completo undecexaginta annorum numero, ad complexum & nuptias sponsi cælestis virgo beata intraret. In quo Monasterio & ipsa, & pater ejus *Osui*, & mater ejus *Eanfred*, & pater matris ejus *Eduinus*, & multi alii nobiles in Ecclesiâ sancti Petri Apostoli sepulti sunt. Hoc autem bellum Rex *Osui* in regione *Loidis*, tertio decimo regni sui anno, de-

cimo septimo die Kalendarum Decembrium cum magnâ utriusque populi utilitate confecit. Nam & suam gentem ab hostili paganorum depopulatione liberavit, & ipsam gentem Merciorum, finitimarumque provinciarum, defecto capite perfido, ad fidei Christianæ gratiam convertit. Primus autem in provinciâ Merciorum, simul & Lindisfarorum ac Mediterraneorum Anglorum, factus est Episcopus *Diuma*, (ut suprâ diximus) qui apud mediterraneos Anglos defunctus ac sepultus est: secundus *Cellach*, qui relicto Episcopatus officio vivens ad Scottiam rediit, uterque de genere Scottorum: tertius *Trumberi*, de natione quidem Anglorum, sed doctus & ordinatus à Scottis, qui erat Abbas in Monasterio quod dicitur *Ingethlingum*. ipse est locus in quo occisus est Rex *Osuim*, ut suprâ meminimus. Nam Regina *Eanfled* propinqua illius, ob castigationem necis ejus injustæ, postulavit à Rege *Osu*, ut donaret ibi locum Monasterium construendi præfato Dei famulo *Trumberi*, quia propinquus & ipse erat Regis occisi: in quo videlicet Monasterio orationes assiduas pro utriusque Regis, id est, & occisi, & ejus qui occidere jussit, æternâ salute fierent. Idem autem Rex *Osu* tribus annis post occisionem *Pendan* Regis, Merciorum genti, necnon & cæteris Australium provinciarum populis præfuit: qui etiam gentem Pictorum maximâ ex parte regno Anglorum subjecit. Quo tempore donavit præfato *Peada*, filio Regis *Penda*, eo quod esset cognatus suus, regnum Australium Merciorum, qui sunt (ut dicunt) familiarum quinque millium, discreti fluvio *Trenta* ab Aquilonaribus Mercis, quorum terra est familiarum septem millium. Sed idem *Peada* proximo vere multum nefariè peremptus est, proditioe (ut dicunt) conjugis suæ, in ipso tempore festi Paschalis. Completis autem tribus annis post interfectionem *Pendan* Regis, rebellaverunt adversus Regem *Osu* Duces gentis Merciorum *Immin*, & *Eafha*, & *Eadbert*, levato in Regem *Wlfhere*, filio ejusdem *Penda* adolescente, quem oculum servaverant; & ejectis Principibus Regis non proprii fines suos fortiter simul & libertatem receperunt: sicque cum suo Rege liberi, Christo vero Regi pro sempiterno in calis regno servire gaudebant. Præfuit autem idem

Rex genti Merciorum annis decem & septem, habuitque primum Episcopum *Trumheri*, de quo suprà diximus, secundum *Jaruman*, tertium *Ceaddan*, quartum *Winfriidum*. Omnes hi per ordinem sibimet succedentes sub Rege *Wlfhere*, gentis Merciorum Episcopatu sunt functi.

CAPUT XXV.

Ut questio sit mota de tempore Paschæ, adversus eos qui de Scottiâ venerant.

INTEREA Aidano Episcopo de hac vitâ sublato, *Finan* pro illo gradum Episcopatus, à Scottis ordinatus ac missus acceperat: qui in insulâ Lindisfarnensi fecit Ecclesiam Episcopali sedi congruam: quam tamen more Scottorum, non de lapide, sed de robore secto totam composuit, atque arundine texit, quam tempore sequenti reverentissimus Archiepiscopus Theodorus in honorem beati Petri Apostoli dedicavit. Sed Episcopus loci illius *Eadberct* ablata arundine, plumbi laminis eam totam, hoc est, & tectum & ipsos quoque parietes ejus cooperire curavit. His temporibus questio facta est frequens & magna, de observatione Paschæ, confirmandis eis qui de Cantia, vel de Galliis advenerant, quòd Scotti Dominicum Paschæ diem contra universalis Ecclesiæ morem celebrarent. Erat in his acerrimus veri Paschæ defensor, nomine *Ronan*, natione quidem Scottus, sed in Gallia vel Italia partibus regulam Ecclesiasticæ veritatis edoctus, qui cum Finano confliens, multos quidem correxit, vel ad solerttorem veritatis inquisitionem accendit: nequaquam tamen Finanum emendare potuit. quin potius, quòd esset homo ferocis animi, acerbiorum castigando, & apertum veritatis adversarium reddidit. Observabat autem Jacob Diaconus quondam (ut suprà docuimus) venerabilis Archiepiscopi Paulini, verum & Catholicum Pascha, cum omnibus quos ad correptiorem viam erudire potuerat. Observabat & Regina *Eanfred* cum suis, juxta quod in Cantia fieri viderat, habens secum de Cantia Presbyterum Catholicæ

observationis, nomine *Romanum*: unde nonnunquam contigisse fertur illis temporibus, ut bis in anno uno Pascha celebraretur. Et cum Rex Pascha Dominicum solus jejuniis faceret, tunc Regina cum suis persistens adhuc in jejunio diem Palmarum celebraret. Hæc autem dissonantia Paschalis observantiæ vivente Aidano patenter ab omnibus tolerabatur, qui patienter intellexerant, quia etsi Pascha contra morem eorum qui ipsum miserant, facere non potuit, opera tamen fidei, pietatis & dilectionis, juxta morem omnibus Sanctis consuetum, diligenter exsequi curavit: unde ab omnibus etiam his qui de Paschâ aliter sentiebant, meritò diligebatur: nec solum à mediocribus, verum ab ipsis quoque Episcopis, Honorio Cantuariorum, & Felice Orientalium Anglorum, venerationi habitus est. Defuncto autem Finano qui post illum fuit, cum Colmanus in Episcopatum succederet, & ipse missus à Scottiâ, gravior de observatione Paschæ, necnon & de aliis Ecclesiasticæ vitæ disciplinis controversia nata est: unde meritò movit hæc quæstio sensus & corda multorum, timentium ne fortè accepto Christianitatis vocabulo, in vacuum current, aut cucurrissent. Pervenit & ad ipsas Principum aures, *Osui* videlicet Regis, & filii ejus Alchfridi: qui nimirum *Osui* à Scottis edoctus ac baptizatus, illorum etiam linguâ optimè imbutus nihil melius quàm quod illi docuissent autumabat. Potrò *Alchfrid* magistrum habens eruditionis Christianæ Vilfridum virum doctissimum: (nam & Romam priùs propter doctrinam Ecclesiasticam adierat, & apud Dalphinum Archiepiscopum Galliarum Lugduni multum temporis egerat, à quo etiam tonsuræ Ecclesiasticæ coronam susceperat) hujus doctrinam omnibus Scottorum traditionibus jure præferendam sciebat: unde etiam ei donaverat Monasterium quadraginta familiarum in loco qui dicitur *Inbrypum*; quem videlicet locum paulò antè eis qui Scottos sequebantur, in possessionem Monasterii dederat. Sed quia illi postmodum datâ sibi optione, magis loco cedere quàm suam mutare consuetudinem volebant, dedit eum illi qui dignam loco & doctrinam haberet, & vitam. Venerat eo tempore Agilbertus, Occidentalium Saxonum Episcopus, cujus supra meminimus, amicus Alchfridi Regis, & Vulfridi

Abbatis, ad provinciam Nordanhymbrorum, & apud eos aliquandiu demorabatur; qui etiam Vulfridum, rogatu Alchfridi, in præfato suo Monasterio Presbyterum fecit. Habebat autem secum ipse Presbyterum nomine *Agathonem*. Motâ ergo ibi quæstione de Paschâ, vel tonsurâ, vel aliis rebus Ecclesiasticis, dispositum est ut in Monasterio, quod dicitur *Strengthen*, quod interpretatur *Sinus fari*, cû tunc *Hild* Abbatissa Deo devota femina præfuit, Synodus fieri, & hæc quæstio terminari deberet. Venerûntque illd Rêges ambo, pater scilicet & filius; Episcopi *Colman* cum Clericis suis de Scottiâ, Agilbertus cum Agathone & Vilfrido Presbyteris. Jacobus & Romanus in horum parte erant: *Hild* Abbatissa cum suis in parte Scottorum, in quâ erat etiam venerabilis Episcopus *Cedd*, jamdudum ordinatus à Scottis, ut suprâ docuimus, qui & interpres in eo Concilio vigilantissimus utriusque partis exstitit. Primûsque Rex *Oswi* præmissâ præfatione, quod oporteret eos qui uni Deo servirent, unam vivendi regulam tenere, nec discrepare in celebratione Sacramentorum cælestium, qui unum omnes in cælis regnum expectarent; inquirendum potiùs quæ esset verior traditio, & hanc ab omnibus communiter esse sequendam: jussit p̄firmò dicere Episcopum suum Colmanum, qui esset ritus, & unde originem ducens ille quem ipse sequeretur. Tunc Colmanus: Pascha, inquit, hoc quod agere soleo, à majoribus meis accepi, qui me huc Episcopum miserunt, quod omnes Patres nostri, viri Deo dilecti, eodem modo celebrasse noscuntur. Quod ne cui contemnendum & reprobandum esse videatur, ipsum est quod beatus Evangelista Johannes discipulus specialiter Domino dilectus, cum omnibus quibus præerat Ecclesiis, celebrasse legitur. Quo hæc & his similia dicente, jussit Rex & Agilbertus proferre in medium morem suæ observationis, unde initium haberet, vel quâ hunc auctoritate sequeretur. Respondit Agilbertus: Loquatur, obsecro, vice meâ discipulus meus *Vilfrid* Presbyter, quia unum ambo sapimus, cum cæteris qui hic adsident, Ecclesiasticæ traditionis cultoribus; & ille meliùs ac manifestiùs ipsâ linguâ Anglorum, quàm ego per interpretem, potest explanare quæ sentimus. Tunc *Vilfrid* jubente Rege ut di-

ceter, ita exorsus est: Pascha quod facimus, inquit, vidimus Romæ, ubi beati Apostoli Petrus & Paulus vixere, docuere, passi sunt & sepulti, ab omnibus celebrari: hoc in Italiâ, hoc in Galliâ, quas discendi vel orandi studio pertransivimus, ab omnibus agi conspeximus: hoc Africam, Asiam, Ægyptum, Græciam, & omnem orbem, quacumque Christi Ecclesia diffusa est, per diversas nationes ac linguas, uno ac non diverso temporis ordine geri comperimus: præter hos tantum, & obstinationis eorum complices, (Pictos dico & Brittones) cum quibus de duabus ultimis Oceani insulis, & his non totis, contra totum orbem stulto labore pugnant. Cui hæc dicenti respondit Colmanus: Mirum quare stultum appellare velitis laborem nostrum, in quo tanti Apostoli qui super pectus Domini recumbere dignus fuit, exempla sectamur; cum ipsum sapientissimè vixisse omnis mundus noverit. At Vilfridus: Absit, inquit, ut Johannem stultitiæ reprehendamus, cum scita legis Mosaicæ juxta litteram servaret, judaizante adhuc in multis Ecclesiâ, nec subito valentibus Apostolis omnem legis observantiam, quæ à Deo instituta est, abdicare. Quomodo simulacra quæ à demonibus inventa sunt, repudiare omnes qui ad fidem veniunt, necesse est: videlicet ne scandalum facerent eis qui inter gentes erant Judæis. Hinc est enim quod Paulus Timotheum circumcidit, quod hostias in templo immolavit, quod cum Aquilâ & Priscillâ caput Corinthi torondit: ad nihil videlicet utile, nisi ad scandalum vitandum Judæorum. Hinc quod eidem Paulo Jacobus ait: Vides, frater, quot millia sunt in Judæis, qui crediderunt? & omnes hi æmulatores sunt legis. Nec tamen hodie clarescente per mundum Evangelio necesse est, immò nec licitum fidelibus, vel circumcidi, vel hostias Deo victimarum offerre carnalium. Itaque Johannes secundum legis consuetudinem decimâ quartâ die mensis primi, ad vespèram, incipiebat celebrationem festi Paschalis, nihil curans utrùm hæc Sabbato, an aliâ quâlibet feriâ proveniret. At verò Petrus cum Romæ prædicaret, memor quia Dominus primâ Sabbati resurrexit à mortuis, ac mundo spem resurrectionis contulit, ita Pascha faciendum intellexit, ut secundum consuetudinem ac præcepta le-

gis, decimam quartam Lunam primi mensis, æquè sicut Johannes Orientem ad vesperam semper exspectaret: & hac exortâ, si Dominica dies (quæ tunc prima Sabbati vocabatur) erat manè ventura: in ipsâ vesperâ Pascha Dominicum celebrare incipiebat, quomodo & nos hodie facere solemus. Sin autem Dominica non proximo manè post Lunam decimam quartam, sed sextâ decimâ, aut septimâdecimâ, aut aliâ quâlibet Lunâ, usque ad vicesimam primam esset ventura, exspectabat eum, & præcedente Sabbato, vespere, sacrosancta Paschæ sollemnia inchoabat; sicque fiebat, ut Dominica Paschæ dies nonnisi à quintâ decimâ Lunâ usque ad vicesimam primam servaretur. Neque hæc Evangelica & Apostolica traditio legem solvit, sed potiùs adimplet, in quâ observandum Pascha à quartâ decimâ Lunâ primi mensis ad vesperam, usque ad vicesimam primam Lunam ejusdem mensis ad vesperam, præceptum est: in quam observantiam imitandam, omnes beati Johannis successores in Asiâ post obitum ejus, & omnis per orbem Ecclesiâ conversa est. Et hoc esse verum Pascha, hoc solum fidelibus celebrandum, Nicæno Concilio non statutum noviter, sed confirmatum est, ut Ecclesiastica docet Hystoria. Unde constat vos (Colmane) neque Johannis (ut autumatis) exempla sectari, neque Petri, cujus traditioni scientes contradicitis, neque legi, neque Evangelio in observatione vestri Paschæ congruere. Johannes enim ad legis Mosaicæ decreta tempus Paschale custodiens, nil de primâ Sabbati curabat; quod vos non facitis, qui nonnisi primâ Sabbati Pascha celebratis. Petrus à decimâ quintâ lunâ usque ad vicesimam primam diem Paschæ Dominicum celebrabat; quod vos non facitis, qui à decimâ quartâ usque ad vicesimam Lunam diem Dominicum Paschæ observatis: itaut tertia decimâ Lunâ ad vesperam sæpius Pascha incipiatis, cujus neque Lex ullam fecit mentionem, neque auctor ac dator Evangelii Dominus in eâ, sed in quartâ decimâ Lunâ vel vetus Pascha manducavit ad vesperam, vel novi Testamenti sacramenta in commemorationem suæ passionis, Ecclesiæ celebranda tradidit. Item, Lunam vicesimam primam, quam Lex maxime celebrandam commendavit, à celebratione vestri Paschæ funditùs eliminatis:

ficque (ut dixi) in celebratione summæ festivitatis, neque Johanni, neque Petro, neque Legi, neque Evangelio concordatis. His contrà Colmanus : Numquid, ait, Anatolius vir sanctus, & in præfatâ Historiâ Ecclesiasticâ multùm laudatus, Legi vel Evangelio contraria sapuit, qui à quartâ decimâ usque ad vicesimam Pascha celebrandum scripsit? Numquid reverentissimum Patrem nostrum *Columban*, & successores ejus viros Deo dilectos, qui eodem modo Pascha fecerunt, divinis paginis contraria sapuisse, vel egisse credendum est? cùm plurimi fuerint in eis, quorum sanctitati cælestia signa, & virtutum quæ fecerunt miracula, testimonium præbuerunt : quos ipse sanctos esse non dubitans, semper eorum vitam, mores & disciplinam sequi non desisto. At Vilfridus : Constat, inquit, Anatolium virum sanctissimum, doctissimum, ac laude esse dignissimum; sed quid vobis cum illo, cùm nec ejus decreta serveris? Ille enim in Pascha suo regulam utique veritatis sequens, circulum novemdecim annorum posuit, quem vos aut ignoratis, aut agnitum & à totâ Christi Ecclesiâ custoditum, pro nihilo contemnitis. Ille sic in Paschâ Dominico decimam quartam Lunam computavit, ut hanc eadem ipsâ die more Ægyptiorum decimam quintam Lunam ad vesperam esse fateretur. Sic idem vicesimam diem Dominico Paschæ adnotavit, ut hanc declinatâ eadem die esse vicesimam primam crederet. Cujus regulam distinctionis vos ignorasse probat, quòd aliquoties Pascha manifestissimè ante plenilunium, id est, in tertiâ decimâ Lunâ facitis. De Patre autem vestro *Columba*, & sequacibus ejus, quorum sanctitatem vos imitari, & regulam ac præcepta cælestibus signis confirmata sequi perhibetis, possum respondere; quia multis in judicio dicentibus Domino, quòd in nomine ejus prophetaverint, & dæmonia ejecerint, & virtutes multas fecerint; responsurus sit Dominus quia nunquam eos noverit. Sed absit ut de Patribus vestris hoc dicam: quia justius multò est, de incognitis bonum credere, quàm malum. Unde & illos Dei famulos, ac Deo dilectos esse non nego, qui simplicitate rusticâ, sed intentione piâ Deum dilexerunt. Neque illis multùm obesse reor talem Paschæ observantiam, quandiu nullus advenerat, qui

qui eis instituti perfectioris decreta quæ sequerentur, ostenderet : quos utique credo , si qui tunc ad eos Catholicus calculator adveniret, sic ejus monita fuisse secuturos, quomodò ea quæ noverant ac didicerant, Dei mandata probantur fuisse securi. Tu autem & socii tui, si audita decreta Sedis Apostolicæ, immò universalis Ecclesiæ, & hæc litteris sacris confirmata sequi contemnitis, absque ullâ dubietate peccatis. Etsi enim patres tui sancti fuerunt, nunquid universali quæ per orbem est Christi Ecclesiæ, horum est paucitas uno de angulo extremæ insulæ præferenda. Et si sanctus erat ac potens virtutibus ille Columba vester, (immò & noster, si Christi erat) numquid præferri potuit beatissimo Apostolorum Principi, cui Dominus ait : Tu es Petrus, & super hanc petram ædificabo Ecclesiam meam ; & portæ inferi non prævalebunt adversus eam ; & tibi dabo claves regni cælorum. Hæc perorante Vilfrido, dixit Rex : Veréne (Colmane) hæc illi Petro dicta sunt à Domino ? Qui ait : Verè, Rex. At ille, Habetis, inquit, vos proferre aliquid tantæ potestatis vestro Columbæ datum ? At ille ait : Nihil. Rursus autem Rex : Si utrique vestrûm, inquit, in hoc sine ullâ controversia consentiunt, quòd principaliter hæc Petro dicta, & ei claves regni cælorum sint datæ à Domino ? Responderunt : Etiam, utrique. At ille ita conclusit : Et ego vobis dico, quia hic est ostiarius ille cui ego contradicere nolo ; sed in quantum novi vel valeo, hujus cupio in omnibus obedire statutis ; ne forrè me adveniente ad fores regni cælorum, non sit qui referet, averso illo qui claves tenere probatur. Hæc dicente Rege, faverunt adfidentes quique, sive adstantes majores unà cum mediocribus ; & abdicatâ minùs perfectâ institutione, ad ea quæ meliora cognoverant, sese transferre festinabant.



CAPUT XXVI.

*Ut Colman victus domum redierit; & Tuda pro illo Episcopatu
sit functus: qualisque illis Doctoribus fuerit
habitus Ecclesiæ.*

FINITOQUE consilio, ac solutâ concione, Agilbertus domum rediit. *Colman* videns spretam suam doctrinam, sectamque esse despectam, adsumptis his qui se sequi voluerunt, id est, qui Pascha Catholicum, & tonsuram coronæ (nam & de hoc quæstio non minima erat) recipere volebant, in Scotiam regressus est, tractaturus cum suis, quid de his facere deberet. *Cedd*, relictis Scottorum vestigiis, ad suam sedem rediit, utpote agnitâ observatione Catholici Paschæ. Facta est autem hæc quæstio anno Dominicæ Incarnationis sexcentesimo sexagesimo quarto, qui fuit annus *Osui* Regis vicessimus secundus; Episcopatus autem Scottorum, quem gesserunt in provinciâ Anglorum, annus tricessimus. Siquidem *Aidan* decem & septem annis, *Finan* decem, *Colman* tribus Episcopatum tenuere. Reverso autem in patriam *Colmano*, suscepit pro illo Episcopatum *Nordanhymbrorum* famulus Christi *Tuda*, qui erat apud Scottos Austinos eruditus, atque ordinatus Episcopus, habens juxta morem provinciæ illius coronam tonsuræ Ecclesiasticæ, & Catholicam temporis Paschalis regulam observans: vir quidem bonus ac religiosus, sed permodico tempore Ecclesiam regens. Venerat enim de Scottiâ, tenente adhuc Pontificatum *Colmano*, & diligenter ea quæ ad fidem & veritatem pertinent, & verbo cunctos docebat & opere. Porro Fratribus, qui in *Lindisfarnensi* Ecclesiâ, Scottis abeuntibus, remanere maluerunt, prapositus est Abbatibus jure reverentissimus ac mansuetissimus *Eata*, qui erat Abbas in Monasterio quod vocatur *Mailros*: quod aiunt *Colmanum* abeuntem petiisse & impetrasse à Rege *Osuiu*, eò quòd esset idem *Eata* unus de duodecim pueris *Aidani*, quos primo Episcopatus sui tempore de natione Anglorum erudiendos in Christo

accepit. Multum namque eundem Episcopum Colmanum Rex pro insitâ illi prudentiâ diligebat. Ipse est *Eata*, qui non multo post eidem Ecclesiæ Lindisfarnensi Episcopus factus est. Abiens autem domum *Colman* assumpsit secum partem ossium reverentissimi Patris Aidani; partem verò in Ecclesiâ cui præerat, reliquit, & in secretario ejus condi præcepit. Quantæ autem parcimonix, cujusque continentix fuerit, ipse cum prædecessoribus suis, testabatur etiam locus ille quem regebat, ubi abeuntibus eis, exceptâ Ecclesiâ, paucissimæ domus repertæ sunt; hoc est, illæ solummodò, sine quibus conversatio civilis esse nullatenus poterat. Nihil pecuniarum absque pecoribus habebant. Si quid enim pecuniæ à divitibus accipiebant, mox pauperibus dabant. Nam neque ad susceptionem potentium sæculi, vel pecunias colligi, vel domos providere necesse fuit, qui nunquam ad Ecclesiam nisi orationis tantum, & audiendi verbum Dei causâ veniebant. Rex ipse, cum opportunitas exegisset, cum quinque tantum aut sex ministris veniebat, & expletâ in Ecclesiâ oratione discedebat. Quod si fortè eos ibi refici contingeret, simplici tantum & quotidiano Fratrum cibo contenti, nihil ultra quærebant. Tota enim tunc fuit sollicitudo Doctoribus illis, Deo serviendi, non sæculo; tota cura cordis excolendi, non ventris. Unde & in magnâ erat veneratione tempore illo religionis habitus; itaut ubicumque Clericus aliquis aut Monachus adveniret, gaudenter ab omnibus tanquam Dei famulus exciperetur: & jam si in itinere pergens inveniretur, adcurrabant, & flexâ cervice vel manu signari, vel ore illius se benedici gaudebant; verbis quoque horum exhortatorijs diligenter auditum præbebant. Sed & diebus Dominicis ad Ecclesiam, sive ad Monasteria certatim, non reficiendi corporis, sed audiendi sermonis Dei gratiâ confluebant: & si quis Sacerdotum in vicum fortè deveniret, mox congregati in unum vicani, verbum vitæ ab illo expetere curabant. Nam neque alia ipsis Sacerdotibus aut Clericis vicos adeundi, quàm prædicandi, baptizandi, infirmos visitandi, & (ut breviter dicam) animas curandi causa fuit: qui in tantum erant ab omni avaritiæ peste castigati, ut nemo territoria ac possessiones ad construenda Mo-

naſteria, niſi à poteſtatibus ſæculi coactus, acciperet. Quæ conſuetudo per omnia aliquanto poſt hæc tempore in Eccleſiis Nordanhymbrorum ſervata eſt. Sed de his ſatis dictum.

CAPUT XXVII.

Ut Egbercht, vir ſanctus de natione Anglorum, Monachicam in Hiberniâ vitam duxerit.

EODEM anno Dominicæ Incarnationis ſexcentefimo ſexageſimo quarto, facta eſt eclipſis Solis diē tertio menſis Maii, horâ circiter decimâ diei: quo etiam anno ſubita peſtilentiæ lues, depopularis priùs Auſtralibus Britanniæ plagis, Nordanhymbrorum quoque provinciam corripiciens, atque acerbâ clade diutiſſis longè larèque deſæviens, magnam hominum multitudinem itrahit. Quâ plagâ præſatus Domini Sacerdos *Tuda* raptus eſt de mundo, & in Monafterio quod vocatur *Pegnalech*, honorificè ſepultus. Hæc autem plaga Hiberniam quoque inſulam pari clade premebat. Erant ibidem eo tempore multi nobilium ſimul & medicorum de gente Anglorum, qui tempore Finani & Colmani Episcoporum, relicta inſulâ patriâ, vel divinæ lectionis, vel continencioris vitæ gratiâ illò ſeceſſerant. Et quidam quidem mox ſe Monaftericæ converſationi fideliter mancipaverunt, alii magis circumeundo per cellas Magiſtrorum, lectioni operam dare gaudebant: quos omnes Scotti libentiſſimè ſuſcipientes victum eis quotidianum ſine pretio, libros quoque ad legendum, & magiſterium gratuitum præbere curabant. Erant inter hos duo juvenes magnæ indolis, de nobilibus Anglorum, *Edilhum* & *Egbercht*, quorum prior frater fuit *Edilhuini*, viri æquè Deo dilecti, qui & ipſe ævo ſequente Hiberniam gratiâ legendi adiit, & benè inſtructus patriam rediit, atque Episcopopus in provinciâ *Lindiſſe* factus, multo Eccleſiam tempore nobiliſſimè rexit. Hi ergo cùm eſſent in Monafterio quod linguâ Scottorum *Kathmelſgi* appellatur, & omnes ſocii ipſorum vel mortalitate de ſæculo

rapti, vel per alia essent loca dispersi, correpti sunt ambo morbo ejusdem mortalitatis, & gravissimè adhiecti; è quibus *Ecgeberet*, (sicut mihi referebat quidam veracissimus & venerandæ canicie Presbyter, qui se hæc ab ipso audisse perhibebat) cum se æstimasset esse moriturum, egressus est tempore matutino de cubiculo, in quo infirmi quiescebant, & residens solus in loco opportuno, cœpit sedulus cogitare de actibus suis, & compunctus memoriâ peccatorum suorum faciem lacrymis abluebat, atque intimo ex corde Deum precabatur, ne adhuc mori deberet, priusquàm vel præteritas negligentias, quas in pueritiâ sive infantiâ commiserat, perfectius ex tempore castigaret, vel in bonis se operibus abundantius exerceret. Vovit etiam votum, quia adeò peregrinus vivere vellet, ut nunquàm in insulam in quâ natus est, id est, Britanniam, rediret; quòd præter sollemnem canonici temporis psalmodiam (si non valetudo corporis obsisteret) quotidie Psalterium totum in memoriâ divinæ laudis decantaret; quòd in omni septimanâ diem cum nocte jejunos transiret. Cùmque finitis lacrymis, precibus & votis, domum rediret, invenit sodalem dormientem: & ipse quoque lectulum conscendens, cœpit in quietem membra laxare. Et cùm paululùm quiesceret, expergefactus sodalis respexit eum, & ait: O frater *Ecgeberete*, ô quid fecisti? Sperabam quia pariter ad vitam æternam intraremus. Verumtamen scito quia quæ postulasti, accipies. Didicerat enim per visionem, & quid petiisset, & quia petita impetrasset. Quid multa? Ipse *Edithum* proximâ nocte defunctus est: at verò *Ecgeberet* decussâ molestiâ agritudinis convaluit, ac multo post tempore vivens, acceptumque Sacerdotii gradum condignis ornans actibus, post multa virtutum bona, ut ipse desiderabat, nuper, id est, anno Dominicæ Incarnationis septingentesimo vicesimo nono, cùm esset ipse annorum nonaginta, migravit ad regna cælestia. Duxit autem vitam in magnâ humilitatis, mansuetudinis, continentiæ, simplicitatis & justitiæ perfectione. Unde & genti suæ, & illis in quibus exulabat nationibus Scottorum sive Pictorum, & exemplo vivendi, & instantiâ docendi, & auctoritate corripiendi, & pietate largiendi de his quæ à divitibus acceperat, multum profuit. Addidit au-

tem votis quæ diximus, ut semper in Quadragesimâ non plus quàm semel in die reficeret, non aliud quàm panem ac lac tenuissimum, & hoc cum mensurâ gustaret: quod videlicet lac pridie novum in phialâ ponere solebat, ut post noctem ablata superficie crassiore, ipse residuum cum modico, ut diximus, pane bibebat. Cujus modum continentix etiam quadraginta diebus ante natalem Domini, totidem quoque post peracta sollemnia Pentecostes, hoc est, Quinquagesimæ, semper observare curabat.

CAPUT XXVIII.

Ut defuncto Tuda, Vilfrid in Galliâ, & Ceadda apud Occidentales Saxones, in provinciâ Nordanhymbrorum sint ordinati Episcopi.

INTEREA Rex *Alchfrid* misit Vilfridum Presbyterum ad Regem Galliarum, qui cum sibi suisque consecrari faceret Episcopum. At ille misit eum ordinandum ad Agilbertum, de quo suprà diximus, qui relictâ Brittaniâ, Parisiæ civitatis factus erat Episcopus: & consecratus est magno cum honore ab ipso, convenientibus plurimis Episcopis in vico qui vocatur *regio in Compendio*. Quo adhuc in transmarinis partibus post ordinationem demorante, imitatus industriam filii Regis *Osui*, misit Cantiam vitum sanctum, modestum moribus, Scripturarum lætione sufficienter instructum, & ea quæ agenda in Scripturis didicerat, operibus sollerter exequentem, qui Eboracensis Ecclesiæ ordinaretur Episcopus. Erat autem Presbyter vocabulo *Ceadda*, frater reverentissimi Antistitis *Ceddi*, cujus sæpius meminimus, & Abbas Monasterii illius quod vocatur *Lestingham*. Misitque Rex cum eo Presbyterum suum vocabulo *Eadbedun*, qui postea regnante Ecgfrido, Rypensis Ecclesiæ Præsul factus est. Verum illi Cantiam pervenientes, invenerunt Archiepiscopum *Densfeldis* jam migrasse de sæculo, & necdum alium pro eo constitutum fuisse Pontificem. Unde diverterunt ad provinciam Occidentalium Saxonum, ubi erat *Vini* Episcopus: & ab illo

est vir præfatus consecratus Antistes, assumptis in societatem ordinationis duobus de Brittonum gente Episcopis, qui Dominicum Paschæ diem, ut sæpius dictum est, secus morem canonicum à quartâ decimâ usque ad vicesimam Lunam celebrant. Non enim erat tunc ullus, excepto illo *Iing*, in totâ Britannia canonicè ordinatus Episcopus. Consecratus ergo in Episcopatum *Ceddæ*, mox cœpit Ecclesiasticæ veritati, & castitati curam impendere; humilitati, continentię, lectioni operam dare; oppida, rura, casas, vicos, castella propter evangelizandum, non equitando, sed Apostolorum more pedibus incedendo peragraré. Erat enim discipulus Aidani, iisdemque actibus ac moribus juxta exemplum ejus, ac fratris sui *Ceddi*, suos instituere curavit auditores. Veniens quoque Britanniam *Wilfrid* jam Episcopus factus, & ipse per plura Catholicæ observationis moderamina Ecclesiis Anglorum suâ doctrinâ contulit. Unde factum est, ut crescente per dies institutione Catholicâ, Scotti omnes qui inter Anglos morabantur, aut his manus darent, aut suam redirent ad patriam.

CAPUT XXIX.

Ut Wighardus Presbyter ordinandus in Archiepiscopum, de Britannia sit missus Romam: quum remissa mox scripta Pape, ibidem obisse narraverunt.

HIS temporibus Reges Anglorum nobilissimi, *Oswin*, provincię Nordanhymbrorum, & *Ecgbert* Cantuariorum, habito inter se consilio, quid de statu Anglorum Ecclesię esset agendum, (intellexerat enim veraciter *Oswin*, quamvis educatus à Scottis, quia Romana esset Catholica & Apostolica Ecclesia) adsumpserunt cum electione & consensu sanctę Ecclesię gentis Anglorum, vitum bonum, & aptum Episcopatu, Presbyterum nomine *Wighardum*, de Clero *Deusdedit* Archiepiscopi, & hunc Antistitem ordinandum Romam miserunt: quatenus accepto ipse gradu Archiepiscopatûs, Catholicos per omnem Britanniam Ecclesiis

Anglorum ordinare posset Antistites. Verùm Vighardus Romanam perveniens, priusquàm consecrari in Episcopum posset, morte præreptus est, & hujusmodi litteræ Regi *Osuin* Britanniam remissæ sunt: Domino excellentissimo Filio *Osuin* Regi Saxorum, Vitalianus Episcopus, servus servorum Dei. Dilectabiles litteras Excellentia vestra suscepimus: quas relègentes, cognovimus ejus piissimam devotionem, ferventissimùmque amorem, quem habet propter beatam vitam; & quia dexterâ Domini protegente ad vetam & Apostolicam fidem sit conversus, sperans ut sicut in suâ gente regnat, ita & cum Christo in futuro contregnare. Benedicta igitur gens, quæ talem sapientissimum, & Dei cultorem promeruit habere Regem: quia non solùm ipse Dei cultor existit, sed etiam omnes subjectos suos meditatyr die ac nocte ad fidem Catholicam atque Apostolicam pro suæ animæ redemptione converti. Quis enim audiens hæc suavia, non lætetur? Quis non exultet & gaudeat in his piis operibus? Quia & gens vestra Christo omnipotenti Deo credidit, secundùm divinatorum Prophetarum voces, sicut scriptum est in *Isaiâ*: In die illâ radix Jesse, qui stat in signum populorum, ipsum gentes deprecabuntur. Et iterum: Audite insulæ, & attendite populi de longè. Et post paululum: Parum, inquit, est ut mihi sis servus ad suscitandas Tribus Jacob, & facies Israël convertendas. Dedi te in lucem gentium, ut sis salus mea usque ad extremum terræ. Et rursus: Reges videbunt, & consurgent Principes, & adorabunt. Et post pusillum: Dedi te in fœdus populi, ut suscitares terram, & possideres hæreditates dissipatas, & diceres his qui vincti sunt: Exite; & his qui in tenebris, Revelamini. Et rursus: Ego Dominus vocavi te in justitiâ, & adprehendi manum tuam, & servavi; & dedi te in lucem gentium, & in fœdus populi, ut aperires oculos cæcorum, & educeres de conclusione vinctum, de domo carceris sedentem in tenebris. Ecce (excellenter Filii) quàm luce clarius est, non solùm de vobis, sed etiam de omnibus Prophetarum gentibus, quòd sint credituræ in Christo omnium conditore. Quamobrem oportet vestram Celsitudinem, utpote membrum existens Christi, in omnibus piâ regulam sequi perennitèr Principis

cipis Apostolorum, five in Pascha celebrando, five in omnibus quæ tradiderunt sancti Apostoli Petrus & Paulus, qui ut duo luminaria cæli illuminant mundum, sic doctrina eorum corda hominum quotidie inlustrat credentium. Et post nonnulla, quibus de celebrando per orbem uno vero Pascha loquitur, Hominem denique, inquit, docibilem, & in omnibus ornatum Antistitem, secundum vestrorum scriptorum tenorem, minimè valuimus nunc reperire pro longinquitate itineris. Profectò enim dum hujusmodi apta reperitque persona fuerit, eum instructum ad vestram dirigemus patriam, ut ipse & vivâ voce, & per divina oracula omnem inimici zizaniam ex omni vestrà insulâ cum divino nutu eradicet. Munuscula à vestrà Celsitudine beato Principi Apostolorum directâ, pro æternâ ejus memoriâ suscepimus, gratiâque ei agimus, ac pro ejus incolumitate jugiter Deum deprecamur cum Christi Clero. Itaque qui hæc obtulit munera, de hac subtractus est luce, sitûsque ad limina Apostolorum, pro quo valde sumus contristati cur hic esset defunctus. Verumtamen gerulis harum nostrarum litterarum vestris missis, beneficia Sanctorum, hoc est, reliquias beatorum Apostolorum Petri & Pauli, & sanctorum Martyrum Laurentii, Johannis & Pauli, & Gregorii atque Pancratii eis fecimus dari, vestræ Excellentiæ profectò omnes contradendas. Nam & conjugi vestræ, nostræ spiritali filiæ, direximus per præfatos gerulos crucem clavem auream habentem de sacratissimis vinculis beatissimorum Apostolorum Petri & Pauli: de cujus pio studio cognoscentes, tantùm cuncta Sedes Apostolica unâ nobiscum lætatur, quantum pia ejus opera coram Deo flagrant & vernant. Festinet igitur, quæsumus, vestra Celsitudo (ut optamus) totam suam insulam Deo Christo dicare. Profectò enim habet protectorem, humani generis redemptorem Dominum nostrum Jesum Christum, qui ei cuncta prospera impertiet, ut novum populum Christi coacervet, Catholicam ibi & Apostolicam constituens fidem. Scriptum est enim: *Quærite primum regnum Dei, & justitiam ejus, & hæc omnia adjicientur vobis.* Nimirum enim quæret, & impetrabit, & ei omnes suæ insulæ, ut optamus, subdentur. Paterno

itaque affectu salutantes vestram Excellentiam, divinam jugiter precamur elementiam, quæ vos vestrosque omnes in omnibus bonis operibus auxiliari dignetur, ut cum Christo in futuro regnetis sæculo. Incolumem Excellentiam vestram gratia superna custodiat.

Quis sanè pro Wighardo repertus ac dedicatus sit Antistes, libro sequente opportuniùs dicetur.

CAPUT XXX.

*Ut Orientales Saxones tempore mortalitatis ad idololatriam re-
versi, sed per instantiam Jarumanni Episcopi mox
sint ab errore correcti.*

EODEM tempore provincie Orientalium Saxonum post Suidhelmum (de quo suprâ diximus) præfuere Reges *Sigheri & Sebbi*, quamvis ipsi Regi Merciorum *Vulfheri* subjecti. Quæ videlicet provincia cum præfatæ mortalitatis clade premeretur, *Sigheri* cum suâ parte populi relictis Christianæ fidei Sacramentis, ad apostasiam conversus est. Nam & ipse Rex, & plurimi de plebe sive optimatibus, diligenter hanc vitam, & futuram non quærentes, sive etiam non esse credentes, cœperunt sana quæ derelicta erant, restaurare, & adorare simulacra: quasi per hæc possent à mortalitate defendi. Porro socius ejus, & coheres regni ejusdem *Sebbi*, magnâ fidem perceptam cum suis omnibus devotione servavit, & magnâ (ut in sequentibus dicemus) vitam fidelem felicitate complevit. Quod ubi Rex *Vulfheri* comperit, fidem videlicet provincie ex parte profanatam, misit ad corrigendum errorem, revocandamque ad fidem veritatis provinciam *Jaruman* Episcopum, qui successor erat *Trumheri*: qui multâ agens sollicitâ, juxta quod mihi Presbyter, qui comes itineris illi & cooperator verbi exstiterat, referebat, (erat enim religiosus & bonus vir) longè latèque omnia pervagatus, & populum & Regem præfatum ad viam justitiæ reduxit: adeò ut relictis, sive destructis fanis arisque quas fecerant, aperirent Ecclesias,

ac nomen Christi, cui contradixerant, confiteri gaudent, magis cum fide resurrectionis in illo mori, quam in perfidia sordibus inter idola vivere cupientes. Quibus ita gestis, & ipsi Sacerdotes, Doctoresque eorum domum rediēre lætantes.

LIBER QUARTUS.

CAPUT I.

Ut defuncto Deusdedit, Vighard ad suscipiendam Episcopiam, Romam sit missus: sed illo ibidem defuncto, Theodorus Archiepiscopus ordinatus, & cum Hadriano Abbate sit Britanniam missus.

ANNO memorato præfata eclipsis, & mox subsequētis pestilentia, quo & Colman Episcopus unanimā Catholicorum intentione superatus, ad suos reversus est; Deusdedit, sextus Ecclesiæ Dorovernensis Episcopus, obiit pridie Iduum Juliarum; sed & Erconbert Rex Cantuariorum, eodem mense ac die defunctus, Ecgercto filio sedem regni reliquit, quam ille susceptam per novem annos tenuit. Tunc cessante non paucō tempore Episcopatu, missus est Romam ab ipso simul & à Rege Nordanhymbrorum Osui (ut præcedente libro paucis diximus) Vighard Presbyter, vir in Ecclesiasticis disciplinis doctissimus, de genere Anglorum, petentibus hunc Ecclesiæ Anglorum Archiepiscopum ordinari: missi pariter Apostolico Papæ donariis, & aureis atque argenteis vasis non paucis. Qui ubi Romam pervenit, cui Sedi Apostolicæ tempore illo Vitalianus præerat, postquā itineris sui causam præfato Papæ Apostolico patefecit, non multò post & ipse, & omnes penè qui cum eo advenerant socii, pestilentia superveniente deleti sunt. At Apostolicus Papa habito de his consilio, quæsit sedulus quem Ecclesiis Anglorum Archiepiscopum mitteret. Erat autem in Monasterio Hiridano, quod est non longè

à Neapoli Campaniæ, Abbas Hadrianus, vir natione Afer, sacris litteris diligenter imbutus, Monasterialibus simul & Ecclesiasticis disciplinis institutus, Græcæ pariter & Latinæ linguæ peritissimus. Hunc ad se accitum Papa jussit Episcopatu accepto Britanniam venire. Qui indignum se tanto gradu respondens, ostendere posse se dixit alium, cujus magis ad suscipiendum Episcopatum & eruditio conveniret, & ætas. Cùmque Monachum quemdam de vicino Virginum Monasterio, nomine *Andream*, Pontifici offerret, hic ab omnibus qui eum novère, dignus Episcopatu judicatus est. Verùm pondus corporeæ infirmitatis, ne Episcopus fieri posset, obstitit. Et rursùm Hadrianus ad suscipiendum Episcopatum actus est: qui petens inducias, si fortè alium, qui Episcopus ordinaretur, ex tempore posset evenire. Erat ipso tempore Romæ Monachus Hadriano notus, nomine *Theodorus*, natus Tharso Ciliciæ, vir & sæculari & divinâ litteraturâ, & Græcè instructus & Latinè, probus moribus, & ætate venerandus, id est, annos habens ætatis sexaginta sex. Hunc offerens Hadrianus Pontifici, ut Episcopus ordinaretur, obtinuit: his tamen conditionibus interpositis, ut ipse eum perduceret in Britanniam, eò quòd jam bis partes Galliarum diversis ex causis adiisset, & ob id majorem hujus itineris peragendi notitiam haberet, sufficiensque esset in possessione hominum propriorum: & ut ei doctrinæ cooperator existens, diligenter attenderet, ne quid ille contrarium veritati fidei Græcorum more in Ecclesiam cui præesset, introduceret. Qui Subdiaconus ordinatus, quatuor exspectavit menses, donec illi coma cresceret, quo in coronam tonderi posset. Habuerat enim tonsuram more Orientalium sancti Pauli Apostoli. Qui ordinatus est à Vitaliano Papâ anno Dominicæ Incarnationis sexcentesimo sexagesimo octavo, sub die septimâ Kalendarum Aprilium, Dominicâ. Et ita unâ cum Hadriano, sexto Kalendas Junias Britanniam missus est. Qui cùm pariter per mare ad Massiliam, & deinde per terram Arelas pervenissent, & tradidissent Johanni Archiepiscopo civitatis illius scripta commendatitia Vitaliani Pontificis, retenti sunt ab eo, quousque Ebroïnus Major domûs regiæ copiam pergendi quoquò vellent, tri-

buit eis. Quâ acceptâ Theodorus profectus est ad Agilbertum, Parisiorum Episcopum, de quo superius diximus, & ab eo benignè susceptus, & multo tempore habitus est. Hadrianus verò perrexit primùm ad Emme Senonum, & postea ad Pharonem Meldorum Episcopos, & benè cum eis diutius fuit: coëgerat enim eos imminens hiems, ut ubicumque potuissent, quieti manerent. Quod cum nuncii certi narrassent Regi Ecgbercto, adesse scilicet Episcopum quem petierant à Romano Antistite, in regno Francorum, misit illò continuò Regetfridum Præfectum suum, ad adducendum eum: quò cum venisset, adsumpsit Theodorum cum Ebroïni licentiâ, & perduxit eum ad portum cui nomen est *Quentovic*, ubi fatigatus infirmitate, aliquantisper moratus est; & cum convalescere cœpisset, navigavit Britanniâ. Hadrianum autem Ebroïnus retinuit, quoniam suspicabatur eum habere aliquam legationem Imperatoris ad Britanniæ Reges adversus regnum, cujus tunc ipse maximam curam gerebat. Sed cum tale nihil illum habere vel habuisse veraciter comperisset, absolvit eum, & post Theodorum ire permisit. Qui statim ut ad illum pervenit, dedit ei Monasterium beati Petri Apostoli, ubi Archiepiscopi Cantix sepeliri, ut præfatus sum, solent. Præceperat enim Theodoro abeunti Dominus Apostolicus, ut in diocesi suâ provideret, & daret ei locum in quo cum suis aptè degere potuisset.

CAPUT II.

Ut Theodoro cuncta peragrante, Anglorum Ecclesia cum Catholica veritate, litterarum quoque sanctarum caperint studiis imbui: & ut Putta pro Damiano Rhofensis Ecclesia sit factus Antistes.

PERVENIT autem Theodorus ad Ecclesiam suam secundo postquam consecratus est anno, sub die sexto Kalendarum Juniarum, Dominicâ; & fecit in eâ annos viginti & unum, menses tres, dies viginti sex. Moxque

peragratâ insulâ totâ , quaquaversum Anglorum gentes morabantur (nam & libentissimè ab omnibus suscipiebatur, atque audiebatur) rectum vivendi ordinem, Paschæ celebrandi ritum canonicum , per omnia comitante & cooperante Hadriano disseminabat. Isque primus erat in Archiepiscopis , cui omnis Anglorum Ecclesia manus dare consentiret. Et quia litteris sacris simul & sæcularibus (ut diximus) abundanter ambo erant instructi , congregatâ discipulorum catervâ , scientiæ salutaris quotidie flumina in rigandis eorum cordibus emanabant : ita ut etiam Metricæ artis , Astronomicæ & Arithmeticæ Ecclesiasticæ disciplinam inter sacrorum apicum volumina suis auditoribus contraderent. Indicio est quoddam usque hodie supersunt de eorum discipulis , qui Latinam Græcâque linguam æquè ut propriam in quâ nati sunt , norunt. Neque unquam prorsus ex quo Britanniam perierunt Angli, feliciora fuere tempora ; dum & fortissimos, Christianosque habentes Reges cunctis barbaris nationibus essent terrori , & omnium vota ad nuper audita cælestis regni gaudia penderent , & quicumque lectionibus sacris cuperent erudiri , haberent in promptu magistros qui docerent. Sed & sonos cantandi in Ecclesiâ , quos eatenus in Cantiâ tantum noverant , ab hoc tempore per omnes Anglorum Ecclesias, discere cœperunt : primusque (excepto Jacobo , de quo suprà diximus) cantandi magister Nordanhymbrorum Ecclesiis , *Eddi* cognomento Stephanus fuit , invitatus de Cantiâ à reverentissimo viro Vilfrido , qui primus inter Episcopos qui de Anglorum gente essent , Catholicum vivendi morem Ecclesiis Anglorum tradere didicit. Itaque Theodorus perlustrans universa , ordinabat locis opportunis Episcopos , & ea quæ minùs perfecta reperit , his quoque juvantibus corripiebat. In quibus & *Ceadda* Episcopum cum argueret , non fuisse ritè consecratum ; respondens ipse voce humillimâ dixit : Si me , inquit , nosti Episcopatum non ritè suscepisse , libenter ab officio discedo : quippe qui neque me unquam hoc esse dignum arbitrabar ; sed obedientiæ causâ justus subire , hoc quamvis indignus consensu. At ille audiens humilitatem responsionis ejus , dixit , non eum Episcopatum dimittere debere ;

sed ipse ordinationem ejus denuò Catholicà ratione consummavit. Eo autem tempore quo defuncto *Deusdedit*, Dorovernensis Ecclesiæ Episcopus quærebatur, ordinabatur, mittebatur, Vilfridus quoque de Britannia Galliam ordinandus est missus: & quoniam ante Theodorum rediit, ipse etiam in Cantia Presbyteros & Diaconos, usquedum Archiepiscopus ad sedem suam perveniret, ordinabat. At ipse veniens mox in civitate *Rhosi*, ubi defuncto Damiano Episcopatus jam diu cessaverat, ordinavit virum magis Ecclesiasticis disciplinis institutum, & vitæ simplicitate contentum, quàm in sæculi rebus strenuum, cui nomen erat *Pitta*; maximè autem modulandi in Ecclesiâ more Romanorum, quem à discipulis beati Papæ Gregorii didicerat, peritum.

CAPUT III.

Ubi Ceadda, de quo supra dictum est, provincia Merciorum fit Episcopus datus; & de vitâ & de obitu & sepulturâ ejus.

EO tempore provincie Merciorum Rex *Vulfheri* præfuit, qui cum mortuo Jarumanno, sibi quique suisque à Theodoro Episcopum dari peteret, non eis novum voluit ordinare Episcopum; sed postulavit à Rege *Osuio*, ut illis Episcopus *Ceadda* daretur, qui tunc in Monasterio suo, quod est in *Lestinghamen*, quietam vitam agebat, Vilfrido administrante Episcopatum Eboracensis Ecclesiæ, necnon & omnium Nordanhymbrorum, sed & Pictonum, quousque Rex *Osuio* imperium protendere poterat. Et quia moris erat eidem reverentissimo Antistiti, opus Evangelii magis ambulando per loca, quàm equitando perficere; jussit eum Theodorus ubicumque longius iter instaret, equitare, multumque renitentem studio & amore pii laboris, ipse eum manu suâ levavit in equum; quia nimirum sanctum esse virum comperit, atque equo vehi quò esset necesse, compulit. Susceptum itaque Episcopatum gentis Merciorum simul & Lindisfarnorum *Ceadda*, juxta exempla Patrum antiquorum, in magnâ vitæ perfectione administrare curavit: cui

etiam Rex *Vulfheri* donavit terram quinquaginta familiarum, ad construendum Monasterium in loco qui dicitur *Ad Barne*, id est, *Ad nemus*, in provinciâ *Lindissi*, in quo usque hodie instituta ab ipso regularis vitæ vestigia permanent. Habuit autem sedem Episcopalem in loco qui vocatur *Lycidfeld*, in quo & defunctus & sepultus est; ubi usque hodie sequentium quoque provinciæ illius Episcoporum sedes est. Fecerat verò sibi mansionem non longè ab Ecclesiâ remotiorem; in quâ secretius cum paucis, id est, septem, sive octo fratribus, quoties à labore & ministerio verbi vacabat, orare ac legere solebat. Qui cum in illâ provinciâ duobus annis ac dimidio Ecclesiam gloriosissimè rexisset, adfuit superno dispensante iudicio, tempus, de quo loquitur Ecclesiastes: Quia tempus mittendi lapides, & tempus colligendi. Supervenit namque clades divinitus missa, quæ per mortem carnis, vivos Ecclesiæ lapides, de terrenis sedibus ad ædificium cæleste transferret. Cùmque plurimis de Ecclesiâ ejusdem reverentissimi Antistitis de carne subtrahis, veniret hora ipsius ut transfiret ex hoc mundo ad Dominum; contigit die quâdam ut in præfatâ mansione fortè ipse cum uno tantum fratre (cui vocabulum erat *Ovini*) commoraretur, cæteris ejus sociis pro causâ opportunâ ad Ecclesiam reversis. Erat autem idem *Ovini* Monachus magni meriti, & purâ intentione supernæ retributionis mundum derelinquens, dignusque per omnia, cui Dominus specialiter sua revelaret arcana, dignus cui fidem narranti audientes accommodarent. Venerat enim cum Reginâ *Edithryde* de provinciâ Orientalium Anglorum, eratque primus Ministrotum, & Princeps domûs ejus. Qui cùm crescente fidei fervore sæculo abrenunciare disponderet, non hoc segniter fecit; sed adedò se mundi rebus exiit, ut relictis omnibus quæ habebat, simplici tantum habitu indutus, & securim atque asciam in manu ferens, venisset ad Monasterium ejusdem reverentissimi Patris, quod vocatur *Leshingabew*. Non enim ad otium, ut quidam, sed ad laborem se Monasterium intrare signabat. Quod ipsum etiam factò monstravit: nam quò minùs sufficiebat meditationi Scripturarum, eò ampliùs operi manuum studium impendebat.

Denique

Denique cum Episcopo in præfatâ mansionem pro suâ reverentiâ devotionis intet fratres habitus, cum illi intus lectiōni vacabant, ipse foris quæ opus esse videbantur, operabatur. Qui cum die quâdam tale aliquid foris ageret, digressus ad Ecclesiam sociis, (ut dicere cœperam) & Episcopus solus in oratorio loci, lectiōni vel orationi operam daret, audivit repente (ut postea testebatur) vocem suavissimam cantantium atque latantium, de cælo ad terras usque descendere: quam videlicet vocem ab Euto-austro, id est, ab alto brumalis exortus, primò se audisse dicebat, ac deinde paulatim eam sibi adaptopinquare, donec ad tectum usque oratorii, in quo erat Episcopus, perveniret: quod ingressa, totum implevit, atque in gyro circumdedit. At ille dum sollicitus in ea quæ audiebat, animum intenderet, audivit denudò, transacto quasi dimidiæ horæ spatio, ascendere de tecto ejusdem oratorii idem lætitiæ canticum, & ipsâ quâ venerat viâ, ad cælos usque cum ineffabili dulcedine reverti. Qui cum aliquantulum horæ quasi adtonitus maneret, & quid hoc esset, sollerti animo scrutaretur, aperuit Episcopus fenestram oratorii, & sonitum manu faciens, ut sæpe consuevit, si quis foris esset, ad se intrare præcepit. Introivit ille concitus, cui dixit Antistes: Vade citò ad Ecclesiam, & hos septem Fratres huc venite facito; tu quoque simul adesto. Qui cum venissent, primò admonuit eos ut virtutem dilectionis & pacis ad invicem, & ad omnes fideles servarent: instituta quoque disciplinæ regularis, quæ vel ab ipso didicissent, & in ipso vidissent, vel in Patrum præcedentium factis sive dictis invenissent, indefessâ instantiâ sequerentur. Deinde subjunxit diem sui obitus jam ptoximè instare. Namque hospes, inquit, ille amabilis, qui fratres nostros visitare solebat, ad me quoque hodie venire, mēque de sæculo evocare dignatus est. Propter quod revertentes ad Ecclesiam, dicite Fratribus ut & meum exitum Dōmino precibus commendent, & suum quoque exitum (cujus hora incerta est) vigiliis, orationibus, bonis operibus prævenire meminerint. Cūque hæc & hujusmodi plura loqueteretur, atque illi perceptorâ ejus benedictione, jam multum tristes exissent, rediit ipse solus qui carmen cæleste audierat, & prostratus se

in terram : Obsecro, inquit, Pater ; licétne aliquid interrogare ? Interroga, inquit, quod vis. At ille : Obsecro, inquit, ut dicas quod erat canticum illud lætantium quod audivi, venientium de cælis super oratorium hoc, & post tempus redeuntium ad cælos ? Respondit ille : Si vocem carminis audisti, & cælestes supervenire cœtus cognovisti, præcipio tibi in nomine Domini, ne hoc cuiquam ante meum obitum dicas. Reverà autem Angelorum fuère spiritus, qui me ad cælestia quæ semper amabam ac desiderabam, præmia vocare venerunt, & post dies septem se redituros, ac me secum adducturos esse promiserunt. Quod quidem ita ut ei prædictum erat, opere completum est. Nam confestim languore corporis tactus est, & hoc per dies ingravescente, septimo (ut promissum ei fuerat) die postquam obitum suum Dominici corporis & sanguinis perceptione munivit, soluta ab ergastulo corporis anima sancta, ducentibus (ut credi fas est) Angelis comitibus æterna gaudia petivit. Non autem mirum si diem mortis, vel potius diem Domini lætus aspexit, quam semper usquedum veniret, sollicitus expectare curavit. Namque inter plura continentix, humilitatis, doctrinæ, orationis, voluntariæ paupertatis, & cæterarum virtutum merita, in tantum erat timori Domini subditus, in tantum novissimorum suorum in omnibus operibus suis memor, ut sicut mihi frater quidam de eis qui me in Scripturis divinis erudiebant, & erat in Monasterio ac magisterio educatus, vocabulo *Trumberët*, referre solebat, si fortè legente eo, vel aliud quid agente, repentè flatus venti major adfurgeret, continuo misericordiam Domini invocaret, & eam generi humano propitiari rogaret. Si autem violentior aura insisteret, jam clauso codice procideret in faciem, atque obnixius orationi incumberet. At si procella fortior, aut nimbus perurgeret, vel etiam corusci ac tonitrua terras & aëra terrent; tunc veniens ad Ecclesiam sollicitus orationibus ac Psalmis, donec serenitas aëris rediret, fixâ mente vacaret. Cumque interrogaretur à suis, quare hoc faceret; respondebat : Non legistis, quia intonuit de cælo sonitus, & Altissimus dedit vocem suam. Misit sagittas suas, & dissipavit eos; fulgura multiplicavit, & conturbavit eos. Mover

enim aëra Dominus, ventos excitat, jacularur fulgura, de caelo insonat, ut terrigenas ad timendum se suscitet, ut corda eorum in memoriam futuri iudicii revocet, ut superbiam eorum dissipet, & conturbet audaciam, reduſto ad mentem tremendo illo tempore, quando ipse cælis ac terris ardentibus, venturus est in nubibus cum potestate magnâ & maiestatem ad iudicandos vivos & mortuos. Propter quod, inquit, oportet nos admonitioni ejus cælesti, debito cum timore & amore respondere, ut quories aëre commoto, manum quasi ad feriendum minitans exerit, nec adhuc tamen percutit, mox imploremus ejus misericordiam, & discussis penetralibus cordis nostri, atque expurgatis vitiorum rudibus, solliciti ne unquam percuti mereamur, agamus. Convenit autem revelationi & relationi præfati fratris de obitu hujus Antistitis etiam sermo reverentissimi Patris Ecgberti, de quo supra diximus, qui dudum cum eodem *Ceadda* adoleſcente, & ipse adoleſcens in Hiberniâ Monachicam in orationibus & continentiâ, & meditatione divinarum Scripturarum vitam sedulus agebat. Sed illo postmodum in patriam reverso, ipse peregrinus pro Domino usque ad finem vitæ permansit. Cum ergo veniret ad eum longo post tempore, gratiâ visitationis, de Britanniâ vir sanctissimus & continentissimus, vocabulo *Hygbald*, qui erat Abbas in provinciâ *Lindissi*, & ut Sanctos decebat, de vitâ priorum Patrum sermonem facerent, atque hanc æmulari gauderent, intervenit mentio reverentissimi Antistitis *Ceadda*; dixitque *Ecgbert*: Scio hominem in hac insulâ adhuc in carne manentem, qui cum vir ille de mundo transiret, vidit animam *Ceddi* fratris ipsius cum agmine Angelorum descendente de caelo, & assumptâ secum animâ ejus, ad cælestia regna redire. Quod utrum de se, an de alio aliquo diceret, nobis manet incertum. Obiit autem *Ceadda* sexto die Nonarum Martiarum, & sepultus est quidem primò juxta Ecclesiam sanctæ Mariæ; sed postmodum ibidem constructâ Ecclesiâ beatissimi Principis Apostolorum Petri, in eandem sunt ejus ossa translata. In quo utroque loco, ad indicium virtutis illius, solent crebra sanitarum miracula operari. Denique nuper phreneticus quidam, dum per cuncta errando discurre-

ret, devenit ibi vespere, nescientibus, sive non curantibus loci custodibus, & ibi totâ nocte requiescens, manẽ sanato sensu egressus, mirantibus & gaudentibus cunctis, quod idem ibi sanitatem Domino largiente consequeretur, ostendit. Est autem locus idem sepulcri tumbâ ligneâ in modum domunculi facta coopertus, habens foramen in pariete, per quod solent hi qui causâ devotionis illò adveniunt, manum suam immittere, ac partem pulveris inde adsumere: quam cum in aquas miserint, atque has infirmantibus jumentis sive hominibus gustandas dederint, mox infirmitatis ablata molestiâ, ad cupitæ sospitatis gaudia redeunt. In cuius locum ordinavit Theodorus Winfridum, virum bonum & modestum, qui, sicut prædecessores ejus, provinciis Merciorum, & Mediterraneorum Anglorum, & Lindisfarorum Episcopatûs officio præesset: in quibus cunctis *Vulfheri* (qui adhuc supererat) sceptrum regni tenebat. Erat autem Winfridus de Clero ejus, cui ipse successerat, Antistitis, & Diaconatûs officio sub eo non paucò tempore fungebatur.

CAPUT IV.

Ut Colmannus Episcopus, relicta Britanniâ, duo Monasteria in Scottiâ, unum Scottis, Anglis alterum, quos secum adduxerat, fecerit.

INTEREA Colmanus, qui de Scottiâ erat Episcopus, relinquens Britanniâ, tulit secum omnes quos in Lindisfarnensium insulâ congregaverat Scottos: sed & de gente Anglorum viros circiter triginta, qui utrique Monachicæ conversationis erant studiis imbuti. Et relictis in Ecclesiâ suâ aliquot Fratribus, primò venit ad insulam *Hii*, unde erat ad prædicandum verbum Anglorum genti destinatus. Deinde secessit ad insulam quandam parvam, quæ ad Occidentalem plagam ab Hiberniâ procul secreta, sermone Scottico *Inhisbonfinde*, id est, *insula vitule albe*, nuncupatur. In hanc ergo perveniens, construxit Monasterium, & Monachos inibi, quos de utraque natione collectos adduxerat, colloca-

vit. Qui cū invicem concordare non possent, coquod Scotti tempore æstatis, quo fruges erant collegendæ, relicto Monasterio per nota sibi loca dispersi vagarentur; at verò hieme succedente redirent, & his quæ Angli præparaverant, communiter uti desiderarent: quæsitiv Colmanus huic dissensionis remedium, & circumiens omnia propè vel longè, invenit locum in Hiberniâ insulâ, aptum Monasterio construendo, qui linguâ Scottorum *Mageo* nominatur; emitque partem ejus non grandem, ad construendum ibi Monasterium, à Comite, ad cujus possessionem pertinebat: eâ conditione additâ, ut pro ipso etiam, qui eis locum commodaret, consistentes ibi Monachi Domino preces offerrent. Et constructo statim Monasterio, juvante etiam Comite, & vicinis omnibus, Anglos ibidem locavit, relictis in præfatâ insulâ Scottis. Quod videlicet Monasterium usque hodie ab Anglis tenetur incolis. Ipsum namque est, quod nunc grande de modico effectum *Maigeo* consuetè vocatur, & converfis jamdudum ad meliora instituta omnibus, egregium examen continet Monachorum, qui de provinciâ Anglorum ibidem collecti ad exemplum venerabilium Patrum sub regulâ & Abbate canonico, in magnâ continentiâ & sinceritate, proprio labore manuum vivunt.

CAPUT V.

De morte Osuii & Ecgberti Regum; & de Synodo factâ ad locum Hertudford, cui præsidebat Archiepiscopus Theodorus.

ANNO Dominicæ Incarnationis sexcentesimo septuagesimo, qui est annus secundus, ex quo Britanniam venit Theodorus, *osuii* Rex Nordanhymbrorum, pressus est infirmitate, quâ & mortuus est anno ætatis suæ quinquagesimo octavo, qui in tantum eo tempore tenebatur amore Romanæ & Apostolicæ institutionis, ut si ab infirmitate salvaretur, etiam Romam venire, ibique ad loca sancta vitam finire disponderet; Visfridumque Episcopum ducem sibi itineris fieri, promissâ non parvâ pecuniarum donatione, ro-

garet. Qui defunctus die decimâ quintâ Kalendarum Martiarum, Ecgfridum filium regni heredem reliquit : cujus anno regni tertio Theodorus coëgit Concilium Episcoporum, unâ cum eis, qui canonica Patrum statuta & diligenter & nossent, Magistris Ecclesiæ pluribus. Quibus pariter congregatis, diligenter ea quæ unitati pacis Ecclesiasticæ congruerent, eo quo Pontificem decebat animo, cepit observanda docere. Cujus Synodicæ actionis hujusmodi textus est :

In nomine Domini Dei & Salvatoris nostri Jesu Christi, regnante in perpetuum, ac gubernante Ecclesiam suam eodem Domino nostro Jesu Christo, placuit convenire nos, juxta morem Canonum venerabilium tractaturos de Ecclesiæ necessariis negotiis. Convenimus autem die vigesimâ quartâ mensis Septembris, Indictione primâ, in loco qui dicitur *Herusford*. Ego quidem Theodorus, quamvis indignus, ab Apostolicâ Sede destinatus Ecclesiæ Dorovernensis Episcopus & Confacerdos ac frater noster reverentissimus *Bisi*, Orientalium Anglorum Episcopus : quibus etiam frater & Confacerdos noster *Vilfrid*, Nordanhymbrorum gentis Episcopus per proprios Legatarios adfuit. Adfuerunt & Fratres ac Confacerdotes nostri, *Putta* Episcopus Castellî Cantuatiorem, quod dicitur *Rhofescetir*, Leutherius Episcopus Occidentalium Saxonum, *Winfred* Episcopus provincie Merciorum. Cûmque in unum convenientes juxta ordinem quique suum resedissemus : Rogo, inquam, dilectissimi Fratres, propter timorem & amorem Redemptoris nostri, ut in commune omnes pro nostrâ fide tractemus : ut quæque decreta ac definita sunt à sanctis & probabilibus Patribus, incorruptè ab omnibus nobis serventur. Hæc & alia quamplura quæ ad caritatem pertinebant, unitatèquæ Ecclesiæ conservandam prosecutus sum. Cûmque expleissem prolocutionem, interrogavi unumquemque eorum per ordinem, si consentirent, ea quæ à Patribus canonicè sunt antiquitùs decreta, custodire. Ad quod omnes Confacerdotes nostri respondentes dixerunt : Optimè omnibus placet, quæque definiunt sanctorum Canones Patrum, nos quoque omnes alacri animo libentissimè servare. Quibus statim protuli eundem librum Canonum, & ex eodem libro decem capitula quæ per loca no-

taveram; quia maximè nobis necessaria sciebam, illis coram ostendi, & ut hæc diligentius ab omnibus susciperentur, rogavi.

Primum capitulum, ut sanctum diem Paschæ in communione omnes servemus Dominicâ post decimam quartam Lunam primi mensis. Secundum, ut nullus Episcoporum parochiam alterius invadat, sed contentus sit gubernatione creditæ sibi plebis. Tertium, ut quæque Monasteria Deo consecrata sunt, nulli Episcoporum liceat ea in aliquo inquietare, nec quicquam de eorum rebus violenter abstrahere. Quartum, ut ipsi Monachi non migrent de loco ad locum, hoc est, de Monasterio ad Monasterium, nisi permissione proprii Abbatis; sed in eâ permaneant obedientiam quam tempore suæ conversionis promiserunt. Quintum, ut nullus Clericorum relinquens proprium Episcopum, passim quolibet discurrat, neque alicubi veniens absque commendatitiis litteris sui Præfatis suscipiatur. Quod si semel susceptus noluerit invitatus redire, &ceptor, & is qui susceptus est, excommunicationi subiacebit. Sextum, ut Episcopi atque Clerici peregrini contenti sint hospitalitatis munere oblato, nullique eorum liceat ullum officium sacerdotale absque permisso Episcopi, in cujus parochiâ esse cognoscitur, agere. Septimum, ut bis in anno Synodus congregetur; sed quia diversæ causæ impediunt, placuit omnibus in commune, ut Kalendis Augusti in loco qui appellatur *Clofeshoch*, semel in anno congregemur. Octavum, ut nullus Episcoporum se alteri præferat per ambitionem; sed omnes agnoscant tempus & ordinem consecrationis suæ. Nonum capitulum in commune tractatum est, ut plures Episcopi, crescente numero fidelium, augerentur; sed de hac re ad præfens siluimus. Decimum capitulum pro conjugii, ut nulli liceat nisi legitimum habere connubium. Nullus incestum faciat, nullus conjugem propriam, nisi (ut sanctum Evangelium docet) fornicationis causâ relinquat. Quod si quisquam propriam expulserit conjugem legitimo sibi matrimonio conjunctam, si Christianus esse rectè voluerit, nulli alteri copuletur; sed ita permaneat, aut propriæ reconcilietur conjugii. His itaque capitulis in commune tractatis ac definitis, ut

nullum deinceps ab aliquo nostrum oriatur contentionis scandalum, ut alia pro aliis divulgarentur, placuit ut quæque definita sunt, unusquisque nostrum manus propriæ subscriptione confirmaret. Quam sententiam definitionis nostræ Titillo Notario scribendam dictavi. Actum in mense & Indictione suprà scriptis. Quisquis igitur contra hanc sententiam, juxta decreta Canonum, nostram etiam consensione ac subscriptione manûs nostræ confirmatam, quoquo modo venire, eamque infringere tentavit, noverit se ab omni officio sacerdotali & nostrâ societate separatam. Divina nos gratia in unitate sanctæ Ecclesiæ suæ viventes, custodiat incolumes. Facta autem est hæc Synodus anno ab Incarnatione Domini sexcentesimo septuagesimo tertio, quo anno Rex Cantuariorum *Egbertus* mense Julio obierat, succedente in regnum fratre *Lothere*, quod ipse annos undecim & menses septem tenuit. *Bis* autem Episcopus Orientalium Anglorum, qui in præfatâ Synodo fuisse perhibetur, ipse erat successor Bonifacii, cujus suprà meminimus, vir multæ sanctitatis & religionis. Nam Bonifacio post decem & septem Episcopatus sui annos defuncto, Episcopus ipse pro eo, Theodoro ordinante, factus est. Quo adhuc superstiti, sed gravissimâ infirmitate ab administrando Episcopatu prohibito, duo sunt pro illo, *Accei*, & *Badmias*, electi & consecrati Episcopi: ex quo usque hodie provincia illa duos habere solet Episcopos.

CAPUT VI.

Ut deposito Vinfrido, Sexwulfus Episcopia ejus acceperit, & Earcawaldus Orientalibus Saxonibus sit Episcopus datus.

NON multo post hæc elapso tempore, offensus à Winfrido Merciorum Episcopo per meritum cujusdam inobedientiæ Theodorus Archiepiscopus, deposuit eum de Episcopatu post annos accepti Episcopatus non multos; & in loco ejus ordinavit Episcopum Sexwulfum, qui erat constructor & Abbas Monasterii quod dicitur *Medesnamstani*,
in

in regione Girviorum. Depositus verò *Vinfrid* rediit in Monasterium suum, quod dicitur *Ad Barne*, ibique in optimâ conversatione vitam finivit. Tunc etiam Orientalibus Saxonibus, quibus eo tempore præfuerunt *Sebbi & Sigheri*, quorum supra meminimus, Earconvaldum constituit Episcopum in civitate Lundoniâ : cujus videlicet viri in Episcopatu, & ante Episcopatum vita & conversatio fertur fuisse sanctissima, sicut etiam nunc cælestium signa virtutum indicio sunt. Etenim usque hodie feretrum ejus caballarium, quo infirmus vehi solebat, servatum à discipulis ejus, multos febricitantes, vel alio quolibet incommodo fessos sanare non desistit. Non solum autem subpositi eidem feretro, vel adpositi curantur ægroti, sed & assulæ de illo abscessæ, atque ad infirmos adlatæ, citam illis solent adferre medelam. Hic sanè priusquàm Episcopus factus esset, duo præclara Monasteria, unum sibi, alterum sorori suæ Edilburgæ construxerat, quod utrumque regularibus disciplinis optimè instituerat. Sibi quidem in regione *Sudergeona*, juxta fluvium Tamensem, in loco qui vocatur *Cerotesfeir*, id est, *Ceroti insulæ*, sorori autem in Orientali Saxonum provinciâ, in loco qui nuncupatur *In Berecingum*, in quo ipsa Deo devotarum mater ac nutrix posset existere feminarum. Quæ suscepto Monasterii regimine, condignam se in omnibus Episcopo fratre, & ipsa rectè vivendo & subjectis regulariter & piè consulendo præbuit, ut etiam cælestia indicio fuere miracula.

CAPUT VII.

Ut in Monasterio Bericiensi, ubi corpora sanctimonialium feminarum poni deberent, cælesti sit luce monstratum.

IN hoc etenim Monasterio plura virtutum sunt signa patrata, quæ & ad memoriam ædificationemque sequentium, ab his qui novere, descripta habentur à multis : è quibus & nos aliqua Historiæ nostræ Ecclesiasticæ inserere curavimus. Cum tempestas sæpe dictæ cladis larè cuncta depopulans, etiam partem Monasterii hujus illam, quâ viri re-

nebantur , invasisset , & passim quotidie raperentur ad Dominum ; sollicita Mater Congregationis , quâ horâ etiam eam Monasterii partem , quâ ancillarum Dei caterva à virorum erat secreta contubernio , eadem plaga tangeret , crebrius in conventu Sororum perquirere cœpit , quo loco in Monasterio corpora sua poni , & cimiterium fieri vellent , cùm eas eodem quo cæteros exterminio raptari è mundo contingeret. Cùmque nihil certi responsi , tametsi sæpius inquirens , à Sororibus accepisset , accepit ipsa cum omnibus certissimum supernæ promissionis responsum. Cùm enim nocte quâdam expletis matutinæ laudis psalmodiis , egressæ de oratorio famulæ Christi , ad sepulera Fratrum , qui eas ex hac luce præcesserant , solitas Domino laudes decantarent , ecce subito lux emissæ cœlitis , veluti linteum magnum venit super omnes , tantoque eas stupore perculit , ut etiam canticum quod canebant , tremefactæ intermitterent. Ipse autem splendor emissæ lucis , in cujus comparatione Sol Meridianus videri posset obscurus , non multò pòst illo elevatus de loco , in Meridianam Monasterii partem , hoc est , ad Occidentem oratorii secessit , ibique aliquandiu remoratus , & ea loca operiens , sic videntibus cunctis , ad cæli se alta subduxit ; ut nulli esset dubium , quin ipsa lux quæ animas famularum Christi esset ductura vel susceptura in cælis , etiam corporibus earum locum in quo requieturæ , & diem resurrectionis essent expectaturæ , monstraret. Cujus radius lucis tantus exstitit , ut quidam de Fratribus senior , qui in ipsâ horâ in oratorio eorum cum alio juniore positus fuerat , referret , quòd manè ingressi per rimas ostiorum vel fenestrarum radii lucis , omnem diurni luminis viderentur superare fulgotem.



CAPUT VIII.

*ut in eodem Monasterio puerulus moriens, virginem quæ se erat
secutura, clamaverit; utque alia de corpore egressura,
jam particulam futura lucis aspexerit.*

ERAT in eodem Monasterio puer trium circiter non amplius annorum, *Esica* nomine, qui propter infantilem adhuc ætatem in virginum Deo dedicatarum solebat cellâ nutriri, ibique medicari. Hic præfatâ pestilentia tactus, ubi ad extrema pervenit, clamavit tertio unam de consecratis Christo virginibus, proprio eam nomine quasi præsentem alloquens, *Eadgid, Eadgid, Eadgid*; & sic terminans temporalem vitam, intravit æternam. At virgo illa quam moriens vocabat, mox in loco quo erat, eadem ad tacta infirmitate, ipso quo vocata est die, de hac luce subtrahita, & illum qui se vocavit, ad regnum cæleste secuta est. Item quædam ex eisdem ancillis Dei cum præfato tacta morbo, atque ad extrema esset perducta, cœpit subito circa mediam noctem clamare his quæ sibi ministrabant, petens ut lucernam quæ inibi accensa erat, exstingerent: quod cum sequenti voce repeteret, nec tamen ei aliquis obtemperaret, ad extremum intulit: Scio quòd me hæc insanâ mente loqui arbitramini; sed jam nunc non ita esse cognoscite: nam verè dico vobis, quòd domum hanc tantâ luce impletam esse perspicio, ut vestra illa lucerna mihi omnimodis videatur esse obscura. Et cum ne adhuc quidem talia loquenti quisquam responderet, vel ad sensum præberet, iterum dixit: Accendite ergo lucernam illam, quamdiu vultis; attamen scitote quia non est mea lux: nam mea lux, incipiente aurorâ, mihi adventura est. Cœpitque narrare quia apparuerit sibi quidam vir qui eodem anno fuerat defunctus, dicens quòd adveniente diluculo perennem esset exitura ad lucem. Cujus veritas visionis, citâ circa exortum diei puellæ morte probata est.

CAPUT IX.

Quæ sint ostensa calitatis signa, cum & ipsa Mater Congregationis illius à mundo transiret.

CUM autem & ipsa Mater pia Deo devota Congregationis Edilburga esset rapienda de mundo, apparuit visio miranda cuidam de Sororibus, cui nomen erat *Teregid*, quæ multis jam annis in eodem Monasterio commorata, & ipsa semper in omni humilitate ac sinceritate Deo servire satagebat, & adiutrix disciplinæ regularis eidem Matri existere, minores docendo vel castigando curabat. Cujus ut virtus juxta Apostolum in infirmitate perficeretur, tacta est repente gravissimo corporis morbo, & per annos novem piâ Redemptoris nostri provisione multum fatigata: videlicet ut quicquid in eâ vitii sordidantis inter virtutes per ignorantiam vel incuriam resedisset, totum hoc caminus diutinæ tribulationis excoqueret. Hæc autem quâdam nocte incipiente crepusculo, egressa de cubiculo quo manebat, vidit manifeste quasi corpus hominis, quod esset Sole clarius, sindone involutum in sublime fecti, elatum videlicet de domo in quâ Sorores pausare solebant. Cùmque diligentius intueretur quo trahente levaretur sursum hæc, quam contemplabatur, species corporis gloriosi, vidit quod quasi funibus auro clarioribus in superna tolleretur, donec cælis patentibus introducta, amplius ab illâ videri non potuit. Nec dubium remansit cogitanti de visione, quin aliquis de illâ Congregatione citius esset moriturus, cujus anima per bona quæ fecisset opera, quasi per funes aureos levanda esset ad cælos: quod reverà ita contigit. Nam non multis interpositis diebus, Deo dilecta Mater Congregationis ipsius, ergastulo carnis educa est, cujus talem fuisse constat vitam, ut nemo qui eam noverit, dubitare debeat, quin ei exeunti de hac vitâ cælestis patriæ patuerit ingressus.

In eodem quoque Monasterio quædam erat femina sanctimonialis, & ad sæculi hujus dignitatem nobilis, & in amore

futuri sæculi nobilior : quæ ita multis jam annis omni corporis fuerat officio destituta , ut ne unum quidem movere ipsa membrum valeret. Hæc ubi corpus Abbatissæ venerabilis in Ecclesiam delatum , donec sepulturæ daretur , cognovit ; postulavit se afferri illò , & in modum orantium ad illud adclinari. Quod dum fieret , quasi viventem adlocuta , rogavit , ut apud misericordiam pii conditoris impetraret se à tantis tamque diutinis cruciatibus absolvi. Nec multò tardius exaudita est : nam post dies duodecim , & ipsa educta ex carne , temporalem afflictionem aternâ mercede mutavit. Cùm verò præfata Christi famula *Torgid* tres adhuc annos post obitum Dominae in hac vitâ teneretur , in tantum eâ , quam prædiximus , infirmitate decocta est , ut vix ossibus hæreret , & ad ultimum , cùm tempus jam resolutionis ejus instaret , non solum membrorum cæterorum , sed & linguæ motu caruit. Quod dum tribus diebus & totidem noctibus ageretur , subito visione spiritali recreata , os & oculos aperuit ; aspectansque in cælum , sic ad eam quam intuebatur visionem , cœpit loqui : Gratus est mihi multum adventus tuus , & bene venisti. Et hoc dicto , parumper reticuit , quasi responsum ejus quem videbat , & cui loquebatur , expectans. Rursúmque quasi leviter indignata subjunxit : Nequaquam hoc læta ferre queo. Rursúmque modicum silens , tertio dixit : Si nullatenus hodie fieri potest , obsecro ne sit longum spatium in medio. Et sicut antea , parum silens , ita sermonem conclusit : Si omnimodis ita definitum est , neque hanc sententiam licet immutari , obsecro ne amplius quàm hæc solummodò proxima nox intersit. Quibus dictis , interrogata à circumfidentibus , cum quo loqueretur : Cùm carissimâ , inquit , meâ Matre *Editl'urge*. Ex quo intellexere quòd ipsa ei tempus suæ transmigrationis in proximum nunciare venisset. Nam & ita ut rogabat , transactâ unâ die ac nocte , soluta carnis simul & infirmitatis vinculis , ad aternæ gaudia salutis intravit.



CAPUT X.

*Ut ad Cimiterium ejusdem Monasterii orans cæca
lumen receperit.*

SUCCESSIT autem Edilburgi in officio Abbatissæ devota Deo famula, nomine *Hildelid*, multisque annis, id est, usque ad ultimam senectutem eidem Monasterio strenuissimè, & in observantiâ disciplinæ regularis, & in earum quæ ad communes usus pertinent, rerum providentiâ præfuit. Cui cum propter angustiam loci in quo Monasterium constructum est, placuisset, ut ossa famulorum famularumque Christi, quæ ibidem fuerant tumulata, tollerentur, & transferrentur omnia in Ecclesiam beatæ Dei Genitricis, unôque conderentur in loco: quoties ibi claritas luminis cælestis, quanta sæpe fragrantia mirandi apparuerit odoris, quæ alia sint signa ostensa, in ipso libro de quo hæc excerpimus, quisque legerit, inveniet. Sanè nullatenus prætereundum arbitror miraculum sanitatis, quod ad ipsum cimiterium Deo dicatæ Congregationis factum idem libellus refert. Erat quippe in proximo Comes quidam, cujus uxor ingruente oculis caligine subitâ, tantùm per dies eadem molestiâ crebrescente gravata est, ut ne minimam quidem lucis alicujus posset particulam videre. Cui dum aliquandiù cæcitatibus hujus nocte clausa maneret, repenti venit in mentem, quia si ad Monasterium esset delata virginum sanctimonialium, ad reliquias Sanctorum peteret, perditam posset accipere lucem. Nec distulit quin continuò, quod mente conceperat, exhiberet. Perducta namque à puellis suis ad Monasterium, (quia in proximo erat) ubi fidem suæ sanationis integram se habere professæ est, introducta est in cimiterium: & cum ibidem diutius flexis genibus oraret, nihilo tardiùs mirum exaudiri. Nam exurgens ab oratione, priusquàm exiret de loco, petitiæ lucis gratiam recepit: & quæ famularum manibus adducta fuerat, ipsa libero pedum incessu domum læta reversa est, quasi ad hoc solummodò lucem amitteret temporalem, ut quanta

Sanctos Christi lux in cælis, quæ gratia virtutis possideret, suâ sanatione demonstraret.

CAPUT XI.

Uti Rex ejusdem provincie Sebbi, in Monachicâ conversatione vitam finierit.

EO tempore præerat regno Orientalium Saxonum, ut idem etiam libellus docet, vir multum Deo devotus, nomine *Sebbi*, cujus supra meminimus. Erat enim religiosus actibus, crebris precibus, piis eleemosynarum fructibus plurimum intentus; vitam privatam & Monachicam cunctis regni divitiis & honoribus præferens, quam & olim jam, si non obstinatus conjugis animus divortium negaret, relicto regno subiisset. Unde & multis visum & sæpe dictum est, quia talis animi virum, Episcopum magis quam Regem ordinari deceret. Cumque annos triginta in regno miles celestis exegisset, correptus est corporis infirmitate permaximâ, quâ & mortuus est: ammonuitque conjugem, ut vel tunc divino se servitio pariter manciparent, cum amplius pariter mundum amplecti, vel potius mundo servire non possent. Quod dum ægrè impetraret ab eâ, venit ad Antistitem Londoniæ civitatis, vocabulo *Valdberi*, qui Earconvaldo successerat; & per ejus benedictionem, habitum religionis, quem diu desiderarat, accepit. Attulit autem eidem & summam pecuniæ non parvam, pauperibus erogandam, nihil omnimodis sibi reservans; sed pauper spiritu magis propter regnum cælorum manere desiderans. Qui cum ingravescente præfatâ ægritudine, diem sibi mortis sensisset imminere, timere cepit homo animi regalis, ne ad mortem veniens tanto adfectus dolore, aliquid indignum suæ personæ vel ore proferret, vel aliorum motu gereret membrorum. Unde accito ad se præfatus urbis Londoniæ, in quâ tunc ipse manebat, Episcopo, rogavit ne plures eo moriente quam ipse Episcopus, & duo sui ministri adessent. Quod cum Episcopus libentissimè se facturum promitteret, non multo post

idem vir Dei, dum membra sopori dedisset, vidit visionem consolatoriam, quæ omnem ei anxietatem memoratæ sollicitudinis auferret; insuper & quâ die esset hâc vitam terminaturus, ostenderet. Vidit enim (ut post ipse referebat) tres ad se venisse viros, clato indutos habitu; quorum unus residens ante lectulum ejus, stantibus his qui secum advenierunt comitibus; & interrogantibus de statu ejus, quem languentem visitare venerunt, dixit quod anima ejus, & sine ullo dolore, & cum magno lucis splendore esset egressura de corpore: sed & tertium exinde diem quo esset moriturus, insinuavit. Quod ita utrumque, ut ex visione didicit, completum est. Nam die dehinc tertio completâ horâ nonâ, subitò quasi leviter obdormiens, sine ullo sensu doloris emisit spiritum. Cujus corpori tumultando præparaverant sarcophagum lapideum: sed cùm huic corpus imponere cœpissent, inveniunt hoc mensurâ palmi longius esse sarcophago. Dolantes ergo lapidem in quantum valebant, addiderunt longitudini sarcophagi quasi duorum mensuram digitorum. Sed nec sic quidem corpus capiebat. Unde factâ difficultate tumulandi, cogitabant aut alium quærere loculum, aut ipsum corpus, si possent, in genibus inflectendo breviare, donec ipso loculo caperetur. Sed mira res, & non nisi cælitus facta, ne aliquid horum fieri deberet, prohibuit. Nam subitò adstante Episcopo, & filio Regis ejusdem ac Monachi Sighardo, qui post illum cum fratre Suefredo regnavit, & turbâ hominum non modicâ, inventum est sarcophagum illud congruæ longitudinis ad mensuram corporis, adeo ut à parte capitis etiam cervical posset interponi; à parte verò pedum, mensurâ quatuor digitorum in sarcophago corpus excederet. Conditus est autem in Ecclesiâ beati Doctoris gentium, cujus edoctus monitis, cælestia sperare didicerat.



CAPUT XII.

Ut Episcopatum Occidentalium Saxonum pro Leutherio Heddi, Episcopatum Rhofensis Ecclesiæ pro Puttâ Vichelm, & pro ipso Gefmund acceperit : & qui tunc Nordanhymbrorum fuerint Episcopi.

QUARTUS Occidentalium Saxonum Antistes Leuthorius fuit. Siquidem primus Birinus, secundus Agilbertus, tertius exstitit *Vini*. Cùmque mortuus esset *Coinvalch*, quo regnante idem Leuthorius Episcopus factus est, acceperunt Subreguli regnum gentis, & divisum inter se, tenuerunt annis circiter decem : ipsisque regnantibus defunctus est ille, & Episcopatu functus est *Heddi* pro eo : consecratus est à Theodoro in civitate Lundoniâ. Cujus Episcopatus tempore devictis atque amotis Subregulis, *Cedualla* suscepit imperium : & cùm duobus annis hoc tenuisset, tandem superni regni amore compunctus reliquit, eodem adhuc Præsule Ecclesiam gubernante ; ac Romam abiens, ibi vitam finivit, ut in sequentibus latius dicendum est.

Anno autem Dominicæ Incarnationis sexcentesimo septuagesimo sexto, cùm *Edilred* Rex Merciorum, adducto maligno exercitu, Cantiam vastaret, & Ecclesias ac Monasteria sine respectu pietatis vel divini amoris sceleraret, civitatem quoque *Rhosi*, in quâ erat *Putta* Episcopus, quamvis eo tempore absens, communi clade absumpsit. Quod ille ubi comperit, Ecclesiam videlicet suam rebus ablatis omnibus depopulatam, divertit ad Sexwlfum Merciorum Antistitem, & acceptâ ab eo possessione Ecclesiæ cujusdam & agelli non grandis, ibidem in pace vitam finivit, nihil omnino de restaurando Episcopatu suo agens : quia sicut suprâ diximus, magis in Ecclesiasticis quàm in mundanis rebus erat industrius ; sed in illâ solum Ecclesiâ Deo serviens, ubicumque rogabatur, ad docenda Ecclesiastica carmina divertens. Pro quo Theodorus in civitate *Rhosi* Vichelmum

consecravit Episcopum. Sed illo post non multum temporis, præ inopiâ rerum, ab Episcopatu decedente, atque ad alia loca secedente, Gefmundum pro eo substituit Antistitem. Anno Dominicæ Incarnationis sexcentesimo septuagesimo septimo, qui est annus imperii Regis Ecgfridi octavus, apparuit mense Augusto stella quæ dicitur cometa; & tribus mensibus permanens, matutinis horis oriebatur, excelsum radiantis flammæ quasi columnam præferens. Quo etiam anno ortâ inter ipsum Regem Ecgfridum, & reverentissimum Antistitem Vilfridum dissensione, pulsus est idem Antistes à sede sui Episcopatus, & duo in locum ejus substituti Episcopi, qui Nordanhymbrorum genti præessent: *Bosa* videlicet, qui Deirorum, & *Eata*, qui Berniciorum provinciam gubernaret: hic in civitate Eboraci, ille in Augustaldensi, sive Lindisfarnensi Ecclesiâ cathedram habens Episcopalem, ambo de Monachorum collegio in Episcopatus gradum adsciti. Cum quibus & *Eadhed* in provinciâ Lindisfarorum, quam nuperrimè Rex *Ecgfrid*, superato in bello & fugato *Wlfhere*, obtinuerat, ordinatur Episcopus. Et hunc primum eadem provincia accepit proprium Præsulem, secundum Ediluinum, tertium Eadgarum, quartum Cyniberctum, quem in præsentem habet. Habebat enim ante Eadhedum, Antistitem Sexwlfum, qui etiam Merciorum & Mediterraneorum Anglorum simul Episcopus fuit: unde & expulsus de *Lindissi*, in illarum provinciarum regimine permansit. Ordinati sunt autem *Eadhed*, *Bosa*, & *Eata* Eboraci ab Archiepiscopo Theodoro: qui etiam post tres abscissionis Vilfridi annos, horum numero duos addidit Antistites, Tunbertum ad Ecclesiam Augustaldensem, remanente *Eatâ* ad Lindisfarnensem, & *Trumvini* ad provinciam Pictorum, quæ tunc temporis Anglorum erat imperio subiecta. Eadhedum de *Lindissi* reversum, eo quod *Edisfred* provinciam receperisset, Rhipensi Ecclesiæ præfecit.



CAPUT XIII.

Ubi Vilfrid Episcopus provinciam Australium Saxonum ad Christum converterit.

PULSUS est autem ab Episcopatu suo *Vilfrid*, & multum diu loca pervagatus, Romam adiit, Britanniam rediit; & si propter inimicitias memorati Regis in patriâ sive Parochiâ suâ recipi non potuit, non tamen ab evangelizandi potuit ministerio cohiberi: siquidem divertens ad provinciam Australium Saxonum, quæ post Cantuarios ad Austrum & ad Occidentem usque ad Occidentales Saxones pertingit, habens terram familiarum septem millium, & eo adhuc tempore paganis cultibus serviebat; huic verbum fidei & lavacrum salutis ministrabat. Erat autem Rex gentis illius *Edilvalch*, præsentem ac suggerentem Rege *Vulfnere*, à quo etiam egressus de fonte loco filii susceptus est: in cujus signum adoptionis, duas illi provincias donavit, Vesteam videlicet insulam, & Meanvarorum provinciam, in gente Occidentalium Saxonum. Itaque Episcopus, concedente, immò multum gaudente Rege, primos provinciarum Duces ac milites sacrosancto fonte abluebat; verum Presbyteri *Eappa*, & *Padda*, & *Burghelin*, & *Oiddia*, cæteram plebem vel tunc, vel tempore sequente baptizabant. Porro Regina nomine *Eabbæ* in suâ, id est, Huietiorum provinciâ, fuerat baptizata. Erat autem filia Eanfridi, fratris *Eanheri*, qui ambo cum suo populo Christiani fuere. Cæterum, tota provincia Australium Saxonum divini nominis & fidei erat ignara. Erat autem ibi Monachus quidam de natione Scottorum, vocabulo *Dicul*, habens Monasterium permodicum in loco qui vocatur *Bosanhammi*, silvis & mari circumdatum, & in eo Fratres quinque, sive sex, in humili & paupere vitâ Domino famulantes. Sed provincialium nullus eorum vel vitam æmulari, vel prædicationem curabat audire. Evangelizans autem genti Episcopus *Vilfrid*, non solum eam ab ærumnâ

perpetuæ damnationis, verùm & à clade nefandâ temporalis interitûs eripuit. Siquidem tribus annis ante adventum ejus in provinciam, nulla in illis locis pluvia ceciderat, unde & fames acerbissima plebem invadens, impiâ nece prostravit. Denique fertur quia sæpe quadraginta simul aut quinquaginta homines inediâ macerati procederent ad præcipitium aliquod, sive ripam maris, & junctis miserè manibus, pariter omnes aut ruinâ perituri, aut fluctibus absorbendi deciderent. Verùm ipso die, quo baptisma fidei gens suscepit illa, descendit pluvia serena & copiosa, refluoruit terra, rediitque viridantibus arvis annus latus & frugifer. Sicque abjectâ priscâ superstitione, exsufflatâ idolatriâ, cor omnium & caro omnium exultaverunt in Deum vivum: intelligentes, eum qui verus est Deus, & interioribus se bonis, & exterioribus cælesti gratiâ ditasse. Nam & Antistes cùm venisset in provinciam, tantâque ibi famis pœnam videret, docuit eos piscando victum quærere. Namque mare & flumina eorum piscibus abundabant, sed piscandi peritia genti nulla nisi ad anguillas tantum inerat. Collectis ergo undecumque retibus anguillaribus, homines Antistitis miserunt in mare, & divinâ se juvante gratiâ mox cepere pisces diversi generis trecentos: quibus trifariam divisit, centum pauperibus dederunt, centum his à quibus retia acceperant, centum in suos usus habebant. Quo beneficio multum Antistes cor omnium in suum convertit amorem, & libentiùs eo prædicante cælestia sperare cœperunt, ejus ministerio temporalia bona sumpserunt. Quo tempore Rex *Edilxaleh* donavit reverentissimo Antistiti *Wilfrido* terram octoginta septem familiarum, ubi suos homines, qui exules vagabantur, recipere posset, vocabulo *Helesên*, quod dicitur Latinè *Insula vituli marini*. Est enim locus ille undique mari circumdatus, præter ab Occidente, unde habet ingressum amplitudinis quasi jactus fundæ: qualis locus à Latinis *Peninsula*, à Græcis solet *Cherronesos* vocari. Hunc ergo locum cùm accepisset Episcopus *Vulfrid*, fundavit ibi Monasterium, ac regulari vitâ instituit, maximè ex his quos secum adduxerat Fratribus: quod usque hodie successores ejus tenere noscuntur. Nam ipse illis in partibus annos

quinque, id est, usque ad mortem Ecgfridi Regis, meritò omnibus honorabilis, officium Episcopatus & verbo exercebat & opere. Et quoniam illi Rex cum præfati loci possessione, omnes quæ ibidem erant, facultates cum agris & hominibus donavit, omnes fide Christi institutos, undâ Baptismatis abluit; inter quos, servos & ancillas ducentos quinquaginta: quos omnes ut baptizando à servitute dæmonicâ salvavit, etiam libertate donando, humanæ jugo servitutis absolvit.

CAPUT XIV.

Ut intercessione Oswaldi Regis, pestifera mortalitas sit sublata.

IN quo tunc Monasterio nonnulla cælestis gratiæ dona specialiter ostensa fuisse perhibent; utpote ubi nuper expulsâ diaboli tyrannide Christus jam regnare cœperat: è quibus unum quod mihi reverentissimus Antistes *Acca* sæpius referte, & à fidelissimis ejusdem Monasterii Fratribus sibi relatum asserere solibat, memoriæ mandare commodum duximus. Eodem fermè tempore quo ipsa provincia nomen Christi susceperat, multas Britanniæ provincias mortalitas sæva corripiebat: quæ cum præfatum quoque Monasterium, cui tunc regendo religiosissimus Christi Sacerdos, vocabulo *Eappa*, præfuit, nutu divinæ dispensationis attingeret; multique sive de his qui cum Antistite illo venerant, sive de illis qui de eadem provinciâ Saxonum nuper ad fidem fuerant vocati, passim de hac vitâ raperentur; visum est Fratribus triduanum jejunium agere, & divinam jugiter obsecrare clementiam, ut misericordiam sibi dignaretur impendere, sive periclitantes hoc morbo à præsentī morte liberaret, seu raptos è mundo à perpetuâ animæ damnatione servaret. Erat tunc temporis in eodem Monasterio parvulus quidam de natione Saxonum, nuper vocatus ad fidem, qui eadem tactus infirmitate, non pauco tempore recubans in lectulo jacebat. Cum ergo secunda memorati jejunii ac supplicationum dies ageretur, contigit fortè ipsum puerum horâ

fermè secundâ diei, in loco in quo æger jacebat, solum inveniri : cui divinâ dispensatione subito beatissimi Apostolorum Principes dignati sunt apparere. Erat enim puer multum simplicis ac mansueti animi, sincerâque devotione Sacramenta fidei quæ susceperat, servans. Salutantes ergo illum verbis piissimis Apostoli dicebant : Noli timere, fili, mortem pro quâ sollicitus es : nos enim te hodiernâ die ad cælestia sumus regna perducturi. Sed primùm expectare habes, donec Missæ celebrentur, ac viatico Dominici corporis ac sanguinis accepto, sic infirmitate simul & morte absolutus, ad æterna in cælis gaudia subleveris. Clama ergo ad te Presbyterum Eappam, & dicito illi quia Dominus exaudivit preces vestras, & devotionem ac jejunia propitiùs aspexit : neque aliquis de hoc Monasterio, sive de adjacentibus ei possessiunculis hac clade ultrâ moriturus est; sed omnes qui alicubi de vestris hac ægritudine laborant, resurrecturi à languore, pristinâ sunt sospitate recuperandi; præter te solum, qui hodiernâ es die liberandus à morte, & ad visionem Domini Christi, cui fideliter servisti, perducendus in cælum : quod divina vobis misericordia per intercessionem religiosi ac Deo dilecti Regis Osualdi, qui quondam genti Nordanhymbrorum & regni temporalis auctoritate, & Christianæ pietatis, quæ ad regnum perenne ducit, devotione sublimiter præfuit, conferre dignata est. Hac etenim die idem Rex ab infidelibus in bello corporaliter extinctus, mox ad sempiterna animarum gaudia adsumptus in cælum, & electorum est sociatus agminibus. Quærant in suis codicibus, in quibus defunctorum est adnotata depositio, & invenient illum hac (ut diximus) die raptum esse de sæculo. Celebrent ergo Missas per cuncta Monasterii oratoria hujus, sive per gratiarum actionem exaudita suæ deprecationis, sive etiam in memoriam præfati Regis Osualdi, qui quondam ipsorum genti præerat. Ideoque pro iis quasi pro suæ gentis advenis supplex orabat ad Dominum : & cunctis convenientibus ad Ecclesiam Fratribus, communicent omnes sacrificiis cælestibus, & ita soluto jejunio corpus quoque suis reficiant alimentis. Quæ cum omnia vocato ad se Presbytero puer verba narrasset, interrogavit eum sollicitus

quales essent habitu vel specie viri qui sibi apparuissent. Respondit: Præclari omninò habitus & vultus erant, lætissimæ ac pulcherrimæ, quales nunquam antè videram, neque aliquos hominum tanti decoris ac venustatis esse posse credebam. Unus quidem attonsus erat ut Clericus, alius barbam habebat prolixam: dicebântque quòd unus eorum Petrus, alius vocaretur Paulus: & ipsi essent Ministri Domini & Salvatoris nostri Jesu Christi, ad tuitionem nostri Monasterii missi ab ipso de cælis. Credidit ergo verbis pueri Presbyter, ac statim egressus quæsiuit in annali suo, & invenit eâdem ipsâ die Osualdum Regem fuisse peremptum: vocatisque Fratribus, parari prandium, Missas fieri, atque omnes communicare more solito præcepit: simul & infirmanti puero, de eodem sacrificio Dominicæ oblationis particulam deferri mandavit. Quibus ita gestis, non multò pòst, eâdem ipsâ die puer detunctus est, suâque morte probavit vera fuisse verba quæ ab Apostolis Christi audierat. Sed & hoc verbis ejus testimonium perhibuit, quòd nemo præter ipsum tempore illo ex eodem est Monasterio raptus de mundo; ex quâ nimirum visione multi qui hæc audire potuerunt, ad exorandam in adversis divinam clementiam, & ad salutaria jejuniorum remedia subeunda, sunt mirabiliter accensi: & ex eo tempore non solum in eodem Monasterio, sed & in plerisque locis aliis, cæpit annuatim ejusdem Regis ac militis Christi natalitius dies Missarum celebratione venerari.

C A P U T X V.

Ut Cedualla Rex, interfecto Rege Gevissorum Edilvalch, provinciam illam sevâ cæde ac depopulatione attriverit.

INTEREA' superveniens cum exercitu Cedualla, juvenis strenuissimus de regio genere Gevissorum, cum exularet à patriâ suâ, interfecit Regem *Edilvalch*, ac provinciam illam sevâ cæde ac depopulatione attrivit; sed mox expulsus est à Ducibus Regis, *Berethuno & Anhuno*, qui

deinceps regnum provinciæ tenuerunt : quorum prior, postea ab eodem Ceduallâ, cum esset Rex Gevissorum, occisus est, & provincia graviore est servitio subacta. Sed & is qui post Ceduallam regnavit, simili provinciam illam afflictione plurimo annorum tempore mancipavit. Quare factum est, ut toto illo tempore Episcopum proprium habere nequireret, sed revocato domum Vilfrido, primo suo Antistite, ipsi Episcopo Gevissorum, id est, Occidentalium Saxonum, qui essent in Ventâ civitate, subjacerent.

CAPUT XVI.

Ut Vecta insula Christianos incolas suscepit, cujus regii duo pueri statim post acceptum Baptisma sunt interempti.

POST QUAM ergo Cedualla regno potitus est Gevissorum, cepit & insulam Vectam, quæ hætenus erat tota idolatriæ dedita; ac tragicâ eadē omnes indigenas exterminare, ac suæ provinciæ homines pro his substituere contendit, voto se obligans, quamvis nondum regeneratus (ut fertur) in Christo; quia si cepisset insulam, quartam partem ejus, simul & prædæ, Domino daret. Quod ita solvit, ut hanc Vilfrido Episcopo, qui tunc fortè de gente suâ superveniens aderat, utendam pro Domino offerret. Est autem mensura ejusdem insulæ, juxta æstimationem Anglorum, mille ducentarum familiarum : unde data est Episcopo possessio terræ trecentarum familiarum. At ipse partem quam accepit, commendavit cuidam de Clericis suis, cui nomen *Bernuini*, (& erat filius sororis ejus) dans illi Presbyterum nomine *Iddila*, qui omnibus qui salvari vellet, verbum ac lavacrum vitæ ministraret. Ubi silentio prætereundum non esse reor, quòd in primitia eorum qui de eadem insulâ credendo salvati sunt, duo regii pueri fratres, videlicet Arvaldi Regis insulæ, speciali sunt Dei gratiâ coronati : siquidem imminentibus insulæ hostibus, fugâ lapsi sunt de insulâ, & in proximam Jutorum provinciam translati : ubi cum delati essent in locum qui vocatur *Ad lapidem*,
occulendos

occidendos se à facie Regis victoris credidissent, proditi sunt, atque occidi iussi. Quod cum audisset Abbas quidam & Presbyter, vocabulo *Cyniberd*, habens non longè ab inde Monasterium in loco qui vocatur *Hreutford*, id est, *Vadum arundinis*, venit ad Regem, qui tunc iisdem in partibus occultus curabatur à vulneribus, quæ ei inflicta fuerant prælianti in insulâ Vectâ: postulavitque ab eo, ut si necesse esset pueros interfici, prius liceret eos fidei Christianæ Sacramentis imbui. Concessit Rex, & ipse instructos verbo veritatis, ac fonte salutari ablutos, de ingressu regni æterni certos reddidit. Moxque illi instante carnifice, mortem læti subiêre temporalem, per quam se ad vitam animæ perpetuam non dubitabant esse transituros. Hoc ergo ordine, postquam omnes Britanniæ provincie fidem Christi susceperant, suscepit & insula Vecta, in quâ tamen ob ærumnam externæ subjectionis, nemo gradum ministerii ac sedis Episcopalis ante Danielem, qui nunc Occidentalium Saxonum est Episcopus, accepit. Sita est autem hæc insula contra medium Australium Saxonum & Gevissorum, interposito pelago latitudinis trium millium, quod vocatur *Solvente*: in quo videlicet pelago bini ætus Oceani, qui circum Britanniam ex infinito Oceano Septentrionali erumpunt, sibimet invicem quotidie compugnantes occurrunt, ultra ostium fluminis *Homelea*, quod per terras Jutorum, quæ ad regionem Gevissorum pertinent, præfatum pelagus intrat; finitoque confictu, in Oceanum refusi, unde venerant, redeunt.

CAPUT XVII.

De Synodo factâ in campo Hetfeld, præsidente Archiepiscopo Theodoro.

HIS temporibus audiens Theodorus, fidem Ecclesiæ Constantinopoli per hæresim Eutychetis multum esse turbatam, & Ecclesias Anglorum, quibus præerat, ab huiusmodi labe immunes perdurare desiderans, collecto venerabilium Sacerdotum Doctorumque plurimorum cœtu, cujus

E c

essent fidei singuli sedulus inquirebat, omniumque unanimem in fide Catholicâ reperit consensum: & hunc synodali-
bus litteris ad instructionem memoriâque sequentium
commendare curavit. quarum videlicet litterarum istud exor-
dium est:

In nomine Domini nostri Jesu Christi Salvatoris, impe-
rantibus Dominis piissimis nostris Ecgfrido Rege Hymbro-
nensium, anno decimo regni ejus, sub die quintâ decimâ
Kalendas Octobres, Indictione octavâ; Edilredo Rege Mer-
cinenſium, anno sexto regni ejus; & Adwlfio Rege Estran-
glorum, anno decimo septimo regni ejus; & Hlothario Re-
ge Cantuariorum, regni ejus anno septimo: præſidente
Theodoro, Dei gratiâ Archiepiscopo Britannîe insulæ, &
civitatis Dorovernis; unâ cum eo ſedentibus cæteris Episco-
pis Britannîe insulæ viris venerabilibus, præpositis sacro-
ſanctis Evangeliiſ, in loco qui Saxonico vocabulo *Heſfeld*
nominatur, pariter tractantes, fidem rectam & orthodoxam
expoſuimus; ſicut Dominus noſter Jeſus Chriſtus incarna-
tus tradidit diſcipulis ſuis, qui præſentialiter viderunt & au-
dierunt ſermones ejus, atque ſanctorum Patrum tradidit
ſymbolum, & generaliter omnes Sancti, & univerſales Sy-
nodi, & omnis probabiliſ Catholicæ Eccleſiæ Doctorem
chorus. Hoſ itaque ſequentes noſ piè atque orthodoxè,
juxta divinituſ inſpiratam doctrinam eorum profeſſi credi-
mus conſonanter, & conſitemur ſecundùm ſanctos Patres,
propriè & veraciter Patrem & Filium & Spiritum ſanctum
Trinitatem in unitate conſubſtantialem, & unitatem in Tri-
nitate, hoc eſt, unum Deum in tribuſ ſubſiſtentiſ vel per-
ſoniſ conſubſtantialibuſ, æqualiſ gloriæ & honoriſ. Et poſt
multa hujſmodi, quæ ad rectæ fidei confeſſionem pertine-
bant, hæc quoque ſancta Synodus ſuiſ litteriſ addidit: Suſ-
cepimus ſanctas & univerſaleſ quinque Synodoſ beatorum
Deo acceptabiliſ Patrum; id eſt, qui in Nicæâ congre-
gati fuerunt, trecentorum decem & octo, contra Arium
impiſſimum, & ejuſdem dogmata; & in Conſtantinopoli
centum quinquaginta, contra veſaniâ Macedonii & Eudo-
xii, & eorum dogmata; & in Ephèſo primo ducentorum
contra nequiſſimum Neſtorium, & ejuſdem dogmata; &

in Chalcedone ducentorum & triginta contra Eurychetem & Nestorium, & eorum dogmata; & iterum in Constantinopoli, quinto congregati sunt Concilio, in tempore Justiniani minoris, contra Theodorum & Theodoretum, & Ibae epistolas, & eorum dogmata contra Cyrillum. Et paulò post: Et Synodum quæ facta est in urbe Româ, in tempore Papæ Martini beatissimi, Indictione octavâ, imperante Constantino piissimo anno nono. Suscepimus & glorificamus Dominum nostrum Jesum Christum, sicut & isti glorificaverunt; nihil addentes vel subtrahentes: & anathematizamus corde & ore quos anathematizaverunt; & quos susceperunt, suscepimus: glorificantes Deum Patrem sine initio, & Filium ejus unigenitum, ex Patre generatum ante sæcula, & Spiritum sanctum procedentem ex Patre & Filio inenarrabiliter, sicut prædicaverunt hi quos memoravimus suprà, sancti Apostoli, & Prophetæ, & Doctores. Et nos omnes subscripsimus, qui cum Theodoro Archiepiscopo fidem Catholicam exposuimus.

CAPUT XVIII.

De Johanne Cantatøre Sedis Apostolica, qui propter docendum venerat Britanniam.

INTERERAT huic Synodo, paritèrque Catholicæ fidei decreta firmabat vir venerabilis Johannes Archicantator Ecclesiæ sancti Petri, & Abbas Monasterii beati Martini, qui nuper venerat à Româ per jussionem Papæ Agathonis, duce reverentissimo Abbate *Bisi* Episcopo, cognomine *Benedicto*, cujus suprà meminimus. Cum enim idem Benedictus construxisset Monasterium Britanniæ, in honorem Apostolorum Principis, juxta ostium fluminis *Vivri*, venit Romam cum cooperatore ac socio ejusdem operis Ceolfrido, qui post ipsum ejusdem Monasterii Abbas fuit, (quod & antè sæpius facere consueverat) atque honorificè à beatæ memoriæ Papæ Agathone susceptus est: petiitque, & accepit ab eo in munimentum libertatis quod fecerat, epistolam privilegii ex

auctoritate Apostolicâ firmatam; juxta quod Egfridum Regem voluisse, ac licentiam dedisse noverat, quo concedente, & possessionem terræ largiente, ipsum Monasterium fecerat. Accepit & præfatum Johannem Abbatem Britanniam perducendum; quatenus in Monasterio suo cursum canendi annum, sicut ad sanctum Petrum Romæ agebatur, edoceret: egitque Abba-Johannes ut jussionem acceperat Pontificis, & ordinem videlicet, ritumque canendi ac legendi vivâ voce præfati Monasterii cantores edocendo, & ea quæ totius anni circulus in celebratione dierum festorum poscebat, etiam litteris mandando: quæ hætenus in eodem Monasterio servata, & à multis jam sunt circumquaque transscripta. Non solùm autem idem Johannes ipsius Monasterii Fratres docebat, verùm de omnibus penè ejusdem provinciæ Monasteriis ad audiendum eum, qui cantandi erant periti, confluebant. Sed & ipsum per loca in quibus doceret, multi invitare curabant. Ipse autem excepto cantandi vel legendi munere, & aliud in mandatis ab Apostolico Papâ acceperat, ut cujus esset fidei Anglorum Ecclesia, diligenter edisceret, Romamque rediens referret. Nam & Synodum beati Papæ Martini, centum quinque Episcoporum consensu non multò antè Romæ celebratam, contra eos maximè, qui unam in Christo operationem & voluntatem prædicabant, secum veniens attulit, atque in præfato religiosissimi Abbatis Benedicti Monasterio transcribendam commodavit. Tales namque eo tempore, Constantinopolitanæ Ecclesiæ fidem multùm turbaverant; sed Domino donante proditi jam tunc, & victi sunt. Unde volens Agatho Papa, sicut in aliis provinciis, ita etiam in Britannia qualis esset status Ecclesiæ, quàm ab hæreticorum contagis castus, ediscere, hoc negotium reverentissimo Abbati Johanni Britanniam destinato injunxit. Quamobrem collectâ pro hoc in Britannia Synodo quam diximus, inventa est in omnibus fides Catholica inviolata: datumque illi exemplar ejus Romam perferendum. Verùm ille patriam revertens, non multò postquam Oceanum transiit, arreptus infirmitate, ac defunctus est: corpusque ejus ab amicis propter amorem sancti Martini, cujus Monasterio præerat, Turonis delatum, atque

honorificè sepultum est. Nam & benigno Ecclesiæ illius hospitio, cum Britanniam iret, exceptus est: rogatusque multum à Fratribus, ut Romam revertens, illo itinere veniret, atque ad eam diverteret Ecclesiam. Denique ibidem adjuutores itineris & injuncti operis accepit: qui etsi in itinere defunctus est, nihilominus exemplum Catholicæ fidei Anglorum Romam perlatum est, atque ab Apostolico Papâ, omnibusque qui audire vel legere, gratantissimè susceptum.

CAPUT XIX.

Ut Edilthrid Regina virgo perpetua permanserit, cujus nec corpus in monumento corrumpi potuerit.

ACCEPIT autem Rex *Ecgfrid* conjugem nomine *Edilthridam*, filiam *Anna* Regis Orientalium Anglorum, cujus sapius mentionem fecimus, viri benè religiosi, ac per omnia mente & opere egregii: quam & alter ante illum vir habuerat uxorem, Princeps videlicet Australium Girviorum, vocabulo *Tenberct*. Sed illo post modicum temporis, ex quo eam accepit, defuncto, data est Regi præfato: cujus consortio cum duodecim annis uteretur, perpetuâ tamen mansit virginitatis integritate gloriosa; sicut mihimet sciscitanti, (cum an hoc ita esset, quibusdam venisset in dubium) beatæ memoriæ *Vilfrid* Episcopus referebat, dicens se integritatis ejus esse certissimum: adeo ut *Ecgfridus* promiserit se ei terras ac pecunias multas esse donaturum, si Reginæ posset persuadere ejus uti connubio, quia sciebat illam nullum virorum plus illo diligere. Nec diffidendum est nostrâ etiam ætate fieri potuisse, quod ævo præcedente aliquoties factum fideles historiæ narrant: donante uno eodemque Domino, qui se nobiscum usque in finem sæculi manere pollicetur. Nam etiam signum divini miraculi, quo ejusdem feminæ sepulta caro corrumpi non potuit, indicio est, quia à viri contactu incorrupta duraverit: quæ multum diu Regem postulans ut sæculi curas relinquere, atque in Monasterio, tantum vero Regi Christo servire permitte-

retur; ubi vix aliquando impetravit, intravit Monasterium Ebbæ Abbatissæ, quæ erat amira Regis Ecgfridi, positum in loco quem *Coludi urbem* nominant, accepto velamine sanctimonialis habitûs à præfato Antistite Vilsfido. Post annum verò ipsa facta est Abbatissa in regione quæ vocatur *Elge*; ubi constructo Monasterio virginum Deo devotarum perplurium mater virgo, & exemplis vitæ cælestis esse cœpit, & monitis. De quâ ferunt, quia ex quo Monasterium petiit, nunquam lineis, sed solum laneis vestimentis uti voluerit; raròque in calidis balneis, præter imminentibus sollemnibus majoribus, verbi gratiâ Paschæ, Pentecostes, Epiphaniæ, lavari voluerit; & tunc novissima omnium, lotis prius suo, suarumque Ministrarum obsequio cæteris, quæ ibi essent, famulabus Christi. Rarò, præter majora sollemnia, vel arctiorem necessitatem, plusquam semel per diem manducavit: semper, si non infirmitas gravior prohibuisset, ex tempore matutinæ synaxeos, usque ad ortum diei, in Ecclesiâ precibus intenta persisterit. Sunt etiam qui dicant quia per prophetiæ spiritum, & pestilentiam quâ ipsa esset moritura, prædixerit, & numerum quoque eorum, qui de suo Monasterio hoc essent de mundo rapiendi, palam cunctis præsentibus intimaverit. Rapta est autem ad Dominum in medio suorum, post annos septem, ex quo Abbatissæ gradum susceperat: & æquè ut ipsa iusserat, non alibi quam in medio eorum, juxta ordinem quo transierat, ligneo in locello sepulta. Cui successit in ministerium Abbatissæ soror ejus *Sexburg*, quam habuerat in conjugem *Earcenbert* Rex Cantuariorum. Et cum sedecim annis erat sepulta, placuit eidem sorori Abbatissæ levare ossa ejus, & in locello novo posita in Ecclesiam transferri; iussitque quosdam de Fratribus quærete lapidem, de quo locellum in hoc facere possent: qui ascensâ navi (ipsa enim regio *elge* undique est aquis & paludibus circumdata, neque lapides majores habet) venerunt ad civitatem quandam desolatam, non procul inde sitam, quæ linguâ Anglorum *Grantacestir* vocatur: & mox invenerunt juxta muros civitatis locellum de marmore albo pulcherrimè factum, operculo quoque similis lapidis aptissimè tectum. Unde intellegentes à Domino suum iter esse pro-

speratum, gratias agentes retulerunt ad Monasterium. Cúm-
 que corpus sacræ virginis ac sponsæ Christi aperto sepulcro
 esset prolatum in lucem, ita incorruptum inventum est, ac
 si eodem die fuisset defuncta, sive humo condita; sicut præ-
 fatus Antistes *Vulfrid*, & multi alii qui novère, testantur.
 Sed certiori notitiâ Medicus *Cinyfrid*, qui & morienti illi,
 & elevata de tumulo adfuit: qui referre erat solitus, quòd
 illa infirmata habuerat tumorem maximum sub maxillâ. Jus-
 seruntque me, inquit, incidere tumorem illum, ut efflueret
 noxius humor qui merat: quod dum facerem, videbatur illa
 per biduum aliquantò levius habere; ita ut multi putarent,
 quòd sanari posset à languore. Tertiâ autem die prioribus
 adgravata doloribus, & rapta confestim de mundo, dolorem
 omnem ac mortem perpetuâ salute ac vitâ mutavit. Cúm-
 que post tam multos annos elevanda essent ossa de sepulcro,
 & extento desuper papilione, omnis congregatio, hinc Fra-
 trum, inde Sororum psallens circumstaret, ipsa autem Ab-
 batissa intus cum paucis ossa elevatura & delatura intrasset,
 repentè audivimus Abbatissam clarâ voce intus proclamare:
 Sit gloria nomini Domini. Nec multò post clamaverunt me,
 intus referato ostio papilionis: vidique elevatum de tumulo,
 & positum in lectulo corpus sacræ Deo virginis quasi dor-
 mientis simile. Sed & discooperto vultûs indumento, mon-
 straverunt mihi etiam vulnus incisuræ quod feceram, cura-
 tum; ita ut mirum in modum pro aperto & hiançe vulnere
 cum quo sepulta erat, tenuissima tunc cicatricis vestigia pa-
 rerent. Sed & linreamina omnia quibus involutum erat cor-
 pus, integra apparuerunt, & ita nova, ut ipso die videren-
 tur castis ejus membris esse circumdata. Ferunt autem quia
 cùm præfato tumore ac dolore maxillæ sive colli premeretur,
 multum delectata sit hoc genere infirmitatis, ac solita dicere:
 Scio certissimè, quia merito in collo pondus languoris porto,
 in quo juvenulam me memini supervacua monilium pondera
 portare: & credo quòd idèd me superina pietas dolore colli
 voluit gravari, ut sic absolvere reatu supervacue levitatis; dum
 mihi nunc pro auro & margaritis, de collo rubor tumoris,
 ardorque promineat. Contigit autem tactu indumentorum
 eorundem, & dæmonia ab obsessis fugata corporibus, &

infirmitates alias aliquoties esse curatas. Sed & loculum in quo primo sepulta est, nonnullis oculos dolentibus salutis fuisse perhibent; qui cum suum caput eidem loculo apponentes orassent, mox doloris sive caliginis incommodum ab oculis amoverent. Laverunt igitur Virginis corpus, & novis indutum vestibus intulerunt in Ecclesiam, atque in eo quod adlatum erat, sarcophago posuerunt, ubi usque hodie in magnâ veneratione habetur. Mirum verò in modum ita aptum corpori Virginis sarcophagum inventum est, ac si ei specialiter præparatum fuisset: & locus quoque capitis seorsum fabricatus, ad mensuram capitis illius aptissimè figuratus apparuit. Est autem *Elge* in provinciâ Orientalium Anglorum regio familiarum circiter sexcentarum, in similitudinem insulæ, vel paludibus (ut diximus) circumdata, vel aquis: unde & à copiâ anguillarum quæ in iisdem paludibus capiuntur, nomen accepit; ubi Monasterium habere desideravit memorata Christi famula, quoniam de provinciâ eorundem Orientalium Anglorum ipsa (ut præfati sumus) carnis originem duxerat.

CAPUT XX.

Hymnus de illâ.

VIDEATUR opportunum huic Historiæ, etiam hymnum virginittatis inferere, quem ante annos plurimos in laudem & præconium ejusdem Reginæ ac sponsæ Christi elegiaco metro composuimus, & imitari morem sacræ Scripturæ, cujus Historiæ carmina plurima indita: & hæc metro ac versibus constat esse composita.

Alma Deus Trinitas, quæ sæcula cuncta gubernas,

Adnue jam captis, alma Deus Trinitas.

Bella Maro resonet, nos pacis dona canamus:

Munera nos Christi, bella Maro resonet.

Carmina casta mihi, sæda non raptus Helena.

Luxus eris lubricis, carmina casta mihi.

Dona superna loquar, misera non prelia Troja,

Terra quibus gaudet: dona superna loquar.

En Deus altus adit veneranda Virginis alvum:
Liberet ut homines, en Deus altus adit.
Femina Virgo parit mundi devota parentem,
Porta Maria Dei, femina Virgo parit.
Gaudet amica cohors, de Virgine matre Tonantis:
Virginitate micans gaudet amica cohors.
Hujus honor genuit casto de germine plures,
Virgineos flores hujus honor genuit.
Ignibus usta feris Virgo non cessat Agatha,
Eulalia & perfert ignibus usta feris.
Casta feras superat mentis proculmine Thecla,
Euphemia sacra casta feras superat.
Lata ridet gladios ferro robustior Agnes,
Cacilia infestos lata ridet gladios.
Multus in orbe viget per sobria corda triumphus,
Sobrietatis amor multus in orbe viget.
Nostra quoque egregia jam tempora Virgo beavit:
Editrida nites nostra quoque egregia.
Orta patre eximio, regali & stemmate clara:
Nobilior domino est, orta patre eximio.
Percipit inde decus Reginz, & sceptrum sub astris,
Plus super astra manens, percipit inde decus.
Quid petis alma virum, sponso jam dedita summo?
Sponsus adest Christus, quid petis alma virum?
Regis ut atheri matrem jam credo sequaris:
Tu quoque sis mater Regis ut atheri.
Sponsa dicata Deo bis sex regnaverat annis,
Inque Monasterio est sponsa dicata Deo.
Tota sacrata polo celsis ubi floruit actis,
Reddidit atque animam tota sacrata polo.
Virginis alma caro est tumulata bis octo Novembris,
Nec putet in tumultu Virginis alma caro.
Christe, tui est operis, quia vestis & ipsa sepulcro
Inviolata nitet: Christe, tui est operis.
Hydros & ater abit sacra pro vestis honore,
Morbi diffugiunt, hydros & ater abit.
Zelus in hoste furis quondam qui vicerat Evam:
Virgo triumphat evans, zelus in hoste furis.

Aspice nuptia Deo, quæ sit tibi gloria terris:

Quæ maneat calis, aspice nuptia Deo.

Munera lata capis festivæ fulgida sedis

Ecce venit sponsus, munera lata capis.

Et nova dulcisono modularis, carmina plectro:

Sponsa hymno exultas & nova dulcisono.

Nullus ob Alithroni comitatu segregat agni,

Quam affectu interat nullus ab Alithroni.

CAPUT XXI.

*Ut Theodorus Episcopus inter Ecgfridum & Edilredum Reges
pacem fecerit.*

ANNO regni Ecgfridi nono, conferto gravi prælio inter ipsum & Edilredum Regem Merciorum, juxta fluvium *Treanta*, occisus est *Elfuini*, frater Regis Ecgfridi, juvenis circiter decem & octo annorum, utrique provincie multum amabilis. Nam & sororem ejus, quæ dicebatur *Ostfrid*, Rex *Edilred* habebat uxorem. Cumque materies belli acrioris & inimicitie longioris inter Reges, populosque feroces videretur exorta, Theodorus Deo dilectus Antistes, divino fretus auxilio, salutiferâ exhortatione cœptum tanti periculi funditus exstinguit incendium: adco ut pacatis alterutrum Regibus ac populis, nullus anima hominis pro interfecto Regis fratre, sed debita solummodò multa pecuniæ Regi ultorì daretur. Cujus fœdera pacis multo exinde tempore inter eosdem Reges, eorûmq; regna durarunt.



CAPUT XXII.

ut vincula cujusdam captivi, cum pro eo Missæ cantarentur, soluta sint.

IN præfato autem prælio quo occisus est Rex *Elfuini*, memorabile quoddam factum esse constat, quod nequaquam silentio prætereundum arbitror, sed multorum salutem, si referatur, fore proficuum. Occisus est ibi inter alios, de militia ejus juvenis, vocabulo *Tunna*, qui cum die illo & nocte sequente inter cadavera occisorum similis mortuo jaceret, tandem recepto spiritu revixit, ac residens, sua vulnera, prout potuit, ipse alligavit: deinde modicum requietus levavit se, & coepit abire sicubi amicos qui sui curam agerent, posset invenire. Quod dum faceret, inventus est, & captus à viris hostilis exercitus, & ad Dominum ipsorum (Comitem videlicet Edilredi Regis) adductus: à quo interrogatus quis esset, timuit se militem fuisse confiteri; rusticum se potius & pauperem, atque uxoreo vinculo conligatum fuisse respondit: & propter victum militibus adferendum, in expeditionem se cum suis similibus venisse testatus est. At ille suscipiens eum, curam vulneribus egit, & ubi sanescere coepit, noctu eum ne aufugeret, vinciri præcepit. Nec tamen vinciri potuit: nam mox ut abiit qui vinxerant, eadem ejus sunt vincula soluta. Habebat enim germanum fratrem, cui nomen erat *Tunna*, Presbyterum & Abbatem Monasterii, in civitate quæ hæcenus ab ejus nomine *Tunnacesir* cognominatur: qui cum eum in pugna peremptum audiret, venit quaerere si fortè corpus ejus invenire posset, inventumque alium illi per omnia simillimum, putavit ipsum esse: quem ad Monasterium suum deferens, honorifice sepelivit, & pro absolutione animæ ejus sæpius Missas facere curavit. Quarum celebratione factum est quod dixi, ut nullus eum posset vincire, quin continuò solveretur. Interea Comes qui eum tenebat, mirari, & interrogare coepit, quare ligari non posset, an fortè litteras solutorias, de qualibus fabulæ ferunt, apud se haberet, propter quas ligari non posset. At ille re-

spondit, nihil se talium artium nosse; sed habeo fratrem, inquit, Presbyterum in meâ provinciâ, & scio quia ille me interfectum putans, pro me Missas celebrare facit: & si nunc in aliâ vitâ essem, ibi anima mea per intercessionem ejus solveretur à pœnis. Dùmque aliquanto tempore apud Comitum teneretur, animadverterunt qui cum diligentius considerabant, ex vultu, & habitu, & sermonibus ejus, quia non erat de paupere vulgo, (ut dixerat) sed de nobilibus. Tunc secretò advocans eum Comes, interrogavit intentius unde esset, promittens se nihil ei mali facturum pro eo, si simpliciter sibi quis fuisset, proderet. Quod dum ille faceret, ministrum se Regis fuisse manifestans, respondit: Et ego per singula tua responsa cognoveram quòd rusticus non eras, & nunc dignus quidem es morte, quia omnes fratres & cognati mei in illâ sunt pugna interempti; nec te tamen occidam, ne fidem mei promissi prævaricer. Ut ergo convaleuit, vendidit eum Lundoniam Frisoni cuidam; sed nec ab illo cum illuc duceretur, potuit ulla tenus alligari. Verùm cum alia atque alia vinculorum ei genera hostes imponent, dissoluta sunt: cumque vidisset qui emerat, vinculis eum non posse cohiberi, donavit ei facultatem sese redimendi, si posset. Tertiâ autem horâ, quando Missæ fieri solebant, sæpissime vincula solvebantur. At ille dato jurejurando ut rediret, vel pecuniam illi pro se mitteret, venit Cantiam, ad Regem *Hlotheri*, qui erat filius sororis *Ediltridæ* Reginae, (de quâ suprâ dictum est) qui & ipse quondam ejusdem Reginae minister fuerat: petiitque & accepit ab eo pretium suæ redemptionis, ac suo domino pro se (ut promiserat) misit: qui post hæc patriam reversus, atque ad suum fratrem perveniens, replicavit ex ordine cuncta quæ sibi adversa, quæve in adversis solatia provenissent: cognovitque referente illo, illis maximè temporibus sua fuisse vincula soluta, quibus pro se Missarum fuerant celebrata sollemnia. Sed & alia quæ periclitanti ei commoda contigissent & prospera, per intercessionem fraternam, & oblationem hostiæ salutaris, cælitus sibi fuisse donata intellexit. Multique hæc à præfato viro audientes accensi sunt in fide ac devotione pietatis ad orandum, vel ad eleemosynas faciendas, vel ad offeren-

das Domino victimas sacræ oblationis, pro ereptione suorum qui de sæculo migraverant : intellexerunt enim quòd sacrificium salutare ad redemptionem valeret & animæ & corporis sempiternam. Hanc mihi historiam, etiam quidam eorum qui ab ipso viro in quo facta est, audièrè, narraverunt : unde eam quia liquidò comperi, indubitanter Historiæ nostræ Ecclesiasticæ inferendam credidi.

CAPUT XXIII.

De obitu Hildæ Abbatisse.

ANNO post hunc sequente, hoc est, anno Dominicæ Incarnationis sexcentesimo octogesimo, religiosissima Christi famula Hilda, Abbatisa Monasterii quod dicitur *Streaneshalch*, (ut suprà retulimus) post multa quæ fecit in terris opera cælestia, ad percipiendâ præmia vitæ cælestis, de terris ablata transivit die quintâ decimâ Kalendarum Decembrium, cùm esset annorum sexaginta sex : quibus aquâ portione divisis, triginta tres primos in sæculari habitu nobilissimè conversata complevit, & totidem sequentes nobilius in Monachicâ vitâ Domino consecravit. Nam & nobilis natu erat, hoc est, filia nepotis Eduini Regis, vocabulo *Herici* : cum quo etiam Rege, ad prædicationem beatæ memoriæ Paulini, primi Nordanhymbrorum Episcopi, fidem & Sacramenta Christi suscepit, atque hæc usquedum ad ejus visionem pervenire meruit, intemerata servavit. Quæ cùm relicto habitu sæculari, illi soli servire decrevisset, secessit ad provinciam Orientalium Anglorum : (erat namque propinqua Regis illius) desiderans exinde, si quo modo posset, derelictâ patriâ, & omnibus quæcumque habuerat, in Galliam pervenire, atque in Monasterio *Cale* peregrinam pro Domino vitam ducere, quò faciliùs perpetuam in cælis patriam posset mereri. Nam & in eodem Monasterio soror ipsius *Hæreaid*, mater Aldulfi Regis Orientalium Anglorum, regularibus subdita disciplinis, ipso tempore coronam expectabat æternam : cujus æmulata exemplum, & ipsa.

proposito peregrinandi, annum totum in præfata provinciâ retenta est: deinde ab Aidano Episcopo in patriam revocata, accepit locum unius familiæ ad Septemtrionalem plagam *Vinni* fluminis, ubi æquè anno uno Monachicam cum paucis sociis vitam agebat. Post hæc facta est Abbatissa in Monasterio quod vocatur *Heruthen*; quod videlicet Monasterium factum erat non multò antè à religiosâ Christi famula *Hein*, quæ prima feminarum fertur in provinciâ Nordanhymbrorum propositum vestemque sanctimonialis habitûs, consecrante Aidano Episcopo, suscepisse. Sed illa post non multum tempus facti Monasterii, secessit ad civitatem Calcariam, quæ à gente Anglorum *Kalceestir* appellatur, ibique mansionem sibi instituit. Prælata autem regimini Monasterii illius famula Christi *Hild*, mox hoc regulari vitâ per omnia, prout à doctis viris discere poterat, ordinare curabat: nam & Episcopus *Aidan*, & quique noverant eam Religiosi, pro inlitâ ei sapientiâ, & amore divini famulatûs, sedulò eam visitare, obnixè amare, diligenter erudire solebant. Cùm ergo aliquot annos huic Monasterio, regularis vitæ institutioni multùm intenta præesset, contigit eam suscipere etiam construendum sive ordinandum Monasterium in loco qui vocatur *Strean s'halch*, quod opus sibi injunctum non segniter implevit. Nam eisdem quibus prius Monasterium, etiam hoc disciplinis vitæ regularis instituit: & quidem multùm inibi quoque justitiæ, pietatis, & castimonie, cæterarumque virtutum, sed maxime pacis & caritatis custodiam docuit: itaut in exemplum primitivæ Ecclesiæ nullus ibi dives, nullus esset egens, omnibus essent omnia communia, cùm nihil cujusquam videretur esse proprium. Tantæ autem erat ipsa prudentiæ, ut non solum mediocres quique in necessitatibus suis, sed etiam Reges ac Principes nonnunquam ab eâ quærerent consilium, & invenirent. Tantùm lectioni divinarum Scripturarum suos vacare subditos, tantùm operibus justitiæ se exercere faciebat, ut facillimè viderentur ibidem qui Ecclesiasticum gradum, hoc est, altaris officium aptè subirent, plurimi posse reperiri. Denique quinque ex eodem Monasterio postea Episcopos vidimus, & hos omnes singularis meriti ac sanctitatis viros, quorum

hæc sunt nomina, *Boja, Aetla, Ostfor, Iohannes, & Vilfrid*. De primo suprà diximus, quòd Eboraci fuerit consecratus Antistes: de secundo breviter intimandum, quòd in Episcopatum *Doracæstre* fuerit ordinatus: de ultimis infrà diceñdum est, quòd eorum primus Augustaldensis, secundus Eboracensis Ecclesiæ sit ordinatus Episcopus. De medio nunc dicamus, quia cum in utroque Hildæ Abbatiæ Monasterio lectioni & observationi Scripturarum operam dedisset, tandem perfectiora desiderans, venit Cantiam ad Archiepiscopum beatæ recordationis Theodorum: ubi postquàm aliquandiu lectionibus sacris vacavit, etiam Romam adire curavit, quòd eo temporis magnæ virtutis æstimabatur: & inde cum rediens Britanniam adisset, divertit ad provinciam Huietiorum, cui tunc Rex *Osric* præfuit, ibique verbum fidei prædicans, simul & exemplum vivendi sese videntibus atque audientibus exhibens, multo tempore mansit. Quo tempore Antistes provinciæ illius, vocabulo *Bosel*, tantà erat corporis infirmitate depressus, ut officium Episcopatus per se implere non posset: propter quod omnium iudicio præfatus vir in Episcopatum pro eo electus, ac iubente Edilredo Rege, per Vilfridum beatæ memoriæ Antistitem, qui tunc temporis Mediterraneorum Anglorum Episcopatum gerebat, ordinatus est: pro eo quòd Archiepiscopus Theodorus jam defunctus erat, & necdum alius pro eo ordinatus Episcopus. In quâ videlicet provinciâ paulò antè, hoc est, ante præfatum virum Dei Boselum, vir strenuissimus atque doctissimus, & excellentis ingenii, vocabulo *Tatfrid*, de ejusdem Abbatiæ Monasterio electus est Antistes: sed priusquam ordinari posset, morte immaturâ præreptus est. Non solum autem præfata Christi ancilla & Abbatissa *Hild*, quam omnes qui noverant, ob insigne pietatis & gratiæ, Matrem vocare consueverant, in suo Monasterio vitæ exemplo præsentibus exstitit: sed & plurimis longè manentibus, ad quos felix industriæ ac virtutis ejus rumor pervenit, occasionem salutis & correctionis ministravit. Oportebat namque impleri somnium quod mater ejus *Bregusuid* in infantia ejus vidit: quæ cum vir ejus *Hereric* exularet sub Rege Brittonum *Cerdice*, (ubi & veneno periit) vidit per somnium,

quasi subito sublatum cum quæsierit cum omni diligentia, nullumque ejus uspiam vestigium apparuerit. Verum cum sollertissimè illum quæsisset, exemplò se reperire sub veste suâ monile pretiosissimum : quod dum attentius consideraret, tanti fulgore luminis refulgere videbatur, ut omnes Brittaniz fines illius gratiâ splendoris impleret. Quod nimirum somnium veraciter in filiâ ejus, de quâ loquimur, impletum est : cujus vita non sibi solummodò, sed multis benè vivere volentibus exempla operum lucis præbuit. Verum illa cum multis annis huic Monasterio præesset, placuit pio provisorii salutis nostræ, sanctam ejus animam longâ etiam carnis infirmitate examinari, ut juxta exemplum Apostoli, virtus ejus in infirmitate perficeretur. Percussa etenim, febribus, acri cæpit ardore fatigari ; & per sex continuos annos eadem molestiâ laborare non cessabat : in quo toto tempore nunquam ipsa vel conditori suo gratias agere, vel commissum sibi gregem & publicè & privatim docere prætermittebat. Nam suo prædocta exemplo, monebat omnes, & in salute acceptâ corporis Domino obtemperanter serviendum, & in adversis rerum, sive in infirmitatibus membrorum fideliter Domino esse gratias semper agendas. Septimo ergo suæ infirmitatis anno, converso ad interanea dolore, ad diem pervenit ultimum, & circâ galli cantum, præcepto viatico sacrosanctæ communionis, cum accersitis ancillis Christi, quæ erant in eodem Monasterio, de servandâ eas invicem, immò cum omnibus pace Evangelicâ admoneret ; inter verba exhortationis læta mortem vidit, immò (ut verbis Domini loquar) de morte transivit ad vitam. Quâ videlicet nocte Dominus omnipotens obitum ipsius in alio longiùs posito Monasterio (quod ipsa eodem anno construxerat, & appellatur *Hacanos*) manifestâ visione revelare dignatus est. Erat in ipso Monasterio quædam sanctimonialis femina, nomine *Begu*, quæ triginta & amplius annos dedicatâ Domino virginitate, in Monachicâ conversatione serviebat. Hæc tunc in dormitorio Sororum pausans, audivit subito in aëre notum campanæ sonum, quo ad orationes excitari vel convocari solebant, cum quis eorum de sæculo fuisset evocatus : apertisque (ut sibi videbatur) oculis aspexit, detecto domus culmine, fusam desuper lucem

lucem omnia replevisse : cui videlicet luci cùm sollicita intenderet , vidit animam præfatæ Dei famulæ in ipsâ luce comitantibus ac ducentibus Angelis ad cælum ferri. Cùmque somno excussa videret cæteras pausantes circa se Sorores , intellexit vel in somnio , vel in visione mentis ostensum sibi esse quod viderat. Statimque exsurgens nimio timore perterrita cucurrit ad Virginem , quæ tunc Monasterio Abbatissæ vice præfuit , cui nomen erat *Frigyd* , fletuque ac lacrymis multum persusa , ac suspiria longa trahens nunciavit , Matrem illarum omnium *Hild* , Abbatissam jam migrasse de sæculo , & se aspectante , cum luce immensâ , ducibus Angelis ad æternæ limina lucis , & supernorum consortia civium ascendisse. Quod cùm illa audisset , suscitavit cunctas Sorores , & in Ecclesiam convocatas , orationibus ac psalmis pro animâ Matris operam dare monuit. Quod cùm residuo noctis tempore diligenter agerent , venerunt primo diluculo Fratres qui ejus obitum nunciarent , à loco ubi defuncta est. At illæ respondentes dixerunt , se prius eadem cognovisse : & cùm exponerent per ordinem , quomodò hæc , vel quando didicissent , inventum est , eadem horâ transitum ejus illis ostensum esse per visionem , quâ illam referebant exisse de mundo. Pulchrâque rerum concordia procuratum est divinitus , ut cùm illi exitum ejus de hac vitâ viderent , tunc isti introitum ejus in perpetuam animarum vitam cognoscerent. Distant autem inter se Monasteria hæc tredecim fermè millibus passuum. Ferunt autem quòd eadem nocte , in ipso quoque Monasterio ubi præfata Dei famula obiit , cuidam Virginum Deo devotatum , quæ illam immenso amore diligebat , obitus illius in visione apparuerit , quæ animam ejus cum Angelis ad cælum ire conspexerit , atque hoc ipsâ quâ factum est horâ , his quæ secum erant , famulabus Christi manifestè narraverit , easque ad orandum pro animâ ejus , etiam priusquàm cætera Congregatio ejus obitum cognovisset , excitaverit. Quod ita fuisse factum mox Congregationi manè factò innotuit. Erat enim hæc , ipsâ horâ cum aliis nonnullis Christi ancillis in extremis Monasterii locis seorsum posita , ibi nuper venientes ad conversionem femine solebant probari , do-

CAPUT XXIV.

*Quod in Monasterio ejus, Fratri cuidam canendi donum
divinitus sit concessum.*

IN hujus Monasterio Abbatissæ fuit Frater quidam divi-
nâ gratiâ specialiter insignis, qui carmina religioni &
pietati apta facere solebat; itaut quicquid ex divinis litteris
per interpretes disceret, hoc ipse post pusillum verbis poë-
ticis maximâ suavitate & compunctione compositis; in suâ,
id est, Anglorum linguâ proferret. Cujus carminibus mul-
torum sæpe animi ad contemptum sæculi, & ad appetitum
sunt vitæ cælestis accensi. Et quidem & alii post illum in
gente Anglorum religiosa poemata facere tentabant; sed ei
nullus æquiparari potuit. Namque ipse, non ab hominibus,
neque per hominem institutus canendi artem didicit; sed
divinitus adjutus gratis canendi donum accepit. Unde nihil
unquam frivoli & supervacui poematis facere potuit; sed ea
tantummodò quæ ad religionem pertinent, religiosam ejus
linguam decebant. Siquidem in habitu sæculari usque ad
tempora provectioris ætatis constitutus nihil carminum ali-
quando didicerat. Unde nonnunquàm in convivio, cum
esset lætitiæ causâ ut omnes per ordinem cantare deberent,
ille ubi adpropinquare sibi cytharam cernebat, surgebat à
mediâ cœnâ, & egressus ad suam domum repedabat. Quod
dum tempore quodam faceret, & relictâ domo convivii
egressus esset ad stabula jumentorum, quorum ei custodia
noctæ illâ erat delegata, ibique horâ competentem membra
dedisset sopori, adstitit ei quidam per somnium, eumque
salutans, ac suo appellans nomine: *Cedmon*, inquit, canta
mihi aliquid. At ille respondens, Nescio, inquit, cantare;
nam & ideò de convivio egressus, huc secessi, quia cantare
non poteram. Rursùm ille qui cum eo loquebatur, Attamen,
ait, cantare mihi habes. *Quid*, inquit, debeo cantare? At

ille, Canta, inquit, principium creaturarum. Quo accepto responso, statim ipse cœpit cantare in laudem Dei conditoris, versus quos nunquam audierat, quorum iste est sensus: Nunc laudare debemus auctorem regni cœlestis, potentiam creatoris, & consilium illius facta Patris gloriæ. Quomodo ille cùm sit æternus Deus, omnium miraculorum auctor exstitit, qui primò filiis hominum cælum pro culmine tecti, dehinc terram custos humani generis omnipotens creavit. Hic est sensus, non autem ordo ipse verborum quæ dormiens ille canebat: neque enim possunt carmina, quamvis optimè composita, ex aliâ in aliam linguam ad verbum sine detrimento sui decoris ac dignitatis transferri. Exurgens autem à somno, cuncta quæ dormiens cantaverat, memoriter retinuit, & eis mox plura in eundem modum verba Deo digni carminis adjunxit. Veniensque manè ad villicum qui sibi præerat, quid doni percepisset indicavit, atque ad Abbatissam perductus, jussus est, multis doctioribus viris præsentibus, indicare somnium, & dicere carmen, ut universorum judicio quid vel unde esset quod referebat, probaretur. Visumque est omnibus, cœlestem ei à Domino concessam esse gratiam. Exponebantque illi quandam sacræ historiæ sive doctrinæ sermonem, præcipientes ei, si posset, hunc in modulationem carminis transferre. At ille suscepto negotio abiit, & manè rediens, optimo carmine quod jubebatur, compositum reddidit. Unde mox Abbatissa amplexata gratiam Dei in viro, sæcularem illum habitum relinquere, & monachicum recipere propositum docuit, susceptumque in Monasterium cum omnibus suis Fratrum cohorti adsociavit, jussitque illum seriem sacræ Historiæ doceri. At ipse cuncta quæ audiendo discere poterat, rememorando secum, & quasi mundum animal, ruminando, in carmen dulcissimum convertebat, suaviusque resonando, doctores suos vicissim auditores sui faciebat. Canebat autem de creatione mundi, & origine humani generis, & totâ Genesis historiâ, de egressu Israël de Ægypto, & ingressu in terram repromissionis, de aliis plurimis sacræ Scripturæ historiis, de Incarnatione Domini, ac Passione & Resurrectione, & Ascensione in cælum, de Spiritûs

sancti adventu, & Apostolorum doctrinâ. Item de terrore futuri judicii, & horrore pœnæ gehennalis, ac dulcedine regni cœlestis multa carmina faciebat; sed & alia perplura de beneficiis & judiciis divinis, in quibus cunctis homines ab amore scelerum abstrahere, ad dilectionem verò & solertiam bonæ actionis excitare curabat. Erat enim vir multum religiosus, & regularibus disciplinis humiliter subditus; adversum verò illos qui aliter facere volebant, zelo magni fervoris accensus: unde & pulcro vitam suam sine conclusionis. Nam propinquantem horâ sui discessus, quatuordecim diebus, præveniente corporeâ infirmitate, pressus est; adedò tamen moderatè, ut & loqui toto eo tempore posset & ingredi. Erat autem in proximâ casâ, in quâ infirmiores & qui propè morituri esse videbantur, induci solebant. Rogavit ergo Ministrum suum vespere incumbente, nocte quâ de sæculo erat exiturus, ut in eâ sibi locum quiescendi præpararet: qui miratus cur hoc rogaret, qui nequaquam adhuc moriturus esse videbatur, fecit tamen quod dixerat. Cùmque ibidem positi vicissim aliqua gaudente animo, unâ cum eis qui ibidem antea inerant, loquerentur ac jocarentur, & jam mediæ noctis tempus esset transcensum, interrogavit omnes, si Eucharistiam intus haberent. Respondebant, Quid opus est Eucharistia? neque enim mori adhuc habes, qui tam hilariter nobiscum velut sospes loqueris. Rursus ille: Et tamen, ait, afferre mihi Eucharistiam. Quâ acceptâ in manu, interrogavit, si omnes placidum erga se animum, & sine querelâ controversiæ & rancoris haberent. Respondebant omnes, placidissimam se mentem ad illum, & ab omni irâ remotam habere: cùmque vicissim rogabant, an placidam erga ipsos mentem haberet. Qui confestim respondit: Placidam ego mentem (filioli) erga omnes Dei famulos gero. Sicque se cœlesti munienti viatico, vitæ alterius ingressui paravit; & interrogavit, quàm propè esset hora, quâ Fratres ad dicendas Domino laudes nocturnas excitari deberent. Respondebant, Non longè est. At ille: Bene ergo, exspectemus horam illam. Et signans se signo sanctæ crucis, reclinavit caput ad cervical, modicumque obdormiens, ita cum silentio vitam sinivit. Sicque fa-

Etum est ut quomodo simplici ac purâ mente, tranquillâque devotione Domino servierat, ita etiam tranquillâ mente mundum relinquens, ad ejus visionem veniret, illâque linguâ, quæ tot salutaria verba in laudem Conditoris composuerat, ultima quæque verba in laudem ipsius, signando sese, & spiritum suum in manus ejus commendando clauderet: qui etiam præcius sui obitus existisse, ex his quæ narravimus, videtur.

CAPUT XXV.

Qualis visio cuidam viro Dei apparuerit, priusquam Monasterium Coludane urbis esset incendio consumptum.

His temporibus Monasterium Virginum, quod *Coludan* urbem cognominant, cujus & supra meminimus, per culpam incertiæ flammis absumptum est. Quod tamen à malitiâ inhabitantium in eo, & præcipuè illorum qui majores esse videbantur, contigisse omnes qui novere, facillimè potuerunt advertere. Sed non defuit puniendis admonitio divinæ pietatis, quâ correcti, per jejunia, fletus & preces iram à se (instar Ninivitarum) justî Judicis averterent. Erat namque in eodem Monasterio vir de genere Scottorum, *Adamnanus* vocabulo, ducens vitam in continentiam & orationibus multum Deo devotam, itaut nihil unquam cibi & potus, exceptis die Dominicâ & quintâ Sabbati perciperet; sæpe autem noctes integras pervigil in oratione transigeret. Quæ quidem illi districtio vitæ arctioris, primò ex necessitate emendandæ suæ pravitatis obvenerat. Sed procedente tempore necessitatem in consuetudinem vertetar: Siquidem in adolescentiâ suâ sceleris aliquid commiserat, quod commissum, ubi ad cor suum rediit, gravissimè exhortuit, & se pro illo puniendum à districto Judice timebat. Accedens ergo ad Sacerdotem, à quo sibi sperabat iter salutis posse demonstrari, confessus est reatum suum, petiitque ut consilium sibi daret, quo posset fugere à venturâ Dei irâ. Qui audito ejus commissio dixit: Grande vulnus gran-

dioris curam medelæ desiderat : & ideo jejuniis , psalmis & orationibus , quantum vales , insiste , quo præoccupando faciem Domini in confessione propitium eum invenire merearis. At ille quem nimius reæ conscientie tenebar dolor , & internis peccatorum vinculis quibus gravabatur , ocius desiderabat absolvi : Adolescentior sum , inquit , ætate , & vegetus corpore : quidquid mihi imposueris agendum , dummodò salvus fiam in die Domini , totum faciliè feram , etiamsi totam noctem stando in precibus peragere , & integram septimanam jubeas abstinendo transigere. Qui dixit : Multum est ut totâ septimanâ absque alimento corporis perdures ; sed biduanum vel triduanum sat est observare jejunium. Hoc facito , donec post modicum tempus rediens ad te , quid facere debeas , & quamdiù pœnitentiæ insistere tibi plenius ostendam. Quibus dictis , & descriptâ illi mensurâ pœnitendi , abiit Sacerdos , & ingruente causâ subitâ , secessit in Hiberniam , unde originem traxerat , neque ultrâ ad eum juxta suum conditum rediit. At ipse memor præcepti ejus , simul & promissi sui , totum se lacrymis pœnitentiæ , vigiliis sanctis , & continentie mancipavit ; itaut quintâ solum Sabbati & Dominicâ (sicut prædixi) reficeretur , cæteris septimanæ diebus jejunus permaneret. Cùmque Sacerdotem suum in Hiberniam secessisse , ibique defunctum esse audisset , semper ex eo tempore , juxta conditum ejus memoratum , continentie modum observabat ; & quod causâ divini timoris , semel ob reatum compunctus cœperat , jam causâ divini amoris , delectatus præmiis indefessus agebat. Quod dum multo tempore sedulus exsequeretur , contigit eum die quadam de Monasterio illo longius egressum , comitante secum uno de Fratribus , peracto itinere redire : qui cùm Monasterio propinquarent , & ædificia illius sublimiter erecta aspicerent , solutus est in lacrymis vir Dei , & tristitiam cordis vultu indice prodebat. Quod intuens comes , quare faceret inquisivit. At ille : Cuncta , inquit , hæc quæ cernis ædificia publica vel privata , in proximo est ut ignis absumens in cinerem convertat. Quod ille audiens , mox ut intraverunt Monasterium , Matri Congregationis , vocabulo *Ebba* , curavit indicare. At illa meritò

turbata de tali præfagio, vocavit ad se virum, & diligentius ab eo rem, vel unde hoc ipse nosset, inquirebat. Qui ait: Nuper occupatus noctu vigiliis & psalmis, vidi adstantem mihi subitò quendam incogniti vultûs: cujus præsentia cum essem exterritus, dixit mihi ne timerem; & quasi familiari me vocè alloquens, Bene facis, inquit, qui tempore isto nocturno quietis, non somno indulgere, sed vigiliis & orationibus insistere maluisti. At ego, Novi, inquam, multum mihi esse necesse vigiliis salutaribus insistere, & pro meis erratibus sedulo Dominum deprecari. Qui adjiciens, Verum, inquit, dicis, quia tibi & multis opus est peccata sua bonis operibus redimere, & cum cessant à laboribus rerum temporalium, tunc pro appetitu æternorum bonorum liberiùs laborare; sed hoc tamen paucissimi faciunt. Si quidem modò totum hoc Monasterium ex ordine perlustrans, singulorum casas ac lectulos inspexi, & neminem ex omnibus præter te erga sanitatem animæ suæ occupatum reperi: sed omnes prorsus & viri & feminae, aut somno torpent inerti, aut ad peccata vigilant. Nam & domunculae quæ ad orandum vel legendum factæ erant, nunc in comessationum, potationum, fabulationum, & cæterarum sunt inlecebrarum cubilia conversæ. Virgines quoque Deo dicatæ, contemptâ reverentiâ suæ professionis, quotiescumque vacant, texendis subtilioribus indumentis operam dant, quibus aut seipsas ad vicem sponsarum, in periculum sui statûs adornent, aut externorum sibi virorum amicitiam comparent. Unde meritò loco huic & habitatoribus ejus gravis de celo vindicta flammis sævientibus præparata est. Dixit autem Abbatisa: Et quare non citiùs hoc compertum mihi revelare voluisti? Qui respondit: Timui propter reverentiam tuam, ne fortè nimium contutbareris; & tamen hanc consolationem habeas, quòd in diebus tuis hæc plaga non superveniet. Quâ divulgatâ visione aliquantulum loci accolæ paucis diebus timere, & seipsos intermissis facinoribus castigare cœperunt. Verum post obitum ipsius Abbatisæ redierunt ad pristinas sordes, immò sceleratiora fecerunt. Et cum dicerent, Pax & securitas, ex templo præfatæ ultionis sunt pœnâ multati. Quæ mihi cuncta sic esse facta reverentissimus meus Compresby-

ter *Edgils* referebat, qui tunc in illo Monasterio degebat. Postea autem discedentibus inde ob desolationem plurimis incolatum, in nostro Monasterio plurimo tempore conversatus, ibidemque defunctus est. Hæc idem nostræ Historiæ inferenda credidimus, ut admoneremus lectorem operum Domini, quàm terribilis sit in consiliis super filios hominum; ne fortè nos tempore aliquo carnis inlecebris servientes, minùtque Dei iudicium formidantes, repentina ejus ira corripiat, & vel temporalibus damnis justè sæviens affligat, vel ad perpetuam perditionem districtius examinans tollat.

CAPUT XXVI.

De morte Ecgfridi & Lothari Regum.

ANNO Dominicæ Incarnationis sexcentesimo octogesimo quarto, Ecgfridus Rex Nordanhymbrorum missus in Hiberniam cum exercitu, duce Bercto, vastavit miserè gentem innoxiam, & nationi Anglorum semper amicissimam; itaut ne Ecclesiis quidem, aut Monasteriis manus parceret hostilis. At Insulani, & quantum valere, armis arma repellebant, & invocantes divinæ auxiliū pietatis, cælitus se vindicari continuis diu imprecationibus postulabant. Et quamvis maledici regnum Dei possidere non possint, creditum est tamen, quòd hi qui merito impietatis suæ maledicebantur, ocius Domino vindice pœnas sui reatûs luerent. Siquidem anno post hunc proximo idem Rex, cum temerè exercitum ad vastandam Pictorum provinciam duxisset, multum prohibentibus amicis, & maximè beatæ memoriæ Cudberto, qui nuper fuerat ordinatus Episcopus, introductus est (simulantibus fugam hostibus) in angustias inaccessorum montium, & cum parte maximà copiarum quas secum adduxerat, extinctus anno ætatis suæ quadragesimo, regni autem quinto decimo, die XIII. Kalendarum Juniarum. Et quidem, ut dixi, prohibuerunt amici ne hoc bellum iniret, sed quoniam anno præcedente noluerat audire reverentissi-

mum

mum Patrem Ecgerctum, ne Scotiam nil se lædentem impugnaret, datum est illi ex pœnâ peccati illius, ne nunc eos qui ipsum ab interitu revocare cupiebant, audiret. Ex quo tempore spes cœpit, & virtus regni Anglorum fluere, & retrò sublapsa referri. Nam & Picti terram possessionis suæ quam tenuerunt Angli & Scotti qui erant in Britanniâ, & Brittonum quoque pars nonnulla, libertatem receperunt, quam & hæcenus habent per annos circiter quadraginta sex; ubi inter plurimas gentes Anglorum vel intemptos gladio, vel servitio addictos, vel de terrâ Pictorum fugâ lapsos, etiam reverentissimus vir Dei *Triumwini*, qui in eos Episcopatum acceperat, recessit cum suis qui erant in Monasterio *Ebbecurnig*, posito quidem in regione Anglorum, sed in viciniâ freti quod Anglorum terras, Pictorumque disternat; cœsque ubicumque poterat, amicis per Monasteria commendans, ipse in sæpedito famulorum famularumque Dei Monasterio, quod vocatur *Sireaneshale*, locum mansionis elegit: ibique cum paucis suorum in monachicâ districtione vitam non solummodò, sed & multis utilem plurimo annorum tempore duxit: ubi etiam defunctus, in Ecclesiâ beati Petri Apostoli juxta honorem, & vitâ & gratiâ ejus condignum conditus est. Præerat quidem tunc eidem Monasterio regia virgo *Elbsted*, unâ cum matre Eanfledæ, quarum suprâ fecimus mentionem. Sed adveniente illuc Episcopo, maximum regendi auxilium, simul & suæ vitæ solatium devota Deo doctrix invenit. Successit autem Ecgfrido in regnum *Alfrid*, vit in Scripturis doctissimus, qui frater ejus & filius *Oswin* Regis esse dicebatur: destructumque regni statum, quamvis intra fines angustiores, nobiliter recuperavit. Quo videlicet anno, qui est ab Incarnatione Dominicæ sexcentessimus octogesimus quintus, *Hlothari* Cantuariorum Rex, cum post Ecgerctum fratrem suum, qui novem annis regnaverat, ipse duodécim annis regnasset, mortuus erat octavo Idus Februarii. Vulneratus namque est in pugnâ Australium Saxonum, quos contra eum *Edric*, filius Ecgercti, adgregarat, & inter medendum defunctus. Ac post eum idem *Edric* anno uno ac dimidio regnavit: quo defuncto regnum illud per aliquod temporis spatium Reges dubii

vel externi disperdiderunt: donec legitimus Rex *Vilfred*, ut est, filius *Ecgbercti*, confortatus in regno, religione simul & industriâ gentem suam ab extraneâ invasione liberaret.

CAPUT XXVII.

Ut vir Domini Cudbertus sit Episcopus factus: utque in monachicâ adhuc vitâ positus vixerit vel docuerit.

IPso etiam anno quo finem vitæ accepit Rex *Ecgfrid*, Episcopum (ut diximus) fecerat ordinari Lindisfarnensium Ecclesiæ, virum sanctum & venerabilem Cudbertum, qui in insulâ permodicâ, quæ appellatur *Farne*, & ab eâdem Ecclesiâ novem fermè millibus passuum in Oceano procul abest, vitam solitariam per annos plures in magnâ corporis & mentis continentia duxerat. Qui quidem à primâ ætate pueritiæ, studio religiosæ vitæ semper ardebat; sed ab ineunte adolescentiâ monachicum & nomen adsumpsit, & habitum. Intravit enim primò Monasterium *Maitros*, quod in ripâ *Tuidi* fluminis positum, tunc Abbas *Eata*, vir omnium mansuetissimus ac simplicissimus regebat: qui postea Episcopus Agustaldensis, sive Lindisfarnensis Ecclesiæ factus est, ut suprâ memoravimus: cui tempore illo præpositus *Boisl* magnarum virtutum & prophetici spiritûs fuit. Hujus discipulatu Cudbertus humiliter subditus, & scientiam ab eo sanctarum Scripturarum, & bonorum operum sumpsit exempla. Qui postquàm migravit ad Dominum Cudbertus eidem Monasterio factus præpositus, plures & auctoritate Magistri, & exemplo suæ actionis regularem instituebat ad vitam. Nec solum ipsi Monasterio regularis vitæ monita simul & exempla præbebat; sed & vulgus circumpositum longè latèque, à vitâ stultæ consuetudinis ad cælestium gaudiorum convertere curabat amorem. Nam & multi fidem quam habebant, iniquis profanabant operibus: & aliqui etiam tempore mortalitatis, neglectis fidei Sacramentis (quibus erant imbuti) ad erratica idolatriæ medicamina concurrebant; quasi missam à Deo conditore plagam, per in-

cantationes, vel philacteria, vel alia quælibet dæmoniacæ artis arcana cohibere valerent. Ad utrorumque ergo corrigendum errorem, crebrò ipse de Monasterio egressus, aliquotiens equo sedens, sed sæpius pedes incedens, circumpositas veniebat ad villas, & viam veritatis prædicabat errantibus: quod ipsum etiam *Boisil* suo tempore facere consueverat. Erat quippe moris eo tempore populis Anglorum, ut veniente in villam Clerico vel Presbytero, cuncti ad ejus imperium verbum audituri confluerent; libenter ea quæ dicerentur, audirent; libentiùs ea quæ audire & intellegere poterant, operando sequerentur. Porro Cudbercto tanta dicendi erat peritia, tantus amor persuadendi quæ cœperat, tale cultûs angelici lumen, ut nullus præsentium latebras ei sui cordis celare præsumeret; omnes palàm quæ gesserant, confitendo proferrent: quia nimirum hæc eadem illum latere nullo modo putarent, & confessa dignis (ut imperabat) pœnitentiæ fructibus abstergerent. Solebat autem ea maximè loca peragrate, & illis prædicare in viculis, qui in arduis asperisque montibus procul positi, aliis horrore erant ad visendum, & paupertate pariter ac rusticitate suâ Doctorum arcebant accessum. Quos tamen ille pio libenter mancipatus labori tantùm doctrinæ sollertis excolebat industriâ, ut de Monasterio egressus sæpe hebdomadâ integrâ, aliquando duabus vel tribus, nonnunquàm etiam mense pleno domum non rediret; sed demoratus in montanis, plebem rusticam verbo prædicationis simul & opere virtutis ad cælestia vocaret. Cùm ergo venerabilis Domini famulus multos in Mailrosensi Monasterio degens annos, magnis virtutum signis esfulgeret, transtulit eum reverentissimus Abbas ipsius *Eata* ad insulam Lindisfarnensium, ut ibi quoque Fratribus custodiam disciplinæ regularis & auctoritate Præpositi intimaret, & propriâ actione præmonstraret. Nam & ipsum locum tunc idem reverentissimus Pater Abbatis jure regebat. Siquidem à reîmporibus antiquis ibidem & Episcopus cum Clero, & Abbas solebat manere cum Monachis; qui tamen & ipsi ad curam Episcopi familiariter pertinerent. Quia nimirum *Aidan*, qui primus ejus loci Episcopus fuit, cum Monachis illuc & ipse Monachus adveniens, monachicam in eo con-

versationem instituit : quomodo & prius beatus Pater Augustinus in Cantia fecisse noscitur, scribente ei reverentissimo Papâ Gregorio, quod & suprâ posuimus. Sed quia tua fraternitas, inquit, Monasterii regulis erudita, seorsum fieri non debet à Clericis suis ; in Ecclesiâ Anglorum, quæ nuper auctore Deo ad fidem perducta est, hanc debet conversationem instituire, quæ initio nascentis Ecclesiæ fuit Patribus nostris ; in quibus nullus eorum ex his quæ possidebant aliquid suum esse dicebat, sed erant illis omnia communia.

CAPUT XXVIII.

Ut idem in vitâ anachoreticâ & fontem de avente terrâ orando produxerit, & segetem de labore manuum ultra tempus reddendi acceperit.

EXIN Cudberst crescentibus meritis religiosæ intentionis, ad anachoreticæ quoque contemplationis (quæ diximus) silentia secreta pervenit. Verùm quia de vitâ illius & virtutibus ante annos plures sufficienter & versibus heroicis, & simplici oratione conscripsimus, hoc tantùm in præsentem commemorare satis sit, quòd aditurus insulam protestatus est Fratribus, dicens : Si mihi divina gratia in loco illo donaverit, ut de opere manuum mearum vivere queam, libens ibi morabor ; sin aliàs, ad vos citissimè Deo volente revertar. Erat autem locus & aquæ prorsus & frugis, & arboris inops ; sed & spirituum malignorum frequentia humanæ habitationi minùs accommodus : sed ad votum viri Dei, habitabilis per omnia factus est ; siquidem ad adventum ejus spiritus recesserunt maligni. Cum autem ipse sibi ibidem expulsus hostibus mansionem angustam circumvallante aggere, & domos in eâ necessarias, juvante Fratrum manu, id est, oratorium, & habitaculum commune construxisset, jussit Fratres in ejusdem habitaculi pavimento foveam facere : erat autem tellus durissima & saxosa, cui nulla omninò species venæ fontanæ videretur inesse. Quod dum facerent, ad fidem

& preces famuli Dei, alio die aqua plena inventa est, quæ usque ad hanc diem, sufficientem cunctis illò advenientibus gratiæ suæ cælestis copiam subministrat. Sed & ferramenta sibi ruralia cum frumento adferri rogavit, quod dum præparatâ terrâ tempore congruo seminaret, nil omnino, non dico spicarum, sed ne herbæ quidem ex eo germinari usque ad ætatis tempora contigit. Unde visitantibus se ex more Fratribus, hordeum iussit adferri, si fortè vel natura soli illius, vel voluntas esset superni largitoris, ut illius frugis ibi potiùs seges oriretur. Quod dum sibi adlatum, ultra omne tempus ferendi, ultra omnem spem fructificandi, eodem in agro sereret, mox copiosa seges exorta desideratam proprii laboris viro Dei refectionem præbebat. Cum ergo multis ibidem annis Deo solitarius serviret, (tanta autem erat altitudo aggeris quo mansio ejus erat vallata, ut cælum tantum ex eâ, cujus introitum sitiebat, aspicere posset) contigit ut congregatâ Synodo non parvâ sub præsentia Regis Ecgfridi, juxta fluvium *Alna*, in loco qui dicitur *Adunifirdi*, quod significat, *ad duplex vadum*, cui beatæ memoriæ Theodorus Archiepiscopus præsidebat, uno animo, omniumque consensu ad Episcopatum Ecclesiæ Lindisfarnensis eligeretur. Qui cum multis legationis ac litteris ad se præmissis, nequaquam suo Monasterio posset erui; tandem Rex ipse præfatus, unâ cum sanctissimo Antistite *Trumwine*, & aliis religiosis ac potentibus viris in insulam navigavit. Conveniunt & de ipsâ insulâ Lindisfarnensi in hoc ipsum multi de Fratribus, genuflectunt omnes, adjurant per Dominum, lacrymas fundunt, obsecrant; donec ipsum quoque lacrymis plenum duleibus extrahunt latebris, atque in Synodum pertrahunt. Quò dum perveniret, quamvis multum renitens, unanimâ cunctorum voluntate superatur; atque ad suscipiendum Episcopatus officium collum submittere compellitur; eo maxime vietus sermone, quò famulus Domini *Boisil* (cum mente propheticâ cuncta quæ ei essent superventura, patefaceret) Antistitem quoque cum futurum esse prædixerat. Nec tamen statim ordinatio decreta, sed peracta hieme quæ imminebat, in ipsâ sollemnitate Paschali completa est Eboraci, sub præsentia præfati Regis Ecgfridi,

convenientibus ad consecrationem ejus septem Episcopis, in quibus beatæ memoriæ Theodorus Primum tenebat. Electus est autem primò in Episcopatum Agustaldensis Ecclesiæ, pro Tunbercto, qui ab Episcopis fuerat depositus: sed quoniam ipse plus Lindisfarnensi Ecclesiæ, in quâ conversatus fuerat, dilexit præfici; placuit ut Eata reverso ad sedem Ecclesiæ Agustaldensis, cui regendæ primò fuerat ordinatus, *Cudbert* Ecclesiæ Lindisfarnensis gubernacula susciperet. Qui susceptum Episcopatus gradum ad imitationem beatorum Apostolorum & vittutum ornabat operibus. Commissam namque sibi plebem, & orationibus protegebat assiduus, & admonitionibus saluberrimis ad cælestia vocabat. Et (quod maxime Doctores juvare solet) ea quæ agenda docebat, ipse prius agendo præmonstrabat. Erat quippe ante omnia divinæ caritatis igne fervidus, patientiæ virtute modestus, orationum devotioni sollertissimè intentus, affabilis omnibus qui ad se consolationis gratiâ veniebant; hoc ipsum quoque orationis loco ducens, si infirmis Fratribus opem suæ exhortationis tribuere, sciens quia qui dixit, Diliges Deum tuum; dixit &, Diliges proximum tuum sicut teipsum. Erat & abstinentiæ castigatione insignis, erat gratiâ compunctionis semper ad cælestia suspensus. Denique cum sacrificium Deo victimæ salutaris offerret, non elevatâ in altum voce, sed profusus ex imo pectore lacrymis, Domino suâ vota commendabat. Duobus autem annis in Episcopatu peractis repetiit insulam ac Monasterium suum, divino admonitus oraculo, quia dies sibi mortis vel vitæ magis illius, quæ sola vita dicenda est, jam adpropiaaret intotus: sicut ipse quoque tempore eodem nonnullis, sed verbis obscurioribus, quæ tamen postmodum manifestè intellegerentur, solitâ sibi simplicitate pandebat; quibusdam autem hoc idem etiam manifestè revelabat.

CAPUT XXIX.

*Ut idem jam Episcopus obitum suum proximè futurum
Heriberto Anachoreta predixerit.*

ERAT^r enim quidam Presbyter, vitæ & morum probitate venerabilis, nomine *Heribert*, jamdudum viro Dei spiritalis amicitiaæ fœdere copulatus; qui in insulâ stagni illius pergrandis, de quo Derwentionis fluvii primordia erumpunt, vitam ducens solitariam, annis singulis eum visitare, & monita ab eo perpetuæ salutis audire solebat. Hic cum audiret eum ad civitatem Leguraltham devenisse, venit ex more, cupiens salutaribus ejus exhortationibus ad superna desideria magis magisque accendi. Qui dum sese alterutrum cælestis vitæ poculis debriarent, dixit inter alia Antistes: Memento, frater *Heribert*, ut modò quidquid opus habes, me interroges, mecumque loquaris: postquam enim ab invicem digressi fuerimus, non ultrà nos in hoc sæculo carnis obtutibus invicem aspiciemus. Certus sum namque quòd tempus meæ resolutionis instat, & velocest depositio tabernaculi mei. Qui hæc audiens provolutus est ejus vestigiis, & fufis cum gemitu lacrymis, Obsecro, inquit, per Dominum, ne me deseras, sed tui memor sis fidißimi sodalis, rogésque supernam pietatem, ut cui simul in tectis servivimus, ad ejus videndam gratiam simul transeamus ad cælos. Nosti enim quia ad tui oris imperiùm semper vivere studui, & quicquid ignorantia vel fragilitate deliqui, æquè ad tuæ voluntatis examen mox emendare curavi. Incubuit precibus Antistes, statimque edoctus in spiritu, impetrasse quod pererat à Domino: Surge (inquit) Frater mi, & noli plorare, sed gaudio gaude, quia quod rogavimus, superna nobis clementia donavit. Cujus promissi & prophetiæ veritatem sequens rerum astruxit eventus, quia & digredientes ab invicem non se ultrà corporaliter viderunt, sed uno eodémque die, hoc est, Kalendarum Aprilium tertiâ decimâ, egredientes è corpore, spiritus eorum mox beatâ invicem visione

conjuncti sunt, atque angelico ministerio pariter ad regnum cæleste translati. Sed *Heriberct* divinâ priûs infirmitate decoquitur; illâ (ut credibile est) dispensatione Dominicæ pietatis, ut si quid minus haberet meriti à beato Cudbercto, suppleret hoc castigans longæ ægritudinis dolor: quatenus æquatus gratiâ suo intercessori, sicut uno eodémque tempore cum eò de corpore egredi, ita etiam unâ atque indissimili sede perpetuæ beatitudinis meruisset recipi. Obiit autem Pater reverentissimus in insulâ *Farne*, multum deprecatus Fratres ut ibi quoque sepeliretur, ubi non parvo tempore pro Domino militarat. Attamen tandem eorum precibus victus assensum dedit, ut ad insulam Lindisfarnensium relatus, in Ecclesiâ deponeretur. Quod dum factum esset, Episcopatum Ecclesiæ illius anno uno servabat venerabilis Antistes *Vilfrid*, donec eligeretur qui pro Cudbercto Antistes ordinari deberet. Ordinatus est post hæc *Eadberct*, vir scientiâ Scripturarum, simul & præceptorum cælestium observantiâ, ac maxime eleemosynarum operatione insignis; itaut juxta legem, omnibus annis decimam non solum quadrupedum, verum etiam frugum omnium atque pomorum, necnon & vestimentorum partem pauperibus daret.

CAPUT XXX.

*Ut corpus illius post undecim annos sepulture, sit corruptionis
immune repertum: nec multò post successor Episcopatus ejus
de mundo transferit.*

VOLENS autem latiùs demonstrare divinâ dispensatio, quantâ in gloriâ vir Domini *Cudberct* post mortem viveret, cujus ante mortem vita sublimis crebris etiam miraculorum patebat indiciis, transactis sepulturæ ejus annis undecim, immisit in animo Fratrum, ut tollerent ossa illius: quæ more mortuorum consumpto jam & in pulverem redacto corpore reliquo sicca invenienda putabant: atque in novo recondita loculo, in eodem quidem loco, sed suprà pavementum dignæ venerationis gratiâ locarent. Quod dum sibi

sibi placuisse Eadbercto Antistiti suo referrent, annuit consilio eorum, iussitque ut die depositionis ejus hoc facere meminissent. Fecerunt autem ita : & aperientes sepulcrum, invenerunt corpus totum quasi adhuc viveret, integrum, & flexibilibus artuum compagibus, multò dormienti quàm mortuo similis ; sed & vestimenta omnia quibus indutum erat, non solum intemerata, verum etiam priscâ novitate & claritudine miranda parebant. Quod ubi videre Fratres, nimio mox timore perculsi, festinauerunt referre Antistiti quæ invenerant, qui tum fortè in remotiore ab Ecclesiâ loco, refluus undique pelagi fluctibus cincto solitarius manebat. In hoc etenim semper Quadragesimæ tempus agere, in hoc quadraginta ante dominicum natale dies, in magnâ continentia, orationis & lacrymarum devotione transigere solebat : in quo etiam venerabilis prædecessor ejus *Cudberct* priusquàm insulam *Farne* peteret, aliquandiù secretius Domino militabat. Attulerunt autem ei & partem indumentorum quæ corpus sanctum ambierant, quæ cum ille & munera grater acciperet, & miracula libenter audiret, (nam & ipsa indumenta quasi patris adhuc corpori circumdata miro deosculabatur affectu) Nova, inquit, indumenta corpori pro his quæ tulistis, circumdate, & sic reponite in arcâ quam parastis. Scio autem certissimè quia non diu vacuus remanebit locus ille, qui tantâ miraculi cælestis gratiâ sacratus est, & quàm beatus est cui in eo facultatem quiescendi Dominus totius beatitudinis auctor atque largitor præstare dignabitur. Hæc & hujusmodi plura ubi multis cum lacrymis & magnâ compunctione Antistes linguâ etiam tremente complevit, fecerunt Fratres ut jusserrat, & involutum novo amictu corpus, novâque in thecâ reconditum, supra pavementum Sanctuarii posuerunt. Nec mora, Deo dilectus Antistes *Eadberct* morbo correptus est acerbo, ac per dies crescente, multumque ingravescente ardore languoris, non multò post, id est, pridie Nonas Maias, etiam ipse migravit ad Dominum : cujus corpus in sepulcro benedicti Patris *Cudbercti* ponentes, adposuerunt desuper arcam in quâ incorrupta ejusdem Patris membra locaverant : in quo etiam loco signa sanitatum aliquotiens facta, meritis amborum testimonium ferunt, è qui-

bus aliqua in libro Vitæ illius olim memoriæ mandavimus. Sed & in hac Historiâ quædam quæ nos nuper audisse contigit, superadficere commodum duximus.

CAPUT XXXI.

Ut quidam ad tumbam ejus sit à paralyfi curatus.

ERAT in eodem Monasterio Frater quidam, nomine *Badudegn*, tempore non pauco hospitum ministerio deserviens, qui nunc usque superest, testimonium habens ab universis Fratribus, quod vir esset multæ pietatis ac religionis, injunctoque sibi officio supernæ tantum mercedis gratiâ subditus. Hic cum quâdam die lænas sive saga, quibus in hospitali utebatur, in mari lavisset, rediens domum, repentinâ medio itinere molestiâ corporali tactus est, itaut corruens in terram, & aliquandiù pronus jacens, vix tandem resurgeret; resurgens autem sensit dimidiam corporis sui partem à capite usque ad pedes paralyfis languore depresso: & maximo cum labore baculo innitens, domum pervenit. Crescebat morbus paulatim, & nocte superveniente gravior effectus est, itaut die redeunte vix ipse per se exsurgere aut incedere valeret. Quo affectus incommodo, concepit utilissimum mente consilium, ut ad Ecclesiam quoquo modo posset perveniens, intraret ad tumbam reverentissimi Patris *Cudberct*, ibique genibus flexis, supplex supernam pietatem rogaret, ut vel ab hujuscemodi languore, si hoc sibi utile esset, liberaretur; vel si se tali molestiâ diutius castigari divinâ providente gratiâ oporteret, patienter dolorem ac placidâ mente sustineret inlatum. Fecit igitur ut animo disposuerat, & imbecilles artus baculo sustentans, intravit Ecclesiam; ac prosternens se ad corpus viri Dei piâ intentione, per ejus auxilium Dominum sibi fieri propitium precabatur: atque inter preces velut in soporem solutus, sensit (ut ipse postea referre erat solitus) quasi magnam latamque manum caput sibi in parte quâ dolebat, tetigisse, eodemque tactu totam illam quæ languore pressa fuerat, cor-

poris sui partem, paulatim fugiente dolore, ac sanitate subsequente, ad pedes usque pertransisse. Quo facto, mox vigilans sanissimus surrexit, ac pro suâ sanitate Domino gratias denuò referens, quid erga se actum esset, Fratribus indicavit: cunctisque congaudentibus ad ministerium quod sollicitus exhibere solebat, quasi flagello probante castigatior rediit. Sed & indumenta, quibus Deo dicatum corpus Cudbereti, vel vivum antea, vel postea defunctum vestierant, etiam ipsa à gratiâ curandi non vacarunt, sicut in volumine Vitæ & virtutum ejus quisque legerit, inveniet.

CAPUT XXXII.

Et alter ad reliquias ejus nuper fuerit ab oculi languore curatus.

NEC silentio prætereundum quod ante triennium per reliquias ejus factum, nuper mihi per ipsum in quo factum est, Fratrem innotuit. Est autem factum in Monasterio quod juxta amnem *Dacore* constructum, ab eo cognomen accepit, cui tunc vir religiosus *Suidbert* Abbatis jure præfuit. Erat in eo quidam adolescens, cui tumor deformis palpebram oculi fœdaverat; qui cum per dies crescens, oculo interitum minaretur, curabant medici hunc adpositis pigmentorum fomentis emollire, nec valebant. Quidam abscidendum esse dicebant; alii hoc fieri, metu majoris periculi, vetabant. Cùmque tempore non pauco Frater præfatus tali incommodo laboraret, neque imminens oculo exitium humana manus curare valeret, quin potius per dies augeteretur, conrigit eum subito divinæ pietatis gratiâ per sanctissimi Patris Cudbereti reliquias sanari. Nam quando Fratres sui corpus ipsius post multos sepulturæ annos incorruptum repererant, tulerunt partem de capillis, quam more reliquiarum rogantibus amicis dare, vel ostendere in signum miraculi possent. Harum particulam reliquiarum eo tempore habebat penes se quidam de Presbyteris ejusdem Monasterii, nomine *Thruired*, qui nunc ipsius Monasterii Abbas est. Qui cùm die quâdam ingressus Ecclesiam, aperuisset thecam reliquiarum, ut portio-

nem earum roganti amico præstaret, contigit & ipsum adolescentem, cui oculus languebat, in eadem Ecclesiâ tunc adesse. Cùmque Presbyter portionem (quantam voluit) amico dedisset, residuum dedit adolescenti, ut suo in loco reponeret. At ille salubri instinctu admonitus, cùm accepisset capillos sancti capitis, adposuit palpebræ languenti, & aliquandiu tumorem illum infestum horum adpositione comprimere ac mollire curabat. Quo factò, reliquias, ut iussus erat, suâ in thecâ recondidit, credens suum oculum capillis viri Dei, quibus adlatus erat, ociùs esse sanandum. Neque eum sua fides fefellit. Erat enim, ut referre est solitus, tunc hora circiter secunda diei. Sed cùm alia, quæque dies illa exigebat, cogitaret & faceret, imminente horâ ipsius diei sextâ, repente contingens oculum, ita sanum cum palpebrâ invenit, ac si nihil unquam in eo deformitatis ac tumoris appatuisset.



LIBER QUINTUS.

C A P U T I.

U: Oidilvaldus successor Cudbercti in anachoretica vita, laborantibus in mari Fratribus, tempestatem orando sedaverit.

SUCCESSIT autem viro Domini Cudbercto, in ex-
scendâ vitâ solitariâ, quam in insula *Farne* ante Episcopatus sui tempora gerebat, vir venerabilis *Oidilwald*, qui multis annis in Monasterio quod dicitur *Inbrypum*, acceptum Presbyteratus officium condignis gradu ipse consecrabat actibus. Cujus ut meritum vel vita qualis fuerit, certius clarescat, unum ejus narro miraculum, quod mihi unus è Fratribus, propter quos & in quibus patratum est, ipse narravit: videlicet *Gudfrid*, venerabilis Christi famulus & Presbyter, qui etiam postea Fratribus ejusdem Ecclesie Lindisfarnensis, in quâ educatus est, Abbatís jure præfuit. Veni, inquit, cum duobus Fratribus aliis ad insulam *Farne*, loqui

desiderans cum reverentissimo Patre Oidilvaldo : cùmque adlocutione ejus refecti, & benedictione petita domum rediremus, ecce subito, positis nobis in medio mari, interrupta est serenitas quâ vehebamur, & tanta ingruit tamque fera tempestatis hiems, ut neque velo, neque remigio quicquam proficere, neque aliud quàm mortem sperare valeremus. Cùmque diu multùm cum vento pelagòque frustra certantes, tandem post terga respiceremus, si forte vel ipsam de quâ egressi eramus, insulam aliquo conamine repetere possemus, invenimus nos undiqueversùm pari tempestate perclusos, nullamque spem in nobis restare salutis. Ubi autem longius visum levavimus, vidimus in ipsâ insulâ *Farne*, egressum de latibulis suis amantissimum Deo Patrem Oidilvaldum iter nostrum inspicere. Audito etenim fragore procellarum ac ferventis Oceani, exierat videre quid nobis accideret : cùmque nos in labore ac desperatione positos cerneret, flectebat genua sua ad Patrem Domini nostri Jesu Christi pro nostrâ vitâ & salute precaturus. Et cùm orationem compleret, simul rumida æquora placavit ; adedò ut cessante per omnia sævitiâ tempestatis, secundi nos venti ad terram usque per plana maris terga comitarentur. Cùmque evadentes ad terram, naviculam quoque nostram ab undis exportarem, mox eadem quæ nostri gratiâ modicùm siluerat, tempestas rediit, & toto illo die furere non cessavit ; ut palam daretur intellegi, quia modica illa quæ provenerat intercedo quietis, ad viri Dei preces nostræ evasionis gratiâ cælitus donata esset. Mansit itaque vir Dei in insulâ *Farne* duodecim annis, ibidemque defunctus, sed in insulâ *Lindisfarne* juxta præfatorum corpora Episcoporum, in Ecclesiâ sancti Petri Apostoli sepultus est. Gesta verò sunt hæc temporibus Adfridi Regis, qui post fratrem suum Ecgfridum genti Nordanhymbrorum decem & novem annis præfuit.



CAPUT II.

141 *Episcopus Johannes mutum & scabiosum benedicendo
cruaveris.*

CUJUS regni principio defuncto Eatâ Episcopo, Johannes, vir sanctus, Agustaldensis Ecclesiæ Præsulatum suscepit: de quo plura virtutum miracula qui eum familiariter noverunt, dicere solent, & maximè vir reverentissimus ac veracissimus *Berethun*, Diaconus quondam ejus, nunc autem Abbas Monasterii quod vocatur *Inderawuda*, id est, *in silvâ Derorum*: è quibus aliqua memoriæ tradere commodum duximus. Est autem mansio quædam secretior, nemore raro & vallo circumdata, non longè ab Agustaldensî Ecclesiâ, id est, unius fermè milliarîi & dimidii spatio interfluente Tino amne separata, habens cimiterium sancti Michaëlis Archangeli, in quâ vir Dei sæpiùs ubi opportunitas adridebat temporis, & maximè in Quadragesimâ, manere cum paucis, atque orationibus ac lectiõni quietus operam dare consueverat. Cùmque tempore quodam, incipiente Quadragesimâ, ibidem mansurus adveniret, jussit suis quærere pauperem aliquem majore infirmitate vel inopiâ gravatum, quem secum habere illis diebus ad faciendam eleemosynam posset (sic enim semper facere solebat.) Erat autem in villâ non longè positâ, quidam adolescens mutus, Episcopo notus, (nam sæpiùs ante illum percipiendæ eleemosynæ gratiâ venire consueverat) qui ne unum quidem sermonem unquam proferre poterat; sed & scabiem tantam ac furfures habebat in capite, ut nil unquam capillorum ei in superiore parte capitis nasci valeret, tantùm in circuitu horridi crines stare videbantur. Hunc ergo adduci præcipit Episcopus, & ei in consecptis ejusdem mansionis parvum tugurium fieri, in quo manens quotidianam ab eo stipem acciperet. Cùmque una Quadragesimæ esset impleta septimana, sequente Dominicâ jussit ad se intrare pauperem, ingresso linguam proferre ex ore, ac sibi ostendere jussit; & adprehen-

dens cum de mento, signum sanctæ Crucis linguæ ejus impressit, quam signatam revocare in eo, & loqui illum præcepit: Dico, inquit, aliquod verbum, dico *Gae*, quod est, linguâ Anglorum, verbum adfirmandi & consentiendi, id est *etiam*. Dixit ille statim, soluto vinculo linguæ, quod jussus erat. Addidit Episcopus nomina litterarum: Dico *A*; dixit ille *A*. Dico *B*; dixit ille & hoc. Cumque singula litterarum nomina dicente Episcopo responderet, addidit & syllabas, ac verba illi dicenda proponere. Et cum in omnibus consequenter responderet, præcepit eum sententias longiores dicere, & fecit: neque ultra cessavit totâ illâ die & nocte sequente, quantum vigilare potuit, (ut ferunt qui præsentibus fuere) loqui aliquid, & arcana suæ cogitationis ac voluntatis, quod nunquam antea potuit, aliis ostendere: in similitudinem illius diu claudi, qui curatus est ab Apostolis Petto & Johanne, exsiliens stetit, & ambulabat; & intrauit cum illis in templum ambulans, & exsiliens, & laudans Dominum; gaudens nimirum uti officio pedum, quo tanto tempore erat destitutus. Cujus sanitati congaudens Episcopus præcepit medico, etiam sanandæ scabredini capitis ejus curam adhibere. Fecit ut jusserat, & juvante benedictione ac precibus Antistitis nata est cum sanitate cutis, venusta species capillorum, factusque est juvenis limpidus vultu & loquelâ promptus, capillis pulcherrimè crispis, qui antè fuerat deformis, pauper, & mutus. Sicque de perceptâ lætate sospitate, offerente etiam ei Episcopo ut in suâ familiâ manendi locum acciperet, magis domum reversus est.

CAPUT III.

Idem idem puellam languentem orando sanaverit.

NARRAVIT idem *Berethun* & aliud de præfato Antistite miraculum. Quia cum reverentissimus vir *Vilfrid* post longum exilium in Episcopatum esset *Agustaldensis* Ecclesiæ receptus, & idem *Johannes*, defuncto *Bosâ*, viro multæ sanctitatis & humilitatis, Episcopus pro eo *Eboraci*

substitutus, venerit ipse tempore quodam ad Monasterium Virginum, in loco qui vocatur *Vetadun*, cui tunc *Eriburg* Abbatissa præfuit. Ubi cum venissemus, inquit, & magno universorum gaudio suscepti essemus, indicavit nobis Abbatissa, quod quædam de numero Virginum, quæ erat filia ipsius carnalis, gravissimo languore teneretur: quia phlebotomata est nuper in brachio, & cum adhuc esset in studio, tacta est infirmitate repentini doloris, quo mox increscente, magis gravatum est brachium illud vulneratum, ac versum in tumorem, adeo ut vix duabus manibus circumplecti posset, ipsâque jacens in lecto præ nimietate doloris jam moritura videretur. Rogavit ergo Episcopum Abbatissa ut intraret ad eam, ac benedicere illam dignaretur, quia crederet illam ad benedictionem vel tactum illius mox melius habituram. Interrogans autem ille quando phlebotomata esset puella; & ut cognovit quia in Lunâ quartâ, dixit: Multum insipientes & indocte fecistis in Luna quarta phlebotomandò. Memini enim beatæ memoriæ Theodorum Archiepiscopum dicere, quia periculosa sit satis illius temporis phlebotomia, quando & lumen Lunæ, & rheuma Oceani in cremento est. Et quid ego possum puellæ, si moritura est, facere? At illa instantius obsecrans pro filia quam oppidò diligebat, (nam & Abbatissam pro se facere eam disposuerat) tandem obtinuit ut ad languentem intraret. Intravit ergo me secum assumpto ad virginem quæ jacebat, multo, ut dixi, dolore constrictam, & brachio in tantum grossescente, ut nihil profusus in cubitu flexionis haberet: & adstans dixit orationem super illam, ac benedicens egressus est. Cumque post hæc horâ competente confederemus ad mensam, adveniens quidam clamavit me foras, & ait: Postulat *Quenborg* (hoc enim erat nomen virginis) ut ocius regrediaris ad eam. Quod dum facerem, reperi illam ingrediens vultu hilariorem, & velut sospiti similem. Et dum adsiderem illi, dixit: Vis petamus bibere? Et ego; Volo, inquam, & multum delector, si potes. Cumque oblato poculo biberemus ambo, cæpit mihi dicere quia ex quo Episcopus oratione pro me, & benedictione completâ egressus est, statim melius habere incipio, etsi necdum vires pristinas recepi, dolor tamen omnis, & de brachio, ubi

ubi ardentior inerat, & de toto meo corpore, velut ipso Episcopo foràs cum exportante, funditus ablatum est; tametsi tumor adhuc brachii manere videretur. Abeuntibus autem nobis inde, continuò fugatum dolorem membrorum fuga quòque tumoris horrendi secuta est; & ecepta morti ac doloribus virgo, laudes Domino Salvatori, unà cum cæteris qui ibi erant, servis illius referebat.

CAPUT IV.

Ut conjugem Comitis infirmam aquâ benedictâ curaverit.

ALIVD quoque non multùm huic dissimile miraculum de præfato Antistite narravit idem Abbas, dicens: Villa erat Comitis cujusdam qui vocabatur *Buch*, non longè à Monasterio nostro, id est, duorum fermè millium spatii separata: cujus conjux quadraginta fermè diebus erat acerbissimo languore detenta, itaut tribus septimanis non posset de cubiculo in quo jacebat, foràs efferri. Contigit autem eo tempore virum Dei illò ad dedicandam Ecclesiam ab eodem Comite vocari. Cùmque dedicata esset Ecclesia, rogavit Comes eum ad prandendum in domum suam ingredi. Renuit Episcopus, dicens, se ad Monasterium quod proximum erat, debere reverti. At ille obnixiùs precibus instans, vovit etiam se eleemosynas pauperibus daturum, dummodò ille dignaretur eà die domum suam ingrediens jejunium solvere. Rogavi & ego unà cum illo, promittens etiam me eleemosynas in alimoniam inopum dare; dum ille domum Comitis pransurus, ac benedictionem daturus intraret. Cùmque hoc tardè ac difficulter impetrarem, intravimus ad rescindendum. Miserat autem Episcopus mulieri quæ infirma jacebat, de aquâ benedictâ quam in dedicationem Ecclesiæ consecraverat, per unum de his qui mecum venerant Fratribus, præcipiens ut gustandam illi daret, & ubicumque maximum ei dolorem inesse didicisset, de ipsâ eam aquâ laveret. Quod ut factum est, surrexit statim mulier sana, & non solum se infirmitate longâ catete, sed & perditas dudum

vires recepiſſe ſentiens, obtulit poculum Epifcopo, ac nobis: cœptumque miniſterium nobis omnibus propinandi, uſque ad prandium completum non omiſit: imitata ſocrum beati Petri Apoſtoli, quæ cùm februm fuiſſet ardoribus fatigata, ad taſtum manûs Dominicæ ſurrexit, & ſanitate ſimul ac virtute receptâ, miniſtrabat eis.

CAPUT V.

Ut puerum Comitſis orando à morte revocaverit.

ALIO item tempore vocatus ad dedicandam Eccleſiam Comitſis vocabulo *Addi*, cùm poſtulatam compleſſet miniſterium, rogatus eſt ab eodem Comite, intrare ad unum de pueris ejus qui acerrimâ ægitudine premebatur, itaur deficiente penitùs omni membrorum officio, jamjamque moriturus eſſe videretur; cui etiam locus jam tunc erat præparatus, in quo defunctus condi deberet. Addidit autem vir etiam lacrymas precibus, diligenter obſecrans ut intraret oraturus pro illo; quia multum neceſſaria ſibi eſſet vita ipſius; crederet verò quia ſi ille ei manum imponeret, atque eum benedicere voluiſſet, ſtatim melius haberet. Intravit ergo illò Epifcopus, & vidit eum mœſtis omnibus jam morti proximum, poſitumque loculum juxta eum, in quo ſepeliendus poni deberet; dixitque orationem, ac benedixit eum, & egrediens dixit, ſolito conſolantium ſermone: Benè convaleſcas, & citò. Cùmque poſt hæc ſederent ad menſam, miſit puer ad dominum ſuum, rogans ſibi poculum vini mittere, quia ſitiret. Gavifus ille multum, quia bibere poſſet, miſit ei calicem vini benedictum ab Epifcopo; quem ut bibit, ſurrexit continuò, & veterno infirmitatis diſcuſſo, induit ſeipſe veſtimentis ſuis; & egreſſus inde intravit, ac ſalutavit Epifcopum & convivas, dicens, quia ipſe quoque delectaretur manducare & bibere cum eis. Juſſerunt eum ſedere ſecum ad epulas, multum gaudentes de ſoſpitate illius. Reſidebat, veſcebatur, bibebat, lætabatur, quaſi unus è convivis agebat; & multis poſt hæc annis vi-

vens, in eadem quam acceperat, salute permanfit. Hoc autem miraculum memoratus Abbas non se præfente factum, fed ab his qui præfentes fuere, fibi perhibet effe relatum.

CAPUT VI.

Uti Clericum fuum cadendo contritum, aquè orando ac benedicendo à morte revocaveris.

NEQVE hoc prætereundum fientio, quoddam famulus Chrifti *Heribald* in feipfo ab eo fictum, olet narrare miraculum, qui tunc quidem in Clero illius converfatus, nunc in Monafterio quod eft juxta oftium *Tini* fluminis, Abbatis jure præeft. Vitam, inquit, illius (quantum hominibus æftimare fas eft) quoddam præfens optimè cognovi, per omnia Epifcopo dignam effe comperi. Sed & cujus meriti apud internum teftem habitus fit, & in multis aliis, & in meipfo maximè expertus fum: quippe quem ab ipfo (ut ita dicam) mortis limite revocans, ad viam vitæ fuâ oratione ac benedictione reduxit. Nam cum primævo adolefcentiæ meæ tempore in Clero illius degerem, legendi canendique quidem fudiis traditus, fed non adhuc animum perfectè à juvenilibus cohibens inlecebris, contigit die quâdam nos iter agentes cum illo, deveniffè in viam planam & amplam, aptamque curfui equorum: cœperuntque juvenes qui cum ipfo erant, maximè laici, postulare Epifcopum, ut curfu majore equos fuos invicem probare liceret. At ille primò negavit, otiofum dicens effe quoddam defiderabant; fed ad ultimum multorum unanimi intentione devictus; Facite, inquit, fi vultis, ita tamen ut *Heribald* ab illo fe certamine funditus abftineat. Porro ipfe diligentius obfecrans, ut & mihi certandi cum illis copia daretur, (Fidebam namque equo quem mihi ipfe optimum donaverat) impetrare nequaquàm potui. At cum sæpiùs huc atque illuc fpectante me & Epifcopo, concitatis in curfum equis reverterentur; & ipfe lascivo fuperatus animo non me potui cohibere, fed (prohibente licet illo) ludentibus me

miscui, & simul cursu equi contendere cœpi. Quod dum agerem, audiui illum post tergum mihi cum gemitu dicentem: O quàm magnum vñ facis mihi sic equitando! Et ego audiens, nihilominus cœptis institi vetitis. Nec mora, dum fervens equus quoddam itinetis concavum valentiore impetu transiliret, lapsus decidi, & mox velut emoriens sensum penitus motumque omnem perdidi. Erat namque illo in loco lapis terræ æqualis obiectus cespiti tenui; neque ullus alter in totâ illâ campi planitie lapis inveniri poterat: casûque evenit, vel potius divinâ provisione, ad puniendam inobedientiæ meæ culpam, ut hunc capite ac manu quam capiti ruens subposueram, tangerem, atque infracto pollice capitis quoque junctura solveretur; & ego (ut dixi) similis mortuo fierem. Et quia moveri non poteram, tetenderunt ibidem papilionem in quo jacerem. Erat autem hora diei circiter septima, à quâ ad vesperum usque quietus, & quasi mortuus permanens, tunc paululùm revivisco, ferorque domum à sociis, ac tacitus totâ nocte perduro. Vornebam autem sanguinem, eo quod & interanea essent ruendo convulsa. At Episcopus gravissimè de casu & interitu meo dolebat, eò quod me speciali diligeret affectu: nec voluit nocte illâ, juxta morem, cum Clericis suis manere; verùm solus in oratione persistens, noctem ducebat pervigilem, pro meâ (ut reor) hospitale supernæ pietati supplicans. Et manè primo ingressus ad me, & dictâ super me oratione, vocavit me nomine meo, & quasi de gravi somno excitatum interrogavit si nossem quis esset qui loqueretur ad me. At ego aperiens oculos, aio: Etiam tu es Antistes meus amatus. Vides, inquit, vivere? At ego; Possum (inquam) per orationes vestras, si voluerit Dominus. Qui imponens capiti meo manum, cum verbis benedictionis rediit ad orandum: & post pusillum ad me revertens, invenit sedentem, & jam loqui valentem: cœpitque me interrogare, divino (ut mox patuit) admonitus instinctu, an me esse baptizatum absque scrupulo nossem: cui ego, absque ulla me hoc dubietate scire respondi, quia salutari fonte in remissionem peccatorum essem ablutus; & nomen Presbyteri à quo me baptizatum noveram, dixi. At ille: Si ab hoc, inquit, Sacerdote

baptizatus es, non es perfectè baptizatus: novi namque cum, & quia cùm esset Presbyter ordinatus, nullatenus propter ingenii tarditatem potuit catechizandi vel baptizandi ministerium discere, propter quod & ipse illum ab hujus præsumptione ministerii quod regulariter implere nequibat, omnimodis cessare præcepi. Quibus dictis, eadem horâ me catechizare ipse curavit; factumque est ut exsufflante illo in faciem meam, confestim me melius habere sentirem. Vocavit autem medicum, & dissolutam mihi hemicranii juncturam componere atque alligare jussit. Tantumque mox acceptâ ejus benedictione convalui, ut in crastinum ascendens equum, cum ipso iter in alium locum facerem: nec multò post plenè curatus, vitali etiam undâ perfusus sum. Mansit autem in Episcopatu annos triginta tres, & sic cælestia regna conscendens, sepultus est in porticu sancti Petri, in Monasterio suo, quod dicitur *In Silvâ Derorum*, anno ab Incarnatione Domini septingentesimo vicesimo primo. Nam cùm post præ majore senectute, minùs administrando Episcopatu sufficeret, ordinato in Episcopum Eboracensis Ecclesiæ Vilfrido Presbytero suo, secessit ad Monasterium suum præfatum, ibique vitam in Deo dignâ conversatione complevit.

CAPUT VII.

Ut Cedualla, Rex Occidentalium Saxonum, baptizandus Romam venerit: sed & successor ejus eadem beatorum Apostolorum limina devotus adierit.

ANNO autem regni Aldfridi tertio, Cedualla Rex Occidentalium Saxonum, cùm genti suæ duobus annis strenuissimè præesset, relicto imperio propter Dominum, regnùmque perpetuum, venit Romam, hoc sibi gloriæ singularis desiderans adipisci, ut ad limina beatorum Apostolorum fonte baptismatis ablueretur, in quo solo didicerat generi humano patere vitæ cælestis introitum: simul etiam sperans quia mox baptizatus, carne solutus ad æterna gau-

dia jam mundus transiret : quod utrumque ut mente dispo-
fuerat, Domino adjuvante completum est. Etenim illò per-
veniens, Pontificatum agente Sergio baptizatus est die san-
cto Sabbati Paschalis, anno ab Incarnatione Domini sexcen-
tesimo octuagesimo nono : & in albis adhuc positus, languo-
re correptus, duodecimo Kalendarum Maiarum die solutus
est à carne, & beatorum est regno sociatus in cælis. Cui etiam
tempore baptismatis Papa memoratus Petri nomen imposue-
rat, ut beatissimo Apostolorum Principi (ad cujus sacra-
tissimum corpus à finibus terræ pio ductus amore venerat)
etiam nominis ipsius consortio jungeretur : qui in ejus quo-
que Ecclesiâ sepultus est ; & jubente Pontifice epitaphium
in ejus monumento scriptum, in quo & memoria devotionis
ipsius fixa per sæcula maneret, & legentes quoque vel au-
dientes exemplum facti, ad studium religionis accenderet.
Scriptum est ergo hoc modo :

*Culmen, opes, subolem, pollentia regna, triumphos,
Exuvias, proceres, mœnia, castra, lares ;
Quæque patrum virtus, & qua congesserat ipse
Cedual armipotens, liquit amore Dei,
Ut Petrum, sedemque Petri Rex cerneret hospes,
Cujus fonte meras sumeret almus aquas,
Splendiscumque jubar radianti carperet haustu,
Ex quo vivificus fulgor ubique fluit.
Percipi nique alacer redvivæ præmia vitæ,
Barbaricam rabiem, nomen & inde suum
Conversus convertit ovans, Petrumque vocari
Sergius Antistes jussit, ut ipse pater
Fonte renascentis, quem Christi gratia purgans
Protinus ablatum vexit in arce poli.
Mira fides Regis ! clementia maxima Christi,
Cujus consilium nullus adire potest !
Sospes enim veniens supremo ex orbe Britanni,
Per varias gentes, per freta, perque vias,
Urbem Romuleam vidit, templumque verendum
Aspexit, Petri mystica dona gerens.
Candidus inter oves Christi sociabilis ibit :
Corpore nam tumulum, mente superna tenet,*

Commutasse magis sceptrorum insignia credas,

Quem regnum Christi promeruisse vides.

Hic depositus est Cedual, qui & Petrus, Rex Saxonum, sub die duodecimo Kalendarum Maiarum, Indictione secundâ; qui vixit annos plus minùs triginta, imperante Domino Justiniano piissimo Augusto, anno ejus Consulatus quarto, pontificante Apostolico viro Domino Sergio Papâ anno secundo.

Abeunte autem Romam Ceduallâ, successit in regnum *Hii*, de stirpe regiâ; qui cum triginta & septem annis imperium tenuisset gentis illius, & ipse relicto regno, ac junioribus commendato, ad limina beatorum Apostolorum Gregorio Pontificatum tenente profectus est, cupiens in vicina locorum sanctorum ad tempus peregrinari in terris, quo familiariùs à Sanctis recipi mereretur in cælis: quod his temporibus plures de gente Anglorum, nobiles, ignobiles, laici, Clerici, viri ac feminae certatim facere consueverunt.

CAPUT VIII.

De obitu Theodori Archiepiscopi.

ANNO autem post hunc quo Cedualla Romæ defunctus est proximo, id est, sexcentesimo nonagesimo Incarnationis Dominicæ, Theodorus beatæ memoriæ Archiepiscopus senex & plenus dierum, id est, annorum octoginta octo, defunctus est: quem se numerum annorum fuisse habiturum, ipse jamdudum somni revelatione edoctus suis prædicere solebat. Mansit autem in Episcopatu annis viginti duobus, sepultusque est in Ecclesiâ sancti Petri, in quâ omnium Episcoporum Dorovernensium corpora sunt deposita: de quo, unâ cum confortibus ejusdem sui gradûs, rectè ac veraciter dici potest, quia corpora ipsorum in pace sepulta sunt, & nomen eorum vivet in generationes & generationes. Ut enim breviter dicam, tantum profectus spiritalis tempore Præsulatûs illius Ecclesiæ Anglorum, quantum nunquam antea potuere, cœperunt. Cujus perso-

nam, vitam, ætatem, & obitum, epitaphium quoque monumenti ipsius versibus heroicis triginta & quatuor palam ac lucidè cunctis illò venientibus pandit; quorum primi sunt hi:

*Hic sacer in tumba pausat cum corpore Præsul,
Quem nunc Theodorum lingua Pelasga vocat.
Princeps Pontificum, felix, summusque Sacerdos
Limpida discipulis dogmata differuit.*

Ultimi autem hi:

*Namque diem nonamdecimam September habebat,
Cum carnis claustro spiritus egreditur.
Alma novæ scandens felix consortia vitæ,
Civibus angelicis junctus in arce poli.*

CAPUT IX.

Ut Theodoro defuncto Archiepiscopatus gradum Berctuald suscepit; & inter plurimos quos ordinavit, etiam Tobiam virum doctissimum Hrofensi Ecclesiæ fecerit Antistitem.

SUCCESSIT autem Theodoro in Episcopatu Berctuald, qui erat Abbas in Monasterio quodam, juxta ostium Aquilonare fluminis Genladæ positum, quod *Racwlfæ* nuncupatur: vir & ipse scientiâ Scripturarum imbutus, sed & ecclesiasticis simul ac monasterialibus disciplinis summè instructus, tamen prædecessori suo minimè comparandus: qui electus quidem est in Episcopatum anno Dominicæ Incarnationis sexcentesimo nonagesimo secundo, die primò mensis Julii, regnantibus in Cantia Wiðredo & Suebbardo. Ordinatus est autem anno sequente, tertio die Kalendarum Juliarum, Dominicâ, à Godwino Metropolitano Episcopo Galliarum: & sedit in sede sua pridie Kalendarum Septembris Dominicâ; qui inter multos quos ordinavit Antistites, etiam Gebmundo Hrofensi Ecclesiæ Præsule defuncto, Tobiam pro illo consecravit, virum Latinâ, Græcâ & Saxonica lingua atque eruditione multiplici instructum.

CAPUT X.

Ut Ecgberct vir sanctus, ad prædicandum in Germaniam venire voluerit, nec valuerit: porro Vicerct adiit quidam; sed quia nec ipse aliquid profecisset, rursum in Hiberniam unde venerat, redierit.

EO tempore venerabilis, & cum omni honorificentia nominandus famulus Christi; & Sacerdos Ecgberct, quem in Hibernia intulâ peregrinam ducere vitam pro adificandâ in cælis patriâ retulimus; proposuit animo pluribus prodesse, id est, inito opere apostolico, verbum Dei aliquibus earum quæ nondum audierant, gentibus evangelizando committere: quarum in Germaniâ plurimas noverat esse nationes, à quibus Angli vel Saxones qui nunc Britanniam incolunt; genus & originem duxisse noscuntur; unde hæctenus à vicinâ gente Brittonum corruptè *Germani* nuncupantur. Sunt autem Fretones, Rugini, Dani, Huni, antiqui Saxones Bornætuarii: sunt etiam alii per plures istidem in partibus populi pagani adhuc ritibus servientes, ad quos venire præfatus Christi miles circumnavigatâ Britanniâ disposuit, si quos fortè ex illis ereptos sanaræ ad Christum transferre valeret; vel si hoc fieri non posset, Romam venire, ad videnda atque adoranda beatorum Apostolorum ac Martyrum Christi limina cogitavit. Sed ne aliquid horum perficeret, superna illi oracula, simul & opera resisterunt. Siquidem electis sociis strenuissimis, & ad prædicandum verbum idoneis, utpote actione simul & eruditione præclaris, præparatisque omnibus quæ navigantibus esse necessaria videbantur, venit die quâdam, manè primo, ad eum unus de Fratribus, discipulus quondam in Britanniâ, & minister Deo dilecti Sacerdotis *Boisili*, cùm esset idem *Boisil* Præpositus Monasterii Mailrosensis, sub Abbate Eatâ, ut suprâ narravimus, referens ei visionem quæ sibi eadem nocte apparuisset: Cùm expletis, inquit, hymnis matutinalibus in lectulo membra posuisssem, ac levis mihi somnus

obrepisset, apparuit magister quondam meus & nutritor
 amantissimus *Boisil*, interrogavitque me, an eum cognos-
 cere possem. Aio, Etiam: tu es enim *Boisil*. At ille; Ad
 hoc, inquit, veni, ut responsum Domini Salvatoris Ecg-
 bercto adferam, quod te tamen referente oportet ad illum
 venire. Dic ergo illi quia non valet iter quod proposuit, im-
 plemente: Dei enim voluntas est ut ad Columbæ Monasteria
 magis pergat docenda. Erat autem Columba primus Doctor
 fidei Christianæ transmontanis Pictis ad Aquilonem, pri-
 musque fundator Monasterii quod in *Hii* insulâ multis diu
 Scottorum Pictorumque populis venerabile mansit. Qui vi-
 delicet Columba nunc à nonnullis composito à *Cella & Co-*
lumba, nomine *Columcelli* vocatur. Audiens autem verba
 visionis *Ecgercti*, præcepit Fratri qui retulerat, ne cuiquam
 hæc alteri referret, ne fortè inlusoria esset visio. Ipse autem
 tacitus rem considerans veram, esse timebat: nec tamen à
 præparando itinere, quo ad gentes docendas iret, cessare
 volebat. At post paucos dies rursùm venit ad eum præfatus
 Frater, dicens quia & eâ nocte sibi post expletos Matutinos
Boisil per visum apparuerit, dicens: Quare tam negligenter
 ac tepidè dixisti Ecgercto quæ tibi dicenda præcepi? At
 nunc vade, & dic illi quia, velit nolit, debet ad Monaste-
 ria Columbæ venire, quia aratra eorum non rectè incedunt:
 oportet autem eum ad rectum hæc tramitem revocare. Qui
 hæc audiens, denuò præcepit Fratri, ne hæc cuiquam pa-
 tesceret. Ipse verò tametsi certus est factus de visione, ni-
 hilominus tentavit iter dispositum cum Fratribus memora-
 tis incipere. Cùmque jam navi imposuissent quæ tanti iti-
 neris necessitas poscebat, atque opportunos aliquot diebus
 ventos expectarent, facta est nocte quâdam tam sæva tem-
 pestas, quæ perditis nonnullâ ex parte his quæ in navi erant
 rebus, ipsam in latus jacentem inter undas relinqueret: sal-
 vata sunt tamen omnia quæ erant Ecgercti, & sociorum
 ejus. Tum ipse quasi propheticum illud dicens, Quia propter
 me est tempestas hæc, subtraxit se illi profectioni, & rema-
 nere domi passus est. At verò unus de sociis ejus, vocabulo
Uithbert, cùm esset & ipse contemptu mundi ac doctrinæ
 scientiâ insignis, (nam multos annos in Hiberniâ peregriti-

nus, anachoreticam in magnâ perfectione vitam egerat) ascendit navem, & Fresiam perveniens, duobus annis continuè genti illi, ac Regi illius Radhbedo verbum salutis prædicabat, neque aliquem tanti laboris fructum apud Barbaros invenit auditores. Tunc reversus ad dilectæ locum peregrinationis, solito in silentio vacare Domino cœpit; & quoniam exterius prodesse ad fidem non poterat, suis amplius ex virtutum exemplis prodesse curabat.

CAPUT XI.

*Wilbrord in Fresiâ prædicans multos ad Christum converterit
& ut socii ejus Ewaldi sint martyrium passi.*

UT autem vidit vir Domini *Egbertus*, quia nec ipse ad prædicandum gentibus venire permittebatur, retentus est ob aliam sanctæ Ecclesiæ utilitatem, de quâ oraculo fuerat præmonitus: nec *Vilbertus* illas deveniens in partes, quicquam proficiebat. Tentavit adhuc in opus verbi mittere viros sanctos & industrios, in quibus eximius *Wilbrord* Presbyterii gradu & merito præfulgebatur. Qui cum illò advenissent, (erant autem numero duodecim) divertentes ad Pippinum Ducem Francorum, gratanter ab illo suscepti sunt: & quia nuper citeriorem Fresiam, expulso inde Radhbedo Rege ceperat, illò eos ad prædicandum misit; ipse quoque imperiali auctoritate juvenis, ne quis prædicantibus quicquam molestiæ inferret; multisque eos qui fidem suscipere vellent, beneficiis adtollens: unde factum est, opiculante gratiâ divinâ, ut multos in brevi ab idolatriâ ad fidem converterent Christi. Horum secuti exempla duo quidam Presbyteri de natione Anglorum, qui in Hiberniâ multo tempore pro æternâ patriâ exulaverant, venerunt ad provinciam antiquorum Saxonum, si fortè aliquos ibidem prædicando, Christo acquirere possent. Erant autem unius ambo, sicut devotionis, sic etiam vocabuli: nam uterque eorum appellabatur *Hewald*; eâ tamen distinctione, ut pro diversâ capillorum specie unus *Niger Hewald*,

alter *Albus Hewald* diceretur : quorum uterque pietate religionis imbutus , sed *Niger Hewald* magis sacrarum litteratum erat scientiâ instructus. Qui venientes in provinciam , intraverunt hospitium cujusdam villici , petieruntque ab eo , ut transmitterentur ad Satrapam qui super eos erat , eò quòd haberent aliquid legationis & causæ utilis , quod deberent ad illum perferre. Non enim habent Regem iidem antiqui Saxones , sed Satrapas plurimos suæ genti præpositos , qui ingruente belli articulo , mittunt æqualitèr fortes , & quemcumque fors ostenderit , hunc tempore belli Ducem omnes sequuntur. Huic obtemperant ; peractò autem bello , rursùm æqualis potentia omnes sunt Satrapæ. Suscepit ergo eos villicus , & promittens se mittere eos ad Satrapam qui super se erat , (ut petebant) aliquot diebus secum retinuit. Qui cùm cogniti essent à Barbaris , quòd essent alterius religionis , (nam & psalmis semper atque orationibus vacabant , & quotidie sacrificium Deo victimæ salutaris offerebant , habentes secum vascula sacra , & tabulam altaris vice dedicatam) suspecti sunt habiti , quia si pervenirent ad Satrapam , & loquerentur cum illo , averterent illum à diis suis , & ad novam Christianæ fidei religionem transferrent ; sicque paulatim omnis eorum provincia veterem cogereetur in novam mutare culturam. Itaque rapuerunt eos subito , & interemerunt ; Album quidem Hewaldum veloci occisione gladii , Nigellum autem longo suppliciorum cruciatu , & horrendâ membrorum omnium dissectione : quos interemptos in Rhenum projecerunt. Quod cùm Satrapa ille quem videre volebant , audisset , iratus est valde , quòd ad se venire volentes peregrinî non permitterentur , & mittens occidit vicinos illos omnes , vicinque incendio consumpsit. Passi sunt autem præfati Sacerdotes & famuli Christi , quinto Nonarum Octobrium die. Nec martyrio eorum cælestia defuere miracula. Nam cùm peremptæ eorum corpora amni (ut diximus) à paganis essent injecta , contigit ut hæc contra impetum fluvii decurrentis , per quadraginta ferè millia passuum , ad ea usque loca ubi illorum erant socii , transferrentur. Sed & radius lucis permaximus , atque ad cælum usque altus , omni nocte supra locum

fulgebat illum, ubicumque ea pervenisse contingeret, & hoc etiam paganis qui eos occiderant, intuentibus. Sed & unus ex eis in visione nocturnâ apparuit cuidam de sociis suis, cui nomen erat *Tilmon*, viro illustri, & ad sæculum quoque nobili, qui de milite factus fuerat Monachus; indicans quod eò loci corpora eorum posset invenire, ubi lucem de cælo terris radiaſſe conſpiceret. Quod ita completum eſt. Inventa namque eorum corpora, juxta honorem Martyribus condignum recondita ſunt; & dies paſſionis vel inventionis eorum congruâ illis in locis veneratione celebratur. Denique gloriſiſſimus Dux Francorum Pippinus, ubi hæc comperit, miſit: & adducta ad ſe eorum corpora condidit cum multâ gloriâ in Eccleſiâ Colonia civitatis, juxta Rhenum. Fertur autem quia in loco in quo occiſi ſunt, ſons ebullierit, qui in eodem loco uſque hodie copioſa fluenti ſui dona perſundat.

CAPUT XII.

Ut viri venerabiles Suidbert & in Britanniâ, Wilbrord Romæ in Freſiam ſint ordinati Epiſcopi.

PRMIS ſanè temporibus adventûs eorum in Freſiam, nox ut comperit *Wilbrord* daram ſibi à Principe licentiam ibidem prædicandi, acceleravit venire Romam, cujus ſedi Apoſtolica tunc *Sergius* Papa præerat, ut cum ejus licentiâ & benediſtione, d' ſideratum evangelizandi gentibus opus iniret: ſimul & reliquias beatorum Apoſtolorum ac Martyrum Chriſti ab eo ſe ſperans accipere, ut dum in gente cui prædicaret, deſtruſtis idolis Eccleſias inſtitueret, haberet in promptu reliquias Sanctorum, quas ibi introduceret; quibûque ibidem depoſitis, conſequenter in eorum honorem quorum eſſent, ille ſingula quæque loca dedicaret. Sed & alia perplura quæ tanti operis negotiorum quærebat, vel ibi diſcere, vel inde accipere cupiebat. In quibus omnibus cum ſui voti compos eſſet effectus, ad prædicandum rediit. Quo tempore Fratres qui erant in Freſiâ verbi

ministerio mancipati, elegerunt ex suo numero virum modestum moribus, & manuetum corde Suidbertum, qui eis ordinaretur Antistes, quem Britanniam destinatum, ad petitionem eorum ordinavit reverentissimus *Alfrid* Episcopus, qui tunc fortè patriâ pulsus, in Merciorum regionibus exulabat. Non enim eo tempore habebat Episcopum Cantia, defuncto quidem Theodoro, sed necdum Berctualdo successore ejus, qui trans mare ordinandus ierat, ad sedem Episcopatus sui reverso. Qui videlicet *Suidbert* accepto Episcopatu, de Brittaniâ regressus, non multò post ad gentem Boructuatorum secessit, ac multos eorum prædicando ad viam veritatis perduxit. Sed expugnatis non longo post tempore Boructuris à gente antiquorum Saxonum, dispersi sunt quolibet hi qui verbum receperant; ipsèque Antistes cum quibusdam Pippinum petiit, qui interpellante Bliththrudè conjuge suâ, dedit ei locum mansionis in insulâ quâdam Rheni, quæ linguâ eorum vocatur *In listore*: in quâ ipse, constructo Monasterio quod hætenus heredes ejus possident, aliquandiù continentissimam gessit vitam, ibique diem clausit ultimum. Postquàm verò per annos aliquot in Fressiâ, qui advenerant docuerunt, misit Pippinus, favente omnium consensu, virum venerabilem Vilbrordum Romam, cujus adhuc Pontificatum Sergius habebat, postulans ut eidem Fresonum genti Archiepiscopus ordinaretur. Quod ita ut petierat, impletum est anno ab Incarnatione Domini sexcentesimo nonagesimo sexto. Ordinatus est autem in Ecclesiâ sanctæ Martyris Ceciliz, die natalis ejus, imposito sibi à Papâ memorato, nomine Clementis: ac mox remissus ad sedem Episcopatus sui, id est, post dies quatuordecim, ex quo in urbem venerat. Donavit autem ei Pippinus locum cathedræ Episcopalis in castello suo inlustri, quod antiquo gentium illarum verbo *Viltaburg*, id est, *Oppidum Viltorum*, linguâ autem Gallicâ *Trajectum* vocatur; in quo ædificatâ Ecclesiâ, reverentissimus Pontifex longè latèque verbum fidei prædicans, multosque ab errore revocans, plures per illas regiones Ecclesias, sed. & Monasteria nonnulla construxit. Nam non multò post, alios quoque illis in regionibus ipse constituit Antistites, ex eorum numero Fratrum

qui vel secum, vel post se illò ad prædicandum venerant; ex quibus aliquanti jam dormierunt in Domino. Ipse autem *Vilbrord*, cognomento *Clemens*, adhuc superest, longà jam venerabilis ætate, utpote tricesimum & sextum in Episcopatu habens annum, & post multiplicis militiæ cælestis agones, ad præmia remunerationis supernæ totà mente suspirans.

CAPUT XIII.

Ut quidam in provinciâ Nordanhybrorum à mortuis resurgens, multa, & tremenda, & desideranda, quæ viderat, narraverit.

HIS temporibus miraculum memorabile, & antiquorum simile in Brittaniâ factum est. Namque ad excitationem viventium de morte animæ, quidam aliquandiù mortuus ad vitam resurrexit corporis, & multa memoratu digna quæ viderat, narravit; è quibus aliqua hîc breviter perstringenda esse putavi. Erat ergo paterfamilias in regione Nordanhybrorum, quæ vocatur *Incuneningum*, religiosam cum domo suâ gerens vitam: qui infirmitate corporis tactus, & hac crescente per dies, ad extrema perductus, primo tempore noctis defunctus est; sed diluculo reviviscens, ac repentiè residens, omnes qui corpori flentes affederant, timore immenso perculsos in fugam convertit: uxor tantùm, quæ amplius amabat, (quamvis multùm tremens ac pavida) remansit: quam ille consolatus, Noli, inquit, timere, quia jam verè resurrexi à morte quâ tenebar, & apud homines sum iterum vivere permissus; non tamen eâ mihi quâ antè consueveram conversatione, sed multùm dissimili ex hoc tempore vivendum est. Statimque surgens abiit ad villulæ oratorium, & usque ad diem in oratione persistens, mox omnem quam possederat substantiam, in tres divisit portiones, è quibus unam conjugii, alteram filiis tradidit, tertiam sibi ipsi retentans. statim pauperibus distribuit. Nec multò post sæculi curis absolutus, ad Mo-

naſterium *Mailros*, quod Tuidi fluminis circumflexu maximâ ex parte clauditur, pervenit; acceptâque toniturâ, locum ſecretæ manſionis quam præviderat Abbas, intravit; & ibi uſque ad diem mortis in tantâ mentis & corporis contritione duravit, ut multa illum, quæ alios laterent, vel horrenda, vel deſideranda vidiffè, etiamſi linguâ ſileret, vitâ loqueretur. Narrabat autem hoc modo quod viderat: Lucidus, inſiciens, aſpectu, & clarus erat indumento qui me ducebat. Incedebamus autem tacentes (ut videbatur mihi) contra ortum Solis ſolſtitialem; cûmq; ambularemus, devenimus ad vallem multæ latitudinis ac profunditatis, infinitæ autem longitudinis, quæ ad lævam nobis ſita, unum latus flammis ferventibus nimium terribile, alterum furenti grandine ac frigore nimium omnia perſante atque verrente non minis intolerabile præferbat. Utrumque autem erat animabus hominum plenum, quæ viciffim hinc inde videbantur quaſi tempeſtatis impetu jaſtari. Cûm enim vim fervoris immenſi tolerare non poſſent, proſiliebat miſeræ in medium frigoris infeſti; & cûm neque ibi quippiam requiæ invenire valerent, reſiliebat rurius urendæ in medium flammarum inextinguibilium. Cûmq; hac infelici viciffitudine longè latèque, prout aſpicere poteram, ſine ullâ quietis intercapedine innumerabilis deformium ſpirituum multitudo torqueretur; cogitare cœpi quòd hic fortaiſſe eſſet infernus, de cujus tormentis intolerabilibus narrare ſæpius audivi. Reſpondit cogitationi meæ ductor qui me præcedebat: Non hoc, inſiciens, ſuſpiceris; non enim hic infernus eſt ille quem putas. At cûm me hoc ſpectaculo tam horrendo perterritum paulatim in ultiora produceret, vidi ſubitò ante nos obſcurari incipere loca, & tenebris omnia repleri. Quas cûm intraremus, in tantum pauliſper condenſatæ ſunt, ut nihil præter ipſas aſpicerem, exceptâ dumtaxat ſpecie & veſte ejus qui me ducebat. Et cûm progredereſcimus ſolâ ſub nocte per umbras, ecce ſubitò apparent ante nos crebri flammarum tetrarum globi, aſcendentes quaſi de puteo magno, ruriſq; decedentes in eundem. Quòd cûm perductus eſſem, repenti ductor meus diſparuit, ac me ſolum in medio tenebrarum & horrendæ viſionis

visionis reliquit. At cùm iidem globi ignium sine intermissione modò alta peterent, modò imbaratri repeterent, cerno omnia quæ ascendebant, fastigia flammarum plena esse spiritibus hominum, qui instar favillarum cum fumo ascendunt, nunc ad sublimiora projicerentur, nunc retractis ignium vaporibus relaberentur in profunda. Sed & fœtor incomparabilis cum iisdem vaporibus ebulliens, omnia illa tenebrarum loca replebat. Et cùm diutius ibi pavidus confisterem, utpote incertus quid agerem, quid verterem gressum, qui me finis maneret: audio subito post terga sonitum immaniissimi fletûs ac miserrimi, simul & cachinnum crepitantem quasi vulgi indocti capris hostibus insultantis. Ut autem sonitus idem clarior redditus ad me usque pervenit, considero turbam malignorum spirituum; quæ quinque animas hominum merentes, ejulantesque; ipsa verò multum exultans & cachinnans medias illas trahebat in tenebras: è quibus videlicet hominibus (ut dignoscere potui) quidam erat adonfus ut Clericus, quidam laicus, quædam femina. Trahentes autem eos maligni spiritus descenderunt in medio baratri illius ardentis; factumque est ut cùm longius subeuntibus eis, fletum hominum, & risum demoniorum clarè discernere nequitem, sonum tamen adhuc promiscuum in auribus haberem. Interea ascenderunt quidam spirituum obscurorum de abyssu illâ flammivomâ, & adcurrentes circumdederunt me, atque oculis flammantibus, & de ore ac naribus ignem putidum efflantes angebant; forcipibus quoque igneis quos tenebant in manibus, minitabantur me comprehendere, nec tamen me ullatenus contingere, tametsi terrere præsumebant. Qui cùm undiqueversum hostibus & excitare tenebrarum conclusus, huc illucque oculos circumferrem, si fortè alicunde quid auxilii quo salvarer, adveniret, apparuit retrò viam quâ veneram, quasi fulgor stellæ meantis inter tenebras, qui paulatim crescens, & ad me ocius festinans, ubi adpropinquavit, dispersi sunt & aufugerunt omnes qui me forcipibus rapere quærebant spiritus infesti. Ille autem qui adveniens eos fugavit, erat ipse qui me antè ducebar: qui mox conversus ad dexterum iter, quasi contra ortum Solis brumalem me ducere cœpit. Nec mora, exem-

prum tenebris in auras me serenæ lucis eduxit : cùmque me in luce apertâ duceret , vidi ante nos murum permaximum , cujus neque longitudini hinc vel inde , neque altitudini ullus esse terminus videretur. Cœpi autem mirari quare ad murum accederemus , cùm in eo nullam januam vel fenestram , vel ascensum alicubi conspicerem. Cùm ergo pervenissemus ad murum , statim nescio quo ordine fumus in summitate ejus. Et ecce ibi campus erat latissimus ac lætissimus , tantâque fragrantia vernantium flosculorum plenus , ut omnem nox fetorem tenebrose fornacis , qui me pervaserat , effugaret admirandi hujus suavis odoris. Tanta autem lux cuncta ea loca perfuderat , ut omni splendore diei , sive Solis meridiani radiis videretur esse præclarior. Erântque in hoc campo innumera hominum albarum conventicula , sedesque plurimæ agminum lætantium. Cùmque inter choros felicium incolarum medios me duceret , cogitare cœpi quòd hoc fortasse esset regnum cælorum , de quo prædicari sæpius audivi. Respondit ille cogitavi meo : Non , inquit , non hoc est regnum cælorum quod autumas. Cùmque procedentes transissemus , & has beatorum mansiones spirituum , aspicio ante nos multò majorem luminis gratiam quàm prius ; in quâ etiam vocem cantantium dulcissimam audivi ; sed & odoris fragrantia miri tanta de loco effundebatur , ut is quem antea degustans quasi maximum rebar , jam permodicus mihi odor videretur : sicut etiam lux illa campi florentis eximia , in comparatione ejus quæ nunc apparuit lucis , tenuissima prorsus videbatur , & parva. In cujus amenitatem loci cùm nos intraturos sperarem , repente ductor sublitit ; nec mora , gressum retorquens , ipsâ me quâ venimus viâ reduxit. Cùmque reversione perveniremus ad mansiones illas lætas spirituum candidatorum , dixit mihi : Scis quæ sint ista omnia quæ vidisti ? Respondi ego , Non. Et ait : Vallis illa quam aspexisti , flammis ferventibus , & frigoribus horrenda rigidis , ipse est locus in quo examinandæ & castigandæ sunt animæ illorum , qui differentes confiteri & emendare scelera sua quæ fecerant , in ipso tandem mortis articulo ad pœnitentiam confugiunt , & sic de corpore exeunt : qui tamen quia confessionem & pœnitentiam vel

in morte habuerunt, omnes in die iudicii ad regnum cælorum perveniunt. Multos autem preces viventium, & elemosynæ, & jejunia, & maxime celebratio Missarum, ut etiam ante diem iudicii liberentur, adjuvant. Porro puteus ille flammivomus ac putidus quem vidisti, ipsum est os gehennæ, in quo quicumque semel inciderit, nunquam inde liberabitur in ævum. Locus verò iste florifer, in quo pulcherrimam hanc juventutem jocundari ac fulgere conspicias, ipse est in quo recipiuntur animæ eorum qui in bonis quidem operibus de corpore exeunt; non tamen sunt tantæ perfectionis, ut in regnum cælorum statim mereantur introduci: qui tamen omnes in die iudicii ad visionem Christi, & gaudia regni cælestis intrabunt. Nam quicumque in omni verbo, & opere, & cogitatione perfecti sunt, mox de corpore egressi ad regnum cæleste perveniunt: ad cujus viciniam pertinet locus ille, ubi sonum cantilenæ dulcis, cum odore suavitatis, ac splendore lucis audisti. Tu autem quia nunc ad corpus reverti, & rursùm inter homines vivere debes, si actus tuos curiosius discutere, & mores sermonesque tuos in rectitudine ac simplicitate servare studueris, accipies & ipse post mortem locum mansionis inter hæc quæ cernis agmina lætabunda spirituum beatorum. Namque ego cùm ad tempus abscessissem à te, ad hoc feci ut quid de te fieri deberet agnoscerem. Hæc mihi cùm dixisset, multùm detestatus sum reverti ad corpus, delectatus nimirum suavitate ac decore loci illius quem intuebar, simul & consortio eorum quos in illo videbam. Nec tamen aliquid ductorem meum rogare audebam: sed inter hæc nescio quo ordine repente me inter homines vivere cerno. Hæc & alia quæ viderat idem vir Domini, non omnibus passim desidiosus ac vitæ suæ incuriosis refert volebat; sed illis solummodò, qui vel tormentorum metu perterriti, vel spe gaudiorum perennium delectati, profectum pietatis ex ejus verbis haurire volebant. Denique in viciniam cellæ illius habitabat quidam Monachus, nomine *Hænigils*, Presbyteratus etiam (quem bonis operibus adornabat) gradu præminens, qui adhuc superest, & in Hiberniâ insulâ solitarius, ultimam vitæ ætatem pane cibario, & frigidâ aquâ sustentat. Hic sæpiùs ad eundem virum ingrediens, audivit

ab eo repetitâ interrogatione, quæ & qualia essent quæ exutus corpore viderat: per cuius relationem, ad nostram quoque agnitionem pervenere quæ de his pauca perstrinximus. Narrabat autem visiones suas etiam Regi Aldfrido, viro undecumque doctissimo; & tam libenter, tamque studiosè ab illo auditus est, ut ejus rogatu, in Monasterio suprà memorato inditus, ac monachicâ sit tonsurâ coronatus, atque ad eum audiendum sæpissimè cum illas in partes devenisset, accederet. Cui videlicet Monasterio tempore illo religiosæ ac modestæ vitæ Abbas & Presbyter *Edilwald* præerat, qui nunc Episcopalem Lindisfarnensis Ecclesiæ cathedram condignis gradu actibus tener. Accepit autem in eodem Monasterio locum mansionis secretiorem, ubi liberius continuis orationibus famulatu sui conditoris vacaret. Et quia locus ipse super ripam fluminis erat situs, solebat hunc crebrò ob magnum castigandi corporis affectum ingredi, ac sæpius in eo supermeantibus undis immergi; sicque ibidem quamdiù sustinere posse videbatur, psalmis vel precibus insistere, fixusque manere, ascendente aquâ fluminis usque ad lumbos aliquando, & usque ad collum; atque inde egrediens ad terram, nunquam ipsa vestimenta uda vel algida deponere curabar, donec ex suo corpore, calefierent & siccarentur. Cùmque tempore hiemali defluentibus circa eum semifractarum crustis glacierum, quas & ipse aliquando contriverat, quò haberet locum standi, sive immergendi se in fluvio, dicerentque qui videbant: Mirum, Frater Drythelme, (hoc enim erat viro nomen) quòd tantam frigoris asperitatem ullâ ratione tolerare prævaldes! Respondebat ille simpliciter: (erat namque homo simplicis ingenii, ac moderatæ naturæ) Frigidiora ego vidi. Et cùm dicerent: Mirum quòd tam austera tenere continentiam velis? Respondebat: Austeriora ego vidi. Sicque usque ad diem suæ vocationis infatigabili cælestium bonorum desiderio corpus senile inter quotidiana jejunia domabat, multisque & verbo & conversatione salutis causa fuit.

CAPUT XIV.

*Ubi è contrà alter ad mortem veniens, oblatum sibi à demonibus
codicem suorum viderit peccatorum.*

AT contrà, fuit quidam in provinciâ Merciorum, cujus visiones ac verba, non autem & conversatio, plurimis, sed non sibi metipsi profuit. Fuit autem temporibus *Coënnedi*, qui post *Edilredum* regnavit, vir in laïco habitu; atque officio militari positus; sed quantum pro industriâ exteriori Regi placens, tantum pro internâ suimet neglegentiâ displicens. Admonebat ergo illum sedulò ut confiteretur, & emendaret, ac relinqueret scelera sua, priusquam subito mortis superventu tempus omne pœnitendi & emendandi perderet. Verùm ille, licet frequenter admonitus, spernebat verba salutis, seseque tempore sequenti pœnitentiam acturum esse promittebat. Inter hæc tactus infirmitate, decidit in lectum, atque acri cœpit dolore torqueri. Ad quem ingressus Rex, (diligebar enim eum multum) hortabatur ut vel tunc antequam moreretur, pœnitentiam ageret commissorum. At ille respondebat, non se tunc velle confiteri peccata sua, sed cum ab infirmitate resurgeret; ne fortè exprobrarent sibi sodales, quòd timore mortis faceret ea quæ sospes facere noluerat; fortiter quidem (ut sibi videbatur) locutus, sed miserabiliter, ut post paruit, dæmoniacâ fraude seductus est. Cùmque morbo ingravescente, denuò ad eum visitandum ac docendum Rex intraret, clamavit statim miserabili voce: Quid vis modò? Quid huc venisti? Non enim mihi aliquid utilitatis aut salutis potes ultrà conferre. At ille: Noli, inquit, ira loqui, vide ut sanum sapias. Non, inquit, insanio, sed pessimam mihi scientiam certus præ oculis habeo. Et quid, inquit, hoc est? Paulò antè, inquit, intraverunt domum hanc duo pulcherrimi juvenes, & resederunt circa me, unus ad caput, & unus ad pedes; protulitque unus libellum perpulchrum, sed vehementer modicum, ac mihi ad legendum dedit, in quo omnia quæ unquam bona

feceram, intuens scripta reperi, & hæc erant nimium pauca & modica. Receperunt codicem, neque aliquid mihi dicebant. Tum subito supervenit exercitus malignorum & horridorum vultu spirituum, domumque hanc & exteriùs obsedit, & intus maximâ ex parte relidens implevit. Tunc ille qui & obscuritate tenebrose faciei, & primatu sedis, major esse videbatur eorum, proferens codicem horrendæ visionis, & magnitudinis enonnis, & ponderis penè importabilis, iussit uni ex satellitibus suis mihi ad legendum deferri. Quem cum legissem, inveni omnia scelera, non solum quæ opere vel verbo, sed etiam quæ tenuissimâ cogitatione peccavi, manifestissimè in eo tetrìs esse descripta litteris. Dicebátque ad illos qui mihi adsederant, viros albatos & præclaros: Quid hic sedetis, scientes certissimè quia noster est ipse? Responderunt: Verum dicis; accipite, & in cumulum damnationis vestræ ducite. Quo dicto, statim disparuerunt: surgentésque duo nequissimi spiritus, habentes in manibus vomeres, percusserunt me, unus in capite, & alius in pede: qui videlicet modò cum magno tormento irrepunt in interiora corporis mei, móxque ut ad invicem pervenient, moriar, & paratis ad rapiendum me dæmonibus, in inferni claustra pertrahar. Sic loquebatur miser desperans, & non multò post defunctus, pœnitentiam quam ad breve tempus cum fructu veniæ facere supersedit, in æternum sine fructu pœnis subditus facit. De quo constat quia (sicut beatus Papa Gregorius de quibusdam scribit) non pro se ista, cui non profuere, sed pro aliis viderit, qui ejus interitum cognoscentes, differre tempus pœnitentiæ, dum vacat, timerent, ne improviso mortis articulo præventi, impœnitentes perirent. Quòd autem codices diversos per bonos sive malos spiritus sibi vidit offerri, ob id supernâ dispensatione factum est, ut meminimus facta & cogitationes nostras non in ventum diffluere, sed ad examen summi Judicis cuncta servari; & sive per amicos Angelos in fine nobis ostendenda, sive per hostes. Quòd verò priùs candidum codicem protulerunt Angeli, deinde atrum dæmones; illi per parvum, isti enormem; animadvertendum est quòd in primâ ætate bona aliqua fecit, quæ tamen universa pravè agendo juvenis obnubilavit. Qui

si è contratio errores pueritiæ corrigere in adolescentiâ , ac benè faciendo à Dei oculis abscondere curasset , posset eorum numero sociari , de quibus ait Psalmus : Beati quorum remissa sunt iniquitates , & quorum tecta sunt peccata. Hanc historiam , sicut à venerabili Antistite Pethelmo didici , simpliciter ob salutem legentium , sive audientium narrandam esse putavi.

CAPUT XV.

*Ut isem alius moriturus deputatum sibi apud inferos locum
pœnarum viderit.*

NOVI autem ipse Fratrem , quem utinam non nossem , (cujus etiam nomen , si hoc aliquid prodesset , dicere possem) positum in Monasterio nobili , sed ipsum ignobilitè viventem. Corripiebatur quidem sedulò à Fratribus ac majoribus loci , atque ad castigatorem vitam converti ammonebatur. Et quamvis eos audire nolisset , tolerabatur tamen ab eis longanimiter , ob necessitatem operum ipsius exteriorum : erat enim fabrilis arte singularis. Serviebat autem multum ebrietati , & cæteris vitæ remissioris inlecebris ; magisque in officinâ suâ diu noctûque residere , quàm ad psallendum atque otandum in Ecclesiâ , audiendumque cum Fratribus verbum vitæ , concurrere consuevit. Unde accidit illi (quod solent dicere quidam) quia qui non vult Ecclesiæ januam sponte humiliatus ingredi , necesse habet in januam inferni non sponte damnatus introduci. Percussus enim languore , atque ad extrema perductus , vocavit Fratres , & multum mœrens , ac damnato similis , cœpit narrare , quia videret inferos apertos , & Sathanam dmersum in profundum tartari : Caiphamque , cum cæteris qui occiderunt Dominum , juxta cum flammis ultatricibus contraditum : in quorum viciniâ , inquit , heu misero mihi locum aspicio æternæ perditionis esse præparatum. Audientes hæc Fratres , cœperunt diligenter exhortari , ut vel tunc , positus adhuc in corpore , pœnitentiam ageret. Respondebat ille desperans : Non est mihi

modò tempus vitam mutandi, cùm ipse viderim iudicium meum jam esse completum. Talia dicens, sine viatico salutis obiit, & corpus ejus in ultimis est Monasterii locis humatum, neque aliquis pro eo vel Missis facere, vel psalmos cantare, vel saltem orare præsumebat. O quàm grandi distantia divisit Deus inter lucem & tenebras! Beatus Protomartyr Stephanus passurus mortem pro veritate, vidit cælos apertos, vidit gloriam Dei, & Jesum stantem à dextris Dei; & ubi erat futurus ipse post mortem, ibi oculos mentis ante mortem, quò lætior occumberet, misit. At contrà, faber iste tenebrose mentis & actionis, imminente morte, vidit aperta tartara, vidit damnationem diaboli & sequacium ejus; vidit etiam suum infelix inter tales carcerem, quo miserabiliùs ipse desperatâ salute periret, sed viventibus qui hæc cognovissent, causam salutis suâ perditione relinqueret. Factum est hoc nuper in provinciâ Berniciorum, ac longè latèque diffamatum, multos ad agendam & non differendam sceletum suorum pœnitudinem provocavit. Quod utinam exhinc etiam nostrarum lectione litterarum fiat.

CAPUT XVI.

Ut plurima Scottorum Ecclesiæ, instante Adamnano, Catholicum Pascha susceperint; utque idem librum de locis sanctis scripserit.

QUO tempore plurima pars Scottorum in Hiberniâ, & nonnulla etiam de Brittonibus in Britanniâ rationabile & Ecclesiasticum Paschalis observantiæ tempus Domino donante suscepit. Siquidem *Adamnan* Presbyter, & Abbas Monachorum qui erant in insulâ *Hii*, cùm legationis gratiâ missus à suâ gente, venisset ad *Aldfridum* Regem Anglorum, & aliquandiu in eâ provinciâ moratus, videret ritus Ecclesiæ canonicos; sed & à pluribus qui erant eruditiores, esset sollester admonitus, ne contra universalem Ecclesiæ morem, vel in observantiâ Paschali, vel in aliis quibusque decretis cum suis paucissimis, & in extremo mundi angulo po-

sic vivere præsumeret; mutatus mente est; itaut ea quæ viderat & audierat in Ecclesiis Anglorum, suæ suorumque consuetudini libentissimè præferret. Erat enim vir bonus & sapiens, & scientiâ Scripturarum nobilissimè instructus. Qui cum domum rediisset, curavit suos qui erant in *Hii*, quive eidem erant subditi Monasterio, ad eum quem cognoverat, quémque ipse toto ex corde susceperat, veritatis callem perducere, nec valuit. Navigavit itaque Hiberniam, & prædicans eis, ac modestâ exhortatione declarans legitimum Paschæ tempus, plurimos eorum, & penè omnes qui ab Hien-sium erant dominio liberi, ab errore avito correctos, ad unitatem reduxit Catholicam, ac legitimum Paschæ tempus observare perdocuit. Qui cum celebrato in Hiberniâ canonico Paschâ, ad suam insulam revertisset, suoque Monasterio Catholicam temporis Paschalis observantiam instantissimè prædicaret, nec tamen perficere quod conabatur posset, contigit eum ante expletum anni circulum migrasse de sæculo. Divinâ utique gratiâ disponente, ut vir unitatis & pacis studiosissimus, antè ad vitam raperetur æternam, quàm redeunte tempore Paschali, graviolem cum eis qui eum ad veritatem sequi volebant, cogeretur habere discordiam. Scripsit idem vitæ de locis sanctis librum legentibus multis utilimum; cujus auctor erat docendo ac dictando Galliarum Episcopus Arculfus, qui locorum gratiâ sanctorum venerat Hierosolymam, & lustratâ omni terrâ repromissionis, Damascum quoque, Constantinopolim, Alexandriam, multasque maris insulas adierat; patriamque navigio revertens, vi tempestatis in Occidentalia Britannia littora delatus est: ac post multa, ad memoratum Christi famulum Adamnanum perveniens, ubi doctus in Scripturis, sanctorumque locorum gnarus esse compertus est, libentissimè est ab illo susceptus, & libentiùs auditus; adeo ut quæque ille se in locis sanctis memoratu digna vidisse testabatur, cuncta mox iste litteris mandare curaverit. Fecitque opus (ut dixi) multis utile, & maximè illis qui longius ab iis locis, in quibus Patriarchæ & Apostoli erant, secreti, ea tantum de his quæ lectione didicerint, norunt. Porrexit autem librum hunc Adamnanus Aldfrido Regi, ac per ejus est largitionem, etiam

minoribus , ad legendum contraditus. Scriptor quoque ipse multis ab eo muneribus donatus , in patriam remissus est. De cujus scriptis aliqua decerpere , ac nostræ huic Historiæ inserere commodum fore legentibus reor.

CAPUT XVII.

Qua in eodem libro de loco Dominicæ Nativitatis , Passionis , & Resurrectionis commemoraverit.

SCRIPSIT ergo de loco Dominicæ Nativitatis in hunc modum: *Bethleem* , civitas David , in dorso sita est angusto , ex omni parte vallibus circumdato , ab Occidente in Orientem mille passibus longa , humili sine turribus muro per extrema plani verticis instructo ; in cujus Orientali angulo quasi quoddam naturale semiantrum est , cujus exterior pars Nativitatis Dominicæ fuisse dicitur locus ; interior *Præsepe Domini* nominatur. Hæc spelunca tota interiùs pretioso marmore tecta , supra locum ubi Dominus natus specialius traditur , sanctæ Mariæ grandem gestat Ecclesiam. Scripsit item hoc modo de loco Passionis ac Resurrectionis illius : Ingressis à Septentrionali parte urbem Hierosolymam , primum de locis sanctis pro conditione platearum divertendum est ad Ecclesiam Constantinianam , quæ Martyrium appellatur. Hanc Constantinus Imperator , eò quòd ibi Crux Domini ab Helenâ ejus matre reperta sit , magnifico & regio cultu construxit. Dehinc ab Occasu Golgothana videtur Ecclesia , in quâ etiam rupis apparet illa , quæ quondam ipsam adfixo Domini corpore , Crucem pertulit , argenteam modò pergrandem sustinens Crucem , pendente magnâ desuper æreâ rotâ cum lampadibus. Infra ipsum verò locum Dominicæ Crucis , excisa in petrâ crypta est , in quâ super altare pro defunctis honoratis sacrificium solet offerri , positis interim in plateâ corporibus. Hujus quoque ad Occasum Ecclesiæ , Anastasis , hoc est , Resurrectionis Dominicæ rotunda Ecclesia , tribus cincta parietibus , duodecim columnis sustentatur , inter parietes singulos latum habens spatium viæ , quæ

tria altaria in tribus locis parietis medii continet, hoc est, Australi, Aquilonari, & Occidentali. Hæc bis quaternas portas, id est, introitus per tres à regione parietes habet, è quibus quatuor ad Vulturium, & quatuor ad Eurum spectant. Hujus in medio monumentum Domini rotundum petra excisum est, cujus culmen intrinsecus stans homo manu contingere potest, ab Oriente habens introitum, cui lapis ille magnus adpositus est; quod intrinsecus ferramentorum vestigia usque in præsens ostendit. Nam extrinsecus usque ad culminis summirarem totum marmore tectum est. Summum verò culmen auro ornatum, auream magnam gestat Crucem. In hujus ergo monumenti Aquilonari parre sepulcrum Domini in eadem petra excisum est, longitudinis septem pedum, trium mensurâ palmarum pavimento altius eminet; introitum habens à latere Meridiano, ubi diu novæque duodecim lampades ardent, quatuor intra sepulcrum, octo supra in margine dextro. Lapis qui ad ostium monumenti positus erat, nunc fissus est; cujus pars minor quadratum altare, anre ostium nihilominus ejusdem monumenti stat; major verò pars in Orientali ejusdem Ecclesiæ loco quadrangulum aliud altare sub lintheaminibus exstat. Color autem ejusdem monumenti & sepulcri albo & rubicundo permixtus esse videtur.

CAPUT XVIII.

Quæ item de loco Ascensionis Dominicæ, & sepulcris Patriarcharum scripseris.

DE loco quoque Ascensionis Dominicæ præfatus Auctor hoc modo refert. Mons Olivarum altitudine monti Sion par est, sed latitudine & longitudine præstat, exceptis vitibus & olivis, raræ ferax arboris, frumenti quoque & hordei fertilis. Neque enim brucosa, sed herbosa & florida soli illius est qualitas: in cujus summo vertice, ubi Dominus ad cælos ascendit, Ecclesia rotunda grandis, ternas per circuitum cameratas habet porticus, desuper tectas. Interior

namque domus propter Dominici corporis meatum camerari & tegi non potuit: altare ad Orientem habens angusto culmine protectum, in cujus medio ultima Domini vestigia, cælo desuper patente ubi ascendit, visuntur. Quæ cum quotidie à credentibus terra tollatur, nihilominus manet, eandemque adhuc speciem veluti impressis signatam vestigiis servat. Hæc circa ærea rota jacet, usque ad cervicem alta, ab Occasu habens introitum, pendente desuper in trochleis magnâ lampade, totâ die & nocte lucente. In Occidentali ejusdem Ecclesiæ parte sunt fenestræ octo, totidemque è regione lampades in funibus pendentes, usque Hierosolymam per vitrum fulgent; quarum lux corda intuentium cum quadam alacritate & compunctione pavescere dicitur. In die Ascensionis Dominicæ, per annos singulos, Mîsâ peractâ, validi flaminis procella desursum venire consuevit, & omnes qui in Ecclesiâ adfuerint, terræ prosternere. De situ etiam *Hebron*, & monumentis Patrum ita scribit: *Hebron* quondam civitas & metropolis regni David, nunc ruinis tantum quid tum fuerit ostendens. Uno ad Orientem stadio speluncam duplicem in valle habet, ubi sepulcra Patriarcharum quadrato muro circumdantur, capitibus versis ad Aquilonem; & hæc singula singulis tecta lapidibus instar basilicæ dolatis, trium Patriarcharum candidis; Adam obscurioris & vilioris operis, qui haud longè ab illis in Borealem, extremamque illius loci partem pausat. Trium quoque feminarum viliores & minores memoriæ cernuntur. *Mambre* collis mille passibus est à monumentis hîs ad Boream, herbosus valde & floridus, campestem habens in verrice planitiem; in cujus Aquilonari parte quercus Abrahæ duorum hominum altitudinis truncus Ecclesiâ circumdata est. Hæc de Opusculis excerpta præfati Scriptoris, ad sensum quidem verborum illius, sed brevioribus strictisque comprehensa sermonibus, nostris ad utilitatem legentium Historiis indere placuit. Plura voluminis illius si quem scire delectat, vel in ipso illo volumine, vel in eo quod de illo dudum strictim excerptimus, epitomate requirat.



CAPUT XIX.

*Ut Australes Saxones Episcopos acceperint Eadbertum & Eollam,
Occidentales Danielem & Aldhelmum; & de scriptis
eiusdem Aldhelmi.*

ANNO Dominicæ Incarnationis septingentesimo quinto, *Aldfrid*, Rex Nordanhymbrorum, defunctus est anno regni sui vicesimo necdum impleto; cui succedens in Imperium filius suus *Asfred*, puer octo circiter annorum, regnavit annis undecim. Hujus regni principio Antistes Occidentalium Saxonum *Heddi* cælestem migravit ad vitam. Bonus quippe erat vir, ac justus, & Episcopalem vitam, sive doctrinam magis insito sibi virtutum amore quàm lectionibus institutus, exercebat. Denique reverentissimus Antistes *Pæthelm*, de quo in sequentibus suo loco dicendum est, qui cum successore ejus Aldhelmo multo tempore adhuc Diaconus sive Monachus fuit, referre est solitus, quòd in loco quo defunctus est, ob meritum sanctitatis ejus multa sint patrata miracula, hominèsq; provincie illius solitos ablatum inde pulverem propter languentes in aquam mittere, atque hujus gustum sive asperisionem multis sanitatem agrotis & hominibus & pecoribus conferre: propter quod frequenti oblatione pulveris sacri, fossa sit ibidem facta non minima. Quo defuncto, Episcopatus provincie illius in duas parochias divisus est. Una data est Danieli, quam usque hodie regit, altera Aldhelmo, cui annis quatuor strenuissimè præfuit; ambo & in rebus Ecclesiasticis, & in scientiâ Scripturarum sufficienter instructi. Denique *Aldhelm*, cum esset adhuc Presbyter, & Abbas Monasterii quod *Mailduf* urbem nuncupant, scripsit, jubente Synodo suæ gentis, librum egregium adversus errorem Brittonum, quo vel Pascha non suo tempore celebrant, vel alia perplura Ecclesiasticæ castitati & paci contraria gerunt, multosque eorum qui Occidentalibus Saxonibus subditi erant Brittones, ad Catholicam Dominici Paschæ celebrationem hujus lectione perduxit.

Scriptit & de virginitate librum eximium, quem in exemplum Sedulii geminato opere, & versibus hexametris, & prosâ composuit. Scriptit & alia nonnulla, utpote vir undecumque doctissimus: nam & sermone nitidus, & Scripturarum (ut dixi) tam liberalium quàm Ecclesiasticarum erat eruditione mirandus. Quo defuncto, Episcopatum pro eo suscepit *Fortheri*, qui usque hodie superest; vir & ipse in Scripturis sanctis multùm eruditus. Quibus Episcopatum administrantibus statutum est synodali decreto, ut provincia Australium Saxonum, quæ eatenus ad civitatis Ventanzæ, cui tunc Danihel præerat, Parochiam pertinebat, & ipsarumdem Episcopalem ac proprium haberet Episcopum: consecratusque est eis primus Antistes *Eadbert*, qui erat Abbas Monasterii beatæ memoriæ Vilfridi Episcopi, quod dicitur *Selaen*: quo defuncto, *Ceolla* suscepit officium Pontificatus. Ipso autem ante aliquot annos ex hac luce substracto, Episcopatus usque hodie cessavit.

CAPUT XX.

161 Coinred Merciorum, & Offa Orientalium Saxonum Reges in monachico habitu vitam finierint; & de vita vel obitu Vilfridi Episcopi.

ANNO autem imperii Osfredi quarto, *Coinred*, qui regno Merciorum nobilissimè tempore aliquanto præfuerat, nobiliùs multò sceptræ regni reliquit. Nam venit Romam, ibique ad tonsus, Pontificatum habente Constantino; ac Monachus factus, ad limina Apostolorum, in precibus, jejuniis & eleemosynis usque ad diem permansit ultimum; succedente in regnum *Ceolredo* filio *Edilredi*, qui ante ipsum *Coinredum* idem regnum tenebat. Venit autem cum illo & filius *Sigheri* Regis Orientalium Saxonum, (cujus supra meminimus) vocabulo *Offa*, juvenis amantissimæ ætatis & venustatis, totæque suæ genti ad tenenda servandaque regni sceptræ exoptatissimus. Qui pari ductus devotione mentis, reliquit uxorem, agros, cognatos & patriam propter

Christum, & propter Evangelium, ut in hac vitâ centuplum acciperet, & in sæculo venturo vitam æternam. Et ipse ergo ubi ad loca sancta Romam pervenerunt, adtonsus, & in monachico habitu vitam complens, ad visionem beatorum Apostolorum in cælis, diu desideratam pervenit. Eodem scilicet anno quo hi Britanniam reliquere, Antistes eximius *Vilfrid*, post quadraginta & quinque annos accepti Episcopatus, diem clausit extremum in provinciâ quæ vocatur *Inundalum*: corpusque ejus loculo inditum, perlatum est in Monasterium ipsius, quod dicitur *Inhyrþum*, & juxta honorem tanto Pontifici congruum, in Ecclesiâ beati Apostoli Petri sepultum. De cujus statu vitæ (ut ad priora repedantes, paucis quæ sunt gesta, memoremus) cum esset puer bonæ indolis, atque ætatem moribus transigens, ita se modestè & circumspèctè in omnibus gereret, ut merito à majoribus quasi unus ex ipsis amaretur, veneraretur, amplecteretur, ubi decimum quartum ætatis contigit annum, monasticam sæculari vitam prætulit. Quod ubi patri suo narravit, (jam enim mater obierat) libenter ejus votis ac desideriiis cælestibus adnuit, cumque cœptis insistere salutaribus jussit. Venit ergo ad insulam Lindisfarnensem, ibique Monachorum famulatur se contradens, diligenter ea quæ monasticæ castitatis ac pietatis erant, & discere curabat, & agere. Et quia acris erat ingenii, didicit citissimè psalmos, & aliquot codices; necdum quidem adtonsus, verum eis quæ tonsurâ majores sunt virtutibus, id est, humilitatis & obedientiæ, non mediocriter insignitus: propter quod & à senioribus, & à cœtaneis suis justo colebatur affectu. In quo videlicet Monasterio cum aliquot annos Deo serviret, animadvertit paulatim adolescens animi sagacis, minimè perfectam esse virtutis viam quæ tradebatur à Scottis, proposuitque animo venire Romam, & qui ad sedem Apostolicam ritus Ecclesiastici sive monasteriales servarentur, videre. Quod cum Fratribus referret, laudaverunt ejus propositum, cumque id quod mente disposuerat, perficere suadebant. At ille confestim veniens ad Reginam Eanflædam, (quia notus erat ei, ejusque consilio & suffragiis præfatus fuerat Monasterio sociatus) indicavit ei, desiderium sibi inesse beatorum Apostolo-

rum limina visitandi : quæ delectata bono adolescentis proposito , misit eum Cantiam , ad Regem Erconbertum , qui erat filius avunculi sui) postulans ut eum honorificè Romam transmitteret. Quo tempore ibi gradum Archiepiscopi Honorius , unus ex discipulis beati Papæ Gregorii , vir in rebus Ecclesiasticis sublimiter institutus servabat. Ubi cùm aliquandiu demoratus adolescens animi vivacis , diligenter his quæ inspiciebat , discendis operam daret , supervenit illò alius adolescens , nomine *Biscop* , cognomento *Benedictus* , de nobilibus Anglorum , cupiens & ipse Romam venire : cujus suprà meminimus. Hujus ergo comitatu Rex sociavit Vilfridum , utque illum secum Romam perduceret , jussit. Qui cùm Lugdunum pervenissent , *Vilfrid* à Dalfino civitatis Episcopo retento , *Benedictus* cœptum lintre navali iter Romam usque complevit. Delectabatur enim Antistes prudentiâ verborum juvenis , gratiâ venusti vultûs , alacritate actionis , & constantiâ ac maturitate cogitationis : unde & omnia quæ necesse habebat , abundanter ipsi cum sociis suis , quamdiu secum erant , donabat : & insuper offerebat , ut si vellet , partem Galliarum non minimam illi regendam committeret , ac filiam fratris sui , virginem illi conjugem daret , eumque ipse loco adoptivi haberet. At ille gratias agens pietati quam erga eum (cùm esset peregrinus) habere dignaretur , respondit propositum se magis alterius conversationis habere , & idèd patriâ relictà Romam iter agere cœpisse. Quibus auditis , Antistes misit eum Romam , dato duce itineris , & cunctis simul quæ necessitas poscebat itineris , largiter subministratis ; observans sedulò , ut cùm patriam reverteretur , per se iter facere meminisset. Veniens verò Romam , & orationibus ac meditationi rerum Ecclesiasticarum (ut omninò proposuerat) quotidianâ mancipatus instantiâ , pervenit ad amicitiam viri sanctissimi ac doctissimi , videlicet Bonifacii Archidiaconi , qui etiam erat Consiliarius Apostolici Papæ ; cujus magisterio quatuor Evangeliorum libros ex ordine didicit , computum Paschæ rationabilem , & alia multa quæ in patriâ nequiverat , Ecclesiasticis disciplinis accommoda , eodem magistro tradente percepit ; & cùm menses aliquot ibi studiis occupatus felicibus exegisset , rediit

ad Daluinum in Galliam, & sex annos apud ipsum commoratus, adtonsus est ab eo, & in tanto habitus amote, ut heredem sibi illum facere cogitaret. Sed ne hoc fieri posset, Antistes crudeli morte præceptus est, & *Vilfrid* ad suæ potiùs, hoc est, Anglotum gentis Episcopatum reservatus. Namque *Baldid* Regina, missis militibus, Episcopum iussit interficere; quem ad locum quidem quo decollandus erat, secutus est *Vilfrid* Cleticus illius, desiderans cum eo (tamen ipso multum prohibente) pariter occumbere. Sed hunc ubi petegrinum atque otiundum de natione Anglorum cognovire catnifices, pepercere illi, neque eum trucidare cum suo voluere Pontifice. At ille Britanniam veniens, conjunctus est amicitia Alcfredi Regis, qui Catholicas Ecclesiæ regulas sequi semper & amare didicerat. Unde & illi, quia Catholicum eum esse comperit, mox donavit terram decem familiarum, in loco qui dicitur *Stanford*, & non multò post Monasterium triginta familiarum, in loco qui vocatur *Inrbrypum*; quem videlicet locum dederat pridem ad construendum inibi Monasterium his qui Scottos sequebantur. Verum quia illi postmodum optione datâ maluerunt loco cedere, quàm Pascha Catholicum, cæterosque ritus canonicos, juxta Romanæ & Apostolicæ Ecclesiæ consuetudinem recipere, dedit hoc illi, quem melioribus imbutum disciplinis ac moribus vidit. Quo in tempore ad jussionem præfati Regis Presbyter ordinatus est in eodem Monasterio, ab Agilbercto Episcopo Gevissorum, cujus suprà meminimus, desiderante Rege ut vir tantæ eruditionis ac religionis sibi specialiter individuo comitatu Sacerdos esset ac Doctor. Quem non multò post detectâ & eliminatâ (ut suprà docuimus) Scottorum sectâ Galliam mittens, cum consilio atque consensu patris sui *Osuin*, Episcopum sibi rogavit ordinari, cum esset annorum circiter triginta, eodem Agilbercto tunc Episcopatum agente Parisiâ civitate; cum quo & alii undecim Episcopi ad dedicationem Antistitis convenientes, multum honorificè ministerium impleverunt. Quo adhuc in transmarinis partibus demorante, consecratus est in Episcopatum Eboraci, jubente Rege *Osuin*, *Ceada* vit sanctus, ut suprà memoratum est, & tribus annis Ecclesiam sublimiter regens, dehinc ad

Monasterii sui, quod est in *Leistingari*, curam secessit, accipiente Vilfrido Episcopatum totius Nordanhymbrorum provinciae; qui deinde regnante Ecgfrido, pulsus est Episcopatu, & alii pro illo consecrati Antistites, quorum suprà meminimus: Romamque iturus, & coram Apostolico Papâ causam dicturus, ubi navem conscendit, flante Favonio pulsus est Fresiam, & honorificè susceptus à Barbaris, ac Rege illorum Aldgils, prædicabat eis Christum, & multa eorum millia verbo veritatis instruens, à peccatorum suorum sordibus fonte Salvatoris abluit; & quod postmodum *Vilbrord* reverentissimus Christi Pontifex in magnâ devotione complevit, ipse primus ibi opus Evangelicum cœpit. Ibi ergo hiemem cum novâ Dei plebe feliciter exigens, sic Romam veniendi iter repetiit; & ubi causa ejus ventilata est præsentem Agathione Papâ, & pluribus Episcopis, universorum judicio absque crimine accusatus fuisse, & Episcopatu esse dignus inventus est. Quo in tempore idem Papa Agatho cum Synodum congregaret Romæ centum viginti quinque Episcoporum, adversus eos qui unam in Domino Salvatore voluntatem atque operationem dogmatizabant, vocari jussit, & Vilfridum, atque inter Episcopos confidentem dicere fidem suam, simul & provinciae sive insulæ de quâ venerat: cùmque Catholicus cum suis esset inventus, placuit hoc inter cetera ejusdem Synodi gestis inseri, scriptumque est hoc modo: Vilfridus Deo amabilis Episcopus Eboracæ civitatis, Apostolicam sedem de suâ causâ appellans, & ab hac potestate de certis incertisque rebus absolutus, & cum aliis centum viginti quinque Coepiscopis in Synodo in judicii sede constitutus, & pro omni Aquilonari parte, Britanniæ & Hiberniæ insulis, quæ ab Anglorum & Brittonum, necnon Scottorum & Pictorum gentibus incoluntur, veram & Catholicam fidem confessus est, & conscriptione suâ corroboravit. Post hæc veniens Brittaniam, provinciam Australium Saxonum ab idolatriæ ritibus ad veram Christi fidem convertit. Vectæ quoque insulæ verbi ministros destinavit: & secundo anno Aldfridi, qui post Ecgfridum regnavit, sedem suam & Episcopatum, ipso Rege invitante, recepit. Sed post quinque annos denuò accusatus, ab eodem ipso

Rege, & plurimis Episcopis Præfultu pulsus est: veniensque Romam, cum præsentibus accusatoribus acciperet locum se defendendi, consedentibus Episcopis pluribus cum Apostolico Papâ Johanne, omnium judicio probatum est accusatores ejus nonnullâ in parte falsas contra eum machinasse calumnias: scriptumque à præfato Papâ Regibus Anglorum Edilredo & Aldfrido, ut eum in Episcopatum suum (cò quòd injustè fuerit condemnatus) facerent recipi. Juvit autem causam absolutionis ejus lectio Synodi beatæ memoriæ Papæ Agathonis, quæ quondam ipso præsentè in urbe, atque in eodem Concilio inter Episcopos residente, ut prædiximus, acta est. Cùm ergo causâ exigente Synodus eadem coram Nobilibus, & frequentia populi jubente Apostolico Papâ, diebus aliquot legeretur, ventum est ad locum ubi scriptum erat: Vilfridus, Deo amabilis Episcopus Eboracæ civitatis, Apostolicam sedem de suâ causâ appellans, & ab hac potestate de certis incertisque rebus absolutus, & cætera quæ suprà posuimus. Quod ubi lectum est, stupor adprehendit audientes; & silente lectore cœperunt alterutrum requirere quis esset ille Vilfridus Episcopus. Tunc Bonifacius, Consiliarius Apostolici Papæ, & alii perplures qui cum temporibus Agathonis Papæ ibi viderant, dicebant ipsum esse Episcopum qui nuper Romam, accusatus à suis, atque ab Apostolicâ Sede judicandus, advenerat: qui jamdudum (inquiunt) æquè accusatus huc adveniens, mox auditâ ac dijudicatâ causâ & controversiâ utriusque partis, à beatæ memoriæ Papâ Agathone prolatus est, contra fas à suo Episcopatu repulsus: & tanti apud eum habitus est, ut ipsum in Concilio quod congregarat, Episcopum, quasi virum incorruptæ fidei, & animi probi, residere præciperet. Quibus auditis, dicebant omnes, unâ cum ipso Pontifice, virum tantæ auctoritatis, qui per quadraginta prope annos Episcopatuungebatur, nequaquàm damnari debere, sed ad integrum culpis accusationum absolutum, patriam cum honore reverti. Qui cùm in Britanniam remeans, in Galliarum partes devenisset, tactus est infirmitate repentinâ, & eâ crescente aded pressus, ut neque equo vehi posset, sed manibus Ministrorum portaretur in grabato. Sic delatus est in Meldum

civitatem Galliæ, quatuor diebus ac noctibus quasi mortuus jacebat, halitu tantum pertenui quia viveret demonstrans. Cùmque ita sine cibo & potu, sine voce & auditu quattuor perseveraret, quintâ demum influente die, quasi de gravi experrectus somno exsurgens resedit; apertisque oculis, vidit circa se choros psallentium simul ac silentium Fratrum; ac modicum suspirans interrogavit, ubi esset *Acca* Presbyter; qui statim vocatus intravit: & videns eum melius habentem, ac loqui jam valentem, flexis genibus gratias egit Deo cum omnibus qui aderant Fratribus. Et cum parum confedissent, ac de supernis judiciis trepidi, aliqua confabulari cœpissent: jussit Pontifex cæteros ad horam egredi, & ad *Accam* Presbyterum ita loqui exorsus est: Visio mihi modò tremenda apparuit, quam te audire ac silentio tegere volo, donec sciam quid de me fieri velit Deus. Adstitit enim mihi quidam candido præclarus habitu, dicens se Michaëlem esse Archangelum; & ob hoc, inquit, missus sum ut te à morte revocem: donavit enim tibi Dominus vitam per orationes & lacrymas discipulorum ac Fratrum tuorum, & per intercessionem beatæ suæ genitricis, semperque virginis Mariæ. Quapropter dico tibi, quia modò quidem ab infirmitate hac sanaberis; sed paratus esto, quia post quadriennium revertens, visitabo te; patriam verò perveniens, maximam possessionum, quæ tibi ablata sunt, portionem recipies; atque in pace tranquillâ vitam terminabis. Convaluit igitur Episcopus cunctis gaudentibus, & Deo gratias agentibus, cœptoque itinere Britanniam venit. Lectis autem epistolis quas ab Apostolico Papâ advexerat, *Berſwald* Archiepiscopus, & *Edilredus* quondam Rex, tunc autem Abbas, libentissimè faverunt: qui videlicet *Edilred* accitum ad se Coinredum, quem pro se Regem fecerat, amicum amico fieri petiit, & impetravit. Sed *Aldfrid* Nordanhymbrorum Rex, cum suscipere contempsit, nec longo tempore superfuit: unde factum est ut regnante Osredo filio ejus, mox Synodo factâ juxta fluvium *Nidd*, post aliquantum utriusque partis conflictum, tandem cunctis faventibus, in Præsulatum sit suæ receptus Ecclesiæ. Sicque quatuor annis, id est, usque ad diem obitus sui, vitam duxit in pace. Defunctus est autem quarto

Idus Octobris, in Monasterio suo quod habebat in provincia Undalum, sub regimine Cudualdi Abbatis, & ministerio Fratrum perlatus in primum suum Monasterium, quod vocatur *Inhrypum*; positusque est in Ecclesiâ beati Petri Apostoli, juxta altare ad Austrum, ut suprâ docuimus; & hoc de illo epitaphium est scriptum:

*Wilfridus hic magnus requiescit corpore Prasul,
Hanc Domino qui aulam ductus pietatis amore
Fecit, & eximio sacrauit nomine Petri,
Cui claves cali Christus dedit arbiter orbis;
Atque auro ac tyrio devotus vestiit ostro.
Quin etiam sublime Crucis radiante metallo,
Hic posuit trophæum; necnon & quatuor auro
Scribi Evangelii præcepit in ordine libros;
Ac thecam è rutilo his condignam condidit auro:
Paschalis qui etiam sollemnia tempora cursus
Catholici ad justum correxit dogma canonis,
Quem statuere Patres, dubioque errore remoto
Certa sua genti ostendit moderamina risus:
Inque locis istis Monachorum examina crebra
Colligit, ac monitis cavet qua regula Patrum
Sedulus instituit: multisque domique forisque
Factatus nimium per tempora longa periclis,
Quindecies ternos postquam egit Episcopus annos,
Transiit, & gaudens caelestia regna petivit
Dona, Jesu, ut grex pastoris calle sequatur.*

CAPUT XXI.

*Ut religioso Abbati Hadriano Albinus, Wilfrido in Episcopatum
Acca successerit.*

ANNO post obitum præfati Patris proximo, id est, quinto Osfredi Regis, reverentissimus Pater Hadrianus Abbas, cooperatore in verbo Dei Theodori beatæ memoriæ Episcopi, defunctus est, & in Monasterio suo, in Ecclesiâ beatæ Dei Genitricis sepultus; qui est annus quadragesimus

primus, ex quo à Vitaliano Papâ directus est cum Theodoro, ex quo autem in Britanniam venit, tricesimus nonus. Cujus doctrinæ simul & Theodori, inter alia testimonium perhibet, quòd Albinus discipulus ejus, qui Monasterio ipsius in regimine successit, in tantum studiis Scripturarum institutus est, ut Græcam quidem linguam non parvâ ex parte, Latinam verò non minùs quàm Anglorum, quæ sibi naturalis est, noverit. Suscepit verò pro Vilfrido Episcopatum Agstaldensis Ecclesiæ *Acca* Presbyter ejus, vir & ipse strenuissimus, & coram Deo & hominibus magnificus; qui & ipsius Ecclesiæ suæ, quæ in beati Andreæ Apostoli honorem consecrata est, ædificium multifario decore, ac mirificis ampliavit operibus. Dedit namque operam (quod & hodie facit) ut adquisitis undecumque reliquiis beatorum Apostolorum & Martyrum Christi, in venerationem illorum poneret altaria, distinctis porticibus in hoc ipsum intra muros ejusdem Ecclesiæ, sed & historias passionum eorum, unâ cum cæteris Ecclesiasticis voluminibus, summâ industriâ congregans, amplissimam ibi ac nobilissimam bibliothecam fecit, necnon & vasa sancta, & luminaria, aliâque hujusmodi quæ ad ornatum domûs Dei pertinent, studiosissimè paravit. Cantorem quoque egregium, nomine *Maban*, qui à successoribus discipulorum beati Papæ Gregorii in Cantiâ fuerat cantandi sonos edoctus, ad se suòsque instituendos accersit, ac per annos duodecim tenuit: quatenùs & quæ illi non noverant, carmina Ecclesiastica doceret; & ea quæ cognita longo usu vel negligentia inveterare cœperant, hujus doctrinâ priscum renovarentur in statum. Nam & ipse Episcopus *Acca* cantator erat peritissimus, quomodò etiam in litteris sanctis doctissimus, & in Catholicæ fidei confessione castissimus, in Ecclesiasticæ quoque institutionis regulis sollertissimus existerat; & usquedum præmia piæ devotionis accipiat, existere non desistit: utpote qui à pueritia in Clero sanctissimi ac Deo dilecti *Boza*, Eboracensis Episcopi, nutritus atque eruditus est; deinde ad Vilfridum Episcopum spe melioris propositi adveniens, omnem in ejus obsequio usque ad obitum illius, explevit ætatem: cum quo etiam Romam veniens, multa illuc quæ in patriâ nequiverat, Ecclesiæ sanctæ institutis utilia didicit.

CAPUT XXII.

*Ut Ceolfrið Abbas Regi Piðtorum architectos Ecclesiæ, simul
& epistolam de Catholico Paschâ, vel de tonsurâ miserit.*

EO tempore *Naitan*, Rex Piðtorum, qui Septemtrionalibus Britanniæ plagas inhabitant, admonitus Ecclesiasticarum frequenti meditatione Scripturarum, abrenunciavit errori, quo eatenus in observatione Paschæ cum suâ gente tenebatur, & se suosque omnes ad Catholicum Dominicæ Resurrectionis tempus celebrandum perduxit. Quod ut facilius, & majori auctoritate perficeret, quæsit auxilium de gente Anglorum, quos jamdudum ad exemplum sanctæ Romanæ & Apostolicæ Ecclesiæ suam religionem instituisse cognovit. Siquidem misit legatarios ad virum venerabilem Ceolfriðum, Abbatem Monasterii beatorum Apostolorum Petri & Pauli, quod est ad ostium *Vinri* amnis, & juxta amnem *Tinam*, in loco qui vocatur *In Girvum*, cui ipse post Benedictum (de quo suprà diximus) gloriosissimè præfuit; postulans ut exhortatorias sibi litteras mitteret, quibus potentiùs confutare posset eos qui Pascha non suo tempore observare præsumerent: simul & de tonsuræ modo vel ratione quâ Clericos insigniri deceret; excepto quòd etiam ipse in his non parvâ ex parte esset imbutus. Et architectos sibi mitti petiit, qui juxta morem Romanorum, Ecclesiam de lapide in gente ipsius facerent, promittens, hanc in honorem beati Apostolorum Principis dedicandam; se quoque ipsum cum suis omnibus, morem sanctæ Romanæ & Apostolicæ Ecclesiæ semper imitaturum, in quantum dumtaxat tam longè à Romanorum loquelâ & natione segregati, hunc ediscere potuissent. Cujus religiosi votis ac precibus favens reverentissimus Abbas Ceolfriðus, misit architectos quos petebat, & litteras scriptas in hunc modum:

Domino excellentissimo & gloriosissimo Regi *Naitano*,
Ceolfrið Abbas in Domino salutem. Catholicam sancti Paschæ observantiam, quam à nobis (Rex Deo devote) reli-

gioso studio quæstisti, promptissimè ac libentissimè tuo desiderio, juxta quod ab Apostolicâ sede didicimus, patescere satagimus. Scimus namque cælitus sanctæ Ecclesiæ donarum, quotiens ipsi rerum Domini, discendæ, docendæ, custodiendæ veritati operam impendunt. Nam & verè omninò dixit quidam sæcularium Scriptorum, quia felicissimo mundus statu ageretur, si vel Reges philosopharentur, vel regnarent Philosophi. Quòd si de Philosophiâ hujus mundi verè intellegere, id est, de statu hujus mundi, meritò dicere potuit homo mortalis hujus mundi; quanrò magis vel civibus patriæ cælestis in hoc mundo peregrinantibus oprandum est, & totis animi viribus supplicandum, ut quòd plus in mundo quique valent, cò ampliùs ejus, qui super omnia est, Judicis mandatis auscultare contendant, atque ad hæc observanda, secum eos quoque qui sibi commissi sunt, & exemplis simul & auctoritate instiguant? Tres sunt ergo regulæ sacris inditæ litteris, quibus Paschæ celebrandi tempus nobis præfinitum, nullâ prorsus humanâ licèt auctoritate mutari; è quibus dux in lege Moysei divinitus statuta, tertia in Evangelio per effectum Dominicæ Passionis & Resurrectionis adjuncta est. Præcepit enim lex ut Pascha primo mense anni, & tertiâ ejusdem mensis septimanâ, id est, à quintâ decimâ die usque ad vicesimam primam fieri deberet: additumque est per institutionem Apostolicam ex Evangelio, ut in ipsâ tertiâ septimanâ diem Dominicam expectare, atque in eâ temporis Paschalis initium tenere debeamus. Quam videlicet regulam triformem quisquis ritè custodierit, nunquam in adnotatione festi Paschalis errabit. Verùm si de his singulis enucleariùs ac latius audire desideras, scriptum est in Exodo, ubi liberandus de Ægypto populus Israël, primum Pascha facere jubetur, quia dixerit Dominus ad Moysen & Aaron: Mensis iste vobis principium mensium primus erit in mensibus anni. Loquimini ad universum cœtum filiorum Israël, & dicite eis: Decimâ die mensis hujus tollat unusquisque agnum per familias & domos suas. Et paulò pòst: Et servabitis eum usque ad quartam decimam diem mensis hujus. Immolabitque eum universa multitudo filiorum Israël ad vesperam. Quibus verbis manifestissimè constat, quòd ita

in

in observatione Paschali mentio fit dici quartadecimæ, ut non tamen in ipsâ die quartadecimâ Pascha fieri præcipiatur; sed adveniente tandem vespere dici quartadecimæ, id est, quintadecimâ Lunâ, quæ initium tertiæ septimanæ faciat, in cæli faciem prodeunte, agnus immolari jubeatur: & quòd ipsa sit, nox quintadecimæ Lunæ, in quâ percussis Ægyptiis, Israël est à longâ servitute redemptus. Septem, inquit, diebus azyma comedetis. Quibus item verbis tota tertia septimana ejusdem primi mensis decernitur sollemnis esse debere. Sed ne putaremus easdem septem dies à quartadecimâ usque ad vicesimam esse supputandas, continuò subjecit: In die primo non erit fermentum in domibus vestris. Quicumque comederit fermentum, peribit anima illa de Israël. A die primo usque ad diem septimum, & cætera, usquedum ait: In eadem enim ipsâ die educam exercitum vestrum de terrâ Ægypti. Primum ergo diem azymorum appellat eum in quo exercitum eorum esset educturus de Ægypto. Constat autem quia non quartadecimâ die, in cujus vespertâ agnus est immolatus, & quæ propriè Pascha si-ve Phase dicitur; sed quintadecimâ sunt educti ex Ægypto, sicut in libro Numerorum apertissimè scribitur. Profecti igitur de Rameffe quintadecimâ die mensis primi, alterâ die fecerunt Phase filii Israël in manu excelsâ. Septem ergo dies azymorum, in quatum primâ eductus est populus Domini ex Ægypto, ab initio (ut diximus) tertiæ septimanæ, hoc est, à quintadecimâ die mensis primi, usque ad vicesimam primam ejusdem mensis diem completam computari oportet. Porro dies quartadecima extra hunc numerum separatim sub Paschæ titulo prænotatur, sicut Exodi sequentia patenter edocent; ubi cum dictum esset: In eadem enim ipsâ die educam exercitum vestrum de terrâ Ægypti; protinus adjunctum est: Et custodietis diem istum in generationes vestras ritu perpetuo. Primo mense, quartadecimâ die mensis comedetis azyma usque ad diem vicesimam primam ejusdem mensis ad vespertam. Septem diebus fermentatum non inveniatur in domibus vestris. Quis enim non videat, à quartadecimâ usque ad vicesimam primam, non septem solummodò, sed octo potius esse dies, si & ipsa

quartadecima annumeretur? Sin autem (ut diligentius explorata Scripturæ veritas docet) à vesperâ diei quartadecimæ usque ad vesperam vicesimæ primæ computaverimus, videbimus profectò quòd ita dies decimaquarta vesperam suam in festi Paschalis initium prorogat, ut non amplius tota sola sacra sollemnitas quàm septem tantummodò noctes eum totidem diebus comprehendat: unde & vera esse probatur nostra diffinitio, quâ tempus Paschale primo mense anni, & tertiâ ejus hebdomadâ celebrandum esse diximus. Veraciter enim tertia agitur hebdomada, quod à vesperâ quartadecimæ diei incipit, & in vesperâ vicesimæ primæ completur. Postquam verò Pascha nostrum immolatus est Christus, diémque nobis Dominicam, quæ apud antiquos una vel prima Sabbati, sive Sabbatorum vocatur, gaudio suæ resurrectionis fecit esse sollemnem; ita hanc nunc Apostolica traditio festis Paschalibus inseruit, ut nihil omnimodis de tempore Paschæ legalis præoccupandûm, nihil minuendum esse decerneret. Quin potius statuit ut expectaretur juxta præceptum legis idem primus anni mensis, expectaretur decimaquarta dies illius, expectaretur vespera ejusdem. Et cum hæc dies in Sabbatum fortè incideret, tolleretur unusquisque agnum per familias & domos suâs, & immolarent eum ad vesperam, id est, præpararent omnes Ecclesiæ per orbem (quæ unam Catholicam faciunt) panem & vinum in mysterium carnis & sanguinis Agni immaculati, qui abstulit peccata mundi: & præcedente congruâ lectionum, orationum, & cæremoniarum Paschalium sollemnitate, offerrent hæc Domino in spem futuræ suæ redemptionis. Ipsa est enim eadem nox in quâ de Ægypto per sanguinem agni Israëlita plebs crepta est; ipsa in quâ per resurrectionem Christi liberatus est à morte æternâ populus omnis Dei. Mandè autem inlucescente die Dominicâ, primam Paschalis festi diem celebrarent. Ipsa est enim dies in quâ resurrectionis suæ gloriam Dominus multifario pæ revelationis gaudio discipulis patefecit. Ipsa prima dies azy-morum, de quâ multum distinctè in Levitico scriptum est: Mense primo, decimaquartâ die mensis, ad vesperam, Phase Domini est, & quintadecimâ die mensis hujus sol-

lemnitas azymorum Domini est. Septem diebus azyma comeditis. Dies primus erit celeberrimus sanctusque. Si ergo fieri potuisset ut semper in diem quintumdecimum primi mensis, id est, in Lunam quintamdecimam Dominica dies incurreret, uno semper eodemque tempore cum antiquo Dei populo, quanquam Sacramentorum genere discreto, sicut unâ eademque fide Pascha celebrare possemus. Quia verò dies septimanæ non æquali cum Lunâ tramite procurrit, decrevit Apostolica traditio, quæ per beatum Petrum Romæ prædicata, per Marcum Evangelistam, & interpretem ipsius Alexandriæ confirmata est, ut adveniente primo mense, adveniente vespere dici quartædecimæ, expectetur etiam dies Dominica, à quintadecimâ usque ad vicesimam primam diem ejusdem mensis. In quacumque enim harum inventa fuerit, meritò in eâ Pascha celebrabitur: quia nimirum hæc ad numerum pertinet illarum septem dierum, quibus azyma celebrari jubetur. Itaque fit ut nunquam Pascha nostrum à septimanâ mensis primi tertiâ in utramvis partem declinet: sed vel totam eam, (id est, omnes septem legalium azymorum dies) vel certe aliquos de illis teneat. Nam etsi saltem unum ex eis, hoc est, ipsum septimum adprehenderit, quem tam excellenter Scriptura commendat; Dies autem septimus, inquit, erit celebrior & sanctior, nullumque servile opus fiet in eo; nullus arguere nos poterit, quòd nos rectè Dominicum Paschæ diem, quem de Evangelio suscepimus, in ipsâ quam lex statuit, tertiâ pripi mensis hebdomadâ celebremus. Cujus observantiæ Catholicâ ratione patefactâ, patet è contrario error inrationabilis eorum qui præfixos in lege terminos, nullâ cogente necessitate, vel anticipare, vel transcendere præsumunt. Namque sine ratione necessitatis alicujus anticipant illi tempus in lege præscriptum, cum Dominicam Paschæ diem à decimaquartâ mensis primi, usque ad vicesimam putant Lunam esse servandum. Cum enim à vespere diei tertædecimæ vigilias sanctæ noctis celebrare incipiunt, claret quòd illum in exordio suo Paschæ diem statuunt, cujus nullam omninò mentionem in decreto legis inveniunt. Et cum vicesimâ primâ die mensis Pascha Dominicum ce-

lebrare refugium, patet profectò, quòd illam per omnem diem à suâ ſollemnitate ſecernunt, quam lex majore præ cæteris feſtivitàte memorabilem ſæpenuerò commendat: ſicque diem Paſchæ ordine perverſo, & aliquando in ſecundâ hebdomadâ totam compleant, & nunquàm in hebdomadæ tertriæ die ſeptimo ponant; rursúmque qui à decimaſextâ die menſis ſæpediſti uſque ad viciſſimam ſecundam Paſcha celebrandum magis autumant, non minore utique errore (tameſſi altero latere) à recto veritatis tramite divertunt, & veluti naufragia Scyllæ fugientes, in Charybdis voraginem ſubmergendi decidunt. Nam cum à Lunâ decimaſextâ primi menſis oriente, id eſt, à vespérâ diei quintædecimæ Paſcha incipiendum doceant; nimirum conſtat quòd quattamdecimam diem menſis ejuſdem, quam lex primitus & præcipuè commendat, à ſuâ prorfus ſollemnitate ſecludunt: itaut quintædecimæ, in quâ populus Dei ab Ægyptiacâ ſervitute redemptus eſt, & in quâ Dominus ſuo mundum ſanguine à peccatorum tenebris liberavit, in quâ etiam ſepultus ſpem nobis poſt mortem beatæ quietis tribuit, vix vespérâ tangant. Iidémque pœnam erroris ſui in ſemetipſos recipientes, cum in viciſſimâ ſecundâ die menſis, Paſchæ diem ſtatuunt Dominicum, legitimos utique terminos Paſchæ appetâ tranſgreſſione violant, utpote qui ab illius diei vespérâ Paſcha incipiunt, in quâ hoc lex conſumari & perfici debere decrevit. Illam in Paſcha diem adſignent primam, cujus in lege mentio nulla uſquàm reperitur, id eſt, quartæ primam ſeptimanæ. Qui utrique non ſolùm in diſſinitione & computo Lunaris ætatis, ſed & in menſis primi nonnunquàm inventione falluntur. Quæ diſputatio major eſt, quàm epiſtola hæc vel valeat comprehendere, vel debeat. Tantùm hoc dicam, quòd per æquinoctium vernale ſemper inerrabiliter poſſet inveniri, qui menſis juxta computum Lunæ, primus anni, qui eſſe debeat ultimus. Æquinoctium autem, juxta ſententiam omnium Orientalium, & maximè Ægyptiorum, qui præ cæteris Doctõribus calculandi palmam tenent, duodecimo Kalendarum Aprilium die provenire conſuevit, ut etiam ipſi horologicâ inſpectione probamus. Quæcumque ergo Luna ante æqui-

noctium plena est, quartadecima videlicet, vel quintadecima existens, hæc ad præcedentis anni novissimum pertinet mensem, ideóque Paschæ celebrando habilis non est. Quæ verò post æquinoctium, vel in ipso æquinoctio suum plenilunium habet, in hac absque ullâ dubietate, quia primi mensis est, & antiquos Pascha celebrare solitos, & nos ubi Dominica dies advenit, celebrare debere noscendum est. Quod ita fieri oportere illa nimirum ratio cogit, quia in Genesi scriptum est, quodd fecit Deus duo luminaria magna; lūminare majus, ut præfset diei; & lūminare minus, ut præfset nocti: vel (sicut alia dicit editio) lūminare majus in inchoationem diei; & lūminare minus in inchoationem noctis. Sicut ergo prius Sol à medio procedens Orientis, æquinoctium vernale suo præfixit exortu, deinde Luna, Sole ad vespertum occidente, & ipsa plena à medio secuta est Orientis; ita omnibus annis idem primus Lunæ mensis eodem necesse est ordine servari, ut non ante æquinoctium, sed vel ipso æquinoctii die, (sicut in principio factum est) vel eo transenso, plenilunium habere debeat. At si uno saltem die plenilunium tempus æquinoctii præcesserit, non hanc primo mensi anni incipientis, sed ultimo potius præteriti Lunam esse adscribendam; & ideò festis Paschalibus inhabilem, memorata ratio probat. Quodd si mysticam quoque vos in his rationem audire delectat, primo mense anni, qui etiam mensis novorum dictus est, Pascha facere jubemur; quia renovato ad amorem celestium spiritu mentis nostræ, Sacramenta Dominicæ Resurrectionis, & ereptionis nostræ celebrare debemus, tertiâ ejusdem mensis septimanâ facere præcipimur; quia ante legem, & sub lege promissus, tertio tempore sæculi cum gratiâ venit ipse qui Pascha nostrum immolaretur Christus: quia tertiâ post immolationem suæ passionis die resurgens à mortuis, hanc Dominicam vocari, & in eâ nos annuatim Paschalia ejusdem resurrectionis voluit festa celebrare: quia nos quoque ita solum veraciter ejus sollemnia celebramus, si per fidem, spem, & caritatem, Pascha, id est, transitum de hoc mundo ad Patrem; cum illo facere curamus: post æquinoctium veris, plenilunium mensis præcipimur observare Paschalis.

ut videlicet primò Sol longiorem nocte faciat diem, dein-
de Luna plenum suæ lucis orbem mundo præsentet; quia pri-
mò quidem Sol iustitiæ, in cuius pennis est sanitas, (id est,
Dominus Iesus) per resurrectionis suæ triumphum cunctas
mortis tenebras superavit: ac sic ascendens in cælos, misso
desuper Spiritu, Ecclesiam suam (quæ sæpe Lunæ vocabulo
designatur) internæ gratiæ luce replevit. Quem videlicet
ordinem nostræ salutis Propheta contemplatus aiebat: Ele-
vatus est Sol, & Luna stetit in ordine suo. Qui ergo pleni-
tudinem Lunæ Paschalis ante æquinoctium provenire posse
contenderit, talis in mysteriorum celebratione maximorum
à sanctarum quidem Scripturarum doctrinâ discordat; con-
cordat autem eis qui sine præveniente gratiâ Christi se sal-
vari posse confidunt: quia etsi vera lux tenebras mundi mo-
riendo ac resurgendo nunquàm vicisset, perfectam se ha-
bere posse iustitiam, dogmatizare præsumunt. Itaque post
æquinoctialem Solis exortum, post plenilunium primi men-
sis hunc, ex ordine subsequens; id est, post completam diem
eiusdem mensis quartamdecimam (quæ cuncta ex lege ob-
servanda accepimus) exspectamus adhuc monente Evange-
lio in ipsâ hebdomadâ tertiâ tempus diei Dominicæ, & sic
demum votiva Paschæ nostri festa celebramus, ut indice-
mus nos non cum antiquis excussum Ægyptiæ servitutis
jugum venerari, sed redemptionem totius mundi, quæ in
antiqui Dei populi liberatione præfigurata, in Christi au-
tem resurrectione completa est, devotâ fide ac dilectione
colere, atque resurrectionis etiam nostræ, quàm eâdem die
Dominicâ futuram credimus, spe nos certissimâ gaudere
signemus. Hic autem quem vobis sequendum monstramus,
Computus Paschæ, decemnovennali circulo continetur; qui
dudum quidem, hoc est, ipsis Apostolorum temporibus, jam
servari in Ecclesiâ cœpit, maximè Romæ, & Ægypti, ut
suprà jam diximus. Sed per industriam Eusebii, qui à beato
Martyre Pamphilo cognomen habet, distinctius in ordinem
compositus est; ut quod eatenus per Alexandriæ Pontificem
singulis annis per omnes Ecclesias mandari consueverat,
jam deinde congestâ in ordinem serie Lunæ quartadecimæ,
facillimè posset ab omnibus sciri. Cujus computum Pascha-

lis, Theophilus Alexandria Præsul, in centum annorum tempus Theodosio Imperatori composuit. Item successor ejus Cyrillus seriem nonaginta & quinque annorum in quinque decemnovennalibus circulis comprehendit: post quem Dionysius Exiguus totidem alios ex ordine pari schemate subnexuit, qui ad nostra usque tempora pertingebant. Quibus termino adpropinquantibus, tanta hodie calculorum exuberat copia, ut etiam in nostris per Britanniam Ecclesiis plures sint qui mandatis memoriæ veteribus illis Ægyptiorum argumentis, facillimè possint in quolibet spatia temporum Paschales protendere circulos, etiam si ad quingentos usque & triginta duos volverint annos; quibus expletis, omnia quæ ad Solis & Lunæ, mensis & septimanæ consequentiam spectant, eodem quo prius ordine recurrunt. Idem autem circulos eisdem temporum instantium vobis mittere supersedimus, quia de rationerantium temporis Paschalis instrui quærentes, ipsos vobis circulos Paschæ Catholicos abundare probastis.

Verùm his de Paschâ succinctè, ut petistis, strictissime commemoratis, tonsuram quoque (de quâ pariter vobis litteras scribi voluistis) hortor ut Ecclesiasticam & Christianæ fidei congruam habere curetis. Et quidem scimus quia neque Apostoli omnes uno eodémque sunt modo adtonsi, neque nunc Ecclesia Catholica sicut unâ fide, spe & caritate in Deum consentit, ita etiam unâ atque indissimili totum per orbem tonsuræ sibi formâ congruit. Denique ut superiora, id est, Patriarcharum tempora respiciamus, Job exemplar patientiæ, dum ingruente tribulationum articulo caput rotundit, probavit utique quia tempore felicitatis capillos nutrire consueverat. At Joseph, & ipse castitatis, humilitatis, pietatis, ceterarumque virtutum executor ac doctor eximius, cum servitio absolvendus, adtonsus esse legitur. Patet profectò quia tempore servitutis, intonsus in carcere crinibus manere solebat. Ecce uterque vir Dei diversum ab altero vultus habitum foris præmonstrabat, quorum tamen intus conscientia in parili virtutum sibi gratiâ concordabat. Verùm, etsi profiteri nobis liberum est, quia tonsuræ discrimen non noceat, quibus pura in Deum fides, & caritas in proximum sincera est;

maximè cum nunquam Patribus Catholicis sicut de Paschæ vel fidei diversitate conflictus, ita etiam de tonsuræ differentiâ legatur aliqua fuisse controversia; inter omnestamen quas vel in Ecclesiâ, vel in universo hominum genere reperimus tonsuras, nullam magis sequendam nobis amplectendamque jure dixerim, eâ quam in capite suo gestabat ille, cui se consentienti Dominus ait: Tu es Petrus, & super hanc petram ædificabo Ecclesiam meam, & portæ inferi non prævalebunt adversus eam; & tibi dabo claves regni cælorum. Nullam magis abominandam detestandamque meritò cunctis fidelibus crediderim, eâ quam habebat ille, cui gratiam sancti Spiritûs comparare volenti dicit idem Petrus: Pecunia tua tecum sit in perditionem, quoniam donum Dei existimasti pecuniâ possideri: non enim est tibi pars neque fors in sermone hoc. Neque verò ob id tantum in coronam adtondemur, quia Petrus ita adtonsus est; sed quia Petrus in memoriam Dominicæ Passionis ita adtonsus est, idcirco & nos qui per eandem Passionem salvari desideramus, ipsius Passionis signum cum illo in vertice, summâ videlicet corporis nostri parte gestamus. Sicut enim omnis Ecclesia quia per mortem sui vivificatoris Ecclesia facta est, signum sanctæ crucis ejus in fronte portare consuevit, ut crebro vexilli hujus munimine à malignorum spirituum defendatur incursibus; crebrâ ejus admonitione doceatur, se quoque carnem suam cum vitiis & concupiscentiis crucifigere debere: ita etiam oportet eos, qui vel Monachi votum, vel gradum Clericatus habentes arctioribus se necesse habent pro Domino continentia frenis astringere. Formam quoque coronæ quam ipse in Passione suâ spineam portavit in capite, ut spinas ac tribulos peccatorum nostrorum portaret, (id est, exportaret & auferret à nobis) suo quemque in capite per tonsuram præferre, ut se etiam inrisiones & opprobria pro illo libenter ac prompto animo sufferre ipso etiam frontispicio doceant: ut coronam vitæ æternæ, quam repromisit Deus diligentibus se, se semper expectare, proque hujus perceptione & adversa se mundi, & prospera contemnere designent. Cæterum, tonsuram eam quam magum ferunt habuisse Simonem, quis, rogo, fidelium non statim cum

cum ipsâ magiâ primò detestetur, & meritò exsufflet? Quæ aspectu in frontis quidem superficie, coronæ videtur speciem præferre; sed ubi ad cervicem considerando perveneris, decurtatam eam quam te videre putabas, invenies coronam; ut meritò talem Simoniaci & non Christianis habitum convenire cognoscas: qui in præsentī quidem vitâ à deceptis hominibus putabantur digni perpetuæ gloriæ coronæ; sed in eâ quæ hanc sequitur vitam, non solum omni spe coronæ privati, sed æternâ insuper sunt pœnâ damnati. Neque verò nie hæc ita prosecutum æstimes, quasi eos qui hanc tonsuram habent, condemnandos judicem, si fide & operibus unitati Catholicæ faverint: immò confidenter profiteor, plurimos ex eis sanctos ac Deo dignos extitisse, ex quibus est *Adamnan*, Abbas & Sacerdos Columbiensium egregius, qui cùm Legatus suæ gentis ad Aldfridum Regem missus, nostrum quoque Monasterium videre voluisset, miramque in moribus ac verbis prudentiam, humilitatem, religionem ostenderet, dixi illi inter alia conloquens: Obsecro, sancte Frater, qui ad coronam vitæ, quæ terminum nesciat, te tendere credis, quid contratio tuæ fidei habitu terminatam in capite coronæ imaginem portas? & si consortium beati Petri quæris, cur ejus quem ille anathematizavit, tonsuræ imaginem imitaris? & non potiùs ejus cum quo in æternum beatus cupis vivere, etiam nunc habitum te, quantum potes, diligere monstras? Respondit ille: Scias pro certo, Frater mi dilectè, quia etsi Simonis tonsuram ex consuetudine patriâ habeam, simoniacam tamen perfidiam totâ mente detestor ac respuo: beatissimi autem Apostolorum Principis, quantum mea parvitas sufficit, vestigia sequi desidero. At ego: Credo (inquam) verè quòd ita sit; sed tamen indicio sit, quòd ea quæ Apostoli Petri sunt, in abdito cordis amplectimini, si quæ ejus esse nostis, etiam facie tenetis. Namque prudentiam tuam facillimè dijudicare reor, quòd aptius multò sit, ejus quem corde toto abominaris, cuiusque horrendam faciem videre refugis, habitum vultus à tuo vultu Deo jam dicato separare; & e contrâ, ejus quem apud Deum habere patronum quæris, sicut facta vel monita cupis sequi, sic etiam morem habitus te imitari condeceat.

Hæc tunc cùm Adamnano dixi, qui quidem conspectis Ecclesiarum nostrarum statutis, quantum profecisset, probavit, cùm reversus ad Scottiam, multas postea gentis ejusdem turbas ad Catholicam temporis Paschalis observantiam suâ prædicatione correxisset: tametsi eos qui in *Hii* insulâ morabantur Monachos, quibûsque speciali rectoris jure præerat, nec ad viam statuti melioris reducere valebat. Tonsuram quoque, si tantum sibi auctoritatis subesset, emendare meminisset. Sed & tuam nunc prudentiam, Rex, admoneo, ut ea quæ unitati Catholicæ & Apostolicæ Ecclesiæ concinnant, unâ cum gente tui te Rex Regum & Dominus dominorum præfecit, in omnibus servare contendas. Sic enim fit ut post acceptam temporalis regni potentiam, ipse beatissimus Apostolorum Princeps cælestis quoque regni tibi tuisque cum cæteris electis libens pandat introitum. Gratia te Regis æterni longiori tempore regnantem, ad nostram omnium pacem custodiat incolumem, dilectissime in Christo fili. Hæc epistola cùm præsentem Rege Naictono, multisque viris doctioribus esset lecta, ac diligenter ab his qui intellegere poterant, in linguam ejus propriam interpretata, multum de ejus exhortatione gavisus esse perhibetur; itaut exurgens de medio optimatum suorum confessu genua flecteret in terram, Deo gratias agens, quod tale munusculum de terrâ Anglorum mereretur accipere. Et quidem & antea novi, inquit, quia hæc erat vera Paschæ celebratio, sed tantummodo rationem hujus temporis observandam cognosco, ut parum mihi omnino videar de his antea intellexisse. Unde palam profiteor, vobisque qui assidetis, præsentibus protestor, quia hoc observare tempus Paschæ cum universâ meâ gente perpetuò volo, & hanc accipere tonsuram debere, quam plenam esse rationis audivimus, omnes qui in meo regno sunt, Clericos decerno. Nec mora, quæ dixerat, regiâ auctoritate perfecit. Statim namque jussu publico mittebantur ad transscribendum, discendum, observandum, per universas Pictorum provincias circuli Paschæ decemnovennales, obliteratis per omnia erroneis octoginta & quatuor annorum circulis. Adtondebantur omnes in coronam Ministri altaris, & Monachi: & quasi novo se discipulatu beatissimi Apostolorum Princi-

pis Petri subditam, ejusque tutandam pattocinio gens correcta gaudebat.

CAPUT XXIII.

Ut Hiemes Monachi cum subiectis sibi Monasteriis canonicum predicante Ecgbercto celebrare Pascha ceperint.

NE c multò pòst illi quoque qui insulam *Hii* incolebant Monachi Scotticæ nationis, cum his quæ sibi erant subdita, Monasteriis, ad ritum Paschæ ac tonsuræ canonicum Domino procurante perducti sunt. Siquidem anno ab Incarnatione Domini septingentesimo sextodecimo, quo Osfredo occiso, *Coënned* gubernacula regni Nordanhymborum suscepit, cum venisset ad eos de Hiberniâ Deo amabilis, & cum omni honorificentia nominandus Pater ac Sacerdos *Ecgberct* (cujus superius memoriam sæpè fecimus) honorificè ab eis, & multo cum gaudio susceptus est. Qui quoniam & Doctor suavissimus, & eorum quæ agenda docebat, erat exsecutor devotissimus, libenter auditis ab universis, immutavit piis ac sedulis exhortationibus inveteratam illam traditionem parentum eorum, de quibus Apostolicum illum licet proferre sermonem, quodd æmulationem Dei habebant, sed non secundum scientiam; Catholicoque illos, atque Apostolico more celebrationem (ut diximus) præcipue sollemnitatis sub figurâ coronæ perpetis agere perdocuit. Quod mirâ divinæ constat factum dispensatione pietatis, ut quoniam gens illa quam noverat, scientiam divinæ cognitionis libenter ac sine invidiâ populis Anglorum communicare curavit: ipsa quoque postmodum per gentem Anglorum in eis quæ minùs habuerat, ad perfectam vivendi normam perveniret. Sicut è contrâ Brittones, qui volebant Anglis eam quam habebant, fidei Christianæ notitiam pandere credentibus jam populis Anglotum, & in regulâ fidei Catholicæ per omnia instructis, ipsi adhuc inveterati, & claudicantes à semitis suis, & capita sine coronâ prætendunt, & sollemnia Christi sine Ecclesiæ Christi societate venerantur. Susceperunt autem

Hiienses Monachi, docente Ecgbercto, ritus vivendi Catholicos sub Abbate Duumchado, post annos circiter octoginta, ex quo ad prædicationem gentis Anglorum Aidanum miserant Antistitem. Mansit autem vir Domini *Ecgberct* annos tredecim in præfata insulâ, quam ipse velut novâ quadam relucente gratiâ Ecclesiasticæ societatis & pacis Christo consecraverat; annoque Dominicæ Incarnationis septingentesimo vicesimo nono, quo Pascha Dominicum octavo Kalendarum Maiarum die celebrabatur, cum Missarum sollemnia in memoriam ejusdem Dominicæ Resurrectionis celebrasset, eodem die & ipse migravit ad Dominum, ac gaudium summæ festivitatis quod cum fratribus quos ad unitatis gratiam converterat, inchoavit, cum Domino & Apostolis, ceterisque cæli civibus complevit, immò idipsum celebrare sine fine non desinit. Mira autem divinæ dispensatio provisionis erat, quia venerabilis vir non solum in Pascha transivit de hoc mundo ad Patrem; verum etiam cum eo die Pascha celebraretur, quo nunquam prius in eis locis celebrari solebat. Gaudebant ergo Fratres de agnitione certâ & Catholicâ temporis Paschalis; lætabantur de patrocinio pergentis ad Dominum Patris, per quem fuerant correcti. Gratulabatur ille quod eatenus in carne servatus est, donec illum in Pascha diem suos auditores, quem semper antea vitabant, suscipere, ac secum agere videret. Sicque certus de illorum correctione reverentissimus Pater exultavit, ut videret diem Domini: vidit, & gavisus est.

CAPUT XXIV.

*Quis sit in præsentî status gentis Anglorum,
vel Brittanîæ totius.*

ANNO Dominicæ Incarnationis septingentesimo vicesimo quinto (qui erat annus septimus Ofrici Regis Nordanhymbrorum, qui Coënredo successerat) *Victred* filius Ecbercti, Rex Cantuariorum, defunctus est nono die Kalendarum Maiarum; & regni quod per triginta quatuor

& semis annos renebat, filios tres, Edilbertum, Eadbertum, & Aldricum reliquit heredes; anno post quem proximo Tobias, Rhofensis Ecclesiæ Præsul defunctus est; vir (ut suprà meminimus) doctissimus. Erat enim discipulus beatæ memoriæ Magistrorum, Theodori Archiepiscopi, & Abbatis Hadriani: unde (ut dictum est) cum eruditione litterarum vel Ecclesiasticarum, vel generalium, ita Græcam quoque cum Latinâ didicit linguam, ut tam notas ac familiares sibi eas, quàm novitatis suæ loquelam haberet. Sepultus verò est in porticu sancti Pauli Apostoli, quam intrò Ecclesiam sancti Andree sibi ipse in locum sepulcri fecerat. Post quem Episcopatus officium *Aldwulf*, Berthualdo Archiepiscopo consecrante suscepit. Anno Dominicæ Incarnationis septingentesimo vicesimo nono, apparuerunt comete duo circa Solem, multum intuentibus terrorem iucentientes. Unus quippe Solem præcedebat, manè Orientem; alter vesperè sequebatur Occidentem, quasi Orienti simul & Occidenti diræ cladis præfagi: vel certè unus diei, alter noctis præcurabat exortum, ut utroque tempore mala mortalibus imminere signarent. Portabant aurem faciem ignis contra Aquilonem, quasi ad accendendum adclinem: apprebantque mense Januario, & duabus fermè septimanis permanebant. Quo tempore gravissima Saracenorum lues Gallias miserâ clade vastabat, & ipsi non multò post in eadem provinciâ dignas suæ perfidiæ pœnas luebant. Quo anno sanctus vir Domini *Ecgbert*, ut suprà commemoravimus, ipso die Paschæ migravit ad Dominum: & mox peracto Paschâ, hoc est, septimâ Iduum Maiarum die, *Osric* Rex Nordanhymbrorum, virâ decessit, cum ipse regni, quod undecim annis gubernabar, successorem fore *Ceoldwlfum* decrevisset, fratrem illius qui ante se regnaverat, *Coenredi* Regis, cuius regni & principia & processus tot ac tantis redundavere iterum adversantium motibus, ut quid de his scribi debeat, quémve habiruri sint finem singula, necdum sciri valeat. Anno Dominicæ Incarnationis septingentesimo tricesimo primo, *Berthwald* Archiepiscopus, longâ consumptus ætate, defunctus est die Iduum Januariarum, qui egit annos triginta septem, menses sex, dies quatuordecim; pro quo anno eodem factus est Archi-

episcopus, vocabulo *Tacuni*, de provinciâ Merciorum, cum fuisset Presbyter in Monasterio quod vocatur *Brindum*. Consecratus est autem in *Doroverni* civitate, à viris venetabilibus Danihele Ventano, & Ingualdo Lundonienſi, & Alduino Lyccitfeldenſi, & Adwaldo Rhofenſi Antistitibus, die decimâ Junii mensis, Dominicâ; vit teligione & prudentiâ insignis, sacris quoque litteris nobilitet instructus. Itaque in præſenti, Ecclesiis Cantuariorum *Tacuni* & *Alawlf* Episcopi præſunt. Poterò provinciæ Orientalium Saxonum *Inguald* Episcopus; provinciæ Orientalium Anglorum *Aldberit* & *Hadulac* Episcopi; provinciæ Occidentalium Saxonum, *Daniel* & *Fortheri* Episcopi; provinciæ Merciorum, *Alduini* Episcopus; & eis populis qui ultra amnem Sabtinam ad Occidentem habitant, *Walchſtod* Episcopus; provinciæ Huiciorum *Vilfrid* Episcopus; provinciæ Lindisfarorum *Cymberit* Episcopus præſt. Episcopatus Veſtæ insulæ ad Danihelem pertinet, Episcopum Ventæ civitatis. Provincia Austriale Saxonum jam aliquot annis absque Episcopo manens, ministerium sibi Episcopale ab Occidentalium Saxonum Antistite quaerit. Et hæ omnes provinciæ, cæteræque Austriales, ad confinium usque *Hymbra* fluminis, cum suis quoque Regibus, Merciorum Regi Edilbaldo subjectæ sunt. At verò provinciæ Nordanhymbtorum, cui Rex *Ceolwulf* præſt, quatuor nunc Episcopi Præſulatum tenent; *Vilfrid* in Eboracenſi Ecclesiâ, *Acca* in Auguſtaldenſi, *Peſthelm* in eâ quæ *Candida caſa* vocatur, quæ nupet multiplicatis fidelium plebibus, in sedem Pontificatus addita, ipsum primum habet Antistitem. Pictorum quoque natio tempore hoc & fœdus pacis cum gente habet Anglorum, & Catholicæ pacis ac veritatis cum universali Ecclesiâ particeps existere gaudet. Scoti qui Britanniam incolunt, suis contenti finibus, nihil contra gentem Anglorum insidiarum moliuntur, aut fraudium. Brittones, quamvis & maximâ ex parte domestico sibi odio gentem Anglorum & totius Catholicæ Ecclesiæ, statum Pascha minùs rectè, moribùsque improbis impugnent, tamen & divinâ sibi & humanâ prorsus resistente virtute, in neutro cupitum possunt obtinere propositum: quippe qui quamvis, ex parte sui sint juris, nonnullâ tamen ex parte Anglorum

sunt ſervicio mancipati : quæ adridente pace ac ſerenitate temporum , plures in gente Nordanhymbrorum , tam nobiles , quàm privati , ſe ſuòſque liberos , depoſitis armis ſatagunt magis acceptâ conſurâ , monaſterialibus adſcribere votis , quàm bellicis exercere ſtudiis. Quæ res quem ſit habitura finem , poſterior ætas videbit. Hic eſt in præſentiarum univerſæ ſtatus Britanniæ , anno adventûs Anglorum in Britanniam circiter ducentefimo octogefimo quinto , Dominicæ autem Incarnationis anno ſeptingentefimo triceſimo primo : in cujus regno perpetuo exultet terra , & congratulante in fide ejus Britanniâ , lætentur inſulæ multæ , & conſecrantur memoriæ ſanctitatis ejus.

CAPUT XXV.

Recapitulatio chronica totius Operis ; & de perſonâ Auctoris.

VERUM ea quæ temporum diſtinctione latiùs digeſta ſunt , ob memoriâ conſervandam , breviter recapitulari placuit.

Anno igitur ante Incarnationem Dominicam ſexageſimo , Gaius Julius Cæſar , primus Romanorum , Britannias bello pulſavit , & vicit ; nec tamen ibi regnum potuit obtinere. 60.

Anno ab Incarnatione Domini XLVI. Claudius , ſecundus Romanorum , Britannias adiens , plurimam inſulæ partem in deditionem recepit ; & Orcadas quoque inſulas Romano adjecit Imperio. 46.

Anno ab Incarnatione Domini CLXVII. Eleutherus Romanæ Præful factus , quindecim annos Eccleſiam glorioſiſſimè rexit : cui litteras Rex Britanniæ Lucius mittens , ut Chriſtianus efficeretur petiit , & impetravit. 167.

Anno ab Incarnatione Domini CLXXXVIII. Severus Imperator factus , decem & ſeptem annis regnavit , qui Britanniam vallo à mari uſque ad mare præcinxit. 189.

Anno CCCLXXXI. Maximus in Britanniâ creatus Imperator , in Galliam tranſiit , & Gratianum interfecit. 381.

Anno CCCCVIII. Roma à Gothis fracta eſt : ex quo 409.

tempore Romani in Britannia regnare cessarunt.

430. Anno ccccx. Palladius ad Scottos in Christum credentes à Cælestino Papâ primus mittitur Episcopus.

449. Anno ccccxlviii. Marcianus cum Valentiniano Imperium suscipiens, septem annis tenuit: quorum tempore Angli à Brittonibus accersiti Britanniam adierunt.

538. Anno dxxxviii. eclipsis Solis facta est xiv. Kalendas Martii, ab horâ primâ usque ad tertiam.

540. Anno dxi. eclipsis Solis facta est xii. Kalendas Julii, & apparuerunt stellæ penè horâ dimidiâ ab horâ diei tertiâ.

547. Anno dxlvii. *Ida* regnare cœpit, à quo regalis Nordanhymbrorum prosapia originem tenet, & duodecim annis in regno permansit.

562. Anno dlxi. Columba Presbyter de Scottiâ venit Britanniam ad docendos Pictos, & in insulâ *Hii* Monasterium fecit.

596. Anno dxcvi. Gregorius Papa misit Britanniam Augustinum cum Monachis, qui verbum Dei genti Anglorum evangelizarent.

597. Anno dxcvii. Venere Britanniam præfati Doctores, qui fuit annus plus minùs centesimus quinquagesimus adventus Anglorum in Britanniam.

601. Anno dci. misit Papa Gregorius Pallium Britanniam Augustino jam facto Episcopo, & plures verbi ministros, in quibus & Paulinum.

603. Anno dciii. pugnatum est ad *Degfastane*.

604. Anno dciiii. Orientales Saxones fidem Christi percipiunt sub Rege Sabercto, Antistite Mellito.

605. Anno dcv. Gregorius Papa obiit.

616. Anno dcxvi. *Edilbert* Rex Cantuariorum defunctus est.

625. Anno dcxxv. Paulinus à Justo Archiepiscopo ordinatur gentis Nordanhymbrorum Antistes.

626. Anno dcxxvi. *Eanfled*, filia Eduini Regis, baptizata est cum duodecim in Sabbato Pentecostes.

627. Anno dcxxvii. Eduinus Rex baptizatus est cum suâ gente in Pascha.

633. Anno dcxxxiii. Eduino Rege perempto, Paulinus Cantiam rediit.

Anno

GENTIS ANGLORUM LIB. V. 313

- Anno DCXL. *Eadbald* Rex Cantuariorum obiit. 640.
 Anno DCXLI. *Oswald* Rex occisus est. 642.
 Anno DCXLIII. *Paulinus*, quondam Eboraci, sed
 tunc Rhofensis Antistes civitatis, migravit ad Dominum. 644.
 Anno DCLI. *Oswini* Rex occisus, & *Aidan* Episcopus de-
 functus est. 651.
 Anno DCLIII. Middilangli sub Principe Pendâ, fidei
 mysteriis sunt imbuti. 653.
 Anno DCLV. Penda periit, & Mercii sunt facti Christiani. 655.
 Anno DCLXIII. eclipsis facta: *Earconbert* Rex Can-
 tuariorum defunctus, & *Colman* cum Scottis ad suos re-
 versus est; & pestilentia venit; & *Ceadda*, & *Wilfrid* Nor-
 danhymbrorum ordinantur Episcopi. 664.
 Anno DCLXVIII. Theodorus ordinatur Episcopus. 668.
 Anno DCLXX. *Oswi* Rex Nordanhymbrorum obiit. 670.
 Anno DCLXXIII. *Egbert*, Rex Cantuariorum obiit;
 & Synodus facta est ad *Herudforda*, præsentem Egfrido Re-
 ge, præsentem Archiepiscopo Theodoro, utillima, decem
 capitulorum. 673.
 Anno DCLXXV. *Wlferi*, Rex Merciorum, postquam
 septemdecim annis regnaverat, defunctus, Edilredo fratri
 reliquit imperium. 675.
 Anno DCLXXVI. *Editred* vastavit Cantiam. 676.
 Anno DCLXXVII. cometa apparuit; *Wilfrid* Episcopus
 à sede suâ pulsus est ab Egfrido Rege; & pro eo *Bosa*,
Eata & *Eadbaed* consecrati Antistites. 677.
 Anno DCLXXVIII. *Elfuini* occisus est. 679.
 Anno DCLXXX. Synodus facta est in campo *Hecdseltha*,
 de fide Catholicâ, præsentem Archiepiscopo Theodoro: in
 qua adfuit Johannes *Abba* Romanus. Quo anno *Hild* Ab-
 batissa in *Sireanaes*, *Hala* obiit. 680.
 Anno DCLXXXV. *Egfrid* Rex Nordanhymbrorum
 obiit. 685.
 Anno DCLXXXVIII. *Cedwald*, Rex Occidentalium Sa-
 xonum, Romam de Britannia pergit. 688.
 Anno DCXC. Theodorus Archiepiscopus obiit. 690.
 Anno DCXCVII. *Ostbryd* Regina à suis, id est, Mercio-
 rum Primatibus, interempta. 697.

699. Anno DCXCVIII. *Berctred*, Dux regius Nordanhymbrorum, à Pictis interfectus.
704. Anno DCCIII. *Edilred*, postquam triginta unum annos Merciorum genti præfuit, Monachus factus, Coënnredo regnum dedit.
705. Anno DCCV. *A'dfrid*, Rex Nordanhymbrorum, defunctus est.
709. Anno DCCVIII. *Coënnred*, Rex Merciorum, postquam quinque annos regnabat, Romam pergit.
711. Anno DCCXI. *Berctfrid* Præfectus cum Pictis pugnavit.
716. Anno DCCXVI. *Ofred*, Rex Nordanhymbrorum interfectus, & Rex Merciorum *Ceolred* defunctus est; & vir Domini *Ecgberct* Hyenses Monachos ad Catholicum Pascha, & Ecclesiasticam correxit tonsuram.
725. Anno DCCXXV. *Victred* Rex Cantuariorum obiit.
729. Anno DCCXXVIII. cometæ apparuerunt, sanctus *Egbert* transiit, *Ofric* mortuus est.
731. Anno DCCXXXI. *Berctwald* Archiepiscopus obiit. Anno eodem *Tacuin* consecratus Archiepiscopus nonus Dorovernensis Ecclesiæ, *Edilbaldo* Rege Merciorum quintumdecimum agente annum imperii.

HÆC de Historiâ Ecclesiasticâ Britanniæ, & maximè gentis Anglorum, prout vel ex litteris antiquorum, vel ex traditione majorum, vel ex meâ cognitione ipse scire potui, Domino adjuvante digessi, Beda famulus Christi, & Presbyter Monasterii beatorum Apostolorum Petri & Pauli, quod est ad *Wirimuda* & *Ingyrum*. Qui natus in territorio ejusdem Monasterii, cum essem annorum septem, curâ propinquorum datum sum educandus reverentissimo Abbati Benedicto, ac deinde Ceolfredo; cunctumque ex eo tempus vitæ in ejusdem Monasterii habitatione peragens, omnem meditandis Scripturis operam dedi: atque inter observantiam disciplinæ regularis, & quotidianam cantandi in Ecclesiâ curam, semper aut discere, aut docere, aut scribere dulce habui. Nonodecimo autem vitæ meæ anno Diaconatum; tricesimo, gradum Presbyteratus, utrumque per ministerium reverentissimi Episcopi Johannis,

jubente Ceolfrido Abbate, suscepi. Ex quo tempore accepti Presbyteratus, usque ad annum ætatis meæ quinquagesimum nonum, hæc in Scripturam sanctam, meæ meorumque necessitati, ex opusculis venerabilium Patrum breviter adnotare, sive etiam ad formam sensûs & interpretationis eorum superadjicere curavi.

In principium Genesis, usque ad
nativitatem Isaac, & dejectionem
Ismaelis, libros 1111.

De Tabernaculo, & vasis ejus,
ac vestibus Sacerdotum, li-
bros 1111.

In primam partem Samuhelis, id
est, usque ad mortem Saulis,
libros 111.

De adificatione templi, allegori-
cæ expositionis sicut & cætera,
libros 11.

Item in Regum, librum xxx. quæ-
stionum.

In Proverbia Salomonis, libros 111.

In Cantica Canticorum, libros
v111.

In Isaiam, Danihelem, duodecim
Prophetas, & partem Jeremiæ,
distinctiones capitulorum extra-
ctæ B. Hieronymi excerptas.

In Esdræ & Neemiam, libros 111.

In Canticum Habacuch, librum 1.

In librum beati Patris Tobie, ex-
planationis allegoricæ de Chri-
sto & Ecclesiâ, librum 1.

Item, Capitula lectionum in Pen-
tateuchum Moyli, Josue, Ju-
dicum.

In libros Regum, & Verba die-
rum.

In librum beati Patris Job.

In Parabolas, Ecclesiastem, & Can-
tica Canticorum.

In Isaiam Prophetam, Ezræ

quoque, & Neemiam.

In Evangelium Marci, libros 1111.

In Evangelium Lucæ, libros v1.

Homeliarum Evangelii libros 11.

In Apostolum quæcumque in opu-
sculis sancti Augustini expolita
inveni, cuncta per ordinem
transscribere curavi.

In Actus Apostolorum, libros 11.

In Epistolas v1. Catholicas, li-
bros singulos.

In Apocalypsim sancti Johannis,
libros 111.

Item, Capitula lectionum in to-
tum Novum Testamentum, ex-
cepto Evangelio.

Item, Librum Epistolarum ad di-
versos; quarum de sex ætati-
bus sæculi una est; de mansio-
nibus filiorum Israël, una; de
eo quod ait Isaias: Et clauden-
tur ibi in carcerem, & per dies
multos visitabuntur; de ratio-
ne Bissexti, una; de Æquino-
ctio, juxta Anatolium, una.

Item, de historiis Sanctorum;
Librum vitæ & passionis sancti
Felicii Confessoris de metrico
Paulini Opere in prosam trans-
tuli.

Librum vitæ & passionis sancti
Anastasi, malè de Græco trans-
latum, & pejus à quodam im-
perito emendatum, prout po-
tui, ad sensum correxi.

Vitam sancti Patris, Monachi
simul & Antistitis, Cudberti,
& prius heroïco metro, & post-
modum plano sermone de-
scripsi.

Historiam Abbatum Monasterii
hujus, in quo supernæ pietati
deservire gaudeo, Benedicti,
Ceolfredi, & Huaetberti in li-
bellis duobus.

Historiam Ecclesiasticam nostræ
insulæ gentis, in libris v.

Martyrologium de natalitiis san-
ctorum Martyrum diebus; in
quo omnes quos invenire po-
tui, non solum quo die, ve-
rum etiam quo genere certa-
minis, vel sub quo iudice

mundum vicerint, adnotare
studui.

Librum Hymnorum, diverso me-
tro, sive rhythmo.

Librum Epigrammatum heroïco
metro, sive elegiaco.

De Naturâ rerum, & de Tempo-
ribus libros singulos.

Item, de Temporibus librum
unum majorem.

Librum de Orthographiâ, aspha-
beti ordine distinctum.

Item, librum de Metricâ arte,
& huic adjectum alium de
Schematibus sive Tropis libel-
lum, hoc est, de figuris mo-
disque locutionum, quibus
Scriptura sancta contexta est.

Te deprecor, bone Jesu, ut cui propitius donasti verba
tuæ scientiæ dulciter haurire, dones etiam benignus, ali-
quando ad te fontem omnis sapientiæ pervenire, & parere
semper ante faciem tuam.

HACTENUS editio prima librorum quinque de Historiâ Eccle-
siasticâ gentis Anglorum, quam S. Maximini Trevirensis codex
pervetustus repræsentat. Sequuntur in editionibus Heidelbergensi &
Lugdunensi, anni 1587. Colonienfi, anni 1612. & Cantabrigienfi,
anni 1644. puncta hæc chronologica, quæ potuissent quidem ple-
raque adjecta esse ab ipsomet Bedâ, per triginta annos, quibus
priori Editioni superstes fuit, & inclusivè usque ad annum Christi
DCCXXI. quem proximè sequentis anni 762. diemensis Maii XXVI.
feriâ quartâ, in pervigilio Ascensionis Dominicæ, sancti ejusdem
viri beata mors excepit. Putamus tamen accessisse à manu recentio-
re; tum quia ultra annum 762. excurrit, tum maximè quia Bedæ
obitum in anno 735. crasso errore desiguit.

732. Anno ab Incarnatione Domini DCCXXXII. Ecgbertus
pro Wilfrido Eboraci Episcopus factus. Cymbertus Episco-
pus Lindisfarorum obiit.

733. Anno DCCXXXIII. eclipsis facta est Solis XVIII. Ka-
lendas Septembris, circa horam diei tertiam; itaut penè

torus orbis Solis, quasi nigerrimo & horrendo scuto videretur esse coopertus.

Anno eodem *Tarmini* Archiepiscopus, accepto ab Apostolicâ auctoritate Pallio, ordinavit *Alric* & Sigfridum Episcopos.

Anno DCCXXXIIII. Luna sanguineo rubore perfusa, quasi horâ integrâ pridie Kalendarum Februariarum circa galli cantum, dehinc nigredine subsequente ad lucem propriam reversa. 734.

Anno eodem *Tarmini* Episcopus obiit.

Anno DCCXXXV. Nothelmus Archiepiscopus ordinatur; & Ecgbertus Episcopus, accepto ab Apostolicâ Sede Pallio, primus post Paulinum in Archiepiscopatum confirmatus est; ordinavitque Fruidbertum & Fruidwaldum Episcopos, & Beda Presbyter obiit. 735.

Anno DCCXXXVII. nimia siccitas terram fecit infecundam; & Ceolwlfus suâ voluntate adtonsus, regnum Eadberti reliquit. 737.

Anno DCCXXXVIII. Edilhartus, Occidentalium Saxonum Rex, obiit; & Nothelmus Archiepiscopus. 739.

Anno DCCXL. Cudbertus pro Nothelmo consecratus est. Edilwaldus, Rex Merciorum, per impiam fraudem vastabat partem Nordanhymbrorum; eratque Rex eorum Eadbertus occupatus cum suo exercitu contra Pictos. Edilwaldus quoque Episcopus obiit, & pro eo Conwlfus ordinatur Antistes. *Aruni* & Eadbertus interempti. 740.

Anno DCCXLI. siccitas magna terram occupavit. Carolus Rex Francorum obiit; & pro eo filii *Caroloman* & *Pippin* regnum acceperunt. 741.

Anno DCCXLV. Wilfridus Episcopus, & Ingualdus, Lundoniæ Episcopus, migraverunt ad Dominum. 745.

Anno DCCXLVII. Herefridus vir Dei obiit. 747.

Anno DCCXL. Cudretus, Rex Occidentalium Saxonum, surrexit contra Edilwaldum Regem, & Oengusum. Thegnorus atque Eanredus obierunt. Eadbertus campum *Cyl* cum aliis regionibus suo regno addidit. 750.

Anno DCCLVI. anno regni Eadberti quinto, Idibus Januarii, eclipsis Solis facta est. Postea, eodem anno & mense, 756.

318 HIST. ECCL. GENT. ANGL. LIB. V.
hoc est , nono Kalendarum Februariarum , Luna eclipsim
pettulit , horrendo & nigerrimo scuto.

754. Bonifacius , qui & Winfridus , Francorum Episcopus ,
cum quinquaginta tribus martyrio coronatus est ; & pro eo
Redgetus consecratur Archiepiscopus à Stephano Papà.

757. Anno DCCLVII. Edilbaldus , Rex Merciorum , à suis
tutoribus , noctu , morte fraudulentâ miserabiliter perem-
ptus occubuit : Beonredus regnare cœpit : Cymwulfus ,
Rex Occidentalium Saxonum , obiit. Eodem etiam anno
offa , fugato Beonredo , Merciorum regnum sanguinolento
quæsitivè gladio.

758. Anno DCCLVIII. Eadbertus , Rex Nordanhymbrorum ,
Dei amoris causâ , & cœlestis patriæ , violentiâ acceptâ san-
cti Petri tonsurâ , filio suo Oswulfo regnum reliquit.

759. Anno DCClix. Oswulfus à suis ministris facinorosè oc-
cisus est ; & Edilvaldus anno eodem à suâ plebe electus , in-
travit in regnum : cujus secundo anno magna tribulatio mor-
talitatis venit , & duobus fermè annis permansit , populanti-
bus duris ac diversis ægritudinibus , maximè tamen dysente-
riæ languore.

761. Anno DCCLXI. Oengus Pictorum Rex obiit , qui regni
sui principium usque ad finem facinore cruento tyrannus
perduxit carnifex : & *Oswini* occisus est.

765. Anno DCCLXV. Aluchredus Rex susceptus est in regnum.

766. Anno DCCLXVI. Ecgbertus Archiepiscopus prolapia re-
gali ditatus , ac divinâ scientiâ imbutus , & Erithubertus ve-
rè fideles Episcopi , ad Dominum migraverunt.



IN BEDÆ HISTORIAM ANGLICANAM NOTÆ.



N T E omnia monendus es, mi Lector, de hujus Operis de gestis Anglorum, quod præ manibus est, variis Editionibus. Antiquissimam, adeoque primam, quam quidem noverimus, nemo (opinor) desideraverit, qui Johannem Gravium Editioni suæ Antuerpiensi anni 1550. sic præloquentem viderit: *Damus en tibi, amice Lector, venerabilis Bedæ Ecclesiasticam Anglorum Historiam, semel dumtaxat, quod sciam, ante annos quinquaginta proculsam; sed adeo depravatam, ut difficile judicare possis, præstuerint, prorsus non fuisse typis mandatam, quam hoc modo in hominum manus devenisse. Mentior, si non in uno hujus Operis sermone supra mille & quinquaginta errata deprehenderim; & plus negotii fortasse nobis in restituendo, quam Auctori in condendo fuerit.* Notari hic putamus Editionem Argentinensem anni 1514. cujus exemplar superest in Bibliothecâ Reipublicæ Augustanæ: quam Editionem quia ipsi non vidimus, Gravii relatu nosse sit modò satis. Sed potuerat Gravius in hoc Bedæ Opere expurgando juvari Editione Parisiensi anni 1544. per Franciscum Jametium, qui primus collecta Bedæ Opera tribus tomis in vulgus emisit. Hactenus ergo Anglicana Bedæ Historia triplici in statu lucem aspexit. Primum sola, Argentorati 1514. Antwerpiz 1550. in parvo folio, Coloniz 1601. in 16. & Cantabrigiæ Anglofaxonica, in folio, 1644. cum versione Anglicanâ Alfredi Regis. Secundò prodiit cum vetustioribus aliquot rerum Britannicarum Scriptoribus, Heidelbergæ, typis Commelini, in folio, 1587. cujus ipsius Editionis plurima exemplaria Renatus Potelerius, Lugdunensis Typographus, mutatâ primâ paginâ, eodem anno 1587. Lugduni à se proculsa esse mentitus est, suoque ipsius nomine venum exposuit: quare, hujus anni editionem Lugdunensem ab Heidelbergensi diversam frustra recensueris. Tertio denique prodiit Anglicana Bedæ Historia, cum aliis ejus Operibus, Parisius, per Jametium, tomis tribus, anno 1544. Ibidem anno 1554. tomis octo; Basileæ item tomis octo, per Joannem Heugvium, 1563. &

denique Coloniz totidem tomis, per Antonium Hieras, 1612. Ex his omnibus Heidelbergensis Editio anni 1587. & Cantabrigiensis anni 1644. cæteris accuratioribus sunt: nec tamen planè illimes, ut apparebit ex subjectis Notis. Nostram hanc profitemur omnium absolutissimam, & emendatissimam, ope manuscriptorum aliquot codicum, inter quos principem locum obtinet codex S. Maximini Trevirensis, optimæ notæ, & vetustissimus: ex quo præsertim sperare audeo me præclarum hoc Opus, haud exiguo Gallicæ pariter & Anglicanæ Historiæ emolumento atque ornamento, ad ipsius Auctoris mentem primævo suo nitore restituisse.

De ratione scribendi moneo, ubique retinuisse me ex codice Trevirensi bonæ notæ, ac pervertuto, antiquariam pingendi formam, quia ex Bedæ ipsius mente atque ingenio profectam esse non dubitavi: nempe in vocibus, Gaius, reverentissimus, inluminare, Britannia, adlectio, adtestatio, adicere, Nordanhymbrorum, adlati, conlitz, inlitz, adlitzere, inlufus, inruptio, adlaturus, conlocarunt, adcolerant, Scotti, conroderet, conlatus, inlatus, adsumto, adsertiones, adplicavit, adsentatio, adpropinquare, intellegunt, intellegentia, adplicuit, adfigunt, adgregatis, inlicita, adscensum, adfedit, adflictiones, adfurgere, inlustravit, expectatis, subpositis, idolatria, subplantatio, inlecebris, exsolvamus, adquirere, Doruvernensis, negligentia, utillimus, exsecretur, proicere, contemptus, redemtus, aquilonalis, Hrofenus, Agilbertus, Cuthbertus, & similia multa; quæ non idè ex illo S. Maximini Trevirensis manuscripto codice expressimus, ut ea in usus communes invehereamus; sed ne à mente aberraremus doctissimi Bedæ, cujus hanc fuisse scribendi formam non possumus dubitare.

L I B R O I.

Cap. 1. BRITANNIA OCEANI INSULA.] Sic apud Eutropium, Xiphilinum, & Græcos alios, Βρετανει, Βρετανια, Βρετανικη; sicut apud Bedam in codice Trevirensi perpetuè legis, *Britanniam*, *Britanniam*, *Britannos*; non ut vulgè alii, *Britanniam*, *Britannias*, *Britannos*: quod semel monuisse sit satis.

Cap. 1. ANNO AD U. C. DCCXCVIII.] Sic habet TREV. pro quo malè in Cantabrigiensis 798. & in aliis omnibus vulgatis 797. Nam annus U. C. 799. respondet anno æræ Christianæ 46. quo anno ubi constans Beda adscribit Claudii expeditionem hanc in recapitulatione ad finem Operis.

Cap. 11. HONORIO AUG. FILIO THEODOSII MINORI.] Vulg. habent *Theodosii junioris*, TR. *Theodosii minoris*. Repono ex vero, & ex Bedæ ipsius mente, *filio Theodosii minore*: major enim illi filius fuit Arcadius.

FARUS, PONTES.] Sic T. R. verisimilius quàm quod in vul- *Ibid.*
gatis, *fara, pontes.*

VIGINTI ET SEX ANNOS TENUIT.] Nempe ab obitu Ho- *Cap. 19.*
norii. Sic in TREV. & in Cantabrigiensi: rectè. Falsò enim in editis
legitur *viginti & septem annos.* Quippe obiit Honorius anno Christi
423. xv. Augusti, ut observat Theophanes; Theodosius autem an-
no 450. v. Kal. Augusti. Quare dici non potest quòd imperarit Theo-
dosius junior post Honorium annis xxvii. qui ex præmissis, ne vi-
gesimum quidem sextum imperii annum totum implevit.

AD ÆTHERIUM ARELATENSEM.] Immo ad Ætherium *Cap. 24.*
Lugdunensem, ut scitè asserit Sirmondus, tomo I. Concil. Galliz,
in Notis ad pag. 420. Præfuit Ætherius Lugdunensis ex anno 589.
ad 602. ut colligitur ex Actis Conciliorum, & ex Romanorum Pon-
tificum Epistolis. Hæc porro epistola Gregorii Magni data est x. Kal.
Augusti, Indictione xiv. adeoque anno 596. Cui geminam habes
lib. 5. Registri Epist. 52. inscriptam, *Palladio Episcopo de Sancto-
nis, Pelagio de Turonis, & Severo de Massiliâ, Episcopis Galliarum
à paribus.* Unde apparet fuisse illam commendaticiam circularem. In
hunc errorem de Ætherii sede, inductus videtur Beda à Nothelmo
Presbytero, à quo hanc & alias epistolas Angliam spectantes de Ro-
manæ Ecclesiæ scrinio acceptas, & ad se delatas fuisse Beda ipse pro-
fietur in Præfatione suæ Historiæ ad Ceolwulfum Regem.

LIBRO II.

ANNO AB I. D. DCXVI.] Sic habet T. R. pro quo mendosè *Cap. 5.*
in editis DCXIII. mutatà (ut sæpe fit) in binarium quinarium notà.
Annum 616. habet recapitulatio ad finem Historiæ. Timidè Alfre-
dus Rex in versione Saxonica, circa 616.

FATIGIORUM VESTRORUM.] Sic T. R. Fatigia dixit Beda *Cap. 8.*
fatigationes in laboribus pro ahimarum lucro susceptis : quam nos
vocem, licèt peregrinam, retinuimus, præ eà quæ est in vulgatis,
fastigiorum vestrorum. In manuscripto S. Germani de Præis lego
fatigationum vestrarum.

HERACLIO ANNO XXIV. &c.] Corruptus erat & mutilatus hic lo- *Cap. 28.*
cus in omnibus Editionibus in quibus sigla P. C. perperam redduntur,
Proconsularis, cum aliud nihil sonent quàm *post Consulatum* : &
emittuntur hæc verba, *aque Constantio filio ipsius, anno XXI. unde*
totius subscriptionis turbatur sensus. Heraclius imperare cœpit v. Octo-
bris, Indictione xiv. anno Christi Dionysiano 610. sed anno 602.
divinæ Incarnationis, secundum Theophanem, qui annos Incarna-
tionis ostensio minere solet, uti Georgius Syncellus, & alii ferè
Græci. Idem Heraclius anno Christi 611. Consulatum auspica-
tus est.

Heraclio ex Eudociâ conjuge Augustâ natus est Heraclius junior, dictus *novus Constantinus*, die tertiâ mensis Maii, Indictione xv. Christi 611. Hic anno v11. Heraclii parentis, Christi 617. die 1. Januarii, Indictione v. Consul renunciatus est.

Heraclius, novi Constantini filius, magni Heraclii nepos, nascitur & baptizatur tertio Novembris, Indictione v. anno Heraclii magni xv. Christi Dionysiano 631. Quir. anno 634. tertio Idus Junii, in cursu erat annus tertius Heraclii pueri Cæsaris: unde restat difficultas ex illis verbis, & *Consulatus ejus anno 111.* ad Constantinum spectantibus. Posito enim Constantini Consulatus exordium ad annum 617. uti ex Theophane retulimus; consequenter anno 634. in cursu erat Consulatus, Constantini annus xv11. Legendum ergo videtur, & *Consulatus ejus anno xv11.* nisi fortè novum ei Consulatus exordium fuit, quando illi natus est Heraclius filius, quod à Græcorum nemine adnotatum reperio.

LIBRO III.

Cap. 8.

IN ANDILEGUM MONASTERIO.] Oppidò mirum est, neutrà in Galliâ Christianâ, inter Francorum regni Abbacias ullam fieri mentionem nobilissimi hujus Parthemonis, in quod supra mille abhinc annos, uti & in *Brige*, & in *Cale*, & Britannia insulâ dicandas Deo virgines, Bedâ ipso teste constat fuisse transmissas. Hoc nobis quasi digito monstrare visus est Hadrianus Valesius, vir doctus, in Notitiâ Galliarum, verbo *Andeliacum*; ubi refert de S. Chrotilde Reginâ, ex codice regio: *Fecit & aliud Monasterium super fluvium Sequana, in loco qui dicitur Andeleius, non longè à muris civitatis Rotomagensis, in nomine Dei Genitricis.* Distat à Rotomago septem ferè leucis; èstque ipsum *Andelagum Monasterium*, cujus mentio in Chronico Pontanellensi, tomo 3. Spicilegii Dacheriani, pag. 243. Sed quomoddò dici potest hoc Monasterium non longè à muris Rotomagensibus positum, si ab illis distat septem ferè leucis? De Bedæ Andilego succurrit aliud; quodd nempe in Alsatiâ positum sit, & à sanctâ Salabergâ ædificari cœptum sit, & postmodum à Richardâ Imperatrice perfectum atque ampliatum. Hermannus Contractus; in Chronico ad annum 887. *Richarda Imperatrix, adulterii cum Luitwardo, Vercellensi Episcopo, qui apud eam & Imperatorem familiariter in palatio vivebat, ab Imperatore & aliis incusata, divino judicio ab omni se virorum commixtione integram, & eatenus virginem esse comprobavit, quamvis jam duodecim annis in conjugio Imperatoris apparuerit. Moxque ab eo separata, in Andelabense Cenobium Virginum à se constructum secessit, ibique sedula in divino servitio virgo Regina permansit.* Inter schedas Patris Stephani Votrin, ad hunc Hermannii locum hæc reperi adnotata: Divinam quod vocat judicium, fuit ab igne non violari. Nam ipsa in candidâ veste pyram ardentem ingressa

ladi non potuit. Mira illa vetis ab incendio intacta servatur in Sti-
vagenſi Cœnobio Præmonſtratenſium in Lotharingiâ, quod illa ha-
buit ab Imperatore Carolo, longè antequàm à Præmonſtratenſibus
poſſideretur; & conjunxit Andelaenſi, ut conſtat ex litteris, tum
ipſius, tum Lucii tertii Pontificis: in quibus clarè dicitur Carolum
ſuperſtitem fuiſſe uxori ſux; quod tamen Hermannſi Hiſtorico non
facis congruit. Sic habent litteræ Lucii anno 1181. datæ: *Locum Sti-
vagi, in quo fundata eſt Abbatia, quæ ex inſtitutione Caroli quor-
dam Romanorum Imperatoris, poſt deceſſum Rechardis ſue conjugis,
quæ eundem locum in propriam poſſeſſionem tenuerat, Andelaenſi Mo-
naſterio, quod eadem Imperatrix à fundamentis conſtruxerat, & præ-
ſente jam diſſo Imperatore, Romana Eccleſia delegaverat, firmitate
perenni dignoſcitur ſubſiſcere.* Litteræ Rechardis ipſius, datæ Kalen-
dis Maii, anno 880. de bonis Abbatix Stivagiænſis, extant Stivagii.
Hæc annotabat Voyrinus, vir angelicæ morum innocentix & pieta-
tis, pertinacis ſtudiî, ingenii præſtantis, multa conſcribendis libris
de publico meriturus, niſi vitâ exceſſiſſet in flore ætatis. Gaſpar
Bruchſchius, in Chronologiâ Monaſteriorum Germaniæ: **ANDLOW,**
inquit, antiquius Andelaha, ab eiſdem nominis ſinivio, vel Helio-
nis Cœnobium, in pago Helifaſia, ſancto Fabiano, & Felicitati ſacrum,
Canoniarum celebri loco natarum opulentum Collegium ad montana
Voſagi ſitum: fundatum, ac pro duodecim Canoniffis, totidemque Ca-
nonicis liberaliſſimè dotatum eſt anno Chriſti 880. aut (ut alii vo-
lunt) 888. à ſanctâ Richarde, Scotorum Regis filiâ, Caroli Cræſſi
Romanorum Imperatoris conjuge; quæ per divortium à marito ſegrega-
ta, ibi vixit, mortua, & honorifico tumulo poſt ſummam aram in ſu-
blime collocata ſepulta eſt. Ex Bruchſchio Stephanus Vitus Richardum
Hibernam fuiſſe contendit, nempe Scotiâ majore ortam. Hujus me-
minit Molanus in Additionibus ad Uſuardum, 18. Septembris. Wion
eâdem die, libro 3. Ligni vitæ, & lib. 4. cap. 3. inter ſanctas Impe-
ratrices Occidentis. Vitam ejus ſcripſit Raderus in Bavariâ ſanctâ;
& de illâ quoque, ac de ejus Monaſterio, Joannes Ruyr, in Anti-
quitatibus Voſagi, parte 3. lib. 1. cap. 10. Quod tamen aiunt hi
omnes, fundatum à Richarde hoc Monaſterium, non ſic accipias,
quodd illa ſacram hanc domum prima erexerit; ſed quodd jam olim
fundatam, ac poſteâ neglectam & ſemidirutam reſtituerit, locuple-
taverit, & ædificiis proventibusque auxerit, ad piarum ac nobilium
Virginum commodam ſtationem. Primò autem fundatum fuerat, ut
opinor, à ſanctâ Salabergâ, in cujus Vita hæc Auctor ipſi ſuppar:
*Quid plura? Auctore Deo omnem ſpem ſuam poſt Deum beato viro
(Walberto Luxovienſi Abbati) committens, viro converſo, proliſſi-
que Deo ſacratſis, religionis veſto acceptâ, inito cum beato Walberto
conſilio, conviventiâ exiſtente marii, Cœnobium puellarum in ſuburbio
Lingonica urbis, in hereditate vel ſucceſſione paternâ condatur exſtruxere;*

quod propriis reditibus pradiorum suorum, ex successione hereditatis paterna Christum faciendo heredem, nobiliter diuavit. Et post pauca: *Qui locus licet Austrasiorum finibus immineret, vicinus tamen Burgundia erat, distans à Luxovio Monasterio paulò minùs millibus quadraginta: ibique adunatus centum, seu amplius, tam ex Nobilium liberis, quam ex proprio officio puellus, Christo Domino dicavit. Sed cum pars maxima fabrica Monasterii constructa esset, capite famula Christi, prasago nupte Spiritu Dei repleta, cum viro Dei truinare animo, non esse in eodem loco puellarum Cœnobium tutum, nihilque stabilitatis habere, vel munitionis locum. Nam licet barbaries procul abesse, Regum tamen limibus hinc inde admixtis, periculi indicium futuris temporibus erat: quod periculum nos deinceps vidimus. Denique nuper civile bellum inter Reges Francorum Theodericum, & Dagobernum, circa illos fines est actum; ibique vicinia quaque depopulata, agri, villa, ades, & ipsa (quod gravius est) Sanctorum corpora igne sunt cremata. Suburbium intellige diocesium seu territorium, ut passim legere est in Antiquis. Est autem Andilegum in superiore Alsatiâ, qui Burgundiz & Austrasiz veterum regnorum fines erant; unde & modò in eorum uno, modò in altero computabatur: & aberat Luxovio quadraginta ferè milliaribus, hoc est, leucis horariis admodum tredecim. Non poterat meliùs designari Monasterium quod Salaberga centum puellis de consilio Walberti Luxoviensis Abbatis paraverat, quas deinde Laudunum transduxit. Sed Andilegi parietinas ducentis post annis (ut cenfeo) instauravit Richardis Heroïna, immò & in melius reparavit.*

Cap. 17. *APPOSTA ECCLESIA.*] Hanc vocem in capitis hujus titulo representant codices Trevirensis & Thuanus, quam idèd negligere religio fuit: sive est Latine originis, ut sit *apposta*, quasi apposita, ad faciendam Ecclesiam: sive Gallicæ, ut sit fulcrum, quod Gallis *appuy, ou estaiçon*: sive Anglicanæ, de quâ Anglorum iudicium esto. Certè homonyma est *destina*, quæ in vulgatis legitur, de quâ hîc nobis agendum distinctius.

Ibid.

DESTINA CUI INCUMBENS OBIT.] Destinam hoc capite celebrat Beda, trabem ligneam, quâ ut fulcro sacra ædes ex lignis fabricata, à parte Occidentis sustinebatur: quòd cum ad eam adclinis animam efflasset Aidanus Episcopus, exinde semel atque iterum incendio absumptâ Ecclesiâ, ea trabs à flammis illâsa perstitisset, ac multis etiam saluti fuisset ægrotis. Attamen Bedâ haud paulò antiquior Vitruvius, libro 5. de Architecturâ, cap. 12. ubi agit de portibus & structuris in aquâ faciendis, *destinas* appellat (sic enim habent manuscripti codices à Philandro laudati) vincula seu catenas, quibus arcæ lignæ cæmentis confectæ, & in aquas devolvendæ constringeantur; unde *destina* vincula dicit in antiquis Glossariis. Duos istos vocis hujus intellectus sic colligo. Est *destina*, id quo

aliud quidlibet coercetur, & cohibetur, siue adstrictum, ne diffusetur; siue suffultum, ne corrumpatur.

LIBRO IV.

IN VENTA CIVITATE.] Sic Trevirensis codex, cum Editione Anglofaxonica, pro eo quod habent cæteri vulgati omnes, *in-ventis in civitate.* Cap. 15

LIBRO V.

LINTRE NAVALI.] In vulgatis legebatur, uti & in Anglofaxonica anni 1644. *Cæptum iter gnaviter Romam usque complevit.* In TRÆV. *Cæptum inter navali iter Romam usque complevit.* Lugduno Romam navigio tendenti, lintre consensu solvendum est ab Arari; unde amne secundo in Rhodanum, à Rhodano in mare Mediterraneum, ad ostia usque Tiberina pronus est cursus. Lego igitur *lintre pro iter*, totumque hunc locum haud dubiè ad Bedæ mentem sic restituo: *Cæptum lintre navali iter Romam usque complevit.* Cap. 20.

ET SEX ANNOS APUD IPSUM COMMORATUS.] Male *Ibid.* in vulgatis, etiam & in Anglofaxonica, & III. annos. TRÆV. & VI. annos. In antiquis membranarum non raro à nobis observatum est, binarii notam librariorum imperitiâ in quinarium transformari, vel vicissim hoc in illud. Sex annos mansisse Vilfridum apud Dalphinum Episcopum Lugdunensem apparet ex utriusque accuratâ chronologia, quam nostræ de annis Dagoberti Dissertationi illigavimus.

BALDID REGINA.] Sic in Træv. Anglofaxonica *Balthit*, sicut *Ibid.* & S. Germ. de Pratis, & Thuanus codex. *Brunschildam* habent Editiones aliorum omnes, crasso errore. Fuit enim Brunichilda uxor Sigiberti, Clotarîi filii, Clodovei Magni nepotis, vafritæ nomine, & horrendo mortis genere infamis: post quam annorum ferè quinquaginta intervallo Balthidis in regiam Francorum familiam enupsit, morum integritate insignis femina, & ipsa Sanctarum catalogo inscripta: conjux Clodovei II. Dagoberti filii, Clotarîi II. nepotis, pronepotis Chilperici, qui Sigiberti Brunichildæ mariti frater fuit, ut videre est in hoc schemate.

Clodoveus Magnus.
Clotarîus.

Sigibertus, cui uxor
Brunchildis.

Chilpericus.
Clotarîus II.
Dagobertus.
Clodoveus II. cui conjux
S. Balthidis.

S f iij

Danda est autem venia homini Anglo Bedæ, quod in Francorum Historiâ minus peritus fuerit. Non enim Baldid Regina (ut ipse ait) *missis militibus Dalsium Lugdunensem Episcopum iussit interficere*; sed tantum ad regium conventum adduci, ut objecta ab adversariis crimina præfens purgaret. Quod ne faceret veriti calumniatores, ut penam talionis imminerent à se averterent, sanctissimum Archipræsulem non decollarunt (ut addit Bedæ;) sed noctu in lecto decumbentem, cultellis compunctum impie interfecerunt. Clara sunt hæc omnia ex Dalsini, sive Annemundi rebus gestis, quas in citatâ Dissertatione passim delibavimus ex Tabulis Lugdunensium Ecclesiarum, in quibus ille ut pro justitiâ passus, verè Martyr colitur die mensis Septembris octavâ & vicesimâ.

Cap. 22. QUOD SI DE PHILOSOPHIÂ HUIUS MUNDI, &c.] In codice Trevirensi de erat versus integer ab exscriptore per imprudentiam prætermisus: sic enim habet exemplar illud vetustissimum: *Quod si de Philosophiâ huius mundi, quando magis civibus patria celestis, &c.* Post illa verba, *huius mundi*, lacuna est, quæ sic expletur in omnibus Editionibus: *Quod si de Philosophiâ huius mundi, verè intelligere de statu huius mundi, meritò diligere potuit homo hunc mundum.* Codex manuscriptus S. Germani de Pratis: *Quod si de Philosophiâ huiusmodi, verè intellexere de statu huius mundi; quando magis, &c.* Codex Thuanus sic habet: *Quod si de Philosophiâ huius mundi verè intelligere, id est, de statu huius mundi meritò dicere potuit homo mortalis huius mundi, quando magis, &c.* Hæc mihi lectio probatur præ cæteris, quam & retinui.

Cap. 23. ANNO DOMIN. INCARN. DCCXXIX.] Sic verè TREV. & Anglosaxonica, cùm falsò in vulgatis aliis legeretur, DCCXXVIII. Ratio in promptu est, quia ibidem Bedæ *Pascha Dominicum octavo Kalendarum Maiarum die*, evenisse dicit; quod anno convenit 729. ut clarum est ex veteri computo.

Cap. 25. ANNO DCLXXVII. COMSTA APPARUIT.] Pluribus de illo egerat lib. 4. cap. 12. & utroque loco eum designat in anno Christi 677. in codice Trevirensi, & in manuscripto S. Germani de Pratis; utique ex mente ipsius Auctoris: cùm in vulgatis perperam jungatur anno 678. Juvit nos plurimùm hæc observatio in Dissertatione de annis Dagoberti Regis, ut Clodovei II. trium filiorum, immò & sæculi totius à Christo septimi, nuantem chronologiam suis terminis definiremus.



BEDÆ PRESBYTERI

ET

FREDEGarii SCHOLASTICI

CONCORDIÆ

Ad senioris Dagoberti definiendam Monarchiæ
periodum, atque ad primæ totius Regum Fran-
corum stirpis chronologiam stabiliendam,

PARS SECUNDA.

DE ANNIS DAGOBERTI

FRANCORUM REGIS EO NOMINE PRIMI

DISSERTATIO.

THE LIBRARY OF THE

71

UNIVERSITY OF CALIFORNIA

CONCORDIA

UNIVERSITY OF CALIFORNIA
LIBRARY

UNIVERSITY OF CALIFORNIA

LIBRARY

UNIVERSITY OF CALIFORNIA

LIBRARY

UNIVERSITY OF CALIFORNIA

LIBRARY

UNIVERSITY OF CALIFORNIA

LIBRARY

DE



DE ANNIS DAGOBERTI
FRANCORUM REGIS
EO NOMINE PRIMI
DISSERTATIO,

In quâ & regni anni sedecim labentes à Clotarii II.
patris obitu Dagoberto asseruntur, & septimi ferè
totius post Christum sæculi Chronologiæ jaciuntur
fundamenta.

*Auctore PETRO FRANCISCO CHIFFLETIO, Vefun-
tionensi, Societatis JESU Presbytero.*

CAPUT I.

*De exordio sedecim annorum regni Dagoberti dua proponuntur
sententia, toto sexennio inter se diverse: quid in hac questione
senserit qui vulgò existimatur Fredegarius.*



COMMUNIS est eruditorum sententia, obiisse
Clotarium, eo nomine secundum, Francorum Re-
gem, iv. Kalendas Octobris (uel notatur in an-
tiquis Nectrologiis) anno ætæ vulgaris 628. regni
sui Neustrici xlii. expleto, sed xlii. à paucis diebus in-
choato; monarchiæ porro (ex quo scilicet secundum S. Co-

lumbani vaticinium, tribus regnis, Neustriæ, Austrasiæ, & Burgundiæ imperare cœpit) anno quartodecimo.

Anno xv i. regni sui Dagobertus profluvio ventris extinctus est, ut ait Fredegarius, cap. 79. Aimoinus, lib. 4. cap. 33. & ex his alii. Sed illi tria fuerant regnandi initia. Primum anno Clotarii patris ejus xx xv i i i. Christi 622. quo cum pater (ut ait Fredegarius, cap. 47.) *super Austrasios Regem instituit, retinens sibi quod Ardenna & Vosagus versùs Neuster & Burgundiam excludebant.* Alterum anno Clotarii x l i i. Christi 626. cùm Dagoberto regnum Austrasiæ ampliatum, firmatùmque est duodecim Procerum judicio : *inter quos & dominus Arnulfus, Pontifex Mettensis, cum reliquis Episcopis elegitur, ut benignissimè (sicut sua erat sanctitas) inter patrem & filium pro pacis loqueretur concordia. Tandem à Pontificibus, vel sapientissimis viris Proceribus, pater pacificatur cum filio; reddensque ei solidatum quod aspiciebat ad regnum Austrasiorum, hoc tantùm exinde quod citra Ligerem, vel Provincia partes situm erat, suæ ditioni retenuit.* Tertium fuit à morte patris Clotarii, nimirum ab anno 628. die mensis Septembris xx v i i i. Cùm igitur obierit Dagobertus x i x. Januarii, regni anno xvi. si à regni Austrasienfis exordio numeres, obierit anno Christi 638. si ab ejusdem regni accretione, desierit vivere anno 642. si denique à patris obitu, & à susceptâ post illum monarchiâ, fuerit superstes usque ad annum æræ Dionysianæ 644.

De secundo regni exordio nullam video moveri quæstionem : de primo & tertio multa est hodie apud eruditos contentio. A morte patris sedecim inchoatos Dagoberti annos numerant ; adeoque illum ineunte anno 644. obiisse affirmant Jacobus Sirmondus, Ægidius Bucherius, Nicolaus Viguierius, Joannes Bollandus, Dionysius Petavius, Andreas Duchesnius, Philippus Labbeus, Dadinus de Altaferia, & ferè quicquid eruditorum habet Europa, perpaucis exceptis, quos mox appellabo, viris alioquin eruditis, de quorum celebri famâ hoc nomine nihil quicquam detractum velim. Illis recentioribus Erchanbertum adjungo, Monachum Cassinensem, cujus est Fragmentum vetus de Majoribus-Dominis, à Frehero & Duchesnio editum ; & Historia eversâ à

Sarracenis Monasterii Cassinensis, de quâ Posssevinus in Apparatu; itémque Continuatio Historiæ Pauli Diaconi, delinens in anno Christi 888. quam edidit Camillus Peregrinus Campanus, in Historiâ Principum Langobardorum: *Dagobertus Rex*, inquit Erchanbertus, *post mortem patris regnavit annis sedecim*. Nec ullum ex antiquis aliter sensisse reperio, uno excepto Hermanno Contracto, qui malè intellecto Fredegario, in errorem lapsus, patricos alios secum præcipites egit.

In hanc igitur communissimam ævi nostri virorum illustrium sententiam primus insurrexit Hadrianus Valesius, Scriptor nominatissimus, Rerum Francicarum libro xvi. i. cui adhæsit Carolus le Coigne, in Annalibus Ecclesiasticis Francorum, tomo 2. 3. & 4. ac deinde Joannes Mabillonius, in Præfatione Tomi secundi Sanctorum Ordinis S. Benedicti, & passim in contextu, ac rursùm in Præfatione Sæculi quarti Benedictini. Hi pro se habent unicùm ex ævi superioris Scriptoribus Hermannum in Chronico auditiore, quod edidit Henricus Canisius, tomo 1. Antiquæ Lætionis, ubi hæc leguntur: *Lotharius Rex Francorum, fortis, pius & religiosus, anno regni xlv. defunctus, & Parisiis in Basilicâ S. Vincentii sepultus est. Ejus regnum Dagobertus accipiens, cum jam sex annis regnaret, decem annis postea rexit*. Existimavit scilicet Hermannus, Fredegarium sedecim regni annos, quos Dagoberto tribuit, non à Clotarii patris obitu repetiisse, sed à regni ejus Austrasiensis exordio, quod Clotarii obitum sexennio (ut putant) præcessit, & ad annum 622. pertinuit. Verùm neque Hermannus, neque hi recentiores Fredegarii mentem fati perspexisse mihi videntur: non enim ille uspiam dixit, decem dumtaxat annis Dagobertum patri fuisse superstitem; sed septimum vel sextum regni ejus Austrasiensis annum cum primo à patris morte conflare visus, decem tantùm illi annos monarchiæ creditus est tribuisse. At longè alia mens Fredegario fuit. Age enim, Dagoberti regnorum annos ex ipso fonte, hoc est, ex probatissimis Fredegarii exemplaribus, hauriamus.

Primum illud moneo, regni ejus Austrasiensis exordium, in vetustissimo & optimo Fredegarii codice, quem Pater Sirmondus nobis reliquit, non adscribi anno Clotarii xxxviii.

qui fuit Christi 622. (ut habet Duchesnii vulgata Editio) sed anno Clotarii xxxix. Christi 623. & sic etiam ab Anonymo Sandionysiano, cap. 12. & ab Aimoino, lib. 4. cap. 8. ut observavit Labbeus in *Æra sua* Christianâ, expositulans, Duchesnium, qui hoc nostro codice usum se esse proficitur, eâ de varietate Lectorem non admonuisse.

Ad hæc observo scripsisse *Fredegariam* in Burgundiâ, & pro suis Burgundionibus : (quod ultro fatetur Cointius cum Valesio) unde est quoddam solos ferè regni Burgundiæ annos in suo Chronico adnotare & extendere studuit, ut apparet in Guntramno, Childeberto juniore, Theoderico, Clotario II. Dagoberto, & Clodoveo I. qui alii ex aliis regnum Burgundiæ obtinuerunt. Quare cum Dagobertum scripsit, anno regni sui sextodecimo extinctum, de regno ejus Burgundiæ, ex Auctoris mente atque instituto est intelligendus, adeoque cum regni ejus annos sextum, septimum, & sequentes usque ad sextumdecimum commemoravit, annos tantum regni Burgundiæ designasse existimandus est. Porro Burgundiæ regno non est potius Dagobertus, nisi post mortem Clotarii patris. Quare hi anni de Austrasiensi Dagoberti regno intelligi nullo modo possunt. Satis esse posset una hæc ratio ad annos regni Austrasiensis à Fredegario exterminandos. Nunc sequentia ipsius verba propius inspiciamus.

Capite XLVI. Anno, inquit, XLV. regni sui Clotharius moritur, & in suburbano Parisius in Ecclesiâ sancti Vincensii sepelitur. Dagobertus cornens genitorem suum fuisse defunctum, universis Leudibus quos regebat in Auster, jubet cum magno exercitu promoveri. Missos in Burgundiâ & Neuster direxit. Ita codex noster, pro quo malè apud Duchesnium [& in Auster direxit :] non enim in Auster Missos direxit, ubi jam quietè regnabat ; sed in alia regna quæ pater ejus Clotarius tenuerat ;] ut suum deberent regimen elegere. Cùmque Remus venisset, Successiones peraccedens, omnes Pontifices & Leudes Burgundiæ inibi se tradidisse noscuntur. Hic legit Duchesnius [per suggestiones accedens] ineptè. Planus est sensus ex codice nostro citato, & altero Divionensi, itémque ex Chronico Benigniano. Sed & Neustrasia Pontifices & Proceres plurima pars regnum Dagoberti visi sunt expetisse. Charibertus frater

suus nitebatur, si potuisset, regnum adsumere; sed ejus voluntas pro simplicitate parum sortitur effectum. Brodulfus [quidam legunt, Brunulfus] velleus nepotem stabilire in regnum, adversus Dagobertum miscipulare cœperat; sed hujus rei vicissitudinem probavit eventus.

Anno LVII. Cùmque regnum Clotarii, tam Neptrico quàm Burgundias ad Dagobertum fuisset præoccupatum, captis thesauris, & sua ditioni redactis, tandem misericordiâ motus, consilio sapientibus usus, citra Ligerim & limitem Spania, quod ponitur partibus Wasconia, sive montis Pyrenæi, pagos & civitates fratri suo Chariberto, ad transagendum, ad initar privato habitu convivendum potuisset sufficere, noscitur concessisse: pagum Tholosanum, Cathorcinum, Agenninsem, Petrocoricum, & Santonicum; vel quod ab his versus montes Pyrenæos excluditur, hoc tantum Chariberto regendum concessit: quod ei per pactiōis vinculum strinxit, ut amplius Charibertus nullo tempore adversus Dagobertum de regno patris repetere præsumeret. Charibertus sedem Tholosa eligens, regnat in partem provincia Aquitania.

Post annum tertium quòd regnare cepisset, totam Wasconiam cum exercitu superans, suæ ditioni redegit; aliquantulum largiorem fecit regni sui spatium.

Vehementer urgeri se sentit Cointius verbis illis, post annum tertium: quare vocem tertium è Fredegarii textu tollendam esse contendit tomo suo tertio, anno Christi 430. numero 1 v. & iterum tomo 4. anno 715. numero xxv. & xxx. ne fateri cogatur; sicut tres quatuorve illos Chariberti annos, sic & annos Dagoberti usque ad ultimum & sextumdecimum, à Clotarii eorum patris obitu esse numerandos. Verùm non modò vulgata Editio Duchesnii, sed etiam alii omnes, quotquot vidimus, Fredegarii codices, vetustissimi & probatissimi vocem illam (*tertium*) repræsentant; eandemque lectionem confirmarunt sexcentis abhinc annis Benignianus, Besuensis, & Virdunensis Chronographi, qui Fredegarium sublegunt, ac tantumnon describunt; habentque hic de Chariberto: *Post annos tres quàm regnare cepisset, totam Wasconiam superans, largius fecit regnum suum.* Quà igitur vel ratione, vel auctoritate, de voce (*tertium*) apud Fre-

degarium expungenda dictum illud à Carolo Cointio prodierit, æqui Lectoris iudicium esto.

Capite LVIII. *Dagobertus cum jam anno sexto regnans, maximam partem patris regnum (ut super memini) adsumpsit, Burgundias ingreditur, &c.* Duchesnius legit [*cum jam anno septimo.*] Ego annum sextum lego cum Chronicis Benigniano, Besuensi, & Virdunensi; immò & cum Hermanno Contracto. Tres primi consequenter anno septimo referunt quæ vulgaris anno octavo, & anno octavo quæ vulgaris nono: tum in annos x. xi. & xii. omnes conveniunt. Rursus habent illi ad annum xiii. quæ refert vulgaris ad annum xiv. & denique concurrunt omnes in annis xv. & xvi.

Igitur anno regni Dagoberti vi. vel vii. hoc est, Christi 634. vel 635. ipse *Nantildem, unam ex puellis de ministerio*, [*Ita Benignianus, & ipsius Fredegarii vetustiores aliquot codices; non, de Monasterio, ut habet vulgaris*] *in matrimonium accipiens, Reginam sublimavit.*

Chronographus Benignianus annos Dagoberti à patris obitu se numerare ostendit: nam antequàm ex Fredegario annum illius sextum, seu septimum commemoret, refert Ermenbertum & Ermenoaram, villas Posciacum & Fontem Lagnis, & Masciacum sancto Benigno contulisse, *quinto anno regni Dagoberti*, utique in Burgundiâ, adeoque post patrem regnantis. Huic anno tabulæ ipsæ donationis, annum subnotant ab Incarnatione Domini DCXXXII. de quo nos infra dicemus.

Hoc ipso anno discessit S. Arnulfus ex aulâ Dagoberti, cum fuisset Episcopus Metensis annis xv. & diebus decem, ut in antiquis codicibus legitur; adeoque illi Ecclesiæ præesse cœpisset anno Christi 619. vel 620. ut pluribus infra ostendam. Anno Dagoberti vii. vel viii. hoc est, 635. vel 636. nascitur illi filius Sigibertus ex puellâ Ragnetrude.

Anno Dagoberti viii. vel ix. (Christi 636. vel 637.) *Charibertus Rex moritur.* Non potest hic annus intelligi de regno Austrasiæ, quia annus viii. vel ix. regni Austrasien-sis, fuit regni Burgundici post patris obitum secundus, vel ad summum tertius. Atqui præmiserat Fredegarius, *Charibertum*, qui non nisi mortuo patre regnare cœperat, *post*

annum tertium regni sui totam Wasconiam imperio suo ad-
jecisse; quod non potest intelligi nisi de annis regni Chari-
berti quarto vel quinto.

Eodem anno Dagoberti VII. vel IX. narrat Fredegarius expeditionem Dagoberti in Hispaniam, quâ Senzila regno pulsus, & in ejus loco Sisenandus regnare cœpit. Hic fuit annus Christi 631. ex accuratis calculis Marianæ in Historiâ Hispanicâ, & Garciz Loaysæ, in Notis ad Concilium Toletanum quartum, quod celebratum est anno tertio Sisenandi Regis, *Ærâ 671. adeoque (detractis 38.) anno Christi 633.* Fucrat ergo annus primus Sisenandi, Christi 631. qui in annum incurrit regni Dagoberti in Burgundiâ tertium, in Austrasiâ nonum. Dicere hic possis cum Petavio, vacillasse Fredegarium in annis Dagoberti recensendis, ejusque annos regni Austrasiensis cum annis regni Burgundici sic confudisse, ut Lectoribus suis tenebras offuderit, ad hanc usque diem vix satis discussas. Sed alia ad manum est responsio, quæ Fredegarii fidem liberat. Sub uno Dagoberti anno plurimum annorum res gestas colligere solitus est, ut in singulis ferè Dagoberti annis observare quisque potest. In hoc igitur ejus anno octavo seu nono, primum meminit Senzilæ iniqui Regis, *qui Sisebuto Regi clementissimo ante annum circiter successerat in regnum.* Deinde narrat ut à Dagoberto deditus sit Senzila, & Sisenandus in ejus loco constitutus, quod ex dictis factum constat anno Christi 631. Postea missos à Dagoberto Amalgarium & Venerandum Legatos, qui à Sisenando promissum poscerent, *missorium aureum pensantem quingenta auri pondo.* In Notis nostris ad caput 32. Chronici Benigniani ostendimus, legendum hoc loco, *pensantem quinquaginta auri pondo;* & sic videri scripsisse Fredegarium ipsum, quem sublegit Benignianus Chronographus, & alij ei suppare. Hoc exhibito, supervenisse Gothos, qui missorium Legatis Dagoberti vi eriperent. Hinc discurrisse utrimque Legatos, ac tandem conventum, ut pro missorii pretio ducenta milia solidorum Legati Dagoberti acciperent. Hoc negotium trahi potuit usque in annum Dagoberti post patrem regnantis octavum vel nonum, Christi 636. vel 637.

Anno XI. Dagoberti in Burgundiâ regnantis, Christi 639.

Sigibertus Austrasie Rex à patre constituitur.

Anno xii. Dagoberti in Burgundiâ regnantis, Christi 640. Clodoveo ex Nantilde nato Nepticum & Burgundia, cum Ducatu Dentelini, subjiuntur, jubente patre ejus Dagoberto. Præclarè ex his constant Sigiberti & Clodovei ætatum & regnorum periodi; & de cæteris Dagoberti annis nulla superest difficultas, quo minùs usque ad sextumdecimum de regno ejus Burgundico accipiantur.

Quòd si cui probari non possit dilata ad quinquennium solutio illa pretii pto missorio aureo à Gothis persoluti; putetque ex Petavii sententiâ, notandum inconstantiz Fredегarium, qui annos Dagoberti nunc ab Austrasiensis regni exordio, nunc à patris obitu deduxerit: nihil tamen in rem suam quæsierint adversarii, vel ex Hermanno, qui Fredегarii mentem in multis non satùs perspexerit; vel ex Fredегario, qui in nonnullis sibiipsi non constiterit.

CAPUT II.

* *Sanctus Arnulfus Metensem Episcopatum suscepit anno Christi 619. tenuit annis quindecim, & decem diebus; abdicavit anno 634. Dagoberti monarchia sexto.*

AUCTORITATE codicum S. Symphoriani, & S. Arnulfi Metensis, immò & Pauli Diaconi, consentiunt omnes sedisse sanctum Arnulfum Metis per annos quindecim, & dies decem, cùm ei decessisset Pappolus xi. Kalendas Decembris. Sed ejus initia refert Cointius in annum Christi 611. regnante adhuc Theodeberto: exitum porrò in annum 626. adhuc superstitè Clotario Rege. At Mabillonius triennio eum submover, ejusque exordia in annum refert 614. exitum in annum 629. Cointio offendiculo fuit Vita S. Goërici, qui S. Arnulfo in Episcopatu Metensi successit: cujus Vitæ anonymus Auctor verbosus & indiligens, ævum suum prodidit, ubi meminit Spinalensis Monasterii, quod *Deodericus major*, Metensis Episcopus, fundavit in pago Calvomontensi, & in quo S. Goërici sacra ossa collocavit.

cavit. Dum enim Deodericum *majorem* appellavit, eo nos docuit pervenisse se ad tempora Deoderici secundi, ad quem prior ille comparatus, *major* seu senior nuncupabatur. Adalberones tres, & Deoderici duo, Metenses Episcopi sic distinguuntur in codice manuscripto S. Vincentii Metensis :

Anno 929. Adalbero I. Episcopus Mettensis.

Anno 964. Deodericus I. Episcopus Mettensis, hujus loci constructor.

Anno 984. Adalbero II. Episcopus Mettensis.

Anno 1005. Deodericus II. Episcopus Mettensis.

Anno 1044. Adalbero III. Episcopus Mettensis.

Scriptus ergo hic Auctor Vitæ S. Goërici sub Deoderico II. circiter annum Christi 1025. adeoque annis post sanctos Arnulfum & Goëricum amplius quadringentis, ut mirum non sit, aberrasse illum, cum asseruit venisse Goëricum Metas, cum regnaret Theodebertus, & sedem Episcopalem Arnulfus obtineret : sic enim legimus in codicibus Spinalensi, & Accinctino. In eundem scopulum impigit Auctor Vitæ S. Clodulfi, cum ait, datum Arnulfum Pappolo in Metensi Episcopatu successorem ex Majore-domûs regis, sub Theodeberto Rege. Turbat hic etiam Cointii calculos, quod sanctum Arnulfum abiisse dicit in eremum, adhuc regnante Clotario, cum apud Bedam id fecisse legatur, *defuncto Clotario Rege* : satisque id colligatur tum ex Fredegario, tum ex Vitâ S. Arnulfi perquam antiquâ, & Clodulfi ejus filii jussu conscriptâ : ex quibus constat, S. Arnulfum multis precibus efflagitasse à Clotario suum in solitudinem secessum; nec impetrasse, nisi à Dagoberto, & post multas preces. Neque enim tantæ prudentiæ, & in Regum aulis subacti ingenii vir, quod à patre non obtinuerat, hoc, patre adhuc superstitè, à filio extorquere velle aut potuisset, aut debuisset.

Immo contendo (ut jam nonui capite primo hujus Dissertationis) iniisse sanctum Arnulfum in Episcopatu Metensi anno Christi 619. vel 620. abdicasse anno 634. vel 635. Dagoberti regni Burgundici, à morte Clotarii patris sexto vel septimo ; evictum scilicet regiis ejus & piis precibus, cum ei scriberet : *Domine & Pater, quæ scripsistis per vestram epistolam, ut in vestro loco alium deberemus eligere successorem,*

istud nostra praesumptio facere nullâ ratione praesumit. Quem enim non flecterent magni Regis & optimi parentis tam æqua studia, pro filio, quem unicum regnorum omnium suorum heredem spectabat? Vicit certè Clotarius, & Arnulfum eò impulit, ut posthabitis eremi vacationibus, Dagoberto ad omne virtutum regiarum decus monitor adesset, atque hortator, usque ad sextum septimùmve annum ab obitu Clotarii patris.

Clara sunt ista ex Fredegario, qui ad hunc annum sic ait: *Usque eodem tempore, ab initio quo regnare cœperat, (primum in Austrasiâ, tum deinde in Neustriâ ac Burgundiâ) consilio primitus beatissimi Arnulfi, Mettensis urbis Pontificis, & Pippini Majoris-domûs usus, tantâ prosperitate regale regimen in Auster regebat, ut à cunctis gentibus immenso ordine laudem haberet, &c. Post discessum beati Arnulfi, adhuc consilio Pippini Majoris-domûs, & Chuniberti Pontificis urbis Colonia, utens, & ab ipsis fortiter admonitus, tanta prosperitatis & iustitia amore complexus universas sibi subditas gentes, usque ad Parisius (ut supra memini) pervenit, regebatur, ut nullus de Francorum Regibus praecedentibus, sua laudis fuisset praeclentior.*

Anno VII. (aliàs VIII.) regni sui, cùm Auster regio cultu circuiret, quamdam puellam, nomine Ragnetrudem, Strati suo adscivit, de quâ eo anno habuit filium nomine Sigibertum.

Cap. LX. Revertens in Neptico, sedem patris sui Chlotarii diligens, (Parisius) assidue residere disponens, cùm omnem iustitiam, quam prius dilexerat, fuisset oblitus, cupiditatis instinctu desuper rebus Ecclesiarum & Leudibus, sagaci desiderio vellet omnibus undique spoliis novos implere thesauros. Luxuria super modum deditus, tres habebat maximè ad instar Reginas, & plurimas concubinas, &c.

Ex his intelligere est, primò sex minimùm annis regiam sedem habuisse Dagobertum Metis, quæ Austrasiorum caput erat, etiam ex quo in Burgundiæ & Neustriæ paterna regna successerat: ac deinde lustratis Monarchiæ suæ provinciis, Lutetiam Parisiorum elegisse; è quâ, tanquàm ex arce, omnibus sibi subiectis populis jus diceret. Deinde Metis aulam suam Parisios transduxisse sub illud tempus, quo sanctus Ar-

nulfus, extortâ tandem multis flagitationibus licentiâ, in eremum Habendensem, ad sanctum Romaricum veterem necessarium suum se recepit. Mutationis hujus causas ex Fredegario interpretari licet; Dagoberti avaritiam in congerendis opibus haud absque subditorum gravi oppressione, & vagas libidines in pellicum alendis gregibus: propter quæ flagitia ac facinora, egregius alioqui Princeps æternis à Christo summo Judice damnatus erat suppliciis, si non (ut fama est) sanctus Dionysius, Parisiorum Apostolus, quem ille impensè coluerat, periclitanti patronus advenisset.

S. Arnulfi secessum in eremum Vosagi montis, ex Fredegario defiximus In anno Christi 634. vel 635. Quantum in illâ vitæ asperitate usque ad obitum perstiterit, non invenio antiquum Auctorem qui definiat. Tantum Sigebertus ad annum 240. *Sanctus Arnulfus*, inquit, *ex Majore-domûs, Mettensium Episcopus, & ex Episcopo solitarius, dormit in Christo.* De die obitus fallunt Martyrologia: cum enim in eis duo legantur dies S. Arnulfi memoriæ consecrari; obitui unus, quem natalem vocant; alter translationi: promiscuè utrumque usurpasse videntur. Beda ipsemet, ad diem Julii 18. *Natale*, ait, *sancti Arnulfi Confessoris.* Hoc securus est Baronius, & obitum seu natalem S. Arnulfi, eâ die, Julii octavâdecimâ, adnotavit: quâ ipsâ die Auctarium Flori (apud Henschenium, tomò 2. Martii) sic habet: *Civitate Metis, depositio S. Arnulfi Confessoris*; translationem scilicet depositionis nomine significavit. Tum idem Florus, 16. Augusti: *Civitate Metis, natale S. Arnulfi Episcopi & Confessoris.* Qui Florum non viderat Baronius, soli Bedæ adhaerens, S. Arnulfi obitum seu natalem, Julii 18. adscripsit; ad Augusti 16. de illo tacuit. Wandelbertus 17. Kal. Septembris, quod est Augusti 16. *Sextum denumque tenes, Arnulfe Sacerdos.* Martyrologium Balernense, 17. Kalend. Sept. *Civitate Mettis translatio beati Arnulfi, Mettensis civitatis Episcopi, & Confessoris.* Ado, 15. Kal. Aug. *Apud civitatem Metensium, S. Arnulfi Episcopi, qui sanctitate & miraculorum gratiâ illustris, eremiticam vitam diligens, beato sine quievit.* Eadem Ufuardus, sed ad diem 16. Augusti. Eadem planè Martyrologium Luxoviense. utroque die, nempe Julii 18. & Augusti 16. nullâ adjectâ vel natalis,

vel translationis mentione. In hac sacrorum fastorum diversitate licet dirimit Martyrologium Habendense, seu Sancti Montis, in cujus Ecclesiâ primò sepultus fuerat sanctus Arnulfus : *xv. Kal. Augusti, translatio sancti Arnulfi, Metensis Episcopi, qui sanctitatis vita, & miraculorum gloriâ illustris, eremiticam vitam diligens, beato fine quievit.* Sic igitur dies obitus, seu dies natalis in mensis Augusti diem sextamdecimam reservatur. Quod & confirmat Auctor anonymus Vitæ S. Arnulfi, ad Clodulfum ejus filium, & ejus jussu conscriptæ, cum ait, *post obitum Arnulfi, anni ferè jam exacto tempore, successorem ejus Goëricum, adscitis duobus aliis Episcopis, de castello Habendo translatus sanctum corpus, in Basilicâ Metensi sanctorum Apostolorum, sepulture tradidisse.* Si enim obiisset S. Arnulfus *xviii. Julii*, & corpus ejus Metas translatus fuisset *xvi. Augusti* anni sequentis, ab ejus obitu ad translationem, supra annum solidum dies *xxix.* intercessissent. Cum autem translatus asseratur anni nondum exacto, sed *ferè jam exacto tempore*; aperte significatur vitâ perfunctus *xvi. Augusti*, translatus porro *xviii. Julii*; cum ad solidum annum decissent dies *xxix.* ab ejus felicitis animæ excessu, ad ejus sacri corporis translationem.

CAPUT III.

Dagoberto anni regni à patris obitu sedecim asseruntur, sancti Audoëni Rotomagensis Episcopi, ejus aquali, testimonio.

APUD S. Audoënum in Vitâ S. Eligii, lib. 2. cap. 2. (ut est in manuscripto nostro codice) obitus Dagoberti Regis præclaro charactere designatus est. *Convenientes igitur simul (inquit) in civitatem Rotomagenscm, quartodecimo die mensis tertiî, tertio anno Clodovei; juvenculi adhuc Regis, die Dominico ante Letanias, inter catervas populi, inter agmina Clericorum, inter choros psallentium, consecrati sumus ab Episcopis pariter Episcopi: ego Rotomago, ille verò Noviomus. Hic est annus Christi 646. quo fuit littera Dominicalis A, Pascha 1x. Aprilis; Christi Ascensio xviii. Maii, Dominica ante*

DISSERTATIO.

341

Letanias , seu Rogationes , xiv. Maii. Eadem ergo die , Maii quartadecimâ , biennio antè , primus annus labeatur Clodovei junioris. Cùm itaque in S. Dionysii Necrologio notetur Dagoberti obitus die xix. Januarii , hac ipsâ die anni 644. obiisse dicendus est , fuissèque omne regni ejus tempus ab excessu Clotarii patris , annorum xv. trium mensium , & dierum xx i.

Hujus argumenti vim infringere conatus Valefius , unôque velut vibrati acinacis ictu rescindere , locum hunc Audoëni corruptum à recentioribus fuisse affirmavit. Dictu facile , sed arduum probari. Hoc asserere ausus non est Carolus le Cointe , antiqua & bonæ notæ ejus operis exemplaria reveritus ; sed effugium captavit luculentius. *Hujus* , inquit , *periodi* (ex Audoëno decerptæ) *dua sunt partes. Prior annum diemque designat , quo Rotomagum Audoënus & Eligius pervenerunt : posterior diem notat , quo consecrati sunt Episcopi. Rotomagum ingressi sunt quartadecimo die mensis tertii. Consecrati sunt autem Episcopi die Dominico ante Litaniis. Dies ille Dominicus ante Litaniâs , fuit vicesimus primus mensis tertii , seu Maii ; quia hoc anno , Clodovei Regis tertio , Pascha die Aprilis decimo sexto celebratum est. Hæc ille anno Christi 640. numero xxi. supponens (quod non probat) simul Audoënum cum Eligio Rotomagum advenisse xi v. Maii , ac deinde octavo post die , hoc est , xx i. ejusdem mensis , Episcopos fuisse consecratos. Certè refert Audoënus , se de partibus Ligeritanis reductum , atque à Deodato Matafscensi Episcopo ex itinere Presbyterum ordinatum , inito consilio cum Eligio , ambos pariter sub unius diei articulo apostolicam benedictionem consecratos. Sed de adventu Eligii Rotomagum , nullam mentionem facit : unde suspicionem ingerit , illi Rotomagi inter Clericos degenti , Audoënum ex partibus Ligeritanis reducem supervenisse. Mirum ergo est , à viro docto sancti Audoëni sententiam hanc malè interpungi , unumque illum diem in duos diffundi ; quorum in priore Audoënus cum Eligio Rotomagum convenerit ; in altero exinde octavo Episcopi fuerint consecrati. Nihil enim cujusquam intererat nosse , quo die seorsim ipsi Rotomagum convenissent ante suam consecrationem : neque id poterat ab Audoëno , nisi absurdè*

& supervacaneè memorari. Sola memoriæ posterorum commendanda erat ordinationis dies, quæ & natalis Episcoporum vulgò dicta, & ab iis anniversariâ celebritate recolita est; immò & in Ecclesiarum Fastis adnotari. Quare hanc diem antiquus Auctor Vitæ S. Audoëni, & quartamdecimam mensis tertii fuisse, & Dominicam ante Litanias sic conjunctim refert, ut unicam illam diem ab eo designari appareat. hæc sunt enim ejus verba ex Vallis-lucentis, Corneoli, & Cartusie Divionensis manuscriptis codicibus. *Pervenienti itaque Rotomagus, Ordinem Pontificalem, secundum Ecclesiasticum & Canonicum dogma, una cum beatissimo Eligio suscepit. Si quidem uno sub die apud Rothomagus ambo pariter ordinati sunt, sanctus Audoënus ejusdem urbis Archiepiscopus; Eligius vero Noviomagensis Episcopus, anno Dominica Incarnationis sexcentesimo tricesimo quinto, Pontificatum agente Romana Ecclesia summo Prasule beatissimo Papâ Martino, anno secundo: porro Clodovei Regis, filii Dagoberti, qui tunc Regni Francorum apicem tenebat, anno tertio, pridie Idus Maiarum, Dominico die ante Litanias. Erravit, inquit, hic Auctor in annis Christi, & Martini Papæ. Fateor: sed doctè erravit in rem nostram. Quæsitivum annum ex Computi regulis, qui Pascha exhiberet 1 x. Aprilis, adeoque Dominicam ante Litanias pridie Idus Maii. Invenit annum 635. his signatum notis: in eo stetit, verum hujus consecrationis annum assecuturus, si ulterius ad annum usque 646. fuisset progressus: in hoc interim rectè sentiens, quod minimè dubitavit quin ordinati essent hi Episcopi eâ die mensis Maii quartadecimâ, quæ in Rogationum Dominicam conveniret; cum & id legisset in Opere S. Audoëni, de S. Eligii Vitâ; & in Rothomagensibus ac Noviomensibus Kalendariis, quæ horum ordinationi diem Maii xiv. veteri more adscriptam exhiberent.*

Sanè in Annalibus Noviomensibus affirmat Vassorius, libro 2. cap. 77. & 113. in Ecclesiâ Noviomensi celebratam fuisse anniversario cultu ordinationem sancti Eligii, quartadecimâ die mensis Maii, ipso adhuc superstite, & spectante; & etiam non post tot sæcula celebrari: quod & Rothomagi de S. Audoëni ordinatione fieri asserit Franciscus Pomeraye,

in Historiâ Archiepiscoporum Rothomagensium, in Audoëno, & in Historiâ regalis Monasterii S. Audoëni, lib. 4. cap. 7. addens nobiscum, (immò & cum ipsomet Audoëno in Vitâ S. Eligii) evenisse illam anno Christi 646. Dominicâ Rogationum, anno Clodovei juvenculi adhuc Regis tertio; vim faciens in iis quos produximus, anni hujus characteribus; litterâ Dominicali, die Paschatis, & die Ascensionis, ex quibus existit chronologica demonstratio, quâ quidem (audeo dicere) nihil habet Gallicana Historia vel fortius, vel illustrius. Nec dubium quin viguerit mos iste ab antiquissimis temporibus in omnibus Christianis Ecclesiis, ut quo die peracta fuerat ordinatio Episcopi, eodem & quotannis recoleretur, ut observare est in ordinationibus S. Ambrosii, S. Augustini, S. Gregorii, & passim aliorum. Cum igitur hujus ordinationis memoria quotannis in Ecclesiis Rothomagensi ac Noviomensi celebrata sit quartadecimâ die mensis Maii, frustra fingitur alio die peracta. Igitur Mabillonius in Præfatione quarti Sæculi Benedictini: *Ingeniosa planè, inquit, & acuta mihi aliquando visa est Caroli Cointii ratio, qui Eligium quidem & Audoënum Maii die xiv. Rotomagum convenisse; at sequenti Dominicâ consecratos fuisse sentit: qui calculus anno DCXL. rectè convenit. At in veterrimo Noviomagensis Ecclesie Kalendario, quod libro Psalmorum ab annis benè nongentis exarato præmissum est, aliisque, ordinatio sancti Eligii assignatur 11. Idus Maii, quo die hætenus celebratur. Non ergo distinguipotest dies xiv. Maii ab Eligii ordinationis die, nisi dixeris, Ecclesiam Noviomagensem hac in re aberrasse ab annis amplius nongentis: quod certè hand temerè proferre licet.*

Neque objicias, non potuisse Audoënum cum Eligio Rotomagum eo ipso die advenire, quo & consecrati sunt; quia interquiescere debuerunt, ut universam ordinationis pompam disponerent, & essent ipsi ad eam paratiores: atque adcò si quartadecimâ die mensis Maii Rotomagum convenerant, eodem die non potuisse ordinari. Non enim illi 14. Maii Rotomagum advenerunt; sed tribus fortasse aut pluribus antè diebus. Ipsâ verò 14. Maii in Dominicam incurrente ordinati sunt. Quare (ut jam monui) interpunctionis observanda est ratio, ne sensum perturbet: & in eâ quam descripsimus,

Audoëni sententiâ , vox (*Rotomagensem*) commate distinguenda est à proximè sequentibus (*quartodecimo die mensis tertii* :) & vox (*convenientes*) non de præsentis , sed de præteriti temporis participio intelligenda est , ut idem sonet quod (*cum convenissemus* ,) sitque aperta mens Audoëni , præsentem illum cum Eligio additisse Rotomagi , ad dictam diem quartamdecimam mensis Maii , quæ tum in Rogationum Dominicam concurrebat , ut unâ ipsi ad suam quisque Ecclesiam Episcopi ordinarentur ; manerétque dies ille Maii quartusdecimus Rotomagensium æquè & Noviomensium sacris factis inscriptus , atque in omnes annos consequentes anniverfariâ celebritate recolendus.

Restat aliquid Carolo *le Cointe* , quod his nostris calculis obijciat , ex Jonâ in Columbani & Eustasii rebus gestis. *Ante annum* , inquit , *Christi sexcentessimum quadagesimum quartum* , in quem adversarii mortem Dagoberti Regis differendam affirmant , *Jonas vitam sancti Eustasii publicavit : eam enim scripsit intra triennium ab obitu sancti Bertulphi Bobiensis Abbatis , cujus mors in annum Christi sexcentessimum quadagesimum incidit*. Probat ex Jonæ Præfatione ad Babolenum Bobiensem , & Walbertum Luxoviensem Abbates , junctâ ipsi Vitâ sancti Eustasii , in quâ sic ait : *Vir illustris , Eligium nomine , qui modo Veromandensis Ecclesie Pontifex , juxta Lemovicensem urbem Monasterium nobile , Solenniacum nomine construxit*. Miror ego nobili Scriptori Cointio non venisse in mentem , potuisse Jonæ id contingere , quod Scriptoribus usitatissimum est , ut Operi suo præfaretur , cui nonnisi post aliquot annos ultimam manum adhiberet : *O mihi bis senos multum vigilata per annos Thebai* ! inquit Stadius. Quàm multi libri multis annis expoliuntur à suis conditoribus , nonumque premuntur in annum ? Ergo qui anno ferè 642. vel 643. præfatus est Operi suo Jonas , non illud perfecit , aut in lucem emisit , nisi postquam Eligius anno 646. die xiv. Maii , Dominicâ ante Litanias , Episcopus consecratus est. Opus enim illud sanè accuratum , multorum annorum labor fuit. Sed de Jonæ , & de libris ab eo conscriptis dicendum hîc pluribus.

CAPUT IV.

De Jonæ Abbatis natali solo, aetate, & libris ab eo conscriptis.

COMMUNI errore lapsi sunt Trichemius & Wion, qui Jonam Scotum sive Hibernum, & S. Columbanum discipulum scribunt. Patriam suam ipse indicavit, scribens Vitam S. Attalæ, proximi post Columbanum Abbatis Bobiensis; Secusium videlicet ad Alpium fauces, oppidum Constantini Magni adversus Maxentium ducentis transitu memorabile: quo ille, visendæ matris causâ, peregrinari permissus est ab Attalâ Bobiensi Abbate, morti proximo, cujus ille in disciplinam concesserat, vitam monasticam professus ante annos novem; adeoque anno æræ Christianæ 618. post Columbanum ad superos transitum tertio. Obierat enim S. Columbanus XI. Kalendas Decembris, anno 615. *expleto anni circulo* in Cænobio Bobiensi, ut affirmat Jonas in ejus Vita; cui successerat Attalas ad annos ferè tredecim, vitamque expleverat VI. Idus Martii, adeoque anno Christi 627. Unde apparet, non fuisse Jonam S. Columbanum discipulum, sed tantum *discipulum beati Columbanum eruditum*, ejusque *discipulorum discipulum*, ut disertè scribunt nominatissimi Auctores. Ipse Jonas in Prænotatione ad Vitam S. Joannis Reomaensis Abbatis: *Anno, inquit, tertio regni Domini Clotarii Regis, ex jussu ipsius Principis, vel genitricis sue præcelsæ Domine Bathildis Regina, cum ad urbem Cabilonensem mitteretur, noni mensis secundâ hebdomadâ, Jonas Abbas, disciplinis beati Columbanum eruditus, atque per Monasterium S. Joannis, quod vocatur Reomaus, præteriens, paucis diebus inibi pro labore itineris quiescisset, ductus precibus Domini Hunna Abbatis, Fratrumque ipsius Cænobii, ut qua per discipulos memorati Confessoris Christi, vel posteros eorum veraciter comperta erant, conscriberet, tandem articulum scribendi ita convertit. Anonymus antiquus, qui Vitam S. Walarici à Ragniberto Auctore suppari, nimis prolixo ac simplici sermone dictatam expolivit. Si quis verò curiosius & plenius hoc scire voluerit, qualis & quantus in vultu*

tibus miraculorum vir iste beatus (Columbanus) existerit, vel in scientiâ & doctrinâ divinarum humanarumque scripturarum, aut præsagio futurorum; seu quot & quales gentes ad fidem Christi acquisierit, Monasteria utriusque sexus construxerit; & in dictandi peritiâ vel exponendi qualis fuerit, facillimè hoc poterit invenire, si opuscula illa perquirat, quæ eruditus discipulorum ejus discipulus (Sic habet vetustissimus codex Bertinianus, ex quo descriptam hanc S. Walarici Vitam ad me olim transmisit P. Bollandus) Jonas Abbas, vir magnus, eloquentia plenus, & dictandi peritus, polito & limato satè sermone de Vitâ ipsius composuit.

Vides ab utroque hoc Scriptore Abbaris titulo insigniti Jonam: sive Abbas fuit aulicus, qui in aulâ Regum sacris præfesset, qualem in aulâ Baltildis Reginae fuisse Genesium nonnulli putant; sive Abbas proprius fuit S. Petri Cabilonensis, ut licet conjicere ex Proœmio citato Vitæ S. Joannis Reomaensis. Fundata est hæc Abbatia à Flavio, qui ex Referendario Guntranni Regis, successit Agricola in Episcopatu Cabilonensi, olim extra muros, nunc in arcem regiam conversa, post eversum Monasterium, anno 1562. à furentibus hæreticis. Primus ejus Abbas fuit S. Lupus, postmodum Episcopus; post quem lacuna est ingens usque ad Aymonem, quem instituit Girboldus Episcopus, tempore Karoli Calvi. Monachi intra urbis mœnia se receperunt. Pronum est igitur suspicari, Jonam non alium in finem jussu regio Cabilonum venisse, quàm ut Monasterium ibi non à multis annis fundatum sanctioribus excoleret disciplinis. Cum tamen in tractatu de S. Faræ Cœnobio Eboriacensi ipse de se Jonas affirmet, se mirâ odoris suavitate perfusus fuisse in obitu piæ Virginis Gebetrudis, ac trigesimo post die, cum ex more de illâ fieret commemoratio, parî suaveolentiâ fuisse recreatum; existimaverim, vel illum apud S. Faræ Parthenonem fixam sedem habuisse, ut nobilissimas Christi sponas & verbo & Sacramentis reficeret; vel certè, quod verisimilius est, ad plurimum spiritalem profectum, nunc uno, nunc alio loco fuisse versatum.

Nunc de ejus ætate, ac de libris ab eo conscriptis pauca colligamus. Qui anno Christi 618. sub Attalâ Abbate mo-

nasticum habitum in Bobio indutus est, si tunc annorum octo-
decim fuisse ponatur, ætatem suam cum septimo sæculo nu-
meraverit; atque idcirco anno tertio Clotarii tertii Regis,
qui fuit (ut probabilius) Christi annus sexcentessimus sexa-
gesimus tertius, ipse annum egerit ætatis LXIII. quando
Reomaensibus ad domesticas eorum historias operam com-
modavit. Hinc ad anteriora regrediamur. Cum novem jam
annos egisset Jonas in Monasterio Bobiensi, sub Attalâ Ab-
bate, ab eo Secusium missus est ad matrem & fratrem, qui
ejus indulgeri sibi præsentiam eatenus frustra poposcerant:
missus est autem, additis ei sociis duobus, Blidulpho Pre-
sbytero, & Vermenoaldo Diacono; qui vix nocte unâ apud
hospites suos transactâ, confestim urgente Deo Bobium re-
volarunt, adfueruntque Attalæ Abbati in extremis consti-
tuto; qui & felicem animam efflavit v l. Idus Martii, anno
Christi 617. Jonæ ætatis, ex hypothesi, xxvii.

Exinde Jonas comitatus est Bertulfum Abbatem, cum
Romam tenderet ad Honorium Papam, à quo & privi-
legium obtinuit immunitatis à jurisdictione Dertonensis
& cujuscunque Episcopi, datum tertio Idus Januarii,
Indictione 1. Heraclii Imperatoris anno viii. Christi 628.
Præfuit Bertulfus annos tredecim, ut disertè asserit Jonas;
obitque anno 640. die mensis Augusti xix. sed ante obi-
tum, urgentibus Fratribus, dedit Jonæ in mandatis, ut S.
Columbani Vitam conscriberet. Hoc accepto mandato;
peregrinatus est Jonas per triennium, (ut profitetur ipse in
Præfatione sui Operis) Elnone visit S. Amandum, & alia
fortasse sui Ordinis lustravit Monasteria, ut Operis à se edendi
materiam præpararet, rerum à Columbano ejusque sociis gesta-
rum testes consulere, locaque ipsa ejus signata vestigiis cer-
neret: quâ præparatione quondam usum se esse scribit Poly-
bius, ut ad Hannibalis res gestas æternis consignandas monu-
menti sese accingeret.

Anno igitur Christi 643. suæ ætatis xliii. scripsit Jonas
Præfationem Vitæ S. Columbani ad Waldebertum & Babo-
lenum Abbates: (sic habent cum Surio manuscripti codices
Monasteriorum Vallis-Lucensis, Accincti, & Caritatis, non
ordine inverso, ad Babolenum & Waldebertum) quâ signifi-

cat, non tantum Columbani Vitam se aggressum esse, sed etiam ejus successorum Attalæ & Eustasii, & cæterorum, inquit, *quas meminimus*; hoc est, Bertulphi & Burgundofaræ, ac sociarum, quæ ejus nomine supersunt. Sic præfatus manum operi admovit; sed quamdiu operi incubuerit, quis ex-amussum definiat? Hoc nemo prudenter negaverit, plurium annorum fuisse hunc laborem, quo certè à mille annis nihil habuit Christiana Historia elaboratius, illo præsertim Itinerario Columbani, cum aulæ regię spurcias non ferret, Luxovio exterminati: quod scitè Cardinalis Baronius sancti Viri non exilium, sed triumphum appellavit. Quid enim non in hac narratione gloriosum atque admirandum? Ubi peregrinantium mansiones adnotatæ, ac stationes, ubi piorum ac nominatim Episcoporum descripta urbanitas, explicata prophetici spiritus oracula, mare ac venti sanctis extorribus obsequentes, prodigia paternæ Dei providentiæ, clientes suos regiorum satellitum furori subducentis. Dignus erat Columbanus Jonâ Historiographo, dignus Jonas tam illustri argumento. Quid porro irrationabilius, quid magis à recto sensu abhorrens, quàm si hanc plurium annorum elaboratissimam Historiam in unius anni, immò in unius diei vel horæ angustias restringas? Agens Jonas de Virginibus Ebo-riacensibus, capite septimo recenset interitum Egæ, viri in sæculo sublimis, cui Dagobertus moriens filium Clodoveum cum regno commendaverat. Egæ hujus obitum collocat Fredegarius anno tertio Clodovei II. qui fuit, ut volumus, Christi 646. Eodem anno affigit Audoënus suam & Eligii ordinationem. Ergo Jonas, qui operi suo præfatus fuerat anno 643. nondum illud perfecerat anno 646. Neque dicas, potuisse quidem id fieri, ut Jonas Vitas S. Eustasii, & Ebo-riacensium Monialium perscriberet annis aliquot post editam Præfationem: verum hinc à nobis quæri, non quod fieri potuerit, sed quod reipsâ factum sit. Aio enim id reipsâ factum plusquam probabiliter colligi ex Operis accurati longitudine; certò autem demonstrari argumentis quamplurimis in hac Dissertatione expositis; præsertim verò ex epochâ ordinationis Eligii & Audoëni Episcoporum: quo argumento, vel si solum sit, nunquam se expedient adversarii, quam-

cumque se in partem vertant. Desinant igitur contrariæ sententiæ fautores sibi placere, & gloriari hoc telo, quod nemo prudens, cum diligenter expenderit, non stupeum stramineumque agnoscat. Neque jactent habere se à suis partibus Auctorem coætaneum Jonam: non enim stat ab eorum partibus Jonas, nisi malè intellectus, quique eadem horâ & Præfationem operosæ Historiæ unâ vix pagellâ comprehenderit, & plurium annorum elaboratissimum Opus iisdem angustiiis coarctasse credatur, quod nemo credit, nisi tam bonæ sit fidei, ut (quod vulgò dicitur) etiam lepores volare credat. Habemus autem nos à partibus nostris coætaneum Scriptorem Audoënum, qui suam & Eligii ordinationem, quartadecimâ die mensis Maii, quæ tunc incurrebat in Dominicam ante Rogationes, & quæ exinde more Christianarum omnium Ecclesiarum, in Rotomagensi ac Noviomensi diœcesibus anniversario cultu celebrata est, & Clodovei adhuc juvenuli Regis anno tertio, adeoque anno ætæ vulgaris sexcentesimo quadragésimo sexto defixit. Cujus vim demonstrationis qui contrâ sentiunt, nullâ unquam tergiversatione eludent. Nunc ad alia progrediamur.

CAPUT V.

A characteribus translationis corporis S. Benedicti in Monasterium Floriacense, iidem anni regni à patris obitu sedecim Dagoberto firmantur. Indictionum & annorum Christi usus, septimo post Christum sæculo jam vigeat in Galliis, etsi haud ita frequens ac firmus, uti sequentibus sæculis fuit.

CLARUISSE jam olim in Floriacensi Benedictinorum Cœnobio viros doctrinæ ac religionis famâ celebres, notius est, quàm ut exemplis probari necesse sit. Ab iis susceptum esse decem ampliùs abhinc sæculis Patriarchæ sui S. Benedicti sacrum corpus, Cisalpinæ omnes Ecclesiæ summo consensu affirmant. Ab hujus translationis epochâ, sine dedecore aberrare non potuerunt Floriacenses, sed nec sine damno suo; alioquin apud exterar præsertim nationes de

350 DE ANNIS DAGOBERTI
tanti thesauri possessione in falsi suspicionem venturi.

In veteri Floriacensi Martyrologio, ad v. Idus Julii, hoc habemus, quod *anno Domini sexcentesimo sexagesimo, sub Clodoveo filio Dagoberti, translatus est corpus S. Benedicti Abbat, à Monte Cassino ad Monasterium Floriacense, per Aigulfum Monachum.* Non igitur obierat Clodoveus II. anno Christi 654. vel 655. (ut volunt adversarii) cum anno 638. mortuo patri Dagoberto in regnum successisset. Respondent illi, nondum septimo post Christum sæculo usurpari solitas à Francis vel Indictionum notas, vel annos à Christi Nativitate, sive Incarnatione, vel Passione derivatos. Ita passim affirmant, & nominatim Cointius, anno Christi 642. numero XLIII. anno 656. num. XXXVII. 688. num. VII. & aliis locis. Quare has Indictionum & annorum Christi annotationes addita menta esse à recentioribus, quæ fidem apud eruditos non merentur. Ego verò contendo usum Indictionum, & ab annis Christi deductum calculum viguisse in Galliis, etiam ante Clodoveum II. & saltem ab anno 541. quo statutum est in Concilio Aurelianensi IV. canone 1. *Ut sanctum Pascha secundum Laterculum Victorii, ab omnibus Sacerdotibus uno tempore celebretur.* Ab hoc etenim uno decreto manasse opinamur in provincias Gallicanas morem triplicem. Primum, ut anni caput à Paschate duceretur: qui mos viguit usque ad annum Christi 1563. quo sanxit Rex Carolus IX. ut exinde in publicis privatisque tabulis anni exordium peteretur à Kalendis Januariis, Juliano veteri more. Sed annos à Paschate inchoandi morem à majoribus acceptum, populis extorqueri sibi ægrè ferentibus, dilata in annum 1565. executio est: ac ne tum quidem in omnibus regni provinciis deductus est annus à Kalendis Januariis; sed paulatim ex aliis in alias ea consuetudo derivata, toto denique regno obtinuit, ut à Laurentio Bouchello in Regiarum Constitutionum Collectione observatum est. Erat sanè annos suos à Paschate exordientium gravo incommodum, tum ex annorum inæqualitate, ob festi Paschalis discursum à die Martii XXI. usque ad diem Aprilis XXV. per dies quinque & triginta: tum maxime (ut notavit Guido Coquillius in Historia Nivernensi, pag. 262.) quia eadem dies (verbi gratia,

prima Aprilis) poterat in uno & eodem anno bis reperiri, atque ita contrahentium ac Tabellionum turbare calculos. Exemplum profert Coquillius anni 1535. quo Pascha fuit xxviii. Martii. Sequentem enim anno 1536. fuit Pascha xvi. Aprilis; quare dies prima Aprilis utrobique in anno 1535. censebatur. Prudentiorum autem Tabellionum cautio erat, quoties à xxii. Martii ad xxv. Aprilis tabulas conficerent, admonere in appellandâ die num ea ante Pascha, aut post illud occurreret, quod in multis pactio- num olim scriptis auctoritatibus observare est. Et erat ea numerandi ratio sanè incommoda, ac (si quando eam clausulam *ante Pascha*, vel *post Pascha* prætermitti contingeret) ferendis discordiis obnoxia, nec ullo, quod sciam, loco, extra Francorum regnum observata: cujus origo nulla apparet verisimilior promulgatione illâ Methodi Victorii. Hic enim in Præfatione Canonis Paschalis ad Hilarum, urbis Romæ Archidiaconum: *Pascha quippe*, inquit, *sicut omnimodâ traditione cognoscitur, anni principio, non fine celebratur.* Quæ quidem verba traditionem significare videntur, à temporibus Apostolicis, aut saltem ab iis quibus Ecclesiæ sunt constitutæ post sæviores illas persecutiones; nempe à Constantini Magni imperio: morem verò sic numerandi, quoad Gallias, ortum putamus ex illo Synodi IV. Aurelianensis decreto, quo Victorii Canon promulgatus, omnibusque Galliarum provinciis in usum inductus est.

Altera consuetudo quæ ex Victorii Cyclo manavit in Gallias, Indictionum usus fuit. Testatur enim Bucherius, in veteri exemplari manuscripto, ex quo ille Victorii Cyclum primus protulit, adscriptas fuisse Indictiones, quamvis triennio luxatas, quas ille suis locis restituit. Nec dubitare debuit Bucherius, essentne illæ Indictiones ab ipsius Victorii ingenio, an ab alio quopiam recentiore ejus Canonis adjectæ. Nam Victor Capuanus Victorio suppar, apud Bedam, libro de Ratione temporum, capite 49. ipsum redarguit Victorium, quòd *novies P. C. Basilij, Indictione xiiii. Pascha sanciverit xv. Kalendas Maii celebrandum*, quod venerabilium Patrum auctoritas viii. Kalendas Maii agendum decrevisset. Indictiones ergo Victorius cum Paschali suâ Methodo in Gal-

lias invexit: quamvis illæ non statim ubique à Notariis publicis ad obſignandas tabulas, aut ab omnibus Historicis ſeu Chronologis, ad rerum geſtarum designanda tempora adhibita ſint; ſed paulatim nunc ab his, nunc ab illis in publicos uſus inveſtæ. Apparent illæ in Marii Chronico, ejusque Continuatore, hominibus Gallis, & Gregorio Turonenſi æqualibus. Si quando igitur ad quintum, ſextum, aut ſeptimum à Chriſto ſæculum adnotatæ occurrerint, non ſtatim velut à recentioribus inculcatæ explodendæ ſunt. De Indictionibus in Vita S. Baboleni adſcriptis dicemus in ſequentibus.

Tertia conſuetudo, per Chriſti annos tempora designandi, à Victorii quoque Laterculo in Gallias derivata eſt. Annos enim Chriſti Cyclo ſuo indidit Victorius; ſed ab ejus Paſſione deductos. Interim Alpes tranſgreſſa eſt Dionyſii Romani Abbatis Methodus, annos Chriſti ab ejus Incarnatione, ſive à Nativitate arceſſens, quæ mox Giſalpinorum, ac præſertim Bedæ Venerabilis ſtudio, ſcriptiſque illuſtrata, latèque ſparſa, in omnium Occidentalium regionum uſus tranſiit, & etiamnum ab iis obſervatur. Sed mediis ſæculis fluctuavit, multasque in varietates ſciſſa eſt illa Chriſti annorum recensio, dum alii alias, ſive ex parte, ſive ex toto ſecuti ſunt methodos. Auctor Vitæ S. Johannis Reomaenſis Abbatis, illum obiſſe refert *anno Domini quingenteſimo duodecimo*, juxta quod in *Cyclo beati Victorii Episcopi numeratur*. Petrus Rouërius in Reomao, & Bollandus ad diem Januarii xxviii. quia Cyclum Victorii videbant à Chriſti Paſſione procedere, huic annorum ſummæ addentes annos xxxiiii. vitæ Chriſti, concludunt, illum exſtinctum anno æræ vulgaris 545. die xxviii. menſis Januarii, cum eſſet annorum centum & viginti, natuſque eſſet anno 425. Enimverò ſi Auctores, alioquin eruditi, attendiſſe non videntur ad ſtatum hujus quæſtionis, neque Victoriani Laterculi veram methodum ſatis habuiſſe perſpectam. Non enim quaſitur quoto anno à vero Chriſti natali (de quo inter peritos nondum convenit) S. Johannes Reomaenſis vel natus, vel mortuus ſit; ſed quoto anno æræ vulgaris ſeu Dionyſianæ, cujus nimirum nunc cum hæc ſcribimus, annus agitur primus

& septuagesimus supra millesimum & sexcentessimum. Constat autem ex Victorii Cyclo, quem edidit Bucherius, caput Cycli Consulatu Geminorum notatum, incurrere in annum æræ vulgaris 28. Quamvis enim reipsâ Consules fuerint Rufus & Rubellius Gemini anno hujus æræ 29. quia tamen Victorius priorum Consulatum seriem unitate superflua cumulavit, hinc effectum est, ut apud illum Geminorum Consulatus veram suam sedem uno anno anteverteret, adeoque ad annum vulgaris æræ 28. adnotaretur. Quare, ut anni Victoriani annos Christi vulgares assequantur, illis addendi sunt anni dumtaxat 27. non autem (ut Rouërio & Bollando visum est) anni 33. Hinc ad annos S. Johannis Reomaensis progrediamur. Is obiit die Januarii xxviii. anno Cycli Victoriani 512. Sed jam tum æra Christi vulgaris annum inchoaverat 513. Adde 27. ad 513. & fient 540. Ergo vivere desuit S. Johannes anno æræ Dionysianæ 540. atque adeo natus erat anno 420. ut fuerit moriens annorum viginti supra centum.

Hanc porro Victoriani Cycli cum annis æræ vulgaris comparisonem confirmat insignis locus Fredegarii, cap. 109. quem (quia in editis viciatus est) placuit hic integrum describere ex codice nostro pervetusto, nec minus probæ notæ à duobus illis, ex quibus Fredegarii auctioris Editionem motus est Duchesnius:

Curricula annorum hætenus reperiuntur.

Ab Adam, vel initio seculi, usque diluvio, anni M. CC. XLII.

A diluvio usque ad Abraham, anni DCCCCXII.

Ab Abraham usque ad Moysen, anni D. V.

A Moysè usque ad Salomonem, anni CCCCLXXVIII.

A Salomone usque ad reedificationem Templi, temporibus Davi Regis Persarum, anni D. XII.

A restauratione Templi, usque ad adventum Domini nostri Jesu Christi, anni D. XLVIII.

Certe ab initio mundi usque ad Passionem Domini nostri Jesu Christi, sunt anni quinquies mille CC. XXVIII.

Et à Passione Domini usque isto anno presente, qui est in Cyclo Victorii annus CLXXVII. Kalendis Januariis die Domini, co, anni DCC. XXXV. Et ut istud milliarium impleatur, restant anni LXV.

Advertere hic licet, illo concursu Dominicae diei cum Kalendis Januariis, designari annum æræ vulgaris 736. à Christi Natali deductum, ac notatum litterâ Dominicali A; cum tamen Fredegario sit adhuc annus 735. quia hic à Paschate tribus circiter post Romanos mensibus annos suos auspicabatur, eoque in Kalendis Januariis uno anno minus computabat. Quam verò *Passionem Domini* dixit, versu proximè præcedenti *Adventum Domini*, hoc est, Incarnationem, vel Nativitatem appellarat. Sicut etiam Dionysius, Beda, & Computistæ alii vetustiores Christi diem natalem, Decembris xxv. (qui caput est æræ Christi vulgaris) *Incarnationis* nomine appellant. Ita vocibus in hac materiâ abutuntur multi, quod parum curandum est, dum de re constet. Igitur, si ad primum Cyclum Victorii annorum 532. & annos 177. Cycli secundi addas 27. confeceris annos 736. qui tamen ob dictam causam, tantum 735. à Fredegario numerantur.

Donum Ermenberti & Ermenoaræ, cujus capite primo meminimus, assignat Chronicon Behignianum, *anno quinto Regis Dagoberti*: hoc verò tabulæ Benignianæ subnotant *anno ab Incarnatione Domini DCXXXII*. Quis hic Notarii fidem desideret? Sed de annis incompletis intelligendæ sunt, quorum primum cum sibi vendicet annus Christi 628. quo obierat Clotarius xxviii. Septembris, quintus cum anno Christi 632. comparetur necesse est.

Major est ἀνομολία tabularum Chronici Besuensis, quibus Adalsinda Abbatisa Monasterii Dornatiaci, seu de Birzillis, trans flumen *Dubium*, in prospectu Bisontinæ civitatis fundati, multis improborum hominum fatigata vexationibus, cum se ad Besuense S. Petri Cœnobium *sub regulâ* victura reciperet, fratri suo Waldaleno Abbati transcripsit villas Assonam, Parnatiacum, Potentiacum, Balatunnam, Montaniacum, & quidquid pater ejus Dux Amalgarius, & Aquilina mater ad Berzilliacensis Parthenonis dotationem contulerant; datâ epistolâ *anno ab Incarnatione Domini DCLII. Indictione x. Epactâ vi. Clotario Rege regnante in Franciâ, primo anno regni ejus: Venerabili verò Donato Besonticam sedem tenente, die Mercurii proximo, ante medium mensis Februarii.* Istarum litterarum (ait Cointius anno 656. num. xxxvii.)

legitimi characteres sunt, dies, mensis, annus Clotarii Regis: cæteræ notæ sunt expungendæ; quia Donatus Episcopus, qui Concilio Remensi subscripsit apud Flodoardum, lib. 2. cap. 5. & teste Joanne Jacobo Chiffletio Vefontionis, parte 2. cap. 25. annos plus minus viginti octo sedit, prius obierat: & in publicis instrumentis nondum adhiberi consueverant, Indictio, & annus ab Incarnatione Domini. Hæc ille. At ego non faciliè adducor ut credam, virum religiosum, nec ineruditum, Joannem Besuensem Monachum, cum suum Chronicon ante annos ferè sexcentos conscriberet, eò prorupisse impudentiæ, ut tanti momenti tabulas à se confectas, pro veris publico objiceret. Sed neque ita delirasse dixerim Tabellionem, ut his litteris pugnantes inter se temporum notas subscriberet. Adhuc supererat S. Donatus anno primo Clotarii III. Regis, qui fuit Christi 661. adeoque ex anno 625. quo Concilio Remensi interfuit, Sedem Bisontinam obtinuit ad annos admodum sex & triginta: & quod in Vefontione obiter dicitur (sed non probatur) de octo & viginti Sedis ejus annis, falsis nicitur fundamentis; quodd nimirum ex anno dumtaxat 633. in annum 661. præfuerit.

Laboriosius est investigare causam, cur in his tabulis annus primus Clotarii III. Regis, dicitur ab Incarnatione Christi 652. Non est iste error Historici seu Chronographi; sed neque Notarii seu Tabellionis, cujus ille opus ex fide descripsit. Mentiri nec Historico licet, nec Notario: ab errore neuter est immunis, errare quippe humanum est. Indictionem x. & Epactam vi. scitè junxit Notarius anno Christi 652. ex Methodo Dionysianâ: erravit porrò dum hos characteres Clotarii III. Regis anno primo copulavit, qui fuit Christi 661. Indictione iv. Nec mirum videri debet, in illis septimi à Christo sæculi tenebris, subinde erratum esse in applicandis ad Christi annos Regum annis, cum in isto conatu nunc etiam peccetur ab eruditis compluribus. At Indictionum, & annorum Christi adnotationem omnem à superioribus octavo sæculis excludere, antiquitatem ignorare est.

CAPUT VI

*Expenduntur Indictiones, & anni Christi, ac Regum adnotati
ab anonymo Scriptore Vita S. Baboleni, Fossatensis Abbatis,
ejusque Chronologiam cum sedecim annis monarchia Dagoberti
bene convenire ostenditur.*

VITAM S. Baboleni ex manuscripto codice Fossatensi descriptam, ad me tunc in Collegio nostro Dolano commorantem transmisit R. P. Michaël Rabardeau, junctis litteris quæ datæ erant Parisiis 1x. Aprilis 1630. Exinde Andreas Duchesnius anno 1636. tomo 1. Scriptorum Historiæ Francicæ, Vitam eandem protulit ex apographo Bibliothecæ S. Germani de Pratis, sed Præfatione mutilatam, & iis paragraphis qui in hac nostrâ Editione, numeris 1. 2. 3. 4. 5. 6. 20. 21. 22. & 25. continentur. Patres Benedictini secundo Sæculo Sanctorum sui Ordinis, ex eodem suæ Bibliothecæ apographo, neglectâ Vitæ historiâ, sola ejus miracula ediderunt, ut quibus plus fidei quàm Vitæ ipsi putarunt esse tribuendum: Et Carolus le Coïnte, tomo tertio Annalium suorum, anno Christi 642. à numero 3. ad 49. multa congestis, ex quibus ejus Vitæ Auctorem censet redarguendum. Cum tamen ille, quicumque est, Auctor sexcentis ferè abhinc annis scripsisse existimetur, & non pauca referat fide digna, magnique ad inclyti Fossatensis Monasterii Historiam momenti, nobis curæ fuit scoriâ (si quæ est) ab aprobrizo secernere, ut quid in eâ probandum, quid rejiciendum sit intelligatur. Ipsum igitur Vitæ Auctorem audiamus.

PROLOGUS IN VITA S. BABOLENI ABB.

Ex manuscripto codice Fossatensi.

SACRARUM Scripturarum meditationibus insistere, eisque studiosè animum applicare, salus videtur esse animæ, si ea quæ leguntur, studuerit quis opere perficere. Præcessores denique nostri,

artium liberalium doctrinis educati, summaque sapientia studiis eruditi, plura & innumera scripta posteris reliquerunt, quæ, Deo auxiliante, sancto illustrati Spiritu ediderunt. Quorum doctrinis atque exemplis sancta per orbem consistit Ecclesia, Domini nostri cruore redempta, sanctarumque Apostolorum prædicationibus sublimata. Quibus successerunt pretiosi Martyres, proprio sanguine contra mundi Principem deertantes. Post quos, sanctos meruit habere Præsules, virtutum fulgoribus, ac admonitionibus Dei plebem illustrantes. Quos sequuti religiosi Confessores, sanctique Eremitæ mundum fugientes, Christum solum diligentes, & pro ejus amore seipso atterentes, ut regni ejus mererentur fieri coheredes. De quorum numero Sanctus exstat BABOLANUS, meritis celsus, insignis virtutibus. De quo tanto viro cogit me, ô Fossatenses, vestra dilectio. ea quæ ab antè natis didici, & quæ oculis ipse vidi, perscribere ad perpetuum ejus memoriale. Et licet tanto oneri impar existam, utpote cui & tenuis est faundia, & ingenii exilis copia; tamen malo dicere quæ novi, quàm cum servo pigro & negligente subire tormenta pro retentâ nec expensâ Domini pecuniâ. Antequàm igitur cœptum opus aggrediar, vobis objicio, quoddam ex pluribus vestri eversionibus loci, quæ post eum acciderunt, & casibus persecutionum variis, ejusdem deperierunt miraculorum gesta, quæ quidem ab antiquis, illius videlicet contemporaneis fuisse credimus descripta. Orandum ergo nobis est, ut Deus qui sui servi adjutor existit, ad peragenda quæ præcepit, sit & nobis cooperatoꝝ ad narrandum quæ in eo & per eum egit. Sed multò libentius vellem quoddam mihi injungitis, ab alio fieri, quàm à me indocto & inutili. Igitur dum periti ab imperito & ineloquenti verba hujusce lectionis percepitis, memores mei sitis, vestro imperio parentis, quatenus post obitum carnis, simul mereamur, favente Deo, consequi præmium æternæ beatitudinis.

INCIPIT VITA

sancti ac inclyti Confessoris Babolani, & Abbatis piissimi.

POST beatam & gloriosam Resurrectionem JESU CHRISTI Domini nostri, Ascensionemque ejus ad cælos, & Spiritus sancti adventum igneis in linguis super Apostolos, atque post gloriosam Martyrium Christi prælia; postque devicta innumerabilia certamina, quibus se usque hodie sancta sublimari gratulatur Ecclesia: non ipsi defuit ipsius largissima misericordia; sed semper adfuit & adest consolatio piissima, quâ protegere illam dignatur miseratione clementissimâ. Munere namque supernæ dispensationis hoc egit idem auctor nostræ salutis, ut sanctæ jugiter Ecclesiæ præsentent Prædica-

tores sancti, æterni pabula ferentes eloquii. Ex his ergo unum largiri dignatus est nobis, nostro loco & sæculo venerandæ sanctitatis, quem parentes religiosi & nobiles ex Burgundis originem trahentes, sanctæ quidem Christianitatis amatores, statuerunt vocari **BABOLÆNUM** sacri Baptismatis undâ renatum. Exhilarati ergo genitores ortu tam dignissimæ prolis, licet ignorantes forent proventuræ prædestinationis, tradiderunt imbuendum sacris litteris, ut ei non desset sapientia Dei Patris, quâ ad plenum edoctus, mentes condiret populi fidelis.

2. Divino deinde instinctu, & beati **COLUMBANI** hortatu, offertur hostia Christo Domino in sacro Luxoviensium Cænobio, eumque sibi vas sincerissimum prælegit Sancti Spiritus gratia, atque inscrutabilis & indeficiens Dei sapientia. Qui moribus annos transcendens pueritæ, in Christi tyrocinio studebat se jugiter exercere, atque plus quàm pueri ætas pati poterat, corpus proprium atterens, moribus perfectorum, operibusque de die in diem nitebatur adhærere. Corde enim devoto imitabatur non solum quæ in cœvis & condiscipulis, verum etiam quæ in perfectis & Deo devotis conspiciebat viris. Ut autem adolescentiæ, sive juventutis annos attingit, semper de magnis ad majora, de mediocribus ad excellentiora scandere certabat virtutum exercitia. Nam, sicut Scriptura jubet, nihil Dei amoris videbatur præponere; sed toto oris affamine, toto cordis amore, totoque mentis conamine eum se testabatur diligere & venerari fidelissimè. Timor enim Domini initium est sapientiæ. Orationi quoque ita erat intentus, ut divinæ contemplationi cerneretur esse conjunctus. Dehinc orationi adjugebatur lectio, atque sanctarum Scripturarum meditatio. Postremò verò scribendi exercitatio. Sunt nempe adhuc penes nos plura volumina, quæ ipsius manu dicuntur fuisse descripta; succedebatque sancta compunctio, & in cubili cordis jugis Dei visio. Caritate denique sic erat plenus, ut per hanc Deo placeret, & hominibus. Decus etiam sanctæ castitatis in eo renitebat, quia per hanc Angelis sociari se non dubitabat. Discretionemque, omnium matrem virtutum, habens, tam sanctè, tam castè, tamque religiosè cuncta agebat, ut in dictis ejus & factis non deesse crederetur Spiritus sancti gratia. Sed quid de ejus patientiâ, misericordiâ, jejuniis, vigiliis, cæterisque virtutibus, quas Spiritus sanctus in eo operatus est, singulatim proferam? Ut enim uno verbo cuncta concludam, omnium virtutum floribus redimitus, resplendebat in illo totius sanctitatis & justitiæ virtus, quia Christi gratiâ erat repletus. Cùm igitur vir Domini **BABOLÆNUS** talibus & tantis resplenderet virtutibus, fama ejus boni odoris circumquaque manentibus velut sidus clarissimum emicabat splendidius. Nam omnibus Fratribus in præfato Cænobio degentibus, exemplar totius religionis esse videbatur; itaut à cunctis perfectò diligeretur amore, & summâ extolleretur

veneratione. Sed ne diutius lucerna sub modio posita, tenebris ignorantia videretur occultata, ad humanos illam Christus produxit aspectus, ut super candelabrum postea luceret omnibus in Domini domo manentibus.

3. Post sancti namque Columbani transitum, scimus eundem virum sanctissimum ^d Monasterio Bobiensi præfuisse Pastorem tertium, ejusque sanctissimam doctrinam & eruditione Christi gregem ^e per biennium gubernatum fuisse. Quod qualiter reperitur in secundo Vitæ libro beati Columbani, & in gestis discipulorum ejus Attalæ & Eusebii, qui nosse plenius cupit, invenire poterit. Nos enim idem hæc omittimus, ut ad alia quantocius veniamus, & de magnis vel minima dicamus. Jonas quoque, Vitæ jamdicti Patris Columbani disertissimus relator, ad hunc beatum virum dicitur illam stylo edidisse clarissimo, sicut in Proœmio ipsius Operis ipse se asserit ejus hortatu atque admonitione posterorum notitiæ manifestavisse.

4. Beatus ergo BABOLANUS Christum toto mentis desiderio amplectens, cumque omni virtute & amore sequi cupiens, & ejus discipulatu, quem jam assumpserat, inhaerere semper desiderans, nativum solum, ^f sibi que commendatum regiminis officium, licentia & assensu Fratrum suorum ac filiorum deferens, cælestis regni peregrinationis assumpsit laborem, quatenus perpetuam inveniret requiem. In qua aliquandiu immoratus, sanctorum locorum perscrutator factus est velocissimus. Sciens denique se per multarum anfractus peregrinationum, & agones atque sudores laborum oportere intrare in regnum cælorum, parvissimus ei videbatur labor terrenus ad remunerationem cælestium præmiorum, quæ summo inquirere intuitu mentis, & ferventissimo non cessabat desiderio amoris.

5. Audita itaque famam REMACLI, ^g qui eo tempore in saltu Arduennæ Monasterium sibi construxerat, & vitam eremiticam sacris acerrimè in eo cum aliis Deo devotis viris ducebat, visendi eum gratia venit, ejusque magisterio adherere, quam redire contendit. Susceptus est namque ab eo officiosissime, & conversatus illic absque offensione est. Qui instruendus venerat, plures ad imitationem suam edificabat. Sanctus ergo Remaclus apud se retractans, ne fortè pro hoc ipso eum Dominus duxerit, non modò ne ab eo discederet, rogavit, verum propter disciplinam, Fratribus Malmundarii positus, (utraque enim Monasteria, Stabulanum videlicet, & Malmundarium ipse construxerat, juxta institutionem sancti Benedicti) salutem suam in omnibus auctoritate præfecit. Quod inter alia Vitæ beati Remaculi capitula sic de eo legimus: Succellit illi Dominus & Pater Babolenus, qui pro meritorum speciali gratia vir dicitur Apostolicus, cujus superius mentionem fecimus.

6. Igitur post excessum beati Remaculi pullulantibus instinctu quorundam pravorum zizanij discordiæ, vel scandalorum intra septem

ipſius Cœnobiorum, beatum virum, de quo ſermo agitur, multis injuriarum convitiis à ſe depulſum habitare aliorſum compulerunt invitum. Qui licet invitus occaſione acceptâ peregrinari, ut olim cœperat, ſine dilatione ſtudebat, credens agi hoc diſpoſitione divi-
nâ. Animatus autem tali deſiderio, gratiâ ſancti Spiritûs, ac virtute divi-
nâ in omnibus ſe comitante roboratus, juxta præceptum divinum, ſua omnia deſeruit, atque poſt multarum anfractûs viarum Galliam expetens, Francorum patriam adiit, & Pariſios, Chriſto ſibi prævio, famoſam ad urbem pervenit. Cùm ergo Chriſti ſervus veluti alter peregrinus maneret, & ab urbe de die in diem progrediens ad beati Martyris Dionyſii ſepulcrum oratum uſque abiret, monachilis habi-
tus qualis interiùs eſſet, demonſtrabat, religio verò ſanctitatis exte-
riùs illum prodebat. Ne igitur Lectorem ſatiſdire videatur, neque im-
prudentiæ noſtræ oratio deſutetur, dignum arbitror huic Operi in-
ſerere, litteriſque poſteriorum notiſiæ tradere, quo hæc agebantur tempore, atque quis tunc præſuerit Francorum Monarchiæ.

7. Reges itaque Francorum, & nobilitate præclaros generis, & bel-
lorum eruditos exercitiis, Hiſtoria eorum prætitulata nomine apertè
declarat. Qui poſtquàm Chriſti nominis ſedem ſuſcipere meruerunt,
victorioſi ſemper, Deo ſibi favente, contra rebelles exſtiterunt. In-
ter quos primus eorum Chriſtianæ ſectator Religionis Magnus CLO-
DOVEUS dictus decenter emicuit, à quo cuncti deinceps Francorum
Reges ſacri Baptiſmatis regeneratione à laqueis diaboli abſtracti,
JESU CHRISTI Domini noſtri, cujus ſanguine erant redempti,
ſigno inſigniti, perfectæ Religionis facti ſunt cultores, atque ſanctæ
& individue Trinitatis devotiſſimi conſeſſores. Poſt jam dictum verò
Clodoveum, ſuccedentibus in regnum ejus filiis, eorum genealogia
non decidit; ſed per plurima annorum curricula, id eſt, per cxxxv.
annos Francorum regnum peroptimè gubernavit: quouſque ipſius re-
gni habenas CLODOVEUS ſuſcepit ſecundus, inclyti DAGO-
BERTI Regis filius, cujus genitor CLOTARIUS Regum fortiſſi-
mus eſt dictus. Hic ergo inclytus Francorum Rex CLODOVEUS
non diſpar ſuis exſtitit præceſſoribus, quia devotus Chriſti fidelium
amator, ſanctæque infra Galliam Eccleſiæ exaltator atque fideliffi-
mus fore non diſtulit deſenſor.

8. Cùm itaque anno incarnati Verbi ſexcentefimo quadrageſi-
mo tertio, Indictione primâ, poſt mortem ſui genitoris jamdicti Da-
goberti Francorum regnum ſuſcepiſſet regendum, mirò callebat in-
gonio, ſtudebâtque diligenti conamine, ut regnum ſibi à Deo com-
miſſum ſummo diſponeret moderamine. Ipſius etenim temporibus
plurima Cœnobia, præcunte Dei nutu & gratiâ, in Francorum regno
à Deo devotis viris ædificata ſunt atque conſtructa. Excellentiâ quo-
que Chriſtianæ Religionis, atque vigor monaſtici Ordinis, tam in
perfectorum virorum ſanctitate, quàm in devotatum Deo Virginum
effulſit copioſè.

9. In illis diebus erat quidam vir in omni religione divinâ erga Deum devotum animum habens, nobilis quidem secundum hujus sæculi honorem, sed longè nobilior moribus & operibus, in prædictâ urbe gerens officium Archidiaconatûs, nomine *Blidegislus*. Qui pro suâ venerabili religione à suprà nominato Rege venerabatur, ac magno amoris studio, ut decebat, conservabatur. Ab *ERCHENALDO* quoque, qui tunc Francorum Ducatui præerat, & omnia palatina officia suo moderamine procurabat, honorabatur: à cunctis etiam Primatibus totius Regni magnoperè diligebatur; utpote qui propinquus & patrinus Regis dicebatur. Erat denique his diebus quoddam vetus Castellum, non longè distans, sed quasi quatuor milliariis à mœnibus Parisiæ urbis, à Julio quondam Cæsare ^k nobiliter constructum, antiquorum gentium mœniis, fossatuûmque ac murorum propugnalis circumcinctum, Maternâ fluvio, permaximo telluris spatio sibi circumfluente firmatum, atque vallatum aquâ & muris undique, vocitatum castrum *Baganlarum* ^l ab antiquis, quod jam tunc dicebatur *Fossatenis*. In hujus igitur insulæ spatio, velut in regali quodam palatio, tam securè & quietè accolæ illius morantur, ut absque Dei, nullius pavore terreantur. Hunc siquidem locum Christicola *Blidegislus* prospiciens servitio Domini aptum, meditabatur in secreto cordis, quomodò hoc suæ devotionis secretum aliquo modo valeat perducere ad effectum. Enimverò cordis ejus erat voluntas, ut in honore sanctorum Felicis & Quintini Martyrum, atque Confessoris Christi Germani, illic construeretur Ecclesia. Salubriori verò reperto consilio, immutatur talis devotio. Itaque locus ille, sicut usque hodie, ita & tunc regalis erat fiscus, idè ejus voluntas valde impediabatur; nec ullo modo adimplere poterat quod ipsius menti Christi affectus immiserat.

10. Tandem verò repletus consolatione sancti Spiritûs Paracliti, Clodoveum supplex adiit, ac humiliter quod in ejus cordis arcano latebat, innotuit. Rex, inquit, nobilissime, tui preces famuli suscipe, & quæ devotè precor, libenter annue. Exoro itaque tuam Celsitudinem, ut mihi digneris concedere Castrum olim dictum *Baganlarum*, cum omnibus adjacentiis sibi subditis cunctarum opportunitatum, sicuti à flumine Maternâ est circumplexam, quò desiderii mei affectum, Christo auxiliante, & te solatium præbente, valeam complere. Cupio enim illic Ecclesiam in honore Dei ædificare, ac in veneratione perpetuæ virginis Mariæ, quam sanctorum Petri & Pauli, Principum Apostolorum, nominibus & reliquiis volo ditare; Monachosque Christo Jesu famulantes inibi adunare, qui pro nostris erratibus Domini clementiam exorent assiduè, & pro totius populi à Deo vobis collati sospitate. Videns ergo Rex ejus animi devotionem, gratanter suscepit ipsius supplicationem. Convocato jam dicto Duce *Erchenaldo* venerabili coram multis Optimatibus & Pri-

matibus sui Regni, quæ à tanto expetebantur viro, libentissimè contulit; eique respondit: Licèt hoc tua mereatur religio, tamen credimus quòd hoc tuo cordi superna immiserit dignatio. Idèd nostrà illud tibi libenter concedit largitio, sciens quia non deerit, cum Dei adjutorio, nostrarum opum regalis & largæ suppeditatio. Quapropter quod jam, Deo juvante, mente concepiit, absque retardatione operis ne moreris exsequi. Dei enim sapientia, quæ per quendam Sapientem, cor Regis in manu Dei esse protestatur, & quocumque voluerit, inclinat illud, ipsius cor suà jam ineffabili gratià perlustraverat; ejusque mentem invisibili quadam potentià sibi subegerat.

Prov. 21. 2.

11. Hæc itaque agebantur primo regni sui anno, ut ante omnia sæcula Dei dispositum fuerat judicio. Huic tanto negotio Regis mater NANDECHILDIS nomine, intererat, & cunctis quæ fiebant, & quæ dicebantur, prout poterat, libens favebat. Rex ergo CLODOVEUS virtute divinà motus, regali more decrevit scripto atque sigillo, eandem quam nuperrimè incipiebant, Ecclesiam cum omni Varennà quam Materna girat fluvius, ab ingressu fossatuum præfati Castelli veteris, ab aquà in aquam inrefragabiliter ab omni inquietudine cunctorum mortalium perpetuò manere liberam, atque securam. Quod regis dignitatis privilegium in eadem conservatur Ecclesià usque ad præsens illæsum.

12. Nec huic piget immittere paginæ quis Episcopus tunc præfederit Parisiis Episcopali Cathedræ, cujusque generis exstiterit, aut quo vocatus nomine. Tunc temporis regebat Ecclesià Parisiacam vir venerandus AUDOBERTUS. Qui die quadam, dum infra beatæ Mariæ Basilicam, orandi causà, oracula circuiret Sanctorum, repentè ante cujusdam Sancti aram reperit beatissimum BABOLENUM stentem, & deprecantem Dominum. Quem intuitus humillimo Monachi habitu indutum, suspicatus est esse Dei famulum, eumque continuò accersivit, & his verbis alloqui cœpit: Unde, Pater, hanc nostram adisti patriam, aut quo loco, Deo cooperante, mortalem transigis vitam? Cui vir sanctus mente ut erat humili, & voce respondit simplici: Sciat, Dei Sacer, tua caritas, à Transalpinis partibus me huc advenisse, sancti verò Patris Columbanì edoctum doctrinà & eruditione. Causà quoque peregrinandi veni ad hanc patriam, ut merear invenire perpetuam. Tum admiratus Præsul tam sapienti eloquio, inquit illi continuò: Si Christo juvante, ut asseris, optas ducere laborem tuæ peregrinationis, obsecro ut istic inhabitare digneris, quòd segetis tuæ fructus multorum proficiat animabus. Nam & ego sum peregrinus à transmarinis huc devolutus partibus, & Regis Angliæ, nomine *Choinvalæ*^m, persecutionem cupiens evadere, Episcopatum urbis reliqui propriæ, & hanc Francorum patriam cum labore adivi, olim mihi incognitam. Sed minimè sprevit me gratia Dei, qui in se fidentibus consuevit misereri. Ut enim præ manibus

tenes, ut præ oculis hodie habes, mihi Francorum Regis CLODOVAT subvenit clementia, & super plebem dominicam ipsius Domini me exaltavit misericordia, ut qui quondam eram ignotus & advena, nunc Pastor hujus urbis factus sim ejus nutu & gratiâ. Ita & tu, carissime, noli de Domini misericordiâ diffidere; sed juxta Psalmistæ vocem, viriliter age, confortetur cor tuum, & Dominum sustine: non enim longè est ab his qui corde quærunt illum; sed prope est omnibus in veritate invocantibus eum, & voluntatem timentium se faciet, & deprecationem eorum exaudiet. Hoc autem dicens, motus pietate, nec etiam à fletu poterat se cohibere, volens eum prorsus secum retinere.

13. Audiens hæc Pater sanctus, ejus exhortationibus animatus, respondit ei protinus: Pater sancte, tua me lætificat allocutio mitis, & grata deprecatio. Quod hortaris, faciendum est cum Dei adjutorio; & quæ præcipis, non sunt spernenda omnino; tantum ut impleatur in me voluntatis Dei miseratio. Hoc audito, Præsul sanctus exultabat in Domino attentius. Denique sciens isdem Præsul voluntatem jamdicti Blidegisili Archidiaconi, convocans eum ad se, talia depromit: Quoniam jam patuit nobis tuæ mentis desiderium in ædificando Cœnobio, loco qui ab antiquis dicitur *Fossatus Bagaudarum*, inde congratulamur bonæ voluntati tuæ: & nos tui laboris participes noveris fore, ut comparticipari mereamur requiei & gloriæ. Ad hoc verò opus exercendum, & ad gregem Christi pascendum, scias quemdam virum nobis à Deo missum, humilem & mansuetum, nomine **BALVOLINUM**, omni sapientiâ comptum, omni actu utilissimum. Quod audiens Archidiaconus, lætus admodum effectus, ardenti animo videre cupiebat, de quo illi à Præsule sermo siebat; & multum diuque suspirans, atque oculos lacrymis præ gaudio madefaciens, venerabili Episcopo respondit continuò: Fateor usque nunc, hanc dubietatem cordis mei fuisse, hanc anxietatem mentis meæ extitisse, ne nobis deesset omnino cui cura pastoralis imponeretur, siue quis dignus tali loco Pastor præficeretur. Sed quoniam laboris nostri te divina majestas voluit fieri cooperatorem, & tibi ostendere dignata est super tanto negotio virum nobis utilem, hunc tuâ dilectione non moreretur ad nostram adducere præsentiam.

14. Hoc Præsul audito, sanctum virum accersivit illicd. Cùmque ante eos venisset, his verbis eum prior affatur Episcopus: Quoniam ad hanc, Deo volente, venisti provinciam, & meo precatu decrevistî finire in regione hac præsentem vitam, non tibi, ut supra dixi, deerit Christi clementia; sed in omnibus comitabitur ejus misericordia. Hic enim vir quem conspicias, ordine Archidiaconus; nobilitate carnis præcelsus, nomine Blidegisilus, alloqui te cupit dulci assamine, & frui tuâ visione. Tum illi Blidegisilus: Te, Pater, fama refert Christi servum esse; te continentur omnes benè huc ad-

venisse : quocirca & nos Deum benedicimus , qui huic patriæ nostro tempore tale mittere dignatus est decus : circa te verò quanta sit nostra devotio , præsens tibi patefaciet ratio. Nempè Clodovei Francorum Regis gratiâ favente , supra Maternæ flumen Cœnobium cœpi construere , quod volo , Deo juvante , tibi committere , & Monachis Deo illic famulantibus te Patrem & Pastorem præficere. Ad hæc Sanctus Domini ambobus respondit : Non affectu prælationis cujuspiam ad hanc sum delapsus patriam , qui Dei amore abnegavi propriam. Enimverò non idèd rejeci propria , & repetam aliena. Nam Abbas Bobiensis olim effectus , juxta Evangelium renunciavi omnibus : licentiâ tamen Fratrum , & assensu Episcopi : & sic demum peregrinari cœpi. Cui illi : Si , ut adstruis , peregrinus vis fieri , tibi proficies , & non alii. Et idèd timemus , ne incurras sententiam illius servi , qui creditum sibi talentum abscondit , nec aliis impertiens duplicatum reportavit. Ne ergo æstimes ab optatâ paupertate longè fieri , si arreptâ obedientiæ viâ insistas bono operi : ille enim cui præficeris , locus , videtur esse eremus.

15. Hac ratione & consilio fultus , multisque precibus devictus , tandem acquievit vir sanctus. Itaque die quadam simul ingressi tres viri beati , Præsul scilicet & Archidiaconus , cum sancto Patre Baboleno , aulam regalem , Regis obtutibus eum præsentant. Cui inquit : En coram te , Rex , Christi servus , en à Deo nobis missus. Huc usque hæc lucerna latuit sub modio ; sed Christus eam nostro manifestavit sæculo , ut nos illuminet religionis radio. Disponat ergo tua jussio regalis ipsum præponi ovibus Dominicis. Quod Rex Clodoveus audiens , & quæ de illo dicebantur , vera esse considerans , ad eum inquit : Ut nobis videtur (Pater sancte) decet te gregem Christi regere. Ergo suscipe pastorale onus , quia ob hoc te misit Dominus. Et ne sit tibi contrarium , scias non deesse Domini auxilium , nec affluentiam opum regaliū. Suscepit igitur eâ die Vir sanctus pastorale regimen , licet invitus. Tunc Rex ejus animi videns devotionem , dedit ad illam novellæ prædicationis Ecclesiâ fiscum regium , nomine *Britanicum* , in præcipio Maternæ situm. Huic tam laudabili spectaculo intererat nobilium multitudo ; inter quos **AUNOBERTUS** Senonum Archiepiscopus , & sæpefatus Parisiensis **AUDOBERTUS** atque **MARINUS** Episcopus Belvacensis , **ARGUNDUS** verò , & **AGOMARUS** , Præsules reverendi , cum quibus & Abbatum erat collegium , *Caroandi* , *Heldoardi* , & *Carterici* venerabilium. Jungebatur his multitudo plebis nomen Domini super hoc laudantis.

16. Adeptus itaque locum regiminis , cœpit virtutibus radiare , hospitalitatem sectari , zelo Dei succendi , domum sibi traditam strenuè gubernare , vitia radicinis amputare , Sanctorum quoque circuire Cœnobîa , sub sancti normâ Columbani degentia , velut apes prudentissimæ , ut aliqua sibi retineret virtutum meliora studia : sicque aro-

Marinus
apud Dun-
elmium.
Marinus
apud Breu-
ham.

matibus virtutum sanctum junioribus monstrabat exemplum. Igitur Vir sanctus insistens cæpto operi, Christo juvante, & Blidegisilo viro venerabili, constructa est Ecclesia in honore Genitricis Dei, & sanctorum Apostolorum Petri & Pauli, cum omnibus ædificiis congruentibus monastico Ordini. Sed cogente loci angustia, ad Aquilonem omnia sunt constructa ædificia, quia ab Austro montis altitudine, à Boreâ verò arcatur fluvii vicinitate. Idem verò locus ita est compositus, ut monasticæ Religionis à Deo credatur dispositus. Caritas ibidem fulget mira, abstinencia maxima, humilitas summa, immensa parcimonia, nulla sæcularis prorsus actio, nulla virorum ac mulierum penes illum cohabitatio. Illic manent qui Deo deserviunt, nil habentes proprium; sed tam remoti à mundialibus, ut deleatet vivere cum cælestibus. Situs autem loci ipsius est tam remotus, ut ab ignorantibus putetur esse eremus. Nam Maternâ fluvio circumcinctus, unum tantum ingressum dat comitantibus. Spatiofa est insula, sed infecunda. Latitudine tamen, vel longitudine sui per duo ferè miliaria videtur extendi. Licet autem sabulosa & arenosa videatur esse, tritici tamen & vini est referta fertilitate. Ibidem castrum nobile condiderunt antiqui: illic nunc adsit in acie nobilis familia Dei, quæ suspirat jugiter desiderio cælesti. Illic jacet Pater almus, de quo narrat noster textus. Sed ad castrum redeamus, unde loqui cœperamus.

17. Cùm Julius Cæsar totum orbem Romano subjugasset Imperio, & navali itinere. ab urbe Senonum usque Meledunum castrum, indeque Parisius cum sibi familiaribus Romanis, ut ad Meldorum civitatem, sive ad reliquas urbes perveniret, quæ aquarum fluminibus munitabantur, contigit eum transitum hinc habere, sicut in gestis Romanorum legitur. Et quia Romanis mos est, si in expeditione fuerint, non ultrà progredi hiemis tempore: sed residendo ibidem usque ad vernum tempus hiemare. Dum istic jamdictus Cæsar ageret iter pervium, videns positionem locorum, aquæ & insularum animatus delectatione, & pulchritudine loci firmissimi, statuit, inito consilio, ibidem hiemare. Fixisque tentoriis illic idem castrum condidit, murorum firmitatibus adornavit, profunditatibus quoque fossatum, ac propugnaculis & omni munitione firmissimè munire studuit: quod etiam *Castrum Bagavarum* vocavit, nomine sumpto à custodibus quos ibi deputavit. Usque hodie etenim inveniuntur lapides magni optimo opere Romano quadrati, qui in fundamento ipsius ædificii tum temporis fuerunt positi. Firmitas verò fluvii, quæ non hominis manufactiva, sed Dei virtute & gratiâ ante sæcularia tempora ordinata, æstate & hieme talis est & tanti, ut nec vadum, nec transitum habeat, nisi juvamine pontis, aut remigio navis. A parte siquidem Orientis, Meridiei, & Septentrionis, ita illud idem fluvius circuit, ut cunctis illic commanentibus pro muro habeatur, & in illis impletum videatur quod in Exodo legitur, quia

Exod. 26.

29.

aquæ erant pro muro Israëlitis à dextris & à sinistris. Occidentis verò partem quæ Parisius respicit urbem, antiquis paganorum, de quibus jam diximus, operibus ex petrosa terra ædificatus exstat murus firmissimus, cum altitudine magnorum fossatum, qui ab aquâ in aquam, id est, à parte Meridiei usque ad Septemtrionis plagam, protendi videtur.

n

18. Historiographus autem Orosius^a, in ipsâ Historiâ quam de Ormestâ mundi composuit, præscriptum castrum à Maximiano Herculio Imperatore solo tendens eversum, ac prorsus destructum asserit. Idè videlicet quia Amandus & Helianus, Christianæ cultores fidei, nolebant Romanis Principibus sacrilegis subdi. Isdem etenim Maximianus, collecto exercitu Romanorum, junctâ sibi legione militum Thebæorum, appropriabat ut funditis destrueret castrum Bagaudarum. Qui juga Alpium cum exercitu transiens, & circa Octodorum festus relidens, præcepit omnes ad fanatica sacrificia invicare, & super sacra Deorum jurare, quòd pari animo contra Bagaudarum turbas pugnarent: cæteros verò Christianos alicubi repertos, ab omnibus decrevit occidendos. At ubi ad aures pervenit Mauricii legionis Thebæ Ducis, jubere scilicet Cæsarem eos contra Christianos pugnatum iri, sibi dixit imperanti: Nos pugnare contra impios scimus, sed debellare pios & concives penitus ignoramus. Tenemus ecce arma, & non resistimus, quia mori magis quàm occidere parati sumus. Sicque percussoribus læti cervices præbuerunt, atque per tormenta corporum ad cæli gloriam pervenire meruerunt.

19. Tunc Cæsar inde progrediens, atque ad Bagaudarum castrum perveniens, tandiù obsidione illud terrâ & aquâ circumdedit, quousque post diuturna tempora, cum habitatoribus cepit, quos ferro & igne occidit. Castrum verò ad nihilum ita redegit, ut penè absque ruinis fossatum nulla vestigia in eo parerent quarumpiam munitionum: quippe ut quod inter alia castra fuerat tumens munitione Imperiali excellentius, ab Imperatore utique Romano destrueretur altius. Habitatores quoque ejusdem castri, qui erant (ut prælibati sumus) Christiani, spernentes, pro Dei amore, curam corporum, ad regna cælestia transire credendi sunt per martyrium. Et licèt de eorum vitâ vel passione scriptura non habeatur, tamen eorum nomina & memoria de libro vitæ minimè delebuntur. Hæc de situ & destructione castri breviter diximus, nunc ad propositæ rei ordinem redeamus.

20. Igitur jam dictus Blidegisilus ut Christi gratiam acquirere mereretur, sæpè nominatum castrum, & omnia testamenta à Rege sibi super eum tradita, sancto viro Baboleno, & Fratribus illi subditis perpetuò tradidit habenda. Sed & multorum reliquiis Sanctorum ipsum exornare Cœnobium studuit, & cuncta bona quæ valuit tam per se, quàm per alios largiendo contulit. Et sicut ipse in

quodam suo scripto dicit : Licet hæc oblatio parva videatur majestati Dei , tamen non quantitatem muneris , sed cor respicit offerentis . Audobertus denique , Parisiæ Episcopus Ecclesiæ , videns sanctissimum Babolenum ad alta virtutum conscendere , & de die in diem ad meliora proficere , nimio eum amplectebatur amore . Cum ergo hi beati viri vinculis amoris sese constringerent , atque ab invicem minimè disjungi vellent , contulit idem Præsul sancto Baboleno privilegium suæ auctoritatis , ut tam ipse , quàm sui successores liberi & securi ab omni inquietudine tam Clericorum , quàm etiam laïcorum ibidem manere possent . Quod si quisquam insaniâ plenus detestando moveatur , cur sanctus Pater à sibi dilecto Præsule tale decretum suscepit , noverit pro certo , (sicut jam diximus) quod eo rogante gratiâ peregrinationis in eo loco resederit , & regali munere præfatum castrum ad construendum Cœnobium concessum ei fuerit . Si verò contra Patrum statuta eum fecisse causatur , legat Canones à sancto Bonifacio Carthaginensi Episcopo , & aliis Episcopis factos , necnon ejusdem Sacerdotis Epistolas ad Liberatum Episcopum missas ; & inveniet , quod Monasteria in quibus regulariter vivitur , libera fore debent ab omni infestatione Episcoporum & Clericorum .

21. Illud verò privilegium suæ manûs conscriptione corroboravit , ac Fratribus & Confacerdotibus suis , videlicet Episcopis , qui in Regis aulâ præsentibus aderant , atque ad sanctam Synodum evocati fuerant , confirmandum tradidit . Primus igitur idem Episcopus AUDOBERTUS , deinde GAUDERICUS Lugdunensis , deinceps ANNOBERTUS Senonensis , PRESTELUNDUS quoque Bituricensis , dein DONATUS Vesontionensis , quatuor scilicet venerabiles Archiepiscopi , & septeno Episcoporum numero juncto sibi , quorum nomina utique sunt in eodem privilegio scripta ; sed præpediente inertia minimè sunt hic inserta . Hi omnes eandem auctoritatem de libertate jamdicti loci , ut dictum est , confirmaverunt , & pari assensu propriis manibus coram Rege subscripserunt . Sed & Rex ipse favens subscripsit , & suo monogrammate facto , anulo regali insigniri jussit . Acta sunt autem hæc in urbe Parisius , Clodoveo regnante anno quinto , Indictione quoque quintâ , die mensis Maii xv. sub die Iduum Maiarum .

22. Cum igitur venerabilis Pater Babolenus Clodovei Regis , ac Audoberti Parisiæ urbis Episcopi , ob reverendam sui sanctitatem , benevolentiam omnimodis obtinuisse , ac de Blidegisi Archidiaconi bonâ voluntate & auxilio , omnino securitatem jam habuisset , quatenus penes Bagaudarum castrum Monasterium ædificaret , ac secum Deo militantium multitudinem coacervaret , & hoc jam ex parte peregisset , interpestre noctis silentio accitis secum duobus de suis , quos ceteris familiares habebat , Maternæ fluvium cum illis ingrediebatur : & p̄ stantes in aquâ super tres ibi lapides compositos ,

in Psalmis & hymnis Dominum deprecabantur ; & hoc jugiter facere non desistebant divini Spiritus igne inflammati , per æstatem , per hiemem. Sanctus autem Pater Babolenus cum bonis inter suos polleret moribus , de die in diem crescebat sacris virtutibus , ita ut miracula per eum operaretur Dominus , & juxta Apostolum , bonus odor Deo esset in omnibus. Cumque , ut dictum est , tali quotidie maceratione se domaret carnis & spiritus , sex de suis elegerat , qui hoc cum illo faciebant attentius , vicissim sibi binis succedentibus , ut semper ex hoc labore ipse esset tertius. Denique cum per septenni tempus agerent talia , nocte quadam circumfussit eos lux de cælo mirè splendidissima , cum visione simul angelicà deferente illis blanda , pia , ac consolatoria verba. Cur , inquit , electi Dei tam diuturno cruciatu vos in hac aquà affligitis ? Si de peccatis vestris estis solliciti , scitote pro certo , quia ab eis estis emundati. Nunc ergo ut probetis hoc verum esse , si quid petieritis Deum , consequemini certissimè. Ac illi hæc audientes , preces fundebant supplices , ut eos Deus dignaretur visere , & per seipsum locum eundem benedicere , quo ibidem consepulti , liberi forent die saltem judicii. Quibus inquit : Cras hac eadem horâ simul septem hic aditate , & quæ operabitur virtus Domini , intentè considerate. Mea verò nunc sequimini vestigia , & loci à Domino sanctificandi notate indicia. Et sic præeunte Angelo videbatur per ejus vestigia nix fluere de cælo , Sanctis eum sequentibus , & silentibus præ gaudio. Angelus post hæc cælo recipitur , & sequenti nocte (ut dixerat) à Christo locus dedicatur , sanctis septem viris illis adstantibus , & beatis oculis cuncta videntibus. Ad testimonium igitur miraculi hujus , tres illi lapides , quibus Sancti insidebant , in eadem aquà permancnt subter dantiâ salicem usque in præsens tempus.

23. Interèa accidit ut Ecclesiæ sancti Vincentii Parisiensis Abbas , nomine SIGERARDUS , à Rege Francorum Clodoveo ad Hispanias destinaretur pro quibuscumque responsionibus. Qui Cæsaraugustæ retentus , & à Rege Hispaniæ carcere clausus , ab impositâ sibi legatione diutius cessavit coactus. Quod Francorum Rex ut audivit , beato viro Baboleno Abbatiam sancti Vincentii commisit , quam per octosemis annos admodum satis strenuè gubernavit. Ad quam cum die quadam iturus , per Parisios transiret , & in portâ civitatis cum quibusdam sibi familiaribus de religione colloquium haberet , contigit illuc cæcum hominem advenire , victusque alimoniam ab eo querere. Cujus Vir Domini miseratus respondit lacrymis perfusus : Argentum nec aurum penes me habeo , sed accede huc jubeo. Cumque præsens staret , & aliquid se accepturum putaret , Vir Domini solo prostratus oravit diutius ; & cum oratum fuisset , positus digitis super oculos ejus , dixit ; Christus Jesus Salvator noster , qui cæco nato lumen reddidit , & sedentibus in tenebris & umbrâ mortis seipsum

vitz lumen præsentavit, ipse suâ ineffabili misericordiâ se illuminare dignetur, ut videns ejus virtutes & opera, nobiscum illum magnificè collaudare possis. Et cum à circumstantibus dictum esset, Amen, oculis ejus dies illuxit; respiciensque quam nunquam viderat lucem, Deum laudare cum aliis cœpit. Sanctus autem Domini iter quod arripuerat, peragens, & ad locum quo tendebat, veniens, ibique aliquantisper degens, pacatis ibi quorundam scandalis, post aliquot dies regressus est Fossatis: sed antequàm reverti conaretur, vulgato circumquaque miraculo, tandem rumor pervenit ad Regem. Quod ille audiens, & super rem gestam Deum collaudans, per seipsum dignatus est accedere ad eum, atque protali factò ad eundem sancti Vincentii locum, largitus est eadem die fiscum regium, nomine *Volensonium*.

Duch. Valen-
conium.
Breul. Val-
lectonium.

24. His ita patris, præfatus Levita Blidegisilus Regis voluitur pedibus, exorans ut cuncta quæ de ipso Fossatensi loco jam peracta erant, & quæ venerandi Præsules nuper confirmaverant, auctoritate regali decerneret firmiter permanere. Quod Rex libenter annuit; & factò testamento, signatòque, ad idem Monasterium vicum qui dicitur *Buxem*, tradidit. Deinde à Rege jamdictus Levita petiit, ut idem Cœnobium sub tutelâ sancti Petri Apostoli, & Romani committere dignaretur Apostolici. Acceptaque licentiâ, Romam adiit, suffragium sancti imploraturus Petri Apostoli. Tunc temporis sanctus Papa MARTINUS Romuleam regebat Ecclesiâ. Præfatus ergo Levita accedens ad eum, obtulit ejus obtutibus regiz dignitatis præceptum, quomodò ab eo expetierit, ac susceperit jamdictum castrum. Epistolam quoque suæ donationis, per quam ipsi loco ea contulit quæ susceperat dono Regis, ac auctoritatem XII. Episcoporum, quam de stabilitate antefuti loci confirmaverunt: atque aliud testamentum regalibus munitum apicibus, à prælibatis gratiâ majoris firmitatis roboratum Pontificibus. His per ordinem Papæ ostensis, exorat excellentiam ejus Sanctitatis, ut jamdictum reciperet locum sub sancti Petri defensione, & Romani Apostolici ideo. Insuper & omnia quæ jam peracta erant de eo, auctoritatis suæ dignaretur corroborare privilegio. Cujus Papa annuens precibus, quod requirebat, celeriter est consequutus. Benedictione itaque petita à sanctissimo Papâ, ac redeundi licentiâ perceptâ, mundi dominam linquens Romam, Francorum lætus & asacer rediit ad patriam, referens cuncta Regi Clodoveo, sanctoque viro Baboleno. Idem verò Levita omnia privilegia quæ ab urbe Româ fuerant delata, Cœnobitis Fossatensibus perpetuò commisit habenda, quæ per ævi tempora illic servantur cum diligentia.

25. Quodam tempore cum Beatus Babolenus apud vicum qui *Buxiacus* dicitur, quem scilicet ei Rex Clodoveus contulerat, cum quodam à Fratribus quibus præerat, consisteret, secumque multitudi-

nem operariorum haberet, quatenus in vineæ culturâ laborarent; nimia siti cœperunt fatigari, nec habebatur aqua unde possent rescillari. Aëstus quippe ingens erat, & fervor Solis desuper incumbabat, qui omnia arefaciebat. Cùmque beatus Pater vidisset Fratres & operarios suos nimia, ut dictum est, siti laborare, nec aquas usquam usque ad Maternam fluvium, qui eminens à loco in quo consistebant, distabat, reperiri posse; hanc orationem fundens ad Dominum ait: Domine Deus noster, qui sitienti populo tuo in eremo fontem viventis aquæ de durâ silice produxisti; adesto nunc & nobis famulis tuis, & aperi thesaurum tuæ pietatis, & præcipe nobis de duritiâ hujus teluris aquas ministrari, quatenus de beneficiis tuis nos servi tui alacres effecti, grates referamus tibi Creatori, qui in Trinitate perfectâ perpetuâliter vivis & gloriaris. Cùmque Fratres qui aderant, dixissent, Amen; subitò juxta illos fons vivus è terrâ erupit, qui & potentiam Divinitatis ostendit, & meritum beati Viri liquidò demonstravit. Quotò anno, excepto vindemiali tempore, defluit, & colonos ibidem consistentes abundanter adquare consuevit. Quod versò vindemiali tempore meatum suum retrahat, ne quis ibi aquas reperiat, cur acciderit, sequens lectio demonstrat. Nempe cum plaustra & boves ad subvehenda vina trans mittebantur, necdumque fons ille esset ipso in tempore exsiccatus, quidam dolosi aquas ex eo fonte hauriebant, vinoque miscebant, ac per hoc fortitudinem vini evacuabant. Quod ut Vir sanctus audivit, fusâ oratione ad Dominum quatenus fons autumnali tempore exsiccaretur, obtinuit.

26. Anno ergo .xvi. regni sui defuncto Clodoveo, filius ejus Clotarius regni suscepit habenas; qui sanctum virum Babolenum, & Levitam Blidegisilum nimio diligebat amore, quos perseverantes videbat in Christi dilectione: Levita verò venerabilis non immemor suæ salutis, innotuit ei quomoddò pater ejus Clodoveus ad ædificandum Cœnobium ei sæpessatum castrum contulerit, & qualiter subregulari normâ Monachos Deo servientes illic adunaverat, Abbatemque sanctum, nomine Babolenum, eis præfecerit. Retulit quoque ei, quomoddò super illud Cœnobium pater suus regale testamentum ob ejus perennem defensionem fecerit, quibusque donis magnificè exaltaverit. Quibus manifestatis, Rex inquit ad eum: Et nostra regalis donatio ipsi, Deo propitio, non deerit Cœnobio. Dedit ergo Rex ad ipsum locum vicum, cuius nomine gaudet mons supereminens, dictum *Sanegium*; jussitque suum super hoc fieri præceptum, in quo etiam illud Cœnobium cum Abbate & Monachis, hominibus, & rebus omnibus eidem loco subjectis, in suâ successorumque suorum defensione Regum suscepit. Alia etiam decreta constituit, quæ & suis apicibus confirmavit; in quibus continetur, ut omnia quæ pater ejus & mater, poscente Blidegisilo, necnon & reverentissimi Episcopi, & maxime Apostolica Sedes, de ipso Cœnobio

*Duch. Sa-
vegium.*

sanxerunt, vel contulerunt, à cunctis mortalibus servaretur illud.

27. Exstat quoque alia Epistola ipsius Regis, quæ precibus sue matris, sancto Patri Baboleno, præsentem Gerino Comite, primo regni sui anno contulit, iterum confirmans omnia quæ dicta vel scripta de jamdicto Cœnobio fuerant. Facta est autem Verno regali palatio, sub die v. Kalendarum Maiarum. Sed quoniam nomen Levitæ Bidegisili in eadem scriptum non habetur, ad cœlestia jam eum transisse non dubitamus. Clotarius denique Rex cum parvo tempore strenuè gubernasset Regnum, imminaturâ præventus morte, THEODERICO fratri quinto anno dimisit Principatum.

28. Sanctus autem Domini Babolenus dum multo labore jamdictum construxisset Cœnobium, multos ibidem coadunavit Fratres, Christo semper devotè famulantes; & dum sciret sui obitus diem imminere, successorem sibi elegit virum reverentissimum, AMAROSIUM nomine. Quo facto, dum viveret cum mortalibus, transibat ad Christum sanctis virtutibus. Sacris autem refulgens actibus immortalæ Regi existerat devotus. Qui in cunctis Domini mandatis exercitatus, & cœlestis gloriæ dignus factus, vi. Kalendas Junii migravit à sæculo, conjunctus Sanctorum choro, atque in gaudio Angelorum exultat ante Dominum. Sepultum est autem ejus sanctum corpus ad Septentrionalem plagam, secus Ecclesiam sanctæ Dei Genitricis, ab ipso constructam, in pretioso lapideoque sarcophago, in quo multis annis jacuit decenter humatum; ubi operatur ejus meritis virtutes ad laudem & gloriam nominis sui Dominus noster Jesus Christus, qui vivit & regnat cum Patre in unitate Spiritus sancti Deus per nunquam finienda sæcula. Amen.

Explicit Vita sancti Baboleni Abbatis.

INCIPIUNT MIRACULA

quæ per eum Dominus operari dignatus est ad laudem
& gloriam nominis sui.

1. **I**GITUR, sicut in Proœmio hujus Operis promissimus, huic paginæ inserere dignum decernimus ea quæ de tanto Viri veracium dictis antiquorum veridicâ & probabili assertionem ab illis audivimus, & oculis nostris partim vidimus. Postquam clementis Dei nutu egregius Christi Confessor BABOLENUS ex hac instabili luce ad ætos emigrasset, & ejus corpus sanctissimum dignè, ut decebat, sicut jam præmissum est, secus Ecclesiam sanctæ Dei Genitricis humo commendatum esset, paulatim paries ille cui inhærebat, de

die in diem virtute divinâ se aperire cœpit, & sarcophagum in quo sanctus Vir jacebat, lapideum intra se recludere.

*Ecclesiæ pa-
ries divini-
tatis perfora-
tur.*

2. Devoluto ergo non multo temporis spatio, & Ecclesiæ pariete, ut nunquam inde lapillus ceciderit, divinitus ita perforato, sancti Viri corpus infra eandem Ecclesiam, juxta Dei Genitricis pertransiit aram cum ipso suo lapideo sarcophago, foramine ad testimonium jugiter manente in pariete. Non hoc itaque cuiuspiam videatur incredibile, quia Deo nihil est impossibile. Ipsa enim qui universa mortuorum corpora, angelicâ personante tubâ, exurgere per diversa loca jubebit, & suæ Matris integritatem nascendo ex eâ, non abstulit, quique ad discipulos clausis resurgens januis, intravit celerrimè, & suo huic fideli amico istud concedere potuit: sic quippe suis loquens

Joan. 14. 12.

fidelibus promisit: Qui credit in me, ea quæ ego, faciet opera & majora. Hoc ergo factum est ad propalanda beati Viri merita, ut membra quæ in suo famulatu afflictione domaverat pervaldâ, infra oratorium quod illi suo labore ædificaverat, transferrentur virtute operante divinâ.

3. Inde igitur est levatum corpus ejus post annos multos pro studio Monachorum inibi Deo servientium, atque in alterâ Basilicâ quæ elegantiori opere à Religioso Abbate BENEDICTO^a constructâ, & à sancto Aldrico, Senonensium Archiepiscopo^b, aliisque Præsulibus dedicata fuerat, septimo Idus Decembris translatum.

*a
b
Translatio
v 11. Idus
Decembris.*

3. Sed quoniam mentionem fecimus de dedicatione Ecclesiæ Fossatenfis Cœnobii, placet professò huic nostro breviter Operi innectere quod à veracibus personis referre audivimus, vel quod scriptum in ipsâ Ecclesiâ inde invenimus. Noctè etenim illâ quæ diem Basilicæ dedicandæ præcedebat, res valde memorabilis accidit, relatûque non indigna. Namque idem Archiepiscopus, ipsâ quâ prædiximus noctè, cum in eâdem Ecclesiâ intempestivè more sibi solito oratum isset, soloque prostratus, jamjamque prolixius orationi instans, preces ad Dominum & lacrymas fudisset, vidit specialiter sanctos Angelos (ut olim Jacob alibi) de cælo descendere, totumque in circuitu atrium & Ecclesiam lustrare, sacrare atque benedicere, ut divinis laudibus ibidem jugiter persolvendis, tantò congruentior fieret idem locus, quantò & sanctior; nec jam dubitaretur quòd in eo specialem sibi Deus elegerit mansionem, cui sacrandò dignitatem deputasset angelicam.

4. In hac igitur eâdem Ecclesiâ delata sunt sancti Baboleni membra, in quâ semper reddentes Christo munia laudum, congregabantur Monachi, ut haud fraudaretur assiduitate divini Officii. Ne verò aliquâ immunditiâ sordidaretur Sancti sarcophagus, gypso decenter est adopertus, ac super geminas duorum altitudine cubitorum columnas lapideas positus. In pariete quoque qui ad caput traditur fuisse ipsius, lapis usque hodie habetur innexus, in quo inventæ fuerunt

insertæ litteræ, quæ vix ab aliquo legi poterant diutius vetustatis abolitione, & pluviarum incurfione. Tandem verò ab aliquibus altioris ingenii enucleatæ difficillimè, inventum est nomen ejus cum termino v. l. Kalendarum Juliarum, descriptum certissimè. Quæ de re patuit procul dubio eum ad cælos migrasse ipso termino, licet ex pluribus ipsius loci everfionibus usque ad diem illum oblivioni fuerit traditus. Ad testimonium igitur hujusce rei quam præfati sumus, quod nostræ ætatis pueritiâ vidimus, proferimus. Parietem enim transforatum, & sancti Viri sepulcrum inter altare & ipsum positum, quousque eadem Ecclesia ab Adelerio ipsius loci Præcentore, postea Milidunensi Abbate, emendandi gratiâ subversa fuit, aspeximus.

5. Alia verò ejus sollemnitas, quæ tam à devotis ejusdem loci Fratribus, quàm etiam ab omnibus ipsius insulæ accolis festivo celebratur obsequio vi. l. Idus Decembris, nulli dubium est, quin sit ejus translationis, quæ facta esse dignoscitur post centum quinquaginta annorum spatium, & eò ampliùs. In quâ igitur statutum est à Re-
 Æoribus Fossatenfis Ecclesiæ, ut naves per gyrum ipsius insulæ discurrentes, censum persolverent, ob piscationis meritum, quem nuncupant vulgariter *Restes*. Quod dispositum idèd ita creditur, ut eadem die sancti Viri translationem celebrantibus copiosa piscium, seu aliarum dapum affluenter refectio præparetur.

6. Porro in præfatâ Dei Genitricis Ecclesiâ, quâ idem præcipuus Christi Confessor quievit sepultus, oleum multis diebus, & annorum curriculis, de lapide ejus sacri mausolæi manavit, quo infirmi variis languoribus oppressi, liniti pristinæ statim sospitati reddebantur. Cùm verò hæc ad laudem nominis sui, & ad declarandum sancti Viri meritum Christus operaretur, accidit ut die quâdam Sacerdos sacro velatus indumento, illuc accederet, & improvidè ipsum quo erat indutus, vestimentum eodem liquore intinctum redderet; quod cernens Minister altaris, inflammatus iracundiæ stimulis quæ modum tenere nescit, inutile mox verbum maligno ore protulit, ne videlicet benignissimi Jesu-Christi, sanctæque ejus Genitricis, ac Baboleni inclyti Confessoris voluntas foret, ut ampliùs quicquam ipsius liquoris olei abhinc & deinceps in æternum manarèt, cujus miserissimam vocem statim sequutus est effectus. Nam liquor substitit, & lapis aruit.

Oleum manar ex ejus sepulcro

7. Ne ergo cuicumque hoc incredibile videatur, quosdam monastici Ordinis religiosos viros ad testimonium in medium deducimus, qui se vidisse hæc & audisse verissimis affirmabant assertionibus, HUBERTUM scilicet cognomento Calvum, BERNARDUM quoque *Ultraregulam* dictum, quorum vita satis probabilis existisse dignoscitur. Quia verò duorum testimonium protulimus, in roborandis his substituitur tertius, quoniam in ore duorum aut trium testium testatur Scriptura omne constare verbum. In Canobio namque sancti

Mauri, quod *Glammufolium* dicitur, quidam religiosus Cœnobita existit, nomine *Odutricus*, centum viginti, veluti alter Moyses, existens annorum, & eò amplius, qui sic se vidisse adstruebat multis vicibus. Ut ergo reprimatur dens æmulus, etiam quartus testis introducatur *ADRICUS* quidam Monachus, his antiquior, qui hæc se vidisse affirmabat tempore diuturno. Talibus & tantis beatissimus Confessor Domini Babolenus decoratus virtutum signis, vivere se demonstrat cum Christo & ejus Sanctis. Ad sepulcrum quoque ipsius, vel ubi ejus sancta permanent corporis membra, plurima infirmis præstantur ejus meritis beneficia, & maximè febris, vel patientium portantium incommoda.

*S. Baboleni
obvinctio-
res divini-
tatis castiga-
ti.*

8. Quante igitur severitatis vel vindictæ in suis vel sibi existat contrariis, dicendum nobis est narratione styli præsentis. Fuit Rector quidam Fossatensis Ecclesiæ, dictus *ROBERTUS* in Baptismate, sancto Baboleno contrarius omni tempore, qui in tantam se contra eum erexit superbiam, ut ejus nomini consecratam everteret aram. Insuper etiam hoc addidit, similiter altare sibi debere statui. Illatæque convicia multiplicat & opprobria. Sed Dei ultrix dextera non diù pertulit Sancti impropria. Nam eo anno captus & vinculis irretitus, jussu Regis *HENRICI* carcere est clausus. Sed quomodò illinc evaserit, quibusque vitiis accusatus fuerit, potius est reticendum, quàm proferendum. Sui quoque coadjutores in altaris subversione, capti similiter & dispersi sunt, ubique facti populo in derisum & improprii canticum. Præfatus autem Abbas impudicè perdidit pastorale decus: & qui suo præcessori, sancto videlicet Baboleno, obsequi noluit, spontaneus ob negligentie suæ meritum tali ludibrio est deditus. Sicque quod malè commiserat, impunè non pertransiit, quia deinceps cum moreore vixit, exemplum posteris factus, ne tale adversus sanctum Babolenum ultra admittant facinus.

9. Existit præterea & alius quidam Monachus, *ROBERTUS*, Cenomanensis & ipse dictus, in Monachos officium exercens Prioratus; qui invidiæ stimulis agitatus & odii, tantà indignatione contra Sanctum exarsit Dei, ut festivitatem translationis ipsius, quæ est VII. Idus Decembris, quæreret annullari, nullà eam ratione dicens fieri, maximè cum pro eà sancti Andreæ Apostoli viderentur Octavæ dimitti. Sic fatus, nec diù cunctatus verbum suum adimplevit. Nam eo anno ipsà die translationis quatuor Lectiones de Apostolo statuit, & octo reliquas de Confessore fieri decrevit. Sed Sanctus Domini patiens super hoc fuit. Annuatim verdè redeunte eadem sollemnitate, de Apostolo omnia jussit fieri, dicens Babolenum quendam mortuum esse, nec festum de eo à quoquam sollemnizari debere. Cujus voto faventes cæteri, paruerunt ei ut Magistro & Priori. Sed hoc diù non pertulit ultrix dextera Domini, quanquam festum fecerit beati Apostoli, quod non tam fecerat devotione, quàm invidia & elatione.

Itaque cum idem Decanus non multo post ad necessaria natura isset, & plus solito in illo opere decertasset, repente ostia ventris sunt aperta, & penè omnia foras exierunt intestina. Sicque manibus aliorum ad stratum relatus cum dolore nimio, non multis supervixit diebus, stupori & admirationi factus omnibus, tantâ celeritate factam in eo vindictam videntibus. Sicque miserior factus miseris, dum non respicit, vitam cum dolore amittit.

10. Quidam quoque HILDUARDUS Fossatenſis Cœnobita, gerens officium Præcentoris in eadem Ecclesiâ, vir quidem venerandæ erat canitiæ; sed multoties in Sanctum Dei verba proferebat arrogantiz. Dum verò quâdam vice à Monachis fidelibus, sancti viri, vi. Kalendas Julii celebraretur transitus, & synaxi nocturnali jam ex parte decantata, ab Abbate, vel à Priore terminaretur Lectio duodecima, quatuor Fratribus, ut assolet, ante altare adstantibus, ac in jubilo vocis cum organo Responsorium, *Sanctus Domini Confessor*, altissimè reboantibus, dies terris illuxit illis cum modulamine in canendo perseverantibus. Tunc subito felle iracundiæ commotus Cantor præfatus, in medium prostruit, & *Vir Israelita* Responsorium violenter arripiens, decantare cepit; sed non ille prævaluit. Unde cum superari se cerneret, & chorus aliud quàm quod ipse inceperat, teneret, non ut Scriptura jubet, appposito ori digito, sed fracto importunè, vel irregulariter silentio, sancto Baboleno intulit plura convitia, dejerans quod quamdiù viveret, Adinventionis ejusdem ODONIS (fuerat quippe auctor hujus Operis) in Ecclesiâ cantari non sineret. Moxque ad cubile rediit, & capite involuto obdormivit. Et ecce repente ante eum Vir sanctus aditit, illique sicut Sol refulgens apparuit, & his verbis, ut idem post retulit, ad eum dixit: HILDUARDE, in me respice. At ille putans ab aliquo se Monacho vocari, capite erecto respexit. Cui Sanctus: Scisne quis sim? Me, inquit Sanctus, esse noveris Babolenum quem hodie exprobraſti in conspectu omnium propter Deum servientium. Cur honorem auferre conaris, quem mihi Deus dedit in terris? Ille autem eum non posset ferre Sancti aspectum, caput lecto reclinans, operuit iterum. Sanctus verò Domini dixit ad eum: Quia cum juramento meum servitium te superſtite ampliùs dixisti non heri, scito certissimè, quia tuo voto minimè frustraberis: hoc etenim anno morte morieris. Sic dixit; & mox disparuit. Ille quoque gravi continèd infirmitate correptus, è lecto quo incumbabat, surrexit concitus, roferens cuncta quæ sibi dicta erant, Priori, & aliis Fratribus. Eà namque die servitio Sancti omni nisu se immisit, putans cum eo concordari; sed nihil illi profuit: nam tertiâ die aggravatus, lecto decubuit, nec inde surrexit, quousque xxvi. die viam univerſæ carnis ingressus, mortem obiit.

11. Nunc quia de ultione quam per servum suum Babolenum

virtus exercet divina in suis adversariis, sufficienter diximus; restat ut quantæ benignitatis erga sibi devotos sit, perpaucis dicamus. Monachus quidam desiderio videndi Sanctum multoties suspirabat, quippe quia quem Patrem se & Pastorem habere gaudebat, cuiusque amore flagrabat, ab illo visitari se aliquando non diffidebat. Cui in hoc perseveranti, & ob id Dominum deprecanti, sanctus Vir in visu noctis apparuit, & blando vultu eum intuens, librum quem dexterâ ferebat, ei porrigens, dixit: Pax tibi; accipe, & lege. Cùmque ut ei videbatur, librum accepisset, & folium unum vertisset, invenit hoc Capitulum *, *Qualiter vexit Vir sanctus Bubium*. Mox verò alia revolvens, & miraculum de illuminato cæco reperiens, totum perlegit; & sic evigilans, visio ab oculis ejus evanuit; in seque reversus, miraculum post dies aliquot litteris tradidit, ac multis quod sibi contigerat, narravit.

*Dentium
dolor ingens
discutitur.*

12. Alius verò dentium aded vexatus dolore, ut præ nimia angustia putaret sibi mortem imminere, de misericordia Domini fîsus, ad sepulcrum sancti Viri accessit intrepidus, ibique oratione suppliciter fûsus, sancti Viri urnam attigit morbidâ maxillâ; & ita meritis Sancti, dolore fugato, efficitur sanus continuò.

*Mutus &
surdus per-
sonatur.*

13. In Fossatensi denique villâ quidam manebat juvenis advena, lingue & auditûs privatus officio, victum sibi quærens mendicando. Qui dum decumberet in strato suo nocte, sancti Viri die sollempni (videlicet sui transitûs) existente, dum Monachi nocturnale Officium decantarent, vidit coram se sanctum Virum stantem, ac debere ire ad Ecclesiam sibi præcipientem. Isque suum inclamare cepit hospitem, factum se dicens hospitem. Concitâsque surgens gaudenter expectabat diem. Cùmque horâ matutinali cuncti surrexissent, hospes, FULCO nomine, ejus collo immisit funem, & ita deduxit usque ad sancti Viri aram. Illicque Fratribus Deum laudantibus, & campanas ob hoc pullantibus, Deo egit gratias pro sibi redditiâ salute coram omnibus. Idem verò adolescens vocabatur Petrus: qui (ut nobis postea retulit) Vir sanctus qui ei apparuit, linguam de ore ejus protrahens, digitos suos in aures misit, sicque ei loquelam & auditum reddidit. Ecce in isto homine duplex miraculum scimus factum esse. Resipiscant igitur æmuli derogantes huic Sancto Domini. Erubescant & confundantur, qui eum cum Christo regnare non consentunt. Desinat detrahentium pertinacia, cùm per eum viderint & audierint facta fuisse miracula.

*Altaria
plura sub
S. Baboleni
nomine con-
secrata.*

Hujus igitur Patris aded exerevit memoria, ut etiam altaria sacrantur in ejus nomine per multa loca. Est nempe vicus in territorio Parisiensi, scilicet inter Gernacum castrum, & Latiniacum positus, qui dicitur *Campus*, in quo ædificaverunt Ecclesiam hic venerabilis Pater Babolenus, & beatus Furseus. Contemporanei enim fuerunt, ut ab antecessoribus verâARRANTIBUS accepimus. Quam postquam ædificaverunt,

ædificaverunt, Parisiæ urbis Episcopum, Audobertum nomine, ut eam dedicaret, advocaverunt. Quam dedicans, consecravit in eâ duo altaria; unum in honorem Virginis Mariæ, alterum verò in beati Petri Apostolorum Principis nomine; itaque permanserunt non modico tempore. At ubi sancti Patres, Babolenus scilicet, atque Furseus, Domino vocante, de sæculo migraverunt, & cælicas sedes pro mercede bonorum operum obtinuerunt, supradictus vicus, *Campus* scilicet, grande discrimen diripientium sustinuit, & colonos qui inibi habitabant; huc illucque dispersit ac dissipavit: unde actum est ut prædicta Ecclesia, nullo reparante, destrueretur, & ferè ad nihilum redigeretur. Postquàm vgrò devastatorum quievit immanitas, cœperunt coloni redire ad propria, & ædificare domicilia; & ab eis reparata est Ecclesia: in quâ in honore beati Fursei, necnon & sancti Baboleni duo consecrata sunt altaria, quæ inibi duraverunt per multa annorum spatia. Cæterùm, exigente habitatorum mole peccaminum, eundem vicum invasit grande incendium, itaut in eo nulla remanerent ædificia, insuper ipsa concremaretur Ecclesia. Altaris verò beati Fursei penitus sunt combusta velamina; illius verò quod in honore sancti Baboleni consecratum erat, cùm desuper pruinarum ac titionum multiplicitas corruisset, ex toto remanserunt intacta. Hoc igitur (Bone Jesu, Fili Dei vivi, Rex sæculorum) ad laudem & gloriam nominis tui fieri voluisti, & ut quanti esset meriti beatus Babolenus, demonstrares hominibus. In Episcopatu verò Meldensi, Funtanetâ villâ, in beati Baboleni nomine consecrata est ara, quam nulloatenus Meldensis Pontifex consecraret, nisi apud ipsum pro magno ejus haberetur memoria. Gloria, Christe, tibi cum Patre & sancto Flamine, qui Sanctos tuos ita mirificas in terris, dum per signa tecum eos regnare testaris in cælis, & nunc, & semper, & per infinita sæcula.

TABULÆ ALIQUOT

Fossatensis Monasterii, quæ huic sancti Baboleni Vitæ lucem affundunt.

Clodoveus I I. Francorum Rex, annuente matre Nantechilde, sub cujus erat tutelâ Fossatum, seu Castrum Bagaudarum, cum agro circumjecto, tradidit Blidegisillo, Parisiensi Diacono, anno primo regni sui, ad Monasterium de S. Benedicti regulâ constituendum.

CLODOVEUS Rex Francorum, Vir inluster, Duci Archenaldo, vel omnibus præsentibus ac futuris fidelibus. Quicquid Sacerdo-

tibus ac religiosis Ecclesiasticis viris ad opus Dei construendum concedimus, hoc & ad Regni nostri stabilitatem, & ad animarum salutem pertinere non diffidimus. Proinde omnibus sanctæ Dei Ecclesiæ tam præsentibus, quàm & futuris utriusque sexus fidelibus, notum fieri cupimus, quemdam virum Diaconum carnis generositate pollentem, ac in Christo venerabilem, valdeque à nobis per omnia dilectum, nomine BLIDEGISILLUM, ad nostræ sublimitatis præsentiam advenisse, & humiliter deprecasse, quatenus ad Ecclesiam Dei funditus ædificandam, in honore scilicet sanctæ Dei Genitricis Mariæ, ac Sanctorum Petri & Pauli Principum Apostolorum, & Monachos sub regulâ sancti Benedicti pro Christi amore in illo ibi congregandos, quamdam terram ex jure nostræ proprietatis in Parisiensi pago consistentem; illum videlicet castellionem qui Fossatus dicitur, & quem vulgaris lingua Castrum Bagaudarum appellat, super fluvium Maternæ situm, habentem ab introitu suo usque in alveum ipsius Maternæ, buinaria duodecim, cum totâ terrâ vocabulo Varennâ, quæ est in circuitu ipsius castellionis, & quam Maternæ fluvius gyrat, & fossatus aquæ concludit, sibi met concederemus. Cujus sacræ petitionis, ob id quia pro æternæ vitæ compendio tali accensus ardore libenter assensum præbuimus. Quapropter per præsentem auctoritatem atque præceptionem jubemus, ut hanc prædictam terram, quam ei tali firmitate ex jure nostræ proprietatis in suum jus, ad opus Dei perficiendum transponimus, per nostram transignationem & reversionem firmiter recipiat. Ita ut quod postmodum jamdictus vir præclarissimus, ac nobis carissimus Blidegisillus Diaconus ipsum castellionem, cum prædictâ Varennâ, quam fluvius Maternæ circumdat, (sicut jam dictum est) & fossatus castellionis in introitu suo ab aquâ in aquam, totam terram concludit, ad integrum, quod fiscus noster ibidem ad præsens tenere vel dominare videtur: unâ cum manentibus illis qui ibidem super terram fisci nostri commanent, & ad fiscum nostrum usque nunc aspexerunt, totum & ad integrum, cum pratis & pascuis, garricis & ulmis, cum aquâ & omni piscatione fisci nostri, insulis quoque ac molendinis, seu piscatoriis, cum portis etiam, & cunctis etiam ipsius aquæ transitoriis, vel cum omnibus adjacentiis cultis & incultis, ex nostrâ munificentia, ad locum sanctum (ut dictum est) regulariter construendum, ac funditus ædificandum, plenissimè ac firmissimè habeat concessum. Et ibidem juxta hoc quod sua devotio locum sanctum, vel Cellulam ad servos Dei sub sancti Benedicti exemplo, inhabitando, Deo adjuvante, ædificet. Et sicut ex fisco nostro processit, ita ipsum locum cum præfatis rebus, & cæteris omnibus ad se pertinentibus, atque cum omni edificio quod abhinc facere poterit, firmiter absque ullâ redibitione fisci nostri, vel Judicis publici requisitione sæpeditus Blidegisillus, & qui ab illo constituendi sunt, in perpetuum valeant possidere. Denique

etiam & jam regio jure decernimus, quod jubendo multum observare præcipimus, ut nullus Judex publicus, neque Episcopus, neque quælibet judiciariæ potestatis persona in eundem locum, aut infra prædictam terram quam sæpèfatus circumdat fluvius, & fossatus aquæ concludit, ad causas audiendas, vel injusta freda tollenda, aut tranſitum publicum faciendum, aut mansionaticos vel paratas faciendas, aut fidejussores tollendos, aut telonea exigenda, aut homines ejus tam ingenuos quàm servos super ipsam terram commanentes distringendos, nec ullas redibitiones vel illicitas occasiones requirendas, ullo unquam tempore ingredi audeat, aut exactare præsumat. Sed ipsi servi Dei præſentes ac futuri nullam ibidem à quacumque occasione patiantur inquietudinem: ut semper sub sancto proposito ibidem Deo serviant, & pro nobis ac genitrice nostrâ, vel conjuge, sive prolis, necnon & totius Regni statu, Domini misericordiam devotius exorare delectet. Ut autem hæc præceptio nostræ cessionis firmitior habeatur, vel per futura tempora, Deo propicio, inviolabilis conservetur, nos, & præcella genitrix nostra Nandechildis, manuumstrarum signaculis adumbravimus. Data anno primo regni nostri.

Blidegisillus Diaconus Monasterium Fossatenſe ex regiâ liberalitate à se fundatum tradit Baboleno Abbati, ejusque Monachis, anno tertio Clodovei II. Regis, Nonis Maii.

IN nomine sanctæ Trinitatis, Blidegisillus Diaconus, servus servorum Dei, omnibus Ordinibus, Clericis quoque, necnon & laïcis, cunctisque sanctæ Dei Ecclesiæ fidelibus, tam præſentibus, quàm futuris cognitum fieri volumus, quia quamdam terram in pago Parisiaco sitam, quam Dominus Rex Clodoveus gloriosissimus, ac præcella genitrix ejus Nandechildis Regina, per præceptum illorum, pro mercede suâ, ad Ecclesiam Dei inibi ædificandam, quondam nobis concesserunt: illum videlicet castellionem qui *Fossatus* dicitur, & quem vulgaris lingua *Castrum* vocat *Bagandarum*, super fluvium Maternæ situm, habentem ab introitu suo usque in alveum ipsius Maternæ buinaria decem; cum totâ terrâ vocabulo *Varenmâ*, quæ est in circuitu castellionis, & quam Maternæ fluvius gyrat, ac fossatus aquæ concludit, ipsi sancto loco in honore Domini, ac sacræ genitricis ejus Mariæ, necnon & Principum Apostolorum Petri & Pauli, à nobis constructo. In quo egregium virum, nomine *Babolenum*, sub sancti Patris Benedicti exemplo nuper constituimus Abbatem, propter ablucenda delictorum meorum facinora, vel Christi gratiam conquirendam complacuit, dedisse volumus. Præterea, ut prædictus vir sanctissimus Babolenus (quem pro amore Dei in eodem, sicut dixi-

mus, loco Abbatem constituimus, sui que Monachi, seu successores eorum sœpessatum castellionem cum jamdictâ Varennâ, quam fluvius Maternæ circumdat, & Fossatus castellionis, ut dictum est, in introitu suo ab aquâ in aquam, totam terram concludit: unâ cum manentibus illis qui ibi appendunt, cum pratis ac pascuis, garricis & ulmis, cum aquâ verò, seu omni piscatione, insulis quoque ac molendinis, necnon & piscatoriis, cum portis etiam, cunctisque ipsius aquæ transitoriis, vel cum omnibus adjacentiis cultis & incultis, ab hodiernâ die usque ad ultimam hujus sæculi horam teneant, ac perpetualiter possideant. Et sicut de regali munere hoc promeruimus, ita de jure nostræ proprietatis, cum præcepto & omni instrumento, sive omni donatione quam suprà memoratus Rex Domnus Clodoveus, & inelyta ejus genitrix Nandechildis fecerunt, & nobis, Deo inspirante, placabiliter dederunt, in eorum ejus potestatem, ad ipsum locum sustinendum, atque ad eorum corpora in Dei servitio ibi sustinenda, Deo auxiliante, transponimus, ac firmiter transfundimus: quatinus ipsi servi Dei, omnesque successores eorum (ut prædiximus) ibidem sub regulâ sancti Benedicti, ad modum & similitudinem Luxoviensis Monasterii, Domino Christo valeant devotissimè famulari, & in omnibus eam sectentur normam: ut omnibus postpositis peculiaribus, juxta Apostolicam traditionem, cuncta possint possidere communia: ut & sibi salutem acquirant, ac pro animâ præscripti Regis Domni Clodovei, ac matris ejus Nandechildis, qui mihi hoc, ut præfatum est, contulerunt: necnon & pro me indigno ac miserrimo Blidegisillo peccatore, Dominum toto corde fidelius exorare delectet. Si quis verò, quod nunquam futurum credimus, contra hanc traditionem, & nostræ delegationis decreum insurrexerit, aut eam infringere præsumperit, vel abstrahere ab ipso loco sancto, seu de potestate eorum inibi Deo servientium, iram Dei omnipotentis se incurrere pertimescat, & in cælis Sanctorum societatem perdere per omnia formidet: & insuper juxta sæculi penam, auri libras quinque, argenti pondera partibus ipsius loci, vel jamdictis servis Dei, cogente fisco exsolvat: & nullo modo, nullôque ingenio, quod adversatur, evindicare valeat. Ut autem hæc epistola nostræ donationis per cupita sæcula teneat vigorem & stabilitatem, manu propriâ subscripsimus, stipulatione subnixâ: & tam Pontifices quàm & Abbates, ceterosque magnificos viros præsentis, in præsentem rogavimus, ut eam suis roborationibus adfirmarent; quod & multi, opulante Deo, libenter fecerunt. Actum Parisius, sub die Nonarum Maiarum, anno tertio, regnante Clodoveo gloriosissimo Rege. Signum Blidegisilli Diaconi, qui hanc epistolam donationis fieri rogavit, & subscripsit. Signum Audoberti, Parisiæ urbis Episcopi, qui huic epistolæ, rogante Blidegisillo, subscripsit. S. Annoberti, Senonicæ Ecclesiæ Episcopi, qui & hanc conscriptionem confirmavit. S. Agomari Episcopi,

qui similiter eam signavit, S. Argundi Episcopi, qui hoc similiter signavit. S. Audonis, qui affirmavit, Waudeberti assignantis, Rande-gramni conscribentis, Theoberti, Charoandi Abbatis, Hildoardi Abbatis, Catherini Abbatis. S. illustri viri Valdeberti Comitis.

N O T Æ

In Vitam Sancti Baboleni Abbatis.

QUAE ab antè natis didici, & qua oculis ipse vidi] In iis igitur quæ vidit, habemus oculatum testem; in iis quæ ab antiquioribus accepit, habemus dignam venerationem traditionem.

^b *Casibus perfectionum variis, ejusdem deperierunt miraculorum gesta*] Intelligit, opinor, Saracenorum, Normannorum, Hungarorum irruptiones, stragesque Ecclesiis Galliarum illatas.

^c *Parentes religiosi & nobiles, ex Burgundis originem trahentes*] Winocum seu Wionicum, ejus genitorem, & exinde Presbyterum, memorat Jonas in Columbano. *Quidam Presbyter, inquit, ex parochianis, pater Baboleni, qui nunc Bobiensi Cœnobio præest, Wionicus nomine, ad beatum Columbanum venit; eratque in salu cum Fratribus ob lignorum opportunitates parandas. Cumque supradictus Wionicus venisset, miransque aspiceret, quantâ vi truncum querci, cuneis artèque parirent, elapsus è truncu cuneus medio frumenti secavit, ac venarum profluam sanguinis undam produxit. Vidensque vir Dei Columbanus cum sanguine fluentem, statim in terram orans ruit; surgensque, salivâ illitum, sanum ita reddidit, ut vix cicatricis vestigium remaneret.* Interjectâ dehinc ferè paginâ, refert, cùm Wionicus Columbani perpetuus ferè comes, Luxovium in ejus comitatu advenisset, ac frumenti in eo conditi exiguitatem pro Monachorum ingenti numero admiratus esset; sequenti nocte, Columbani precibus, probatissimo frumento confectum apparuisse horreum, nullâ cujusquam spectabili manu, sed Dei solius nutu importato, Ughellus tomo 4. Italix sacræ, in Abbatibus & Episcopis Bobiensibus, sub titulo, *Incipit Vita Bobuleni Abbatis: Auctorum, inquit, ex genere nobilis Bobulenus, Monachorum præfuit Cœnobiis.* Duo hîc notanda; primum, Ethiconum videri hîc designatam nobilissimam in Burgundiâ familiam, è quâ ortus S. Leodegarius, Augustodunensis Episcopus, & Martyr, Bliildis Reginæ avunculus. Quâ verò ratione Babolenus pluribus præfuerit Cœnobiis, aperit Auctor in decursu.

^d *Monasterio Bobiensi præfuisse Pastorem tertium*] Frustrâ hîc hæret Breulius in Supplemento Antiquitatum Parisiensium; non enim fuit Babolenus Abbas Bobiensis tertius, nisi Columbano excluso. Primus quippe à Columbano fuit Attalas, secundus Bertulfus, tertius Babolenus, alioqui quartus censendus, vocato in numerum

Columbano. Qui Baboleni Fossatensis Vitam luce indignam putarunt, aiunt diversum esse Babolenum Fossatensem à Bobiensis, & à Stabulensi seu Malmundariensis; sed non probant, nisi de tumulis diversis, sive ex diversis eorum ossibus. Imbecillis est hæc argumentatio, cum experientiâ compertum sit, sæpissimè si non mentiri, certè errare populos in reliquiis Sanctorum sibi asserendis. Non sunt Sancti tricorporales, ut ille Poëtarum Geryon; & tamen S. Benigni corpus ostendunt in suis hierothecis Divionenses, apud quos mortuus est; ostendunt Colonienfes, ostendunt Helwangenses. Reginæ Virginis & Martyris corpus, apud Æducensium Alexiam passæ, affirmant habere se Æduenses, affirmant Osnaburgenses, qui de loco & ratione martyrii conveniunt cum Æduensibus. Intercedunt Hispani, Reginam eadem die septimâ Septembris, tormenta eadem passam prædicant, sed apud Alexiam urbem, in Lusitanæ & Carpetanæ finibus sitam. Porro Babolenos quidam tres distinguunt, Bobiensem, Stabulensem, Fossatensem. Hos tres in unum constat anonymus Scriptor Vitzæ S. Baboleni Fossatensis; & quæ ab aliis de tribus feruntur, in unum optimè convenire ostendit, ipse qui sexcentis abhinc annis scripsit, & quæ scribit, vel à se visa, vel à prioribus omni fide dignis accepisse se profitetur. De Baboleno Bobiensis non celebratur, inquit Ughellus, *quamquam fecerit miracula*. Babolenum suum Stabulenses & Malmundarienses eadem die colunt, quâ Fossatenses suum; nempe Junii mensis vigesimâ sextâ. Tamen refert Wion, pridie Kalendas Septembris, anno 1482, in Bobiensis Monasterio multa relevata esse Sanctorum corpora, & in his Baboleni. Fossatensium potior est auctoritas, qui Baboleni sui corpus ostendunt apud se primò sepultum, apud se aliquoties relevatum, plurimis ad hanc usque diem claruisse miraculis. Colant Baboleni sui reliquias Bobienses, colant Stabulenses, per me licet: nos interim cum Fossatensibus, majores nostros secuti, in uno Fossatensi, Bobiensem & Stabulensem Babolenum agnoscemus.

^e *Per biennium*] Intelligit de biennio completo; itaut labente sui regiminis anno tertio, à Bobio recesserit. Id probat privilegium Baboleno adhuc Bobiensis Abbati concessum à Theodoro Papâ, 4. Nonas Maii, Indictione primâ, apud Ughellum Italix sacræ tomo I V. citato. Quare, mortuo Bertulfo, Christi anno 640. xix. Augusti, videtur nonnullum fuisse interregnum, dilatamque Baboleni electionem, fortasse factione eorum qui ab Episcopo Dertonensi stabant, cum Abbatis institutionem ad se spectare diceret: quæ etiam potuit esse causa Baboleno à Bobio abscedendi statim post obtentum à Papâ Theodoro privilegium, cum sibi ab Episcopo, aut ab ejus ministris timeret. Tertio igitur anno sui regiminis Bobium reliquit Babolenus, & Gallias versùs peregrinatus est anno 643.

^f *Nativum solum*] Impropiè hic appellatur nativum solum

Baboleni, in quo videlicet ad multos annos fixâ sede, jus civitatis adeptus censebatur. Alioqui Burgundiâ oriundus in Præfatione asseritur.

^k *Remacii, qui eo tempore in saltu Arduenna*] Subobscurè Anonymus res à Baboleno apud S. Remacium gestas, hic perstringit. In silvâ Arduennâ duo Monasteria fundaverat Remacius, Stabulaum diœcesis Trajectensis, Malmundarium Colonienfis. Huic primò cum præfecit, Stabulaum quoque & tunc visendum & aliquando (si Superis placeret) post se regendum disposuit. Utroque ille pulsus, Parisios ad S. Dionysium se recepit. Vera hæc quidem, sed ordine præpostero recensita: non enim priùs excessit è vivis S. Remacius, quàm S. Babolemus Fossatenfis Monasterio præficeretur. Lucem hic affert ci-tatus locus apud Ferdinandum Ughellum, ex quadam Vitâ S. Baboleni, ubi *Cœnobis præfuisse* asseritur. Sed quibus & quo ordine? Opinor sicut Odo Cluniacensis, & Guillelmus Divionenfis, & alii nonnulli quos nuncupare possis Abbates Patriarchales. Odo in primis, priusquàm in Congregatione Cluniacensi monarchiam constitueret, multorum Cœnobiorum dictus est Abbas, quæ circumiens ad sancti Benedicti regulæ perfectiorem normam instituit. Sic & Guillelmum Divionensem non tantùm Benigniani, sed & Reomaenses, Fiscannenses, Besuenses, Meldenses, Tornodorenses, Fructuarienses, & alii complures Abbatem suum prædicant, quoddam Monasteria vel primus fundaverit, vel ab aliis fundata sanctioribus excoluerit disciplinis. Simile quiddam evenisse arbitror Luxovienfis ac Bobienfis Cœnobiorum Abbatibus, Columbano, Eustasio, Attalæ, Walberto, Bertulfo, atque etiam Baboleno; qui è Bobio peregrinatum egrediens, nescio an Bobienfis Abbatis titulum reliquerit, cum de successore haud satis constet, an ei proximè fuerit subrogatus. Sic & Stabulaum & Malmundarium Monasteria perlustrans, ac deinde Fossatenfis dans initium, & denique Vincentiano ad aliquot annos præpositus, horum omnium Abbas nuncupatus est.

^l *Per cxxxv. annos*] Cùm sic scripsisset Auctor, corruperunt numerum librarii, & pro C, notâ centenarii, reposito L, quinquagenarii notâ, *elloginta quinque annos* scripserunt, errore ipsius etiam tyronibus manifesto. Nam à Clodovei Magni obitu, qui evenit die Novembris xxviii. anno æræ vulgaris s10. ad Clodovei secundi exordia, post obitum patris Dagoberti, adscriptum die xix. Januarii anni 644. fluxere anni 132. mensis unus, dies xxviii. Sed fortasse Anonymus annum indicare voluit vocati ad Fossatenfis Monasterii regimen Baboleni, qui fuit Clodovei II. tertius, æræ Christianæ, secundùm accuratos nostros calculos, 641. Sic à Clodovei I. obitu annos cœnsuerit omninò 135.

ⁱ *Anno I. V. 643. Indictione primâ*] Regnare cœpit Clodoveus II. post patrem Dagobertum, ex die xix. Januarii, anno æræ vulgaris

644. Indictione secundâ : quare annum quintum regni agebat anno Christi 648. mense Maio, Indictione vi. Porro hic Auctor Clodoveum II. regnare cœpisse ait anno Christi 643. Indictione i. Tùm infra, numero 21. tabulas commemorat, *datas Clodoveo eodem regnante anno quinto, Indictione quoque quinta, die mensis Maii xv. sub die Iduum Maiarum.* Hic est annus Christi 648. Indictione vi. anonymo autem annus 647. Indictione v. Hujus diversitatis rationem cognosce. Sequitur hic Auctor Fredegarium, & uno anno Gregorii Turonensis calculum antevertit. Hanc Fredegarii à Gregorio diversitatem observarunt eruditi, & in his Cointius tomo 2. Annatum, anno Christi 584. numero 221. *Gregorius, ait, annum decedentis Regis ultimum, à primo succedentis separat, Fredegarius non distinguit. Ex Gregorii calculo annus Christi 561. est ultimus Clotarii, & annus 562. est primus filiorum. Apud Fredegarium annus Christi 561. est ultimus Clotarii, & primus filiorum. Inde fit ut Fredegarus Gregorianum calculum uno anno praveniat in assignandis annis filiorum Clotarii. Eandem methodum secutus Auctor Vitæ sancti Baboleni in annis Clodovei II. illos uno anno minuit, dum primum ejus annum fecit Christi 643. Indictione i. & quintum ejus annum Indictione v. nihilo minus Dagoberti monarchiæ annum sextumdecimum confirmavit.*

^k *Castrum Bagaudarum*] Hoc castrum constructum fuisse dicit à Julio Cæsare, & sic appellatum derivato nomine à Præsidariis ibi ab eo constitutis. De castris conditore nihil habet contrarium Romanæ Historia; nec yana est conjectura, in quibus structuris opus Romanum ex firmitate agnoscitur, illarum auctorem putare Julium Cæsarem, per quem constat Gallias Romano Imperio fuisse adjectas. De vocis significatu, cujus ante tempora Diocletiani nullum usum reperias, existimaverim Celticam esse vocem quæ aliud nihil sonet quàm latrones, rebelles, factiosos, Victor de Cæsaribus; Carini discessu *Ælium, Amandumque per Galliam excitâ manu agrestium ac latronum, quos Bagaudas incolæ vocant, populatis laicis agris, plerasque urbium tentare.* Eutropius lib. ix. *Cum tumultus rusticani in Galliâ concitasset, & factioni suæ Bagaudarum nomen impoherent; Duces autem haberent Amandum & Ælium, ad subigendos eos Maximianum Herculeum Cæsar misit.* Pomponius Latrus: *Maximianus tumultus in Galliis, quos Amandus & Ælianus excitaverant sub specie tyrannidis, cum totâ factione Bagaudarum (hoc nomine se appellavis turba rusticorum) compressit mirâ celeritate, statimque delevit.* Salvianus lib. v. de Gubernatione Dei: *Hinc est quòd etiam hi qui ad barbaros non confugiunt, barbari tamen esse coguntur: scilicet ut est pars magna Hispanorum, & non minima Gallorum; omnes denique quos per universum Romanum orbem fecit Romana iniquitas jam non esse Romanos.* De Bagaudis nunc mihi sermo est, qui per malos Indices & cruentos spoliati, afflicti, necati, postquàm jus Romana libertatis amiserunt.

etiam

etiam honorem Romani nominis perdidit. Et imputatur his infelicitas sua, imputamus his nomen calamitatis sua, imputamus nomen quod ipsi fecimus, & vocamus rebelles, vocamus perditos, quos esse compulsumus criminosos. Quibus enim aliis rebus Bagauda facti sunt, nisi iniquitatibus nostris, nisi improbitatibus Judicum? &c.

¹ Regis Anglia, nomine Choinvala] Visus est Anonymus, dum libertate propè poeticà in colloquia varia se extendit, Audobertum cum Agilberto confudisse. Constat enim ex Bedà, lib. 3. de Gestis Anglorum, cap. 7. & 28. & in recapitulatione ad finem libri quinti, Agilbertum Episcopum à Choinvalà (qui & Cenvalch) Anglosaxonum Rege malè habitum secessisse in Gallias, ibique Parisiensibus Episcopum datum, apud eos consensuisse. Sed erat Agilbertus natione Gallus, neque Parisiensi Episcopatu potitus est (ut evincit S. W. I. fridi Chronologia) ante annum Christi 664. Clodoveo II. jam mortuo. Inepè igitur Audobertum de se narrantem inducit esse se patrià Anglosaxonem, & ibidem constitutum Episcopum, ac deinde in Gallias profugum, à Clodoveo II. Episcopatu Parisiensi donatum esse. Audobertum nos quidem agnoscimus Parisiensem Episcopum per initia Clodovei II. Regis, in Tabulis Fossatensibus fide dignis non semel appellatum? imperitam quæ ipsi tribuitur loquacitatem probare non possumus.

^m Paulus Orosius] Lib. 7. cap. 25. Dehinc cum in Gallià Amanandus & Elianus collectà rusticorum manu, quæ Vacantulas vocabant, perniciosos tumultus excitavissent, Maximianum cognomento Herculium Cæsarem fecit, (Diocletianus) misitque in Gallias, qui facile agrestium hominum imperitam & confusam manum militari viriute compescuit.

ⁿ Quatuor Archiepiscopi.] Privilegium S. Baboleno, ejusque Monachis Fossatensibus concessum ab Audoberto Parisiensi Episcopo, confirmant quatuor Archiepiscopi, Gaudericus Lugdunensis, Annobertus Senonensis, Prestelendus Bituricensis, Donatus Vefontionensis, & Episcopi septem. Idem est Prestelendus Bituricensis cum Wlfolendo; sive binominis fuit, sive librarii oscitantia inculcatus. De Archiepiscopi appellatione, quando Episcopis Metropolitanis tribui cœperit, testem profero Bedam, qui septimo post Christum sæculo florere cœpit. In libro 1. Historiæ Ecclesiasticæ gentis Anglorum, cap. 25. Misit etiam tunc isdem venerandus Pontifex (S. Gregorius Papa) ad Ethernum Arelatensem Archiepiscopum, ut Augustinum Britanniam pergentem benigne susceperet, litteras. Libro eodem, cap. 28. Interea vir Domini Augustinus venit Arelas, & ab Archiepiscopo ejusdem civitatis Ethernio, juxta quod jussu sancti Patris Gregorii acceperant, Archiepiscopus gentis Anglorum ordinatus est. Lib. 2. cap. 3. in Epitaphio; Hic requiescit Dominus Augustinus, Dorovernesis Archiepiscopus primus. Cap. 4. & 7. Laurentius Archiepiscopus. Cap. 9. 18.

& 20. *Iustus Archiepiscopus*. Eodem cap. 20. *Honorius Archiepiscopus*. Lib. 3. cap. 20. *Densdedit Archiepiscopus*. Cap. 25. *Archiepiscopus Theodorus*. Ibidem, *Dalsinus Archiepiscopus Galliarum*. Item lib. 4. cap. 2. 6. 12. & 17. & lib. 5. cap. 8. & 24. *Theodorus Archiepiscopus*. Eodem cap. 24. *Berwaldus & Tacune Archiepiscopi*. Verum est, in Conciliis præfati xvi, ac ferè ante mille abhinc annos, quando subscripserunt Metropolitanì, vel etiam quando in suis diplomatibus ex personâ suâ locuti sunt, illos solo Episcopi titulo fuisse contentos, exemplo nimirum supremi totius Ecclesiæ Archipontificis, qui se ex tempore Magni Gregorii in hodiernam usque diem *Episcopum servum servorum Dei* appellat. At cum de illis alii locuti sunt, vel Historici, vel Notarii, Archiepiscopos ut plurimum nuncuparunt. Exempla vidisti apud Historicum Bedam, vide & apud Notarium in tabulis Dagoberti Regis (quas autographas olim inspeximus) quibus anno regni sui xii. in Trevirensi S. Maximini Monasterium multa bona confert, & meminit *Agricii venerabilis Archiepiscopi*, qui Constantino Magno imperante, Trevirensi Metropoli præerat. Sicut ergo sub Dagoberto Rege Trevirensis vel Moguntinus Notarius (Moguntia enim datum est diploma) *Agricius Archiepiscopus* dixit : ita & potuit Notarius Fossatenlis, sub Clodoveo, Dagoberti filio, Lugdunensem, Senonensem, Bituricensem, & Vesontionensem Archiepiscopos nuncupare. Scio Cointium anno Christi 633. numero vii. falsi notare hoc Dagoberti diploma, quod refert ex Gaspare Bruschio, in Chronologiâ Monasteriorum Germaniæ. Pace viri eruditi dixerim. Vidi ego in archivo Maximiniacensi, & manibus tractavi has ipsas tabulas autographas, signo & sigillo regio munitas, nec deprehendi quidquam unde illæ conficte probari possint. *Potentissimi* titulus referendus videtur ad ingenium Cancellerarii Regi suo adblandientis, & qui se Marculphi formulis adstringi non credebat : & illa emunitas S. Maximini Monasterio concessa, recte conveniens erat cum Magni Constantini recens ad Christi fidem conversi plusquam regiâ pietate. Integrum ipsum diploma hic tibi damus ex autographo accuratè descriptum ; cui & subjunximus monogramma, & sigilli regii ipsissimam effigiem, non de taniis aut funiculis penduli, sed ipsimet membranæ præfati more affixi : in quo observare est trifidum sceptrum, seu virgam trifidam Dagoberti, monarchiæ ejus, ut videtur symbolum, quæ ex tribus, videlicet Neustriæ, Burgundiæ, & Austrasiæ regnis coaluit in Clotario II. Dagoberti patre, secundum prædictionem S. Columbani à Jonâ non uno loco memoratam. Quod sceptrum trifidum, sive in Dagoberto, sive in aliquo ex prioribus Regibus cæpit, non improbabilius fuisse opinamur Liliæ Francici originem ; ut pluribus olim demonstravimus in Divione seu Burgundiâ nostrâ Christianâ, quæ in schedis nostris adhuc latet, aliquando tandem, si Deo visum fuerit, in lucem emersura.

De hac regii Francorum stemmatis origine nuper eruditè scripsit Henschenius noster tomo 3. de Viris Sanctorum mensis Martii, Exegesi præliminari 2. cap. 2. §. 8. Nec alia produisse hæcendū videtur, vel in solidā historiā fundatior, vel etiam genti Francorum gloriosior super hoc argumento sententia.


DAGOBERTI REGIS DIPLOMA,

Moguntiaꝝ anno regni xii. datum.

Ex ipsomet autographo descriptum.

IN nomine Patris, & Filii, & Spiritus sancti. Omnium Christianorum noverit industria, qualiter ego DAGOBERTUS Rex potentissimus, cum convenienti consilio Episcoporum meorum, Comitumque, Legatos de meā parte ad Abbatem *Memilianum* direxi; mandans ei, ut diligenter inquireret, mihiq; per seipsum indicaret, quibus auctoribus illud Monasterium *S. Maximini* constructum, vel cujus imperio à pristinis temporibus esset subiectum. Hanc legationem Abbas cum Fratribus sollicitè percipiens, perlectisque in eodem loco quibusdam vetustissimis cartulis inventum est, id ipsum Monasterium Constantini Imperatoris fuisse regale templum; atque iussu ejus dedicatum fore in honore *S. Johannis Evangelistæ*, à *S. Agricio* venerabili Archiepiscopo. In quo videlicet templo, ut idem Pater Monasterii nostræ Regalitati certā relatione patefecit, Helenā sacrā Dei famulā petente & faciente, supradictus Imperator pauperes Christi congregavit, eisq; virum Dei *Johannem* præposuit, ut in servitio Dei semper vacarent, & pro se orationibus insisterent. Et insuper illius loci habitationem aliæ personæ noluit subdere, nisi suæ, successorumque Imperatorum potestati. His rebus ita esse firmiter intellectis, regio more constituo, atque firmissimā jussione præcipio, ut nullus unquam protervè illud Monasterium, in quo Abbas supradictus præesse videtur, audeat inire, vel ullam inhumanitatem illi violenter inferre. Igitur ut assidua recordatio mei meorumque parentum maneat in prædicto Monasterio, ipsorum *S. Maximini* Præbendariorum victualia sub præmemorato Imperatore constituta, additis ex meā parte prædiis augere curavi, quorum nomina hæc sunt, *Kannis*, *Cressiacum*, *Lunewich*, *Regiodola*, *Vallis*, *Poliche*, *Budeliacum*, *Talevanc*, *Loavia*. Hæc loca ad regiam curtem, quæ dicitur *Decima*, pertinent: quam curtem cum omnibus rebus ad eam pertinentibus (hoc est, quidquid prædii visus sum habere à fluvio qui dicitur *Rubora*, usque ad silvam quæ dicitur *Jeder*) sancto *Maximino* Præsuli in perpetuam hereditatem contradidi. Insuper etiam cum consilio & rogatu meorum Principum, cæteris inibi Deo

deservientibus hanc legem firmiter ac perpetualiter imposterum habendam decrevi ; scilicet ut centenorum ibidem summa Monachorum semper integra maneat , & inconvulsa : excepto si Imperatorum , Principumve per sæcula succedentium benivolentiâ prædiis augmentetur , vel thesauris : & si propter Paganorum , vel infidelium Christianorum devastationem , eisdem Christi servitoribus penuria ultra modum ingruerit , & per thesauri effusionem expelli nequeat Dei Omnipotentis , & mei , meorumque successorum habeant licentiam alodum cum familiâ à fidelibus illis contraditum dandi & vendendi , antequàm Dei destruantur servitia . Et ut istius cartulæ confirmatio firma in ævum permaneat , describi eam præcepi , & nostro sigillo eam inde firmari . Datum pridie Nonas Aprilis , anno regis nostri 111. Moguntiaë feliciter . Amen.



HEATCUS Cancellarius ad vicem RICOLFI Archiepiscopi recognovi.



* *Stantes in aqua super tres ibi lapides compositos.*] Pœnitentiæ hoc genus pœnitis sæculis haud fuisse inusitatum, agnosces, cum apud Bedam legeris lib. 5. Anglicanæ Historiæ, cap. 13. quendam virum visum in spiritu pœnis auiamarum, hoc genus merlionis in aquam gehdam sibi indixisse, ut præteritæ vitæ pœnas elueret, cum vidisset ipse animas alternis vicibus, nunc ardore igni, nunc frigore, ad stridorem usque dentium acerrimè excruciiari.

* *Cloaius Rex, immaturâ præventus morte. Theoderico fratri quinto anno dimissis Principatum.*] Hæc Anonymus ex Fredegario malè intellecto. Vide hujus Dissertationis caput xv. ubi ratio allata, cur Clotario III. quatuor dumtaxat regni annos Fredegarius tribuerit : & an hi quatuor anni ducendi sint ab obitu Clodovei patris, an potiùs à matris Balthildis abdicatione, cum in Calense Monasterium se recepit.

NOTÆ IN MIRACULA S. BABOLENI,

codem Auctore qui Vitam ejus conscripsit.

* *A religioso Abbate Benedicto.*] Hoc magistro aliquando usos Monachos Fontanellenfes, legitur in Chronico Fontanellenfi, cap. 16. tomo 3. Spicilegii Dacheriani.

* *Aldrico Senonensium Archiepiscopo.*] Cùm Aldricus Senonensis Archiepiscopus, novam Basilicam Fossatensem à Benedicto XVIII. Abbate exædificatam dedicavit v. 11. Idus Decembris, & eadem die corpus S. Baboleni intra illam transtulerit ; si Dominicâ die celebrata est illa seu translatio, seu consecratio, (ut est verisimile) fuerit ille annus Christi 833. aut 839. Sedit enim Aldricus ab anno 830. ad 840. per quod decennium fuit littera Dominicalis E, quæ duobus tantum illis annis in septimum Idus Decembris incurrit. Unde emendes licet quod apud Labbeum legitur tomo 1. Bibliothecæ, paginâ 656. translatum fuisse corpus S. Baboleni anno Christi 989. quod ex Aldrici Senonensis Archiepiscopi Chronologiâ falsum deprehenditur, & S. Baboleni translationis epocha centum circiter & quinquaginta annis retardatur.

* *Quod nostra ætatis pueritiâ vidimus.*] Hoc loco viam aperit Auctor, quâ ad tempus ab eo conscripti hujus Opusculi perveniatur. Sed priùs constare debet de tempore quo Adalerius (qui exinde Abbas fuit Milidunensis) adhuc Præcentoris Fossatenfis officioungebatur.

* *Per centum quinquaginta annorum spatium*] Legendum hic fuit, post centum quinquaginta annorum spatium ; nempe à primâ ejus depositione.

* *Qualiter rexit Vir sanctus Bobinm.*] Confirmat Bobiensis
Ccc iij

sancti Baboleni Præfecturam hæc visio, Monacho ejus videndi cupido oblata.

CAPUT VII.

Dagoberti, ejusque filiorum ac nepotum chronologia lux affulget à Cometâ nominatissimo, qui anno Christi 677. a mense Augusto per tres menses orbe toto spectatus est.

INFAUSTA sideta Cometas, & (si Poëtæ credimus) nunquam impunè visos, potest Deus optimus maximus, cum liberit, in bonum convertere. Cometam hunc, septem à Christo sæculi pharum esse dixerim: quo certè ad hujus, in quâ versamur, chronotaxeos discutiendas tenebras nihil mihi apparet illustrius.

Dagobettum Regem è vivis abiisse scribit Hadrianus Valesius, & Catolus *le Cointe*, anno Christi 638. ego anno 644. cum Sirmundo, Vignietio, Petavio, Bucherio, Duchesnio, Henschenio, Labbeo, & aliis. Clodoveus II. ex Valesio obit anno 654. ex Cointio 655. ego ejus obitum ad annum refero 660. Clotarius III. extinctus est anno regni sui XI v. secundum Valesium, Christi anno 668; secundum Cointium 669; secundum me anno 674. Childericus ex Valesio & Cointio, occisus est anno 673; ex me anno 677. cujus intestum, & fractis ejus Theodetici exordia signavit Cometes anno 677. ex mense Augusto in tres menses Europæis imminens. Hoc probemus idoneis testibus.

Anonymus auctor Vitæ S. Leodegarii, Eumenatio Æduensium Episcopo conscriptæ: *Igitur, inquit, cum Hilderici mors subito nunciata fuisset, tunc si qui ob ejus jussionem exilio fuerant condemnati, tanquam verno tempore post hiemem soluti de cavernis serpentes venenati procedere, sine metu fuerunt reversi: quorum debacchante furore, surrexit magna turbatio patriæ, ita ut manifestè crederetur adventus imminere Antichristi. Hi verò qui rectores regionum esse debuerant, surrexerunt contra alios; & qui pacis fœdera debuerant continere, odiis se invicem superunt lacessere. Et quia Rex tunc non erat stabilis in cul-*

mine, quod unicuique rectum videbatur in propria voluntate, hoc agebat sine formidine disciplina. Adèd tunc iram Dei manifestum cognovimus evenisse, ut etiam stella appareret in sidere, quam Astrologi vocant Cometam: in cuius ortu asserunt fame terram turbari, mutationem Regum, vel commotionem gentium, & percussioneis gladium imminere. Eiusdem Cometæ meminit Paulus Diaconus, de gestis Longobardorum, lib. 5. cap. 35. his ipsis verbis: *Insequenti post tempore, mense Augusto, à parte Orientis stella Cometes apparuit nimis radiis fulgentibus: quæ post in semetipsam reversa, disparuit. Nec mora, gravis pestilentia ab eadem parte Orientis secuta, Romanum populum devastavit. Sic ille, per tempora Pertharisth Regis Longobardorum, & Imperatoris Constantini Pogonati.*

Annum ipsum spectati hujus Cometæ designant alii plerique. Matthæus Westmonast. ad annum gratiæ DCLXXVII. *Sub his quoque diebus Cometa per tres menses apparuit, & unoquoque die manè velut Sol resplenduit. Sigebertus eodem anno 677. Ab Augusto per tres menses stella radiis calos penetrans, à parte Orientis, à galli cantu usque in manè apparebat; & maxima mortalitas à parte Orientis subsecuta est.* Distinctiùs Anastasii Bibliothecarii liber de Romanis Pontificibus in Dono LXXIX. *Hic Papa, inquit, dum esses electus, per Augusti mensim apparuit stella à parte Orientis, à galli cantu usque manè, per menses tres; cuius radii calum penetrabant. In cuius visione surgentes omnes provincia & gentes, mirabantur quidnam esse posset. Quæ post in semetipsam reversa disparuit. Post eam apparitionem maxima mors à parte Orientis subsecuta est.* Electus est Donus anno 676. 1. Novembris; sedit annum unum, menses quinque, dies decem. Ex quo firmatur epocha Cometæ: menses enim Augustum & duos sequentes non vidit in suo Pontificatu Donus, nisi anno Christi 677. Ex Anastasio Hermannus Contractus Henrici Canisii, ad annum 676. quo iniit Donus Papa: *Cometa per tres menses visus, & magna hominum pestilentia in Oriente subsecuta est. Quid sit illud, à galli cantu usque manè, discite ex Censorino, de die natali, cap. 24. Tempus quod huic (nocti scilicet medix) proximum est, vocatur, De mediâ nocte: sequitur gallicinium, cum galli canere incipiunt; dein conticinium, cum conticuerunt: tunc Ante lucem;*

& sic diluculum, cum Sole nondum orto, jam lucet. Secundum diluculum vocatur manè, cum lux videtur Solis. Duos tamen galli cantus nocturnos distinguit Christus, Marci 14. v. 30. cum ait Petro: Tu hodie in nocte hac, priusquam gallus vocem bis dederit, ter me es negaturus. Tum v. 72. Et recordatus est Petrus verbi quod dixerat ei Iesus: Priusquam gallus cantet bis, ter me negabis. Lucas, cap. 22. v. 59. inter secundam & tertiam Petri negationes intervallum fuisse ait quasi horæ unius, secundam negationem post pusillum à primâ contigisse notans: quare inter hos duos galli cantus haud multò majus quàm unius horæ spatium videtur intercessisse. Meritò tamen Scaliger, Exercitatione 239. & alii experti negant statas esse gallo canendi horas; quamvis ut plurimum ter in nocte canere dicantur: primò, semihorâ circiter post mediam noctem: iterum circa secundam aut tertiam horam, nempe post Censorini conticinium: tertio, manè, oriente Sole: Diemque venientem nunciant cantu, ipsum verò cantum plausu laterum, inquit Plinius lib. 10. cap. 21. De primo cantu accipiendum est Censorini, & vulgò dictum gallicinium, à quo usque ad manè, circa æquinoctium horæ sunt ferè quinæ cum dimidiâ. Per hoc ergo tempus apparebat Cometa ille anni 677.

Hanc istius Cometæ epocham confirmat Beda, ad finem Historiæ gentis Anglorum. *Anno, inquit, DCLXXVI. (sic enim lego in codice S. Maximini Trevirensis, bonæ notæ, & pervetusto) Cometa apparuit. Vilfrid Episcopus a sede suâ pulsus est ab Ecgfrido Rege. Explicatiùs autem lib. 4. cap. 12. Anno Dominica Incarnationis sexcentesimo septuagesimo septimo, qui est annus imperii Regis Ecgfridi octavus, apparuit mense Augusto stella quæ dicitur Cometa; & tribus mensibus permanens, matutinis horis oriebatur, excelsam radiantis flammæ quasi columnam præferens. Quo etiam anno, ortâ inter ipsum Regem Ecgfridum, & reverentissimum Antistitem Vilfridum, dissensione, pulsus est idem Antistes à sede sui Episcopatus. Utrobique in vulgatis pro anno 677. legitur 678. quæ lectio non tantùm emendatur ex manuscriptis melioris notæ exemplaribus, sed etiam ex libri ejusdem 14. capite quinto, ubi asserit Beda, anno Incarnationis DCLXX. mortuum Osuin Regem Northanhymbrorum, x v. Kalendas Martias, Ecgfridum filium regni*

regni heredem, reliquisse. Ex quo evidens est, mense Augusto illius anni 670. numeratum jam fuisse Ecgfridi Regis annum primum, adeoque octavum ejusdem regni annum mense Augusto in annum Christi 677. concurrisse.

Hic ipse est Cometa cujus meminere ad annos 676. 677. & 678. recentiores aliquot Chronographi; neque in duos aut tres diffundendus, ut fecisse videtur Stanislaus Lubieniecus in *Historiâ Cometarum*, sectione secundâ, num. cXLVII. & cXLVIII.

Nunc ergo ad hujus sideris lucem, Childerici nece, & Theoderici monarchiæ exordio constitutis, cætera quæ vel priùs, vel posterius evenere, suis quæque temporibus redamus.

CAPUT VIII.

Ex principiis positis, Childerico anni monarchiæ tres, regni Austrasiensis quatuordecim; Clotario III. anni XIV. Clodoveo II. anni XVII. à Dagoberti patris obitu, & ab anno Christi 644. vindicantur.

DE Childerici regno libenter accipio annos quatuordecim, in brevissimo Tilliano Chronico adnotatos, apud Duchesnium tomo 1. pag. 781. Bellè enim respondent tempori quò Regina Balthildis, secundum prædictionem S. Eligii, (ut ait Audoënus in ejus Vitâ) *jure regio exempta, filios in Principatum reliquit*. Hic nimirum fuit annus Christi 663. (ut infra ostendam) à quo quartus decimus incurrit in annum 677. miserabili Childerici interitu cruentatum.

Hos porro Childerici annos quatuordecim, inter Austrasiense ejus regnum, & ejusdem monarchiam sic partimur, ut solis Austrasii imperariis annis solidis undecim; & annus ejus duodecimus, in Maricolenfi diplomate apud Henschenium, libro 2. de tribus Dagoberti, cap. 4. adnotatus, idem fuerit ejus monarchiæ primus, Christi (secundum nostram chronologiam) sexcentessimus septuagesimus quintus. Henschenium (qui Vindicianum Episcopum his tabulis subscri-

ptum, sequenti dumtaxat anno 676. inisse affirmat) refellit Cointius anno 669. n. x. ex Mirao docens , ordinatum fuisse Vindicianum octavo Kalendas Julii , Dominicâ die, adeoque anno 669. litterâ G. signato.

Frustrà autem objiciat quis, videri Auctorem Vitæ S. Balthildis, Childerici in Austrasiâ regnantis exordia cum Clotharii in regno Neustrico initiis conjunxisse, cum ait, *tunc* illum Austrasiis datum Regem, cum Clotharius in tutelâ Balthildis matris, Clodoveo patri successor proclamatus est. Hunc enim locum (quem aliâ occasione descripsimus hujus Diatribæ capite XI.) si quis propius inspexerit, intelliget, particulam illam, *tunc*, ad totam Balthildis administrationem extendi, quam ut minimùm triennalem fuisse credimus. Nam ibi legitur, quòd mortuo Clodoveo, successit illi Clotharius, tuncque pacem fuisse in toto regno; tunc & Childericum datum Austrasiis Regem, & Burgundiones Franciis fuisse unitos; & *Dlo gubernante juxta domne Balihildis magnam fidem* tria regna pacis inter se tenuisse concordiam. Austrasiam cettè à duobus aliis regnis sejungendi, quantum conjecturâ consequi possum, occasio fuit sævitia Ebroïni, & tyrannicus dominatus, quo & Dalphinus Lugdunensis Præfectus, & frater ejus Ansemundus Episcopus, adornatis in eos calumniis sublatis sunt, anno (ut infra ostendemus) Christi 663. cum similia, ac etiam graviora Austrasii capitibus suis imminere cernerent, nisi & proprium Regem, & proprios Præfectos à Neustriciis ac Burgundicis Magistratibus planè immunes penès se haberent.

Nec verò his Childerici exordiis obstat Childebertus Grimoaldi filius, cui citatum breve Chronicon, apud Duchesnium, tomo 1. pag. 781. septem Austrasienfis regni annos assignat, à Sigiberti Regis obitu, adeoque à Kalendis Februarii anni 660. ad annum usque 667. computandos. Plerique enim Childeberto huic paucos dumtaxat regni menses adscribunt: ac si ad septem annos Sigiberto superstes fuit, exiguum tantùm Austrasie partem obtinuit; putà Remensem Campaniam, ubi Nivardo Remensi Archipræsuli immunitatis quoddam privilegium impertit, ut in Vitâ S. Nivardi refertur, & à Flodoardo, lib. 2. Historiæ Ecclesiæ Remensis, cap. 7. Childerico interim latè dominante ab eo, quem di-

ximus, anno 663. qui & Balthildi ejus matri administrationis ultimus fuit.

Ex Camuzati Promptuario describit Cointius tabulas Childerici Dervensibus datas, 1 v. Nonas Julii, anno tertio regni ejus; & alteras Berchatii Dervensis Abbatis, datas Remis, 111. Kalendas Septembris, præfente ipso Childerico Rege: quibus utrisque subscriptus legitur cum Nivardo Remensi Archiepiscopo Leodegarius Episcopus Augustidunensis; quas, nisi à librario deperitæ sunt, putamus de Childerici Austrasiensi regno intelligendas: cujus regni annus tertius & quartus, fuerunt Leodegarii Episcopatus secundus & tertius.

At Childerici monarchia triennalis fuit, teste Ursino, in Vita S. Leodegarii, ubi asserit, concessisse S. Leodegarium in Monasterium Luxoviense, cum *annis fere tribus* in Childerici Monarchæ palatio fuisset versatus. Quod & confirmant Acta S. Ragneberti Martyris, ab Ebroïno interfecti: in quibus Clericum & Monachum exuisse dicitur Ebroïnus *post triennium*, ex quo Luxovium relegatus fuerat. Idem enim fuit & Ebroïni monachismi, & Childerici monarchiæ initium, idémque terminus. Quattuor annum Childerici, Dervensibus tabulis inscriptum, non esse monarchiæ, sed regni Austrasiensis annum suprà jam monui. Anno Christi 677. fuit Pascha 1 v. Kalendas Aprilis. Hoc Pascha egit Childericus Rex Augustoduni, à Leodegario Episcopo invitatus, sed funesto eventu. Ibi enim Leodegarius Hectorem Patricium Massiliensem, nonnullorum criminum apud Regem delatum hospitio exceperat, ab eoque circumventus, ei faverat per imprudentiam in malâ causâ. Eamobrem Leodegarius, qui eatenus Regi acceptissimus fuerat, excidit à Regis gratiâ, cujus amore in odium, ac penè in furorem versò, necesse habuerunt Hector cum Leodegario fugâ sibi consulere. Fugiens Hector, à regiis satellitibus oppressus, trucidatusque est. Leodegarius vix vitâ impetratâ, Luxovii inter Monachos exulare est permissus. Sed *divina non diu distulit ultio suum de Childerico dare judicium*: (inquit Anonymus, qui Vitam S. Leodegarii Ermenario ejus successoris inscripsit) *nam ejus dissoluta conversatio omnibus increverat Optimatibus palatinis. Tunc unus ex eis, molestius ferens præ ceteris, dum*

venationem in silvâ securus exerceret, cum vulnere mortis percussit. Sic habet manuscriptus codex Broviensis, ex quo descriptam hanc Vitam olim ad me milit amicus meus Pater Bollandus.

Si verè adscribitur *Excacatio gloriosissimi Martyris Leodegarii v.iii. Kalendas Septembris*, ut legi in antiquis membranis, Childerici cædes haud procul exeunte Julio, vel Augusto ineunte, perpetrata dicenda est; nec in autumnum regii venationibus opportunum referenda, cum non rarò æstivos dies autumnali par amœnitas temperet.

Æstas anni 674. quæ Childerico monarchiæ initium dedit, eadem & Clotario ejus fratri ac decessori fuit suprema. Cur à Fredegario, & plerisque aliis Scriptoribus, quatuor dumtaxat annis regnasse memoretur, infra aperiam: nunc à patris obitu quantum regnarit, definiendum est. Quintum ejus regni annum exhibent tabulæ ab eo datæ Corbeienfi Monasterio, apud Sirmundum, tomo 1. Conciliorum Galliar. Sextum S. Audomarus, Teruanensis Episcopus, apud Jacobum Malebranchum, in Scholiis ad librum 1 v. de Morinis, cap. 3. & Johannes Iperius, in Chronico Bertiniano. Septimum, Bertheфридus, Ambianensis Episcopus, apud Sirmundum, tomo 1. citato Ursinus in Vitâ S. Leodegarii ad Ansoaldum Pictavensem Episcopum, scribit de Leodegario, quòd cum Ecclesiam Augustodunensem per annos decem strenuè gubernasset, *Rex Clotharius, qui eum Episcopum constituerat, defunctus est.* En Clotarii regni annos decem. Ergo qui obiit anno Christi 674. decem antè annis, hoc est, anno 664. Leodegarium Episcopum constituerat. Anonymus in Vitâ ejusdem Leodegarii, hunc ait Augustodunensibus datum fuisse Episcopum à Balthilde Regina, *qua cum Clothario filio Francorum regebat Palatium.* Quod intellige de pio Reginæ consilio, quæ jam ex anno 663. in Calæ Monasterium se receperat, ut infra apparebit ex tempore martyrii S. Annemundi, Lugdunensis Episcopi. Melchior Regnaldus in Epitome historica urbis Sueffionis, Probationum folio secundo profert tabulas Dranscii, seu Dranscionis, Sueffionensis Episcopi, pro Monasterio Beatæ Mariæ in eadem urbe fundato ab Ebroïno, Majore-domûs regis, ejusque conjuge

Lentruide ; & Bovone filio , quarum hæc est subscriptio : *Actum Augusta Sueffionum , sub datâ vi. Kalend. Iunii , anno decimoquarto regni Domini nostri Clotharii gloriosissimi Regis.* Nec verò ultra hunc annum regnasse Clotharium , docet nos Auctor antiquus Vitæ S. Wandregisili , apud Surium , xxii. Julii , cap. 14. *Postquam autem , inquit , excessit è vitâ Clodoveus Rex , remansit Balthildis Regina cum tribus filiis , Clothario , Childerico , ac Theodorico ; è quibus Clotharius , qui major natu erat , fastigium adeptus est Regni , rexitque populum Occidentalium Francorum annis quatuordecim.* Anno porro regni quattuordecimo , non completo , sed labente , Clotharium vivere desiisse significat , cap. 21. his verbis : *Balthildi namque Regina , relicte Clodovei Regis , obitus trium filiorum , ac successiones exposuit , (S. Wandregisilus) è quibus Clotarius , qui major erat natu , quatuordecimum regni annum agens , consortiis subitò caruit humanis.* Cujus igitur obitum retulimus in ætatem anni 674. illum vel exeunte anno 660. vel ineunte 661. regnate cœpisse oportuit.

Nunc ad Clodoveum II. retrocedendo accedamus. Natus est , ut opinor , anno Dagoberti in Austrasiâ regnantis duodecimo , Christi 634. Illi annos regni sedecim tribuunt plerique omnes , nempe Gesta Francorum , cap. 44. Aimoinus lib. 4. cap. 43. Vita S. Baboleni Fossatensis Abbatis. Duo Chronica Jurensia usque ad Ludovicum Juniorem perducta , Erchamberti Fragmentum apud Duchesnium , tomò 1. pag. 780. & Genealogia Regum Francorum , ex veteri codice Regis Britannæ , tomo eodem Duchesnii , pag. 794. Exstat in archivo Dionysiano præceptum Regis hujus , de libertate Monasterii S. Dionysii , datum anno regni ejus sextodecimo , ad x. Kalendas Julii. Fredegarius vulgatus , cap. 91. regni annos ei tribuit xviii. uti & Benignianum ac Bezuenſe Chronica : at Fredegarius noster manuscriptus pervertulus , & bonæ notæ , tantum xvii. Item , Auctor Vitæ S. Balthildis , apud Bollandum , xxvi. Januarii , cap. 2. *Interèd , inquit , Dominus Rex Clodoveus vir ejus , gratiâ evocante divinâ , xvii. regni sui anno rebus exemptus humanis , migravit à seculo.* Lucem hic afferret dies obitus Regis hujus , sicubi adnotatus reperiretur. Obiisse illum cenſeo anno regni

398 DE ANNIS DAGOBERTI
sexto decimo completo, & labente xvii. adeoque anno
Christi 660. exeunte, vel incunte 661. ætatis suæ xxvi.

CAPUT IX.

*Ex dictis, consequentia nonnulla ad septimi post Christum sæculi
rectam chronologiam deducuntur. Unus, idemque est Lugdu-
nensibus Annemundus Episcopus, qui Bede Dalsinus.*

IN vulgaris Bedæ exemplaribus legitur, lib. 5. Historiæ
Ecclesiasticæ gentis Anglorum, cap. 20. Dalsinum Lugdu-
nensem Episcopum, cui adhæserat Wilfridus, & in Cleri-
cum ab eo attonsus fuerat, crudeli morte præreptum esse. Nam,
inquit, Brunechilda Regina missis militibus Episcopum jussit in-
terfici: quem ad locum quidem quo decollandus erat, secutus est
Wilfridus Clericus illius, desiderans cum eo (tamen ipso mul-
tū prohibente) pariter occumbere. Sed hunc ubi peregrinum,
atque oriundum de natione Anglorum cognovère carnifices, pe-
percere illi, neque eum trucidare cum suo voluere Pontifice. At
ille Britanniam veniens, conjunctus est amicitiiis Aldfridi Regis,
&c. Mendum hoc in Brunechildæ nomine attripuere, Cæsar
Baronius ad annum Christi 614. num. 1 v. Joannes Chenu, &
Jacobus Severtius in Archiepiscopis Lugdunensibus, necnon
Theophilus Raynaudus, in Indiculo Sanctorum Eugdunen-
sium: rati nimirum in sanctam Balthildem Reginam cadere
non potuisse tam execrandum facinus; certique æqualem
ei fuisse Annemundum, Dalsinum putarunt à Brunechilde
nequissimā feminā interfectum; atque ab eo Annemundum
quinquaginta ferè annorum intervallo discrevere. Verū po-
terant hi ex Bedæ animadvertisse, Wilfridum (qui Dalsino
ad usque supplicii locum comes adfuit) haud multò post ab
ab Agilberto Parisiensi Episcopo, in villā regiā Compendio
Episcopum fuisse consecratum anno Christi 664. cum ipse
annorum esset ferè triginta: unde apparet, viginti circiter
annis antequàm natus esset Wilfridus, interiisse Brunichil-
dem (nempe anno Christi 614.) de illā pœnas sumente Clo-
tario II. trium Regnorum recenti Monarchâ. Vel hinc igitur

mendum à librario agnoscere poterant apud vulgatum Bedam, apud quem in codice S. Maximini Trevirentis vetulissimo, optimæque notæ, *Baldia Regina* habetur pro Brunichildâ. Et *Balthildem* apud Bedam legerat Willelmus Malmesburienſis; qui tamen libro 3. de geſtis Pontificum Anglo- rum, *furias infernales* ei immiſſas dicit, ut *Dalſinum poſt novem quos trucidarat Episcopos, accumularet in decimum*; Episcopos fortasse pro Regibus uſurpans, cum apud Fredegarium legiſſet, duodecim Reges à Brunichilde fuiſſe occiſos: neque cogitans, tot hæc parricidia Brunichildi convenire, cujus extremum ſupplicium, adminiſtrationem Balthildis, & Dalſini eadem quinquaginta propè annis præceſſit.

Idem igitur fuit Dalſinus Bedæ, qui Annemundus Lugdunenſibus: in quorum nihilominus tabulis *Dalſinum ſive Annemundum* Episcopum promiſcuè appellari obſervavimus; Annemundi appellatione poſtmodum ei reſervatâ, ut à fratre ſuo, cognomine Dalſino, nimirum Lugdunenſi Præſecto diſtingueretur. Quare Dalſini nomen, antiquæ familiæ videtur fuiſſe; è quâ non temerè quis ſuſpicetur, Dalſinorum Viennenſium, Avernienſium, ac Valentinienſium nobiliſſimas genres fuiſſe propagatas: mutaro deinde familiæ cognomine in prænomen dignitatis, præſertim cum Humbertus Dalſinus Viennenſis, anno Chriſti 1349. Comitatum Viennenſem, ſeu Delfinatum regiæ Francorum familiæ in perpetuum addixit, eâ ſux donationi appoſitâ conditione, ut primùm Francorum Rex ipſe, donec prolem mâſculam ſuſcepſiſſet, deinde ipſius Regis primogenitus, Dalſini nomen, & Dalſinatûs imperium obtineret. Quæ ſi ita ſe habent, eſt quòd amemus ac miremur divinæ conſilium providentiæ, quæ duorum Lugdunenſium Proregis & Episcopï, pro juſtitiâ nequiter interfectorum nomen non vindicariſ, modò ab oblivione, ſed etiam primùm in illuſtriſſimorum Comitum, deinde in Regum Chriſtianiſſimorum, eorûmque maximorum natu filiorum ſempiternum cognomentum crexerit. Cæterùm jugulatum potiùs, aut punctim confoſſum Dalſinum, quàm decollatum, (ut ſcripſit Beda) indicant cultelli duo cum aliis ejus reliquiis olim aſſervari ſoliti apud S. Petri Lugdunenſis Moniales. Cave autem exiſtimes (mi Lector) adhæſiſſe

Balthildi sanctissimæ Reginæ à Dalsinorum nece, aut injustitiæ, aut crudelitatis maculam. Non enim Dalsinum Episcopum *jussit occidi*, ut scripsit Beda ex vulgi famâ; sed delatum majestatis ad se adduci mandavit, purgaturum se de objectis, & à ministris indictâ causâ obtruncatum vehementer doluit. Debebat autem adornatas in eum calumnias non negligere, ne regni tum Administratrix, Regi filio suo, ac regno non satis cavere existimaretur. Nullâ igitur ejus culpâ, sed Annemundi potius æmulorum nequitia factum est, ut innocenti, sanctoque Episcopo vita eriperetur: aut si qua fuit Balthildis culpa, nimia credulitas fuit; quam quidem illi impingit Paradinus, lib. 2. Hist. Lugd. cap. 16. haud scio an satis prudenter. Nam quæ Erchinoaldi Majoris-domûs, Audoëni, Chrodoberiti, aliorumque magnorum virorum consiliis utebatur; quid poterat æquius statuere, quàm ut audiendus in aulam regiam adduceretur? Sed obsequentes non habuit ministros. Volebat nimirum Deus Annemundum sibi habere Martyrem.

CAPUT X.

Dalsinus, sive Annemundus, idem est in Vita S. Balthildis Sigobrandus.

HOc subodorari visi sunt eruditi viri Bollandus & Henschenius in Prænotationibus ad Vitam S. Balthildis, xxvi. Januarii, §. v. *Quid si*, inquiunt, *Sigobrandus ille, Annemundus fuit? Is sanè Sigonis filius fuit, quo alludere videtur Sigibrandi nomen. Et fortè cum secularibus studiis vacaret, Sigobrandus dictus post Annemundus. Quid quòd inter Francos superbiâ elatus dicitur, quasi ipse non fueris Francus? Et erat Annemundus Romanus. Sed de hoc plenius 28. Septembris. Patres Benedictini, secundo Sæculo Sanctorum sui Ordinis, in Observationibus præviis ad Vitam S. Balthildis, de propositâ quæstione hæc habent: Sunt qui Sigoberrandum seu Sigibrandum Episcopum, de cujus cade infra num. 10. agitur, eundem esse existiment cum Annemundo, qui à patris Sigonis nomine*

nomine Sigoberrandus cognominatus sit. Id sanè à vero non multùm recedit. Tum post aliquot versus : Ex his intelligitur, Sigoberrandi cadem eodem contigisse tempore, quo Annemundi Episcopi Lugdunensis : qui proinde non immeritò idem cum Sigoberrando fuisse videtur. Aliter visum Henschenio, libro 4. de tribus Dagobertis, cap. 2. ubi Sigobrandum Parisiensem Episcopum fuisse affirmavit : ex catalogis nimirum Episcoporum Parisiensium, in quibus Sigobrandus, sive (ut aliis effertur) Sigebandus, Sigoberrandus, Sigobrannus, aut Sigobaudus, post Chrodobertum, Landerici successorem, ponitur ; Importuni verò primùm, tum deinde Agilberti decessor affirmatur. Mihi verò non conjectura solùm, sed opinio est quammaximè probabilis, eundem ipsum qui Lugdunensibus Annemundus, Dalfinus Anglis apud Bedam, lib. 3. Hist. cap. 25. & lib. 5. cap. 20. audivisse in aulâ Regum Francorum Dagoberti, Clodovei II. & Clotarii III. Sigobrandum, seu Sigobrannum : quod his rationibus mihi sit, verosimile.

Primùm illud specto, quòd fuit Annemundus (ut in ejus Actis legitur) natione Romanus ; hoc est, non Gothus, non Francus, non Burgundio, aut ex aliis advenis ; sed Gallus indigena, qui Romanis moribus, legibúsque uteretur : quâ de acceptione vocis hujus nos alio loco pluribus. Sollemne autem fuit municipibus Romanis, præsertim nobilibus, plura in unum caput nomina congerere. Hinc Alcimus Ecdicius Avitus, C. Sollius Apollinaris Sidonius, Gaius Vedius Aquilinus Juvenus, (ut legimus in vetustissimo exemplari Evangelicæ Historiæ heroicis versibus ab eo descriptæ) & alii trinomines, aut quadrinomines. Ut mirum videri non debeat, Annemundo & genere claro, & Gallo indigenæ, Dalfini quoque, & Sigobrandi indita cognomina : quorum *Dalfinus* sit familiæ nomen, ut jam supra monui : *Annemundus* nomen proprium : *Sigobrandus* (quod Sigonis lumen, patris nimirum delicias sonat) agnomen amabili puero à patre aut matre adblandientibus impositum, cujus usus (ut non ratò in aliis observatum est) ad reliquam ætatem perduravit.

Nec verò tantùm id potuisse fieri, sed & reverà factum fuisse affirmamus, his argumentis.

1. Sigonis filius fuit Annemundus. Hoc porro veteri Gal-
lorum linguâ sonat Sigobrandi vocabulum, uti mox di-
ximus.

2. Extraneus Francis fuit Sigobrandus, *cujus superbia in-
ter Francos* (ait Auctor Vitæ S. Balthildis) *meruit mortis rui-
nam*; extraneus & fuit Annemundus, quippe genere Roma-
nus; hoc est, Gallus indigena.

3. Uterque Episcopus fuit, uterque cæsus, regnante Clo-
tario III. in tutelâ Balthildis matris; & quidem præter man-
datum piissimæ Reginæ, contrâque voluntatem. De Sigo-
brando apertè Auctor Vitæ S. Balthildis, ipsum *contra ejus
voluntatem* interfectum: unde auctores ejus patricidii, *me-
tuentes ne hoc ipsa Domna contra eos graviter f. met, ac vindi-
care ipsam causam vellent, permiserunt eam subito pergere ad ipsum
Monasterium*, quod illa sibi Kalæ præparaverat. Nec minùs
id certum de Annemundo, *cujus in Actis* habetur quòd in
suburbano Aurelianensi, occiso Dalfino ejus fratre, Lugdu-
nensi Præfecto, mandatum est tribus Ducibus, *ut beatum
Annemundum Pontificem sub fidâ custodiâ Principi præsentarent*:
quod & se facturos, tres Duces Waldeberto Luxoviensi Ab-
bati cum asseveratione polliciti sunt Matiscone, quando il-
lum ab eo recedere jusserunt: unde & necato postridie An-
nemundo, aut doluerunt, aut se dolere finxerunt, quòd pro-
missis non stetissent. Ex quibus apparet, adornatâ calumniâ
adversùs Annemundum ab ejus æmulis, cavisse prudentissi-
mam Reginam, ne ille à se inauditus damnaretur: verires
porro ejus inimicos ne auditus absolveretur, ipsi verò talio-
nis rei fierent, regium mandatum prætergressos esse; & quam-
vis nihil resistantem, ultróque ad Regis tribunal se deduci
passum, indictâ causâ nefariè trucidasse in territorio Cabi-
lonensi, die mensis Septembris xxviii.

4. Utrique Episcopo fuit mortis causa eadem: Sigobran-
do *superbia inter Francos*, ut notat Auctor Vitæ S. Balthildis;
nempe ex vulgi sermonibus: unde ille in regni Procerum
odia, invidiamque incurrit. Annemundo Regis gratia, quem
de sacro fonte susceperat, à quo & præ cæteris diligebatur;
unde *cùm à fratribus celsior videretur in casu, incidit cunctis
in odium*. His adde ex Bedâ, lib. 3. Hist. cap. 20. quòd Dal-

finus Episcopus Wilfrido cum neptis nuptiis *offerebat ut (si vellet) partem Galliarum non minimam illi regendam committeret* : quæ verba & liberalem sancti viri animum redolent, ac tantumnon regios spiritus, summamque per ea tempora in regno auctoritatem : qui sanè in æmulatorum animis invidiæ fomes fuit.

5. Verùm ultrò hoc concedamus adversariis, diversum fuisse ab Annemundo Sigobrandum; illum Lugdunensem, hunc Parisiensem fuisse Episcopum: cum uterque sub regni Procuratrice Balthilde interierit, & posteriùs è duobus Sigobrandus, ut cujus nece indignata Regina gubernaculo cesserit; si jam antè Annemundus Francorum purpuratorum odiis oppressus fuerat, cur Balthildis Vitæ Auctor æqualis de tam sacrilego facinore ipsâ regnante perpetrato nullum verbum fecit? cur illa in sanctissimi juxta & innocentissimi Archipræsulis parricidas lege talionis non animadvertit? non saltem illos in ordinem redegit? aut si non potuit, (ut est femineum regimen timidum atque imbelles) cur non extunc regiarum curatum pertaxa Monasterio se abdidi? Nimirum hoc ultimum fecit, & hoc ejus Vitæ Auctor memoravit; quia & Balthildi, & ejus Vitæ Scriptori unus atque idem fuit Sigobrandus qui Annemundus.

CAPUT XI.

Dalsini, sive Annemundi, aut Sigobrandi cædes ad annum æræ vulgaris 663. referenda est: uti & qui eam proximè subsequutus est, Balthildis Regina, abdicatâ regni administratione, in Kalense Monasterium secessus.

QUA diligentia sanctus ac venerabilis Beda Presbyter, S. Vilfridi popularis sui, ac penè æqualis, chronologiam texuit, eâdem & S. Annemundi cædis tempus nobis quasi digito demonstravit.

Vilfridus cum esset annorum circiter triginta, ordinatus est Episcopus ab Agilberto Parisiorum Episcopo, in villâ regiâ Compendio, præsentibus aliis undecim Episcopis, anno

Christi 664. Beda lib. 3. Hist. cap. 28. lib. 5. cap. 20. & in recapitulatione chronica ad finem libri quinti. Natus ergo erat Vilfridus anno Christi 634.

Idem obiit quarto Idus Octobris, *Quindicies ternos postquam egit Episcopus annos.* Beda lib. 5. cap. 20. Præmiserat autem sub initium ejusdem capituli: *Eodem sanè anno quo hi* (nempe Rex Coenred, & Offa filius Sigberti Regis) *Britanniam reliquere, Antistes eximius Vilfrid, post XL. & v. annos accepti Episcopatus, diem clausit extremum.* Tum ad finem libri v. Anno DCCVIIII. Coenred, Rex Merciorum, *postquam quinque annos regnabat, Romam pergit.* Igitur obiit Vilfridus anno Christi 709. Episcopatus XLV. ætatis LXXV. Sed de triginta primis ejus annis tota est quæstio.

Cum annum attigisset ætatis quartumdecimum, addidit se Monasterio Lindisfarnensi inter Monachos, licet non Monachus; ibique *aliquot annos versatus*, Romam visere in animum inducit, ut quidquid vel ad ritus catholicos, vel ad Christianam pietatem spectaret, ex illâ totius orbis metropoli, velut ex fonte hauriret. Beda lib. 5. cap. 20.

Venit ad Reginam Eanfledam de se benè meritam; atque ab eâ mittitur ad Earconberctum, Cantiorum Regem, Reginæ Eanfledæ consobrinum; ac tum in disciplinâ fuit Honorii, ex discipulo magni Gregorii Papæ, Cantuariensis Archiepiscopi: ubi *aliquandiu demoratus*, socium Romani itineris accipit ex nobilibus Anglorum Biscopum, cognomento Benedictum. Beda ibidem.

Trajecto Oceano, Lugdunum ex itinere divertunt ad loci Archiepiscopum Dalfinum, sive Annemundum Sigonis filium, adeoque Sigobrandum. Vilfridum quidam opinantur ibi substituisse morbo præpeditum: quod Beda non dixit.

Tantam autem apud Dalfinum inuit gratiam, ut eum ille Romam præmisso Biscopo apud se retinuerit, ac suum facere voluerit, etiam fratris sui filix virginis nobilissimæ oblati nuptiis, cum partis Galliarum non minimæ Præfecturâ. Quod mirum est, videri Hadriano Valesio incredibile, cum à Bedâ asseratur libro 5. cap. 20. Scriptore accuratissimo, & illibata fidei, qui & Vilfridi suppar fuit, & hæc ex ejus ore potuit didicisse: necnon ab Eddio Stephano Presbytero & Monacho

ipsius Vilfridi æquali, in ejus Vitâ, quam ex Angliâ acceptam nobis exhibuit disertissimus ac diligentissimus rerum Benedictinarum illustrator Mabillonius, quarto suo Sæculo Benedictino. Sed excusavit Vilfridus, actisquæ quàm potuit maximis gratiis, aliud se vitæ genus professus est cogitare, Romæque adeundæ magno studio teneri, præsertim ut ibi catholici Paschatis tempus, ritumque edoctus, Scottos Quartadecimanos, ac tum adhuc judaizantes, errorem suum aliquando posset dedocere.

His votis annuit Episcopus, Romamque ut Vilfridus honorificè deducatur, curat, prius ab eo sponcione acceptâ, ut in reditu ad se divertere ne gravaretur. Ille Romæ cum multis mensibus, ait Eddius, loca Sanctorum omni die ad orationem circumiens, in Bonifacium Archidiaconum incidisset, eoque doctore (ut dicit Beda) *mensibus aliquot studiis occupatus felicius exegisset, rediit ad Dalsinum in Galliam, & sex annos apud illum commoratus, attensus est ab eo, & heres designatus.* Ita Beda lib. 5. cap. 20. ex codice Trevirensi, melius quàm in vulgatis editionibus, quæ Lugdunensi huic moræ tres annos dumtaxat assignant. Certè idem Beda, lib. 3. cap. 25. Vilfridum Lugduni apud Dalsinum Archiepiscopum multum temporis egisse affirmat, quod de sexennio pronius est interpretari.

Dalsinus interim per calumniam delatus læsæ majestatis, occiditur inauditus in agro Cabilonensi. Egressus Lugduno Vilfridus in Episcopi comitatu, ratus ei non solum in extremis adesse; sed (si ita res ferret) etiam comiotti, jussus est ad sua se recipere. Igitur ille in Angliam reversus, Aldfridum Regem, qui catholicas Ecclesiæ regulas sequi semper & amare didicerat, primo congressu sibi conciliat: unde & Rex illi *mox donavit* terram decem familiarum, & non multo post, Monasterium triginta familiarum. Sub hæc Vilfridus ab Agilberto adhuc Gevissorum, sive Occidentalium Saxonum Episcopo, Presbyter consecratur; statimque Colmanum, & Scottos alios Quartadecimanos, coram duobus Regibus disputatione habitâ confundit anno Christi 664. ut refert Beda, lib. 3. cap. 26. qui & sequenti capite 27. Solis eclipsim adnotat, conmissam *die tertio mensis Maii, horâ circiter*

decimâ diei : sive *quinto Nonas Maias* , ut inculcat libro de sex ætatibus , & in libro breviorè de ratione temporum , constanti errore : cui & adhæsit Hermannus Contractus. Evenisse enim hoc Solis deliquium biduo antè , hoc est , Kalendis ipsis Maiis , evincunt tabulæ Astronomicæ Vendelini , Petavii , Riccioli , & cæterorum , hujusmodi Solis & Lunæ concursuum fidissimæ testes. Natus Beda anno 672. hanc anni 664. eclipsim non observavit ; sed eam à senioribus memorari audierat , sub mensis Maii initia commissam. Confusus ergo Computum Beda , invento illius anni Aureo numero xix. quem in Calendario adnotatum videbat ad v. Nonas Maias , eâ ipsâ die Novilunium illud eclipticum adscribere non dubitavit. Regula erat Lesbia Aureus numerus ; quamvis illum ut divinum inventum venerata sit antiquitas. Hinc necessitas orta restituendi Calendarii , ut Solis ac Lunæ suis periodis definiti cursus , Christiani & civilis anni festa ac ferias justis spatiis metirentur.

Eodem anno 664. Agilbertum offensum , quòd Rex *Coinvalc* eo inconsulto Episcopatum ejus duas in partes divisisset , relicto Britannico suo Episcopatu , in Galliam rediisse , moxque Episcopatu Parisiensi donatum fuisse ; missumque ad se à Rege Aldfrido Vilfridum annorum circiter triginta , in villâ regiâ Compendio , undecim aliis Episcopis adstantibus , Episcopum consecrassè , testatur Beda locis à me hujus capituli initio citatis. Ad hæc Walbertum Luxoviensem Abbatem , qui Annemundo ad usque mortis pervigilium consolator aditit , constat mense Maio anni 665. è vivis abiisse. Quare Annemundi martyrium ante hos annos 665. & 664. evenisse necesse est. Nec verò ante anni 663. diem Septembris xxviii. posse assignari probat Reginæ Balthildis administratio ad hoc saltem tempus perducta , ut post conjugis Clodovei obitum , *aliquanto tempore* , seu *paucis annis* secundum S. Eligii vaticinium Regno præfuerit.

Mirè autem his calculis congruens est Vilfridi chronologia. Biscopium , cujus in comitatu Vilfridus fuit , Romam profectum esse anno 653. asserit Florentius Wigorniensis : at Ranulphus Castrensis , lib. 5. cap. 16. anno 654. Verè uterque , si anno 653. ex Angliâ in Gallias venit , sequenti 654.

Romam attigit. Sed cum prævenerat Vilfridus apud Honorium Cantuariensem Archiepiscopum, quem Beda, libro 3. cap. 2. obiisse dicit anno 653. pridie Kalendas Octobris. In Honorii disciplinā *aliquandiu demoratus* fuerat Vilfridus, cum ei supervenit Biscopius, itineris futurus comes. Ergo, si rectè conjicio, natus Vilfridus anno 634. Lindisfarnensibus se adjunxit anno 648. ætatis anno xiv. post annos quatuor, ætatis xvi. Christi 652. Honorium Archiepiscopum audit, ætatis xix. Christi 653. Lugdunum advenit; ubi ferè biennium commoratus, Romam profectus est, annos natus xxi. Christi anno 655. In itū & reditū, in visendis *per multos menses*, magnæ Romæ sanctis locis, in audiendo *per aliquot menses* Bonifacio de Paschate, ritibusque aliis Catholicis, non minùs annis duobus exegisse potuit. Sic Lugdunum ad Dalsinum Mæcenatem suum redierit, ætatis suæ anno xxxi. Christi 657. His adde *sex annos* in Dalsini familiā transactos, perveneris ad annum ætatis ejus xxxix. Christi 663. quo Dalsinum adoptivum suum parentem die mensis Septembris xxviii. nequiter occisum luxit. Sequenti 664. primū consecratus Presbyter, mōxque profligatis Scottis Quartadecimanis ordinatus est Episcopus, *cū esset annorum circiter triginta.*

Nec te moveat quod leges apud Hugonem Flaviniacensem à Labbeo editum tomo 1. Bibliothecæ, pag. 102. *Balthildis, missis militibus, Dalsinum Lugdunensem Episcopum interfecit anno dclxi. Incarnationis Dominicæ; à quo consecratus est sanctus Vilfridus Eboracensis Episcopus.* Nam in hujus Operis autographo codice, qui in manibus est, lego [*à quo tonsuram a. . . . sanctus Vilfridus:*] quod Labbei properantis diligentiam fugit. In lacunā reponendum, *acceperat.*

Ex istā igitur S. Vilfridi chronologiā, tum Venerabilis Bedæ, tum Eddii Stephani æqualium Scriptorum firmatā testimoniis apparet, sanctum Dalsinum, sive Annemundum non anno Christi 657. ut censuit Mabillonius, sed anno 663. fuisse interfectum; adeoque standum esse in communi sententiā, quæ Dagoberti regnum Burgundicum ad annum sextumdecimum protendit, ejusque obitum adscribit anno Christi 644. Quam sententiam, majorum exemplo, ample-

xus Henschenius, nunquam retractavit, ut visum est nonnullis; sed Valesium & Cointium prius facere admonens, *ne dum moliantur adiculam construere, basilicam destruant*, adjungit candore Belgico (& ne quid ex contentione super Dagoberti secundi regis annalibus primò restituti, amatoris collegisse videretur) quædam diverticula, quæ nec ipsi, ejus maximè intererat, Mabillonio probata sunt: qui idcirco de capite quæstionis, hoc est, de Audoëni & Eligii ordinationum chronicis characteribus ampliùs pronunciat, aliquid expectans, quo tam evidenti certoque argumento satisfaciat, quod nunquam vel inventurus, vel reperturus est: una est enim, Solis instar, cujusque objecti veritas, cujus lumini nullis tergiversationum nebulis obstrui potest. Magnopere autem miror quòd ex codice Thuaneco ad numerum 780. idem Mabillonius opinioni suæ pondus ac momentum quæsierit, in cujus nescio quo diplomate concurrunt, ut existimat, Johannes Papa quartus, & Clodoveus Francorum Rex eo nomine secundus. Cum enim lègo in eo scripto, *Monasterium illud beate genitricis & semper virginis Maria, vel sancte Columbanæ, vel sancte Agathæ, seu aliorum sanctorum Martyrum, in loco qui nuncupatur Ill. super pago Ill. quod viri magnifici Ill. pia devotione dediti, &c. construxisse noscuntur*; intelligo, formulam hanc esse, seu specimen privilegii, cuius Puellarum Monasterio concedendi; non autem ipsasmet tabulas, quæ certis temporum characteribus notari, & monogrammate, signoque, ac sigillo ad fidem faciendam muniti solent. Tales inveni non unas formulas in quarundam Ecclesiarum antiquis membranis descripras, adjecto etiam Ludovici Pii ac semper Augusti nomine, quæ Notariis conficiendi publici instrumenti ideam præbent; sed nihil certi exhibent ad rerum, locorum, ac temporum definienda adjuncta; & idèò tabulæ non sunt, sed tabularum dumtaxat adumbrationes ad usum Notariorum.



CAPUT XII.

Satisfit nonnullis in præmissam S. Annemundi, Lugdunensis Archiepiscopi & Martyris, chronologiam objectis.

HACTENÙS diximus trinominem fuisse Annemundum, haud certè alium à Dalfino & Sigobrando; ac secundum illius necem anno Christi 663. 1 v. Kalendas Octobris perpetratam, abire Balthildem in Calense Monasterium, non tam permissam fuisse quàm compulsam ab ejus interfectoris; veritis nimirum ne innocentissimi Præsulis cædem magnanima Regina illorum sanguine expiaret. Quare ab obitu Clodovei II. Regis, ejus relictæ administratio tres ferè annos tenuit: quæ tamen periodus his argumentis videtur labefactari.

1. Ex Vitâ S. Bertilæ, Kalensis Abbatissæ, hoc habemus, in ejus disciplinam concessisse Balthildem Reginam, jam *Clotario filio adulto*: quam ætatem opinatur Henschenius, lib. 1. de tribus Dagobertis, cap. 11. & lib. 4. cap. 2. fuisse annorum ferè xvi. quos negat potuisse attingere Clotarium ante annum Christi 670. ab obitu Clodovei parentis, ut putat, circiter octavum. Cointius verò, qui natum vult Clotarium anno 651. obiisse porrò Clodoveum ejus patrem, anno 655. nec Balthildem jure regio fuisse exemptam, nisi anno 665. consequenter decem annos imputat Balthildis administrationi. Quæ certè manifestè adversantur Audoëno affirmanti, illam secundum S. Eligii prophetiam *pauca annis* regnum obtinuisse; quos de triennio nos rationabilius interpretamur. Nihil obstante ætate Clotarii, quem natum supra diximus anno xii. Dagoberti in Austrasiâ regnantis, Christi verò 634. qui si anno ætatis xvi. suscepisse ponatur ex Balthilde Clotarium primogenitum, fuerit ille autumno vel hieme anni 663. annorum saltem xiv. quo anno quartodecimo expleto, & libato quintodecimo, adulti post omnem memoriam habiti sunt, & nunc etiam censentur Francorum Reges.

11. Neque opponat quisquam, subscribere, aut saltem memorari Balthildem Reginam, Clotarii filii annis quinto &

septimo: potuit enim his piis officiis intendere, Kalensî Monasterio jam recepta: unâ & Leodegarium ad Æduenses insulas promoveri curare anno 664. & alias ejusmodi quas vocant gratias conferre, aut conferri rogare; dum à militiâ, à palatinis & politicis negotiis, cæterâque imperii regii supremâ potestate abstineret. Quanquam de S. Leodegario infra ostendam, missum videri ad capessendum Episcopatum Augustodunensem à Clotario & Balthilde matre simul regnantibus sub finem anni 663.

III. Ab Ebroîni principatu alia movetur difficultas; nempe à Cointio, qui anno 660. Clotarii III. quinto, illum Erchinoaldo Majori-domûs in Principatum successisse asserit ex Anonymo in Gestis Francorum, & ex Fredegarii Continuatore. Ait autem Auctor antiquus Vitæ S. Balthildis, hanc post obitum Clodovei conjugis, regno Francorum præfuisse cum filio Clotario, opem suam & consilia conferentibus præcellentibus Principibus, *Chroberto Episcopo Parisiaco, & domno Audoëno, seu & Ebroîno Majori-domûs*. Igitur ex hypothesi, anno quinto Clotarii, qui nobis est Christi 665. adhuc regno præerat Balthildis, quam tamen nos anno 663. abdicatam, & Kalensî Monasterio receptam fuisse diximus. Verùm, procedit, ut monui, ex hypothesi hæc Cointii ratiocinatio. Nobis verò hoc primùm constat ex Audoëno in Vitâ S. Eligii, Erchinoaldo Eligium fuisse superstitem. Obiit autem Eligius Kalendis Decembris anni 661. quare & mors Erchinoaldi, vel anno eodem 661. vel etiam præcedenti 660. assignanda erit, Clodoveo II. Rege, vel adhuc superstitè, vel haud multò antè extincto. Nihil igitur hoc facit ad moram injiciendam abdicationi sanctæ Balthildis; cum eam appareat, jam ab initio sui regiminis, Ebroîni Majori-domûs consiliis usam. Sanè quamvis Acta S. Annemundi nusquam Ebroîni mentionem faciant; tamen recentiorum Paradini, Severtii, Valesii, & aliorum prudens conjectura est, istâ innocentissimi ac sanctissimi Archipræsulis atrocissimâ necè prælusisse cruentam bestiam illi lanienæ, quam postmodum Clotario III. & fratre ejus Theoderico, regni solium occupantibus, in Ragnebertum, Guayrenum, Leodegarium, aliósque Regni Proceres exercuit.

IV. Nunc de Sigobrando pauca. Henschenius lib. 4. de tribus Dagobertis, cap. 2. Sigobrandum, cujus cædes Reginam Balthildem in Monasterium compulit, putat fuisse Parisiensem Episcopum; & quidem successisse Agilberto, Chrodoberto autem decessisse in Episcopatu. At vulgati Episcoporum Parisiensium catalogi omnes Chrodobertum ponunt Landerici successorem; decessorem porro Sigobrandi, quem proximè excipit Importunus, tum Agilbertus. Paulò aliter Cointius anno 654. num. xx. *Post Landericum*, inquit, *sedit Importunus, tum Chrodobertus, deinde Sigobrandus, cujus mors in annum Christi 664. incidit.* Sigobrando quoque successisse ait Agilbertum, cujus obitum rejicit in annum 680. ut verè de illo dixerit Beda, lib. 3. Hist. cap. 7. quòd *senex & plenus dierum* obierit. Mihi verò in hoc magis probatur Hadrianus Valesius, lib. 21. *Sigobrandus*, inquit, *falsò quibusdam Parisiorum Episcopus fuisse dicitur*: & hic certè xvo recentiore, ex Vità S. Balthildis malè explicatà, in Episcoporum Parisiensium seriem videtur fuisse inculcatus. Longissimè autem aberrat Henschenius, dum Sigobrandum successorem facit Agilberti, qui ex anno Christi 664. in multam usque Tenectam Parisiensis Episcopus fuit; ac deinde Sigobrando proximè subjicit Chrodobertum, quasi ipse sit ad quem Audoënus S. Eligii Vitam emisit: & non potius Chrodobertus seu Rodobertus Turonensis, ut egregiè docet Cointius anno 672. num. 111. Edidit Audoënus Vitam S. Eligii sub obitu Clotarii, fratribus ejus Childerico & Theoderico supersticibus, ac rerum suarum adhuc incertis. Narratis enim S. Eligii de familià regià prædictionibus, hæc addit: *Non post multos annos major natu ex ipsis, qui potissimum jus regum tenere videbatur, dum quietè tranquilleque regnaret, demum obiens duos superstites fratres reliquit. De ipsis jam quid agatur, solius Dei judicio definiri convenit.* Hic fuit, secundum nostram chronologiam, annus Christi 674. exiens, vel certè sequens 675. ante quem Agilbertus toto minimùm decennio Parisiensis Episcopus fuit; nempe ex anno 664. Præcesserat autem Agilbertum Importunus solo notus nomine; Importunum Chrodobertus ex anno 660. quo ei decesserat Landericus decimà die mensis Junii; cùm anno Clodovei II.

quintodecimo; Christi 658. Kalendis Julii immunitatis privilegium Dionysianis concessisset; ac subinde, anno 659. Clodovei xvi. præcepto ejusdem Regis de libertate Dionysiani Monasterii, x. Kalendas Julii fuisset subscriptus. Ille ergo Chrobertus seu Rodobertus, cui Audoënus anno 675. Vitam S. Eligii recognoscendam obtulit, Parisiensis Episcopus non fuit, sed Turonensis; quem Cointius ex anno 665. ad annos triginta, & usque ad annum 695. eam sedem obtinuisse prodit, suorum Annalium tomo III. & IV.

v. Restat ut Auctorem Vitæ S. Annemundi cum Audoëno conciliemus. Hic enim in Vitâ S. Eligii, lib. 2. cap. 33. (in nostro manuscripto codice) sic ait: *Sunt & alia multa quæ familiariter loquens (S. Eligius) sæpe prophetando prædixit. Sicut & de morte quondam Hariberti Regis, quam sicut prænuñciavit, ita post paululum evenit: & de morte Dagoberti incliti Principis, necnon & de natiuitate Lotharii junioris. Nam cum adhuc in utero esset inditus, & Regina magnopere id parviret, verens ne filiam ederet, & ob hoc Regnum subsumeret; [Hic nota illustre & antiquum vestigium Salicæ legis] veniens ad eam Eligius, alacriter eam recreavit; atque coram omnibus puerperam vocitans, partum ejus masculum prænuñciavit, suumque filium ex mysterio regenerationis fore prædixit: nomen etiam puero adhuc in alvo imposuit; & ad hæc omnia certius tenenda, quoddam opificium quod parvulo posset aptari, fieri rogavit, atque ad usus ejus, usquedum nasceretur, custodiri jussit. Hæc autem omnia, sicut prædixit, ita demum rei eventus probavit. Nam & Regina filium protulit, & Eligius eum filiolum habuit, ac nomen Lotharii, quod dudum indiderat, vocitavit. In Actis porro S. Annemundi asseritur, quod gratiâ plurimum valeret apud Clotarium tertium Principem, qui ejus de lavacro sacro fontis filiulus fuerat. Qomoddò igitur, inquires, Clotarius in Baptismate, & S. Eligii & S. Annemundi potuit esse filiulus? Id verò fuit perquam facile, si ab altero baptizatus, ab altero de sacro fonte susceptus est: sicut Symphorianum puerum legimus in ejus Actis, & in Chronico Benigniano, à S. Benigno baptizatum, & à S. Andochio de sacro fonte susceptum. Exurgit enim ex Baptismo, paternitatis spiritalis cognatio duplex; altera in baptizante, in sus-*

ceptore altera : quæ duæ cognationes post omnem memoriam in Ecclesiâ observatæ , etiam à Tridentino sacrosancto Concilio , (multis aliis extinctis) sess. 24. cap. 2. retentæ sunt. Unde apparet , cum qui Baptismo initiatur , non tantum patrini seu susceptoris , sed ejus etiam à quo baptizatus est , filiolum & esse , & dici debere.

CAPUT XIII.

*S. Sigiberti III. Austrasie Regis ex principiis positis
ordinata chronologia.*

AD finem Vitæ sancti hujus Regis , à Sigeberto Gemblacensi Monacho conscriptæ , lego apud Bollandum ,
1. Februarii : *Obiit autem Kalendis Februarii , ætatis suæ anno ferè tricesimo primo , regni vicesimo octavo , ab Incarnatione Domini anno sexcentesimo sexagesimo secundo , à transitu sancti Martini anno ducentesimo sexcentesimo tertio.* Idem habet manuscriptus codex , qui olim fuit S. Martini Metensis , nunc est Ecclesiæ Primatialis Nanceianæ , in quâ S. Sigiberti Regis corpus adhuc integrum cernitur. Epocham à transitu S. Martini , & à Christi Incarnatione deductam non excutio , ne longius digrediar. Henschenius in Commentario prævio ad Vitam S. Sigiberti , 1. Februarii , & in libro singulari de tribus Dagobertis , S. Sigibertum natum vult anno Christi 635. Dagoberti post patrem Monarchæ 1 x. creatum Regem Austrasiorum anno Dagoberti x 1. Christi 638. mortuum ætatis anno x x v i i 1. Christi 663. cum obiisset junior ejus frater Clodoveus II. præcedente anno 662. Verum superstitem fuisse Sigiberto Clodoveum , ex eo patet , quod supplicium sumpsit de Grimoaldo , qui post mortem Sigiberti , Dagobertum ejus filium per Didonem Episcopum Piætaventsem in Scotiam relegaverat , Childeberto filio suo in locum ejus Rege constituto , uti asseritur in ipsâ S. Sigiberti Vitâ , in Gestis Francorum , cap. 43. in Aimoino , sive ejus Continuatore , lib. 4. cap. 42. in Ademari Chronico Engolismensi , in Vitâ S. Remacii , in Vitâ recentiore S. Romarici , & passim

ab aliis Scriptoribus. Verùm, inquires, cur ista Grimoaldi vel pœna, vel proditio Fredegario intacta? Causa in promptu est, quia Childebrandi intererat (cujus jussu hæc Fredegario accessit appendix) non tradi Annalium monumentis vel nequissimam perfidiam, vel supplicium atrox Grimoaldi, quem Childebrandi avia Begga fratrem omnes scirent.

Cointius, tomo 3. Annalium, S. Sigibertum natum ait Januario anni 630. Regem Austrasiæ creatum 633. obiisse 1. Februarii 654. ætatis xxiv. Rectè ille quidem ex chronologicæ suæ principiis positus. Mihi verò sanctus idem Rex natus videtur anno octavo Dagoberti in Austrasiâ regnantis, Christi 630. mense Januario, Rex Austrasiis datus anno 633. ætatis suæ tertio completo, & labente quarto: mortuus 1. Februarii, ætatis xxxi. inchoato, regni xxviii. Christi 660. cùm adhuc in vivis esset Clodoveus, Grimoaldi prodicionis mox futurus ultor.

Ætatis & regni annos ex ipso ejus epitaphio, & primario monumento descriptos verisimile est à Sigeberto strenuo juvene, qui Metis versabatur, cùm hanc illius Vitam conscriberet: accuratè enim designati leguntur non tantùm in iis exemplaribus, quibus usus est Bollandus; sed etiam (ut monui) in antiquo ipso codice S. Martini Metensis, unde illos accepimus: & bellè conveniunt cum Vitâ S. Balthildis, ab Auctore coætaneo contextâ, in quâ hæc habentur: *Quid plura? Deo jubente Rex Clodoveus, vir ejus, migravit à corpore; relictaque sobole filiorum cum matre, suscepit illicò post eum filius ejus Clotarius quondam Francorum Regnum. Tunc etenim præcellentibus Principibus Chrodoberto Episcopo Parisiaco, & domno Audoëno, seu & Ebroïno Majore-domus, cum reliquis Senioribus, vel ceteris quampluribus, & Regno quidem Francorum in pace consistenti. Tunc enim nuper & Austrasipacifico ordine, ordinante domnâ Balthilde, per consilium quidem seniorum, receperunt Childevicum filium ejus Regem Austri. Burgundiones verò & Franci facti sunt uniti: & credimus, Deo gubernante, juxta domnâ Balthildis magnam fidem, ipsa tria Regna tunc inter se tenebant pacis concordiam. Ex his verbis Henschenius in Commentario prævio ad Vitam S. Sigiberti, §. x. numero 97. insinuari putat superfluum fuisse*

Clodoveo fratri Sigibertum, quod nos non probamus. Melius Cointius, cum anno 654. Sigiberti obitum adscripsisset, sequenti 655. Clodovei mortem assignavit. Et hæc quidem ex hypothefi suæ chronologiæ, qui Dagoberto à patris excessu decem tantum vitæ annos tribuit. Nos qui sedecim damus, in hoc tamen convenimus cum Cointio, quòd Clodoveum Sigiberto fratri uno dumtaxat anno superstitem fuisse credimus.

Nec verò ulla restat difficultas ex Vitâ S. Romarici Habendensis Abbatis, in quâ ille v. 1. Idus Decembris, Dominicâ die in cælum emigrasse legitur, paulò ante obitum S. Sigiberti Regis: unde Cointius & Mabillonius S. Romarici transitum anno adscribunt 653. isto dierum concursu signatum. Nam idem concursus Dominicæ cum octavâ die Decembris, anno pariter evenit 659. cujus in proximas Kalendas Februarias sequentis anni 660. felicem S. Sigiberti ad cælites abscessum, tum ex annis regni & ætatis in ejus Virâ assertis, tum ex obitu junioris ejus fratris Clodovei proximè secuto, potiori ratione concessimus.

CAPUT XIV.

Sancti Eligii Episcopi obitus anno suo redditur, ejusque regiminis Episcopalis definitur periodus.

SANCTI Eligii & S. Audoëni ordinationem refert Cointius in annum Christi 640. diem Dominicam ante Litanias, mensis Maii primam & vigesimam. De obitu porro S. Eligii hæc habet anno 659. num. xiii. *Eligius, Noviomensis ac Tornacensis Episcopus, qui Erchinoaldum Majorem-domus, ut supra dictum est, hoc anno sepultura mandavit, obiit etiam hoc anno, Kalendis Decembribus, quibus coli solet. Paucis ab Erchenvaldi exitu diebus (inquit Buzelinus, lib. 2. Anal.) mense Decembri vitam cum morte commutavit S. Eligius. Vixit Eligius annis amplius septuaginta, sedit annis undeviginti, mensibus sex, diebus decem. Nostra chronologia favent Jacobus Vassorius, alique, qui volunt Eligium annis ne-*

venedecim sedisse, quamvis in annotandis annis Christi non parum à nobis dissentiant.

At nos suprà ostendimus, ordinatos fuisse Eligium & Audoënum Rotomagi, die mensis Maii xiv. incurtente in Dominicam ante Litanias, anno Christi 646. Clodovei juven- culi adhuc Regis tertio. S. Eligii periodum Sedis dabit obi- tus ejus anno suo redditus: nam de die, quæ fuit prima De- cembtis, nemo negat, ex fide omnium Mattyrologiorum, & S. Audoëni in ejus Vitâ.

Supertstes fuit Clodoveo Regi S. Eligius, quem scilicet (Audoëno teste) triginta antè diebus è vivis abiturum præ- dixit: & refert Clarius in Chronico S. Petri Vivi, quòd san- ctus Emmo, Senonum Archiepiscopus, privilegium libertatis, unà cum comprovincialibus Episcopis, Monachis S. Petri synoda- liter fecit temporibus Clotharii Regis, & Baltechildis matris ejus. In quo Conventu fuerunt Antistites gloriosi, S. Audoënus Archi- episcopus Rotomagensis, & S. Faro Episcopus Meldensis, sanctusque Eligius Noviomensis Episcopus, & S. Amandus Tregetensium Episcopus, cum aliis triginta Episcopis. Hæc ille ad annum d c lxxv. qui fuit Emmoni Senonensi supremus. Porro Clo- doveus, ut suprà ostendimus, naturæ debitum persolvit, vel anno vergente 660. vel 661. ineunte. Ad hæc, nuperrimè post obitum suum vir beatus (inquit Audoënus in Vitâ S. Eligii) in visione noctis cuidam persona in aulâ Regis habitanti appa- ruit: cui in habitu præfulgido assistens præcepit, ut sine aliquo cunctamine adiens Reginam Balihildem, commonere eam debe- ret, quòd insignia auri, gemmarumque ornamenta, quibus ad- huc in cultu utebatur, ob Christi jam reverentiam deponere non gravaretur. Quod cum is cui jussum fuerat, negligenter silendo præterisset, apparuit nihilominus & nocte secundâ, atque ead- em qua pridè eadem serie commonuit. Sed cum nec tunc quidem præsumpsisset ex visione Regina quidquam intimare, tertiâ ni- hilominus vice cum magnâ apparens comminatione: eadem quæ prius mandaverat, ingeminando subjunxit. Cumque nec sic quicquam Regina auderet indicare, emissâ subito corpori febre, capitis vehementer angi. Quem cum Regina egrotantem visitaret, san-ctus ag-ritudinis sciscitari studuit. Tunc ager opportunitate in- ventâ, secreta cordis detexit, mandata Regina indicavit, atque omnia

omnem ei tenorem visionis exposuit. Nec mora, & post rerum narrationem, discedente extemplo f. bre, sanitatem pristinam recepit. Regina verò non ambigua de Confessoris admonitione, omnia à se confestim ornamenta rejecit, nec prater brachiales aureos super se quicquam ornamentorum reservavit. Omnia itaque in elemosynis dispersiens, compitiora quaque in Crucis opere aptavit, quam nimirum eleganter perficiens, ad caput S. Eligii stabiliri precepit. Jussit præterea & crepam ex auro & argento mirificè fabricari, quam super Confessoris membra deponere deberet. In quo opere copiosam molem auri & argenti ipsa præbuit, dicens: Hic beatissimus multorum Sanctorum fabricavit sepulcra: & ego, ut dignum est, si quivero, fabricabo ei memoriam. Factumque est ita. Hæc Audoënus. At regium ornatum Balthildis Kalensi Monasterio recepta à se abjecerat. Igitur vitam exegit S. Eligius, dum adhuc illa in sæculo degens regni curam gereret. Concessit autem sancta Regina in Kalam, vergente anno 663. post S. Annemundi seu Sigobrandi necem, ut supra ostendimus. Eligium ergo vel anno 661. vel 662. ad superos emigrasse oportuit. Utro è duobus, nunc inquirendum.

Lucem fortasse huc afferet mors Erchinoaldi Majoris domus, quem sepelivit S. Eligius, eique, ut ait Cointius anno 659. num. xi. paucos dumtaxat dies supervixit. Chronicon Childebrandi Fredegario adjectum, cap. 91. postquam Clodoveum II. vitâ caruisse dixit, statim addit: *Franci quoque Clotharium filium ejus majorem in regno statuunt cum præfatâ Regina matre (Balthilde.) Eodem quoque tempore (expende hæc verba) mortuus est Erchannaldus, Major domus Palatii. Franci autem in incerto vacillantes, accepto consilio, Ebroinum in hujus honoris curam ac dignitatem statuunt.* Eadem & iisdem ferè verbis Gesta Francorum, cap. 44. & 45. Ex quibus videtur plurius eventuum quasi catenam: mortem Clodovei, Clotharii successionem in regnum sub tutelâ matris, Erchinoaldi obitum, Ebroini subrogationem in Majordomatum, cum aliquandiu vacillassent Franci, incerti nimirum quid in tanti momenti negotio consilii caperent. Porro inter Erchinoaldi & Ebroini principatus haud longam moram intercessisse significat Auctor Vitæ S. Balthildis, illam innuens ab

ipſo ſuz adminiſtrationis exordio conſiliis uſam , non tantum Chrodoberti & Audoëni Episcoporum , ſed etiam *Ebroini Majoris-domus.*

Hæc igitur rerum geſtarum ſeries ut ad annos Chriſti re-ducatur , videtur obuiſſe Clodoveus inclinante ad finem anno 660. vel ineunte 661. Mox ei ſucceſſorem proclamatum , quem natura obtulerat , Clotarium ejus filium primogenitum ; ſed ob immaturam ætatem in tutelâ matris. Haud multo poſt , ablatum è vivis Erchinoaldum , quem paucis exinde diebus conſecutus S. Eligius , anni ejusdem 661. Kalendis Decembribus ad cælites tranſierit. Si ita factum eſt , ſedie S. Eligius annos quindecim , meſes ſex , dies unum & viginti : tantumdem enim fluxit temporis à xiv. Maii anni 646. ad anni 661. Kalendas Decembres.

CAPUT XV.

Theoderici III. Regis tria regnorum diſtincta exordia. Clotario ejus fratri cur annos regni tantum quatuor tribuerit Auſtor Appendicis , juiſſu Childebrandi Fredegario adjecta.

JACOBUS SIRMONDUS tomo 1. Conciliorum Gallix , in Notis ad Concilium Rotomagenſe : Theodericus , inquit , poſt Paſcha regnare cœpit anno Chriſti DCLXVII. ut patet ex privilegio Vindiciani pro Eccleſiâ Atrebatenſi dato *Kalendis Maii , anno VII. Theoderici Regis , Indiſtione 1.* Itẽmque ex aliis Vindiciani ejusdem litteris , apud Baldericum in Chronico Cameracenſi , lib. 1. cap. 25. in quibus Leodegarius Episcopus ſubſcribit VII. *Idus Maias , anno VII. Theoderici Regis , Indiſtione II.* hoc eſt , juxta æram noſtram , Chriſti anno DCLXXIV. cujus anni meſe Maio ſecunda erat Indiſtio.] Primum hoc fuit Theoderico regnandi exordium , & quidem in Burgundiâ , duobus interim ejus fratribus , Clotario in Neuſtriâ , & Childerico in Auſtraſiâ regnantibus.

Cauſam inſiti hujus regni opinor fuiſſe idoneam ætatem in adoleſcente Principe , atque inſuper Burgundiæ Procerum ſtudia , proprium ſibi Regem votis omnibus depoſcentium ,

eoque spectantium, ut Ebroini tyrannicæ dominationis jugum excuterent, providerentque (ut ait anonymus Auctor Vitæ S. Leodegarii ad Ermenarium) *ne de unâ provinciâ Rectores in alias introirent, neque unus instar Ebroini tyrannidem assumeret, ut postmodum sicut ille, contubernales suos despiceret.* Id verò ut assequerentur Burgundiones, Austrasiorum stimulari exemplo, quibus jam pridem Rex proprius datus fuerat Childericus, Regem sibi postularunt Theodericum, qui in Burgundiam regnaturus concederet, ut tria regna (nempe Franciæ, Burgundiæ, & Austrasiæ) singula à singulis fratribus, & per Ministros indigenas regerentur. Iis ut satisfaceret, Rex quidem Burgundiæ creatus est Theodericus; sed tamen Ebroini astu apud fratrem Clotarium in Neustriâ retentus est, ut nimirum tam in Burgundiâ quàm in Neustriâ edicta regia de uno Ebroini ingenio nutûque prodirent: qui etiam tyrannicum edictum dedit, (inquit Anonymus citatus) *ut de Burgundia partibus nullus præsumeret adire palatium, nisi qui ejus accepisset mandatum.* Atque hanc vexationem magno suo dolore ac detrimento perpessi sunt Burgundiones usque ad obitum Clotarii: quo extincto, in tumultum prorumpentes cum Francis, Theoderico, (quem Neustriæ Regem Ebroinus ipsis inconsultis constituerat) ipsòque Ebroino de gradu dejectis, illum ad S. Dionysium, hunc in Luxovium compulerunt.

Hoc Theoderici regnum Burgundicum, quamvis in Annalibus, ut & alia septimi hujus sæculi pleraque silentio transmissum est; satis tamen deprehenditur ex Audoëno, in Vitâ S. Eligii, lib. 2. cap. 78. ita loquente: *Die igitur quidam duo Reges germani, Lotharius scilicet & Theodericus, egressi penes palatium, gratiâ illi orationis divertunt, (nempe ad vetus quoddam hospitium S. Eligii) ubi oratione factâ, cum redirent ad Regiam, &c.* Vides ut vivente adhuc Clotario, jam pleno jure Rex fuerit Theodericus? Alioqui certè non dixisset Audoënus, *duo Reges germani*; sed *Rex Clotharius cum Theoderico fratre.* Tempus inchoati hujus regni habemus ex laudatis tabulis Vindiciani Atrebatensis Episcopi: hoc verò Burgundicum fuisse confirmat testamentum S. Leodegarii, sive diploma quo Æduensi suæ S. Nazarii Ecclesiæ tradit villas

Mariniacum, Tiliniacum, de Olgeâ, & de Chanavis, anno tertio Theodenci Regis, sui Episcopatus septimo: quibus addit annum Dominicæ Incarnationis DCLIII. & Indictionem decimam, falsas quidem notas; sed ut in sæculi illius tenebris, tolerandas. Non enim accedo ad cruditos Criticos, qui omnes hujus testamenti characteres chronicos, de recentioris cujuspiam ingenio adjectitios esse opinantur. Clotarii Regis hic meminit Leodegarius, & Baltechildis Regina ejus matris; quorum scilicet beneficio Episcoporum Augustodunensem consecutus erat. Indictiones, & annos Christi jam inde à recepto Victorii Latereulo in Gallis fuisse adhibitos, suprà ostendi, quamvis ad Dionysianam methodum haud semper exactos. Ecquis legens apud Gregorium Turonensem, ad finem libri 1. Historiæ Francorum, obiisse S. Martinum anno à Passione Domini quadringentesimo duodecimo; non statim exclamet haud esse assertionem hanc à Gregorio ipso Turonensi, sed ejus scriptis ab imperito quopiam Neoterico illigatam? Sic & legens testamentum S. Leodegarii, notatum anno Incarnationis 653. Indictione decimâ; non illicò affirmare habet, temporis hos characteres, quia longè à vero aberrant, recentioris cujuspiam esse additamenta. Aberravit hic (farcior) Notarius Augustodunensis, & ipsemet fortè Leodegarius, à verâ annorum Christi epochâ; aberravit & Dionysius ipse, qui Christi Natalem quatuor aut quinque circiter annis adscripsit tardiùs quàm par erat: recepta est nihilominùs in usum totius orbis Occidentalis methodus Dionysiana; sed pederentim, & postquàm mos ille annos Christi appellandi, à recepto Victorii Cyclo duobus ferè sæculis per Gallias fluctuavit. At anni septimi Episcopatus sancti Leodegarii conjunctionem cum anno tertio regnantis in Burgundiâ Theoderici, non tantùm à S. Leodegario, vel ab ejus Noratio his tabulis fuisse adscriptam, sed & verissimam esse sic ostendo.

Iniit Theodericus in regno Burgundiæ, anno Christi 667. Indictione secundâ, ut ex dictis constat: tertius abhinc annus fuit 670. Porro hic ipse annus 670. fuit S. Leodegarii sedis septimus, deductus ex anno 664. qui fuit sedis ejus primus, ut suprà jam attigi, & post hæc etiam apertius faciam.

*Vide Coin-
tium, to-
mo III. an-
no 666. i
num. 10. x.
ad xxii*

Ex his autem quæ præmisimus, apparet ratio cur Auctor Appendicis Childebrandi curis Fredegario adjectæ, Clotario III. quatuor dumtaxat regni annos adscripserit: quam in sententiam recentiores ferè omnes abièrunt. Scripta est enim hæc Appendix in Burgundiâ, in quâ Childebrandum, ejusque familiam multos in Comites ac Proceres efflorescentem jam inde à Karoli Martelli temporibus constitutas sedes habuisse intelliget, qui Childebrandi & Nibelongi jussu adjectas Fredegario Appendices perlegerit, ac Burgundiæ veterum Ecclesiæ archiva, præsertim verò Patriciæense tabularium Stephani Perardi Collectioni illigatum diligenter excusserit. Res igitur Burgundicæ præ cæteris spectavit Childebrandi ille Annalium Scriptor. Porro quatuor tantum annos Clotarius pleno jure in Burgundiâ regnavit: nam ex annis quatuordecim quos illi vindicavimus, tres primos exegit in tutelâ matris, ab anno Christi 660. ad 663. septem postremis Rex fuit Burgundiæ Theodericus; ab anno 667. ad 674. mediis quatuor, à 663. ad 667. Clotarius utrumque Neustriæ & Burgundiæ regnum, matre Balthilde, jam in Kalense Monasterium semotâ, ipse administravit. Hos tantum quatuor regni Burgundici annos Burgundus Chronographus Clotario adscripsit, quos ad rem suam solos pertinere existimavit.

Alterum Theoderico fuit regni initium in Neustriâ, post Clotarium fratrem anno 674. vitâ functum: quod ille regnum ad paucos menses retinuit. Clarè id insinuat Anonymus in Vita S. Leodegarii. Exstincto enim Clotario, *Cùm Ebroinus, inquit, ejus fratrem germanum, nomine Theodericum, convocatis Optimatibus solummodo, ut mos est, debuisset sublimare in regnum, spiritu superbie tumidus eos noluit deinde convocare. Ideo magis capere metueret, eò quod Rex quem ad gloriam patriæ publicè debuerat sublimare, dum post se eum retinens promoveret, ille, cui malum cupiebat, audenter valeret inferre. Cùmque multis Nobilibus, qui ad Regis novi properabant occursum, mandante Ebroino itineris accepissent repudium, invito in communi consilio, relicto eo, omnes expetunt Hildericum, juniorem ejus fratrem, qui in Austrasiis sortitus erat Regnum. Sic lego ex Broniensi, & aliquot aliis bonæ notæ codicibus, paulò emendatius quàm apud Coincium anno 669. num. xii ubi Auctor*

(subdit Cointius) *70 juniorem*, non ad fratrem, sed ad Childericum referre voluit, ut Childericum hunc, cognomento Junio-rem, à seniore Childerico Clodovei primi patre distingueret. Nam cum res sui temporis in litteras referret; ignorare non potuit, Childericum natu majorem fratre Theoderico fuisse.] Hæc hausisse videtur Cointius, ex Hadriani Valensierum Francicarum libro XXI. sub cujus initium Theodericum, *Clodovei filiorum natu minimum* fuisse asserit: quod optarem ego antiqui alicujus Scriptoris auctoritate firmari. In primis enim præter morem est Scriptorum qui sub primâ Regum stirpe floruerunt, ut è duobus cognominibus Regibus *juniorem* appellent, qui à priore fuerit tanto intervallo discretus, quanto Childericus hic à Childerico Magni Clodovei parente, qui fuit avi ejus Dagoberti atavus. Immo in tertiâ Regum familiâ Ludovicus septimus non tulisset cognomen- tum *junioris*, nisi ut à patre Ludovico Crasso, à quo in regni societatem adscitus fuerat, distingueretur. Mihi certe dubium non est quin Auctor iste horum inspector temporum Childericum Theoderico fratre juniorem fuisse existimaverit, idemque cum illo (si tamen vera narrat) Franci ipsi Proceres senserint. Quorsum enim isti ad Theoderici *Regis novi properabant occursum*, nisi regnum illi jure debitum pro certo habebant? Quicquid enim sit de regno Burgundiæ, fueritne illis temporibus Austrasiensi potius, adeoque prius genito deferendum, dubitari nequit, quin Neustriæ seu Franciæ regnum quod Clotarius, ut primogenitus, obtinuerat, etiam post illum è duobus fratribus residuis prius genito deberetur. Accurrebant ergo undique Franci Proceres Theodericum salutaturi, suâque illi obsequia delaturi, quem legitimum suum esse Regem non dubitabant, quem *publicè debuerat sublimare* Ebroinus: à quo repulsam passi, & ad aulam accedere prohibiti, inito consilio, Childericum sibi Regem statuerunt, quando se intelligebant stare non posse in fide Theoderici, nisi pariter illi dominanti Ebroino cervices submitterent. Extremum hoc extremo malo remedium fuit. His adde, quod attonsus Theodericus, & à Childerico fratre interrogatus, *quid de se agi vellent*, hoc solum respondit ex Anonymo citato, *eò quod injustè fuerat de regno ejectus*, judi-

cium sibi à Deo celere expectare : quæ vix accidissent regiâ indole acceptissimo juveni , ac sui juris non ignaro , nisi veritate niteretur. Celere judicium habent pervetusti , & optimæ notæ codices ; nec ego emendare volui , grammaticam quæstionem Lectoris arbitrio relinquens : multa sibi licere putarunt ævi medii Scriptores quæ prisco Latio non cohererent.

Clare autem asseritur secundum illud Theoderici regni exordium in Chronico Childebrandi post Fredegarium , cap. 93. ubi sic Duchesnii vulgata editio : *Hisc diebus Clotharius Rex à validâ febre correptus , obiit in juventute , regnavitque annos quatuor. Theodericus verò frater in Austrasiâ à Francis in regnum elevatus est apud Wlfoaldum Ducem.* Sed mutilavit locum hunc Librarii oscitantia , qui in nostro codice manuscripto pervetusto integer sic habet : *His diebus Clotharius Rex à validâ febre correptus , obiit in juventute , regnavitque annos quatuor. Theudericus verò frater ejus in regno successit : Childericus enim frater in Auster à Francis in regno elevatus est apud Wlfoaldum Ducem.* Sic & in Gestis Francorum , cap. 45. *In his diebus Clotharius Rex puer obiit , regnavitque annis quatuor. Theudericus autem , frater ejus , Rex elevatus est Francorum. Childericus itaque , alius frater ejus , in Austriâ und cum Wlfoaldo Duce regnum suscipere perrexit.* Immo Ademarus in Chronico Engolismensi , & alii duo quos penès me habeo , Regum Francorum ante annos quingentos in membranis descripti catalogi , Theodericum Clotario in regno Neustriz proximè subjiciunt : Childerici ne meminerunt quidem. Et ab hoc regni post Clotarium initio , Theoderici annos identidem deductos invenire est , tum in tabulis antiquis , tum in Chronicis , uti apud Fridegodum , in Vitâ S. Audoeni , cujus obitum anno Theoderici decimo sexto assignat , qui fuit (ut suprâ ostendam) annus Christi 689. ab anno 674. labens sextus decimus ; & apud alios passim.

Tertium Theoderico initium regnandi fuit post interitum Childerici , cum toti Francorum monarchiæ ad multos annos imperare cœpit ex anno 677. De illius exitu , ac de totius primæ Regum stirpis chronologiâ , ad finem hujus Disputationis pauca delibabimus.



CAPUT XVI.

*Sancti Leodegarii Augustodunensis Episcopi disposita chronologia
ex nostris principis.*

CUM per sex ferè annos Monasterium S. Maxentii strenuè rexisset Leodegarius, in tantum ejus operum odor processit, (ait Ursinus in ejus Vita) ut usque in Regis palatium redoleret. Erat enim tunc Rex Clotharius cum sancta recordationis Baldechilde matre suâ regens Francorum Regnum: qui agnitâ ejus sancti viri prudentiâ, cupientes eum secum habere in aulâ regiâ, petierunt Pontificem (Didonem Pictavensem) ut ejus licentiâ eum in palatio secum haberent: qui continuò eorum annuens precibus, magnis rebus ditatum, moribus decorum, sapientiâ floribus adornatum, voluntati eorum sanctum destinavit Leodegarium. Quem Rex atque Regina videntes, gratanter ac honorificè susceperunt. Qui etiam apud eos paucis adhuc degens diebus, & verborum ejus mellis suam ostendit suavitatem, & reconditam quam intus habebat sanctitatem. Sicque factum est ut non solum à Rege atque Regina, verum etiam & ab omnibus qui eorum adharebant obsequiis, præ omnibus haberetur in amore. Contigit illo in tempore, ut Episcopus qui Augustiduno Præsul esse videbatur (quæ & Æduorum civitas dicitur) moreretur: cùmque hoc ad aures pervenisset Regis, ac Principum ejus, scientes sanctam Leodegarium dignum esse ad suscipiendum honorem Pontificalem, cunctorum consensu, præcipuè Francorum, eum Pontificem Augustiduno unanimiter elegerunt. Quam cùm per annos decem strenuè gubernasset, Rex Clotharius, qui eum Episcopum constituerat, defunctus est.

Auctor Anonymus Vitæ S. Leodegarii ad Ermenarium ejus successorem editæ, diligentius quidem explicuit Æduensis Ecclesiæ tumultus, vacante sede ferè ad biennium productus; sed Leodegarii adventum in aulam regiam, cum ejus promotione ad Episcopatum confudisse visus est, dum ait: Tunc Balhildis Regina, quæ cum Clothario filio Francorum regebat Palatium, divino (ut credimus) inspirata consilio, ad
memoratum

memoratam urbem (Augustidunum) hunc strenuum direxit virum ibidem esse Episcopum. Distinctiùs Ursinus solius meminuit Clotarii, qui Leodegarium Episcopum constituerit; quamvis paulò antè, & Clothario Regi, & Balchildi regni Administratrici acceptissimum fuisse dicat: eò satis indicans, in aulam advenisse quidem Leodegarium, adhuc Balchilde & Clotario simul regnantibus, anno, secundum nos, Christi 663. sequenti porro 664. abdicatà jam Balchilde, datum Aduenlibus Episcopum à solo Clotario.

Hinc plana est via ad reliquam ejus chronologiam. Defunctus est enim Clotarius anno Christi 674. cùm Augustodunensem Ecclesiam S. Leodegarius *per annos decem strenuè gubernasset.* Anno autem 677. post necem Childerici, Theoderico monarchiam adepto, Leodegarius tertio decimo sui Episcopatus anno ab impio Ebroïno oculis exsculptis excæcatus est; & quidem octavo Kalendas Septembris ex antiquis membranis, in quibus legimus: *Excæcatio quoque gloriosissimi Martyris Leodegarii, ac lapidatio beati Gayreni est v l i i i. Kalendas Septembris.* Dies utriusque supplicii eadem esse potuit; sed non annus idem, cùm biennio ferius lapidibus obrutus fuerit Gayrenus, seu Garinus, aut Gerinus, quàm excæcatus Leodegarius. Hinc enim orbus oculis perductus est sub custodià in quoddam Cœnobium (ait Ursinus) in quo degens lauit annis duobus, ubi magnum immensumque suæ humilitatis ac patientiæ reliquit exemplum.

Expleto hoc biennio, atque adeò anno Christi 679. Ebroïnus, cùm S. Leodegarium, fratremque ejus Gerinum coram se sisti præcepisset, utroque gravibus contumeliis & opprobriis onerato, Gerinum quidem stipiti alligatum, lapidibus obrui jussit; Leodegarium verò per quamdam piscinam, aculeatis constrictam saxorum quasi cuspidibus raptari, inòxque linguam illi, ac labia præcidi: eò spectans sceleratissimus carnifex, ut illustrem virum in has redactum angustias ad desperationem compelleret. Sed vicit in Martyre suo Christus, pro quo ille patiebatur. His tormentis superstitem Ebroïnus Waningo cuidam custodiendum tradidit: qui cùm illum agnovisset, & labia & linguam divinitus recepiisse, stupore attonitus, quem ut noxæ capitalis reum acceperat, cœpit

reveri ut Martyrem, deductumque in Fiscamnenſe à ſe conditum Monafterium, à piis virginibus humaniter excipituravit. Ubi vir ſanctus divinis ſuis colloquiis & cohortationibus, hoſpitarum ſuarum numeroſiſſimæ familiæ ad omnem virtutis decus incitamento fuit.

Fiscamni ubi Leodegarius *ſerè per biennium* reſediſſet, inquit Anonymus, anno Chriſti 681. adductus eſt in quamdam villam regiam, ad Synodum in quâ rei capitalis per calumniam damnatus, decalvatus, ac reſciſſâ veſte exauſtoratus eſt; indeque Chrodoberto in cuſtodiam traditus, haud multo poſt à quatuor gladiatoribus equitibus in interiorem ſilvam abreptus, in pago Atrebatenſi, haud procul Sarcingo villâ, amputato capite ad Martyrum præmia evolavit ſexto Nonas Octobris. Leodegarii merita juſtus remunerator Deus, multis prodigiis ac miraculis orbe toto teſtata eſſe voluit. Impius Ebroinus *tranſaſſo ſpatio penè annorum trium*, die quâdam Dominicâ ab Ermenſredo, cui bonis ſuis nequiter ſpoliato, etiam mortem minabatur, anno Chriſti 684. gladio percuſſus interiit.

In veteri Martyrologio Monialium Caſtri Karoli, diœceſis Biſontinæ lego: *v. 1. Idus Novembris, Dedicatio Eccleſiæ beatæ Mariæ Caſtri Karoli, per manus domni Leodegarii.* Adſtabant Leodegario Auguſtodunenſi Epifcopo in eâ conſecratione (ut ex traditione quotannis ad populum proclamari ſolet) tredecim quâ Epifcopi, quâ Archiepiſcopi. Pronum eſt autem conjicere, vocatum ad id muneris S. Leodegarium, quoddam Nordeberti Patritii fundatoris, vel Euſebiz ejus conjugis eſſet conſanguineus. Porro illa dedicatio, ſi facta eſt Dominicâ die, ad majorem populi concuſum, & officii ſollemnitatem, referenda erit in annum 666. litterâ D notatum, S. Leodegarii Epifcopatûs tertium. Non tamen ſicut Epifcopi, ſic & altaria atque Eccleſiæ Dominicâ die conſecrari ſolitæ ſunt; ſed prout commodum viſum eſt, vel conſecratori, vel eum adhibentibus, quâlibet hebdomadæ feriâ peractæ: S. Stephani Divionenſem Eccleſiam Guarmundus Viennenſis Archiepiſcopus anno Chriſti 1077. dedicavit pridie Kalendas Julii, feriâ *v. 1.* Cryptam ei ſubjectam, tertio poſt die, *v. 1.* Nonas Julii, Dominicâ.] Paſchalis Papa II.

anno 1107. S. Benigni Divionensem basilicam, xiv. Kalendas Martii, Sabbato consecravit. Idem, anno eodem, vii. Idus Martii Sabbato Ecclesiam Caritatis ad Ligerim dedicavit.] S. Leo Papa IX. altare Bifontinx S. Stephani Ecclesie sacravit anno 1050. v. Nonas Octobris, feriâ quartâ.] Item, Eugenius Papa III. feriâ 1 v. tertio Nonas Maii, anno Dominicæ Incarnationis 1148. cathedralem S. Johannis basilicam Vesontionensem dedicavit.] Godefridus Lingonensis Episcopus, anno 1141. restitutam ex incendio Divionensem S. Stephani Ecclesiam sacravit v. Kalendas Maii, quæ tum dies in Dominicam incurrebat.] Plura exempla congerere supervacaneum est. Cùm igitur quilibet hebdomadæ dies pro eorum arbitrio, quorum intererat, ad consecrandas Ecclesias post omnem memoriam delectus fuerit, frustra dixerimus Castri Karoli sacram ædem à S. Leodegario fuisse dedicatam anno 666. quòd eo anno Dominica dies occurrerit vi. Idus Novembris. Est autem verosimilius, S. Leodegarium in eo tredecim Episcoporum, sive Archiepiscoporum cœtu quasi Præsidem id obuisse ministerii, cùm novus Monarcha Childericus *sanctum Leodegarium Pontificem* (ut ait Urstinus) *super omnem domum suam, quamquam invitum, gloriosè sublimavit, & omnis familia sua principem esse constituit*; hoc est, anno Christi 674. vel altero è duobus sequentibus. Sic autem lego ex codice pervetusto S. Benigni, & altero Romarici montis : ubi habent quædam exemplaria : *Sublimavit, & Majorem-domus in omnibus constituit* : quod abusive dictum, cùm esset Majordomatus laica dignitas, eaque tum à Wlfoaldo obtineretur, ut ab aliis observatum est. Sed illo Leodegarii principatu videtur indicare duntaxat voluisse Urstinus, fuisse illum Childerico Regi præ cæteris gratiosum.



CAPUT XVII.

Sancti Audoëni Rotomagensis Episcopi chronologia discussa.

AD multa pertinet S. Audoëni annorum ratio : singula attingam quàm potero brevissimè. Duæ exstant ejus Vitæ in manuscriptis : altera tempore Karoli Martelli scripta, quam ferè totam Cointius, tomo III. & IV. Annalium suorum per partes descripsit : altera Fridegodi, qui decimo post Christum sæculo, priori illi & antiquiori chronicos characteres de suo ingenio illigavit ; quam & Surius edidit stylo (ut solet) passim immutato. Prior illa, & antiquior, nullas habet temporum notas : Fridegodi sunt istæ, quas habemus ex aliquot codicibus manuscriptis.

S. Audoënus ordinatus est Episcopus eodem die, cum S. Eligio, pridie Idus Maii, Dominicà ante Litanias, anno Dominicæ Incarnationis 635. Clodovei II. Regis tertio, Martini Papæ secundo. Romam profectus est jam senex, Deodati Papæ anno quarto. Obiit nonagenarius 1x. Kalendas Septembris, die Dominicà, anno Christi 678. Theoderici Regis decimo sexto, Varatone Subregulo, cum Ecclesiam suam rexisset annis XLIII. mensibus tribus, & diebus decem. Post tres annos, & menses novem, translatum est ejus corpus ab Ansberto ejus successore in sollemnitate Ascensionis dominicæ, tertio Nonas Maii. In eo loco in quem translatus fuerat (addit codex manuscriptus Corneolensis, & alii quidam) requievit annis CLXII. donec Nortmanni succenderent ejus Monasterium Idibus Maii, anno Christi DCCCXLI. regnantibus post obitum Ludovici Imperatoris Lotario & Karolo ejus filiis anno primo.

Ex hac Fridegodi chronologiâ, quæ S. Audoëni ordinationem solidis undecim annis antevertit, adeoque ruinosa fundamento ferè tota insistit, retineo periodum Sedis, ex Ecclesiæ Rotomagensis (ut videtur) traditione derivatam : obitus diem Dominicam, Waratonis Majordomatu, & Theoderici Regis anno sextodecimo notatam : translationem quarto post

anno in tertium Nonas Maias incurrentem: totâmq; sancti Archipræfulis temporum seriem sic dispono.

Ordinatus Audoënus pridie Idus Maii, Dominicâ ante Litanias, tertio anno Clodovei II. *juvenculi adhuc Regis*, ætæ autem vulgaris anno 646. sedit annos XLIII. menses tres tricenarios, dies decem. Obiit anno 689. Waratone Subregulo, Theoderici anno regni Neustrici sextodecimo, qui (ut suprâ monui) ex anno 674. & ex Clotarii ejus fratris obitu numerandus est. Animam autem efflavit Clippiaci in Comitibus, die mensis Augusti XXI. In Necrologiis, seu Martyrologiis, non obitus ejus, sed depositionis adnotatus est dies Augusti XXIV. quæ fuit feria tertia. Illo enim mortuo die Dominicâ, XXI. Augusti, sequenti feriâ secundâ, Augusti XXIII. curatum est factum cadaver, & pompa funeris præparata: porro feriâ tertiâ, Augusti XXIV. elatus est magno apparatu, Pontisaram usque, Rege Theoderico, Chrodochilde Reginâ, Waratone Majore domûs, plurimis Episcopis ac Proceribus funus prosequentibus; ibique sollemnibus exequiis mortuo parentatum est, præsentè Rege, cum reliquo Aulicorum comitatu. Idcirco hæc dies, Augusti XXIV. ejus depositioni addicta est, & sacris fastis inscripta.

Præclare convenit hæc nostra chronologia cum tribus primis Fontanellæ Abbatibus, & cum aliquot Lugdunensibus Episcopis, quibus illa implexa est. Etenim in Abbatiâ Fontanellensi sancto Wandregisilo successit Lantbertus, Lantberto Ansbertus, postmodum in Episcopatu Rotomagensi S. Audoëni successor. Rursus in Episcopatu Lugdunensi, S. Annemundo Martyri effecto successit S. Genesius ex Abbate; non tamen (ut multis visum est) Fontanellensi: Genesio Lantbertus, qui S. Ansbertum ordinavit Rotomagensem Episcopum, habuitque in suo Lugdunensi Præfulatu successorem Gudinum seu Godwinum, qui anno Christi 693. Dominicâ die, tertio Kalendas Julii, Bercualdum Theodori in Præfulatu Dorovernensi successorem Episcopum consecravit, teste Bedâ, lib. 5. Historiæ Anglicanæ, cap. 9. Nunc horum præfecturas suis singulas temporibus reddamus.

De initiis Fontanellensi Monasterii hæc habet Auctor antiquus, in Vitâ S. Wandregisili: *Cepitum est autem hoc*

opus ab anno Dominica Incarnationis sexcentesimo quadragésimo quinto, sub die Kalendarum Martiarum, Indictione tertiâ, qui erat annus prefati Regis Hlodovei undecimus. Tum post aliquot versus : Anno quarto regiminis ejusdem viri Dei, qui erat Hlodovei prefati Regis decimus quintus, &c. Denique haud multò ante finem : Viatico percepto post paululum conticuit, annorum circiter nonaginta sex, & regiminis sui anno decimonono, mense quarto, die primo & vicesimo, qui erat annus Dominica Incarnationis sexcentesimus sexagesimus quintus, Indictione octavâ, porro tertii H Lotharii Regis annus undecimus regni ipsius. Erat igitur annus obitus S. Wandregisili, regiminis ejus vigesimus labens à quatuor jam mentibus, & uno ac viginti diebus : quas minutias non colligens Aigradus in Vitâ S. Ansberti, tantùm dixit S. Wandregisilum Abbatem fuisse per viginti ferè annorum spatia.

Hic Auctôr Vitæ S. Wandregisili (quem primarium ejus Vitæ scriptorem fuisse opinamur, & non interpolatorem) annos Christi cum annis Regum aut Antistitum malè composuit. Censuit autem annum primum regiminis S. Wandregisili, fuisse Clodovei II. undecimum ; & annum obitus ejus fuisse item Clotarii III. undecimum ; adeoque inter horum Regum annos undecimos intercurrisse annos viginti ; quod nos non admittimus : etenim annus Clodovei XI. fuit ætæ Christianæ 654. Porro annus XI. Clotarii fuit 671. ab illo priore octavus decimus. Igitur aut octodecim dumtaxat annis Abbas fuit S. Wandregisilus ; aut si ad vigesimum annum rexit, iniit biennio ante inchoatam exstructionem Fontanelæ, & anno Clodovei non undecimo, sed nono, Christi 652. quod per se evidens est. Quibus enim exstruebatur Monasterium, nisi Monachis ? Non fuerunt autem Monachi absque Abbate. Ergo prius Abbas fuit S. Wandregisilus, & Monachorum familiam duxit, quàm huic familiæ ædes magnificæ construerentur ; & duobus annis prius, per quos ipse Abbas cum suis Monachis in viciniâ, aut accolarum ædibus, aut extemporaneis cellulis recepti, amplioris & elegantioris cœnobii exstructioni invigilabant.

Ad hæc, in Vitâ S. Condedi Presbyteri, & Monachi Fontanellensis, ab Aigrado ante mille ferè annos conscriptâ,

asseritur, annus 1x. Lantberti Abbatis, fuisse Theoderici monarchiæ tertius; itémque annus secundus Ansberti Abbatis, fuisse ejusdem Theoderici septimus. Quibus positis fundamentis, accurata hæc est horum vel Abbatum, vel Archiepiscopulorum series.

Anno æræ Dionysianæ 652. Clodovei II. Regis nono, S. Wandregisilus à S. Audoëno Rotomagensi Episcopo Abbas instituitur.

Anno 654. Clodovei xi. cœptum est opus Monasterii Fontanellæ, Kalendis Martiis.

Anno 663. occiditur S. Annemundus xxvi. Septembris. Succedit illi S. Genesius ex Abbate incerti loci, non tamen Fontanellensi.

Anno 671. Clotarii III. Regis anno xi. obiit S. Wandregisilus xxii. Julii, cum Abbas præfuisset annis ferè viginti. Nam si anno 679. Theoderici monarchiæ tertio, die vi. Idus Octobris, in cursu erat Lantberti Abbatis annus nonus, uti asserit Aigradus in Virâ S. Condedi, cerè annus primus Lantberti Abbatis, idémque Sancti Wandregisili ultimus, fuit Christi 671.

Anno 682. Kalendis Novembris excessit è vivis S. Genesius, jam ab annis novemdecim Episcopus Lugdunensis. Succedit illi Lantbertus, Abbas ab annis xi. Lantberto autem in Abbatia Fontanellensi sufficitur S. Ansbertus. Erat hic annus Theoderici monarchiæ quintus: nam ab Aigrado in Virâ S. Condedi, cum anno Theoderici septimo (qui fuit Christi 683.) comparatur annus Ansberti Abbatis secundus.

Anno 689. abiit è mortali vitâ S. Audoënus die xxii. Augusti, quæ fuit Dominica; ejus depositio (ut suprà monuimus) fuit xxiv. Augusti, quâ die illi ad Pontem Ifaræ regiâ pompâ parentatum est.

Translatio S. Audoëni non dubium quin quarto exinde anno, Christi 693. celebrata sit; & quidem tertio Nonas Maii, die festo Ascensionis Dominicæ: quam diem translationis S. Audoëni, testatur Aigradus in Virâ S. Ansberti, fuisse exinde Rotomagensibus quotannis sollemniter celebrem. Hæc est Ascensio fixa, in antiquis multis Martyrolo-

guis aut Kalendaris adnotata, quâ scilicet ipsâ die Christus in cælum ascendisse vulgò creditur. Sicut etiam Resurrectio Domini vi. Kalendas Aprilis, & Passio viii. Kalendas Aprilis. Non intelligi autem ab Aigrado festum mobile Ascensionis Dominicæ, quod per quinque & triginta dies excutrit, agiturque quadragesimo semper die post Dominicam Paschalem, & feriâ semper quintâ, vel hinc evidenter probatur, quòd hæc Ascensio nobilis non incurrit in tertium Nonas Maii, toto tempore medio inter annos 628. & 707. ut ex veteris Kalendarii regulis manifestum est.

De Concilii Rotomagensis epochâ, & de Waratonis Majordomatu restat difficultas sequenti capite explicanda.

CAPUT XVIII.

Conventus seu Synodi Rotomagensis verum tempus fuit autumnus anni ære Dionysiana 689. Theoderici annus monarchia xlii. regni Neustrii xvi. regni Burgundia xxiv. Ansberti Episcopatus annus primus. Waratonis in Neustriâ Majordomatum, Pippini Heristelli principatus ex anno 687. inchoatus non sustulit.

CONCILIUM hoc Rotomagensè Aigradus in Vitâ sancti Ansberti celebratum ait anno Christi 682. Indictione x. Ansberti Episcopatus anno quinto, Theoderici Regis anno xlii. ut habent plerique codices, vel anno xvi. ut legit Vincentius Bellovacensis in Speculo Historiali, & Simondus ex codice S. Michaëlis in mari. Hæc scribebat Aigradus ad Hilbertum, Ansberti in Fontanellenâ Abbatia successorum: cujus testimonii tanta fuit apud multos auctoritas, ut obitum sancti Audoëni Fridegodus Surianus, & duo manuscripta chronica à me visa, Blandiniense nimirum, & Dunense, referant in annum 677. Fridegodus manuscriptus in annum 678. Ægidius Bucherius, & Aubertus Miræus in annum 676. procul à vero omnes. Frustrâ autem nævus hic Vitæ S. Ansberti interpolatori tribuitur. Ipsi Auctoris Aigradi hæc hallucinatio fuit, quam exhibent vetustissimi optimæque notæ codices.

dices. Non enim ille annos Regum aut Pontificum ad æræ Dionysianæ annos aptare didicerat, sicut nec Auctor Vitæ S. Wandregisili, nec Fridegodus in Vitâ S. Audoëni, ut jam monui.

Non ante annum 689. è vivis abiisse S. Audoënum supra ostendimus. An Aigradus Concilio Rotomagensi annum adnotari Theoderici Regis **xiii.** an **xvi.** supervacaneum est disputare, cum utrumque poruerit diverso respectu, fueritque (ut alio loco à nobis observatum est) idem annus 689. Theoderici monarchiæ **xiii.** & regni Neustrixi **xvi.** Tota restat quaestio de anno sedis S. Ansberti, quem pro primo quintum exhibent vulgata exemplaria, non Auctoris errore, sed librarii oscitantia, quod nunc mihi incumbit demonstrare.

Subinde evenit ob lineamentorum similitudinem, ut *quintus* pro *primo*, aut hic vicissim pro illo, à properantibus librariis scriberetur. Surius in Vitâ S. Petri Tarentasiensis Archiepiscopi, auctore Gaufrido Abbate Altzumbæ, ait obiisse S. Petrum anno Dominicæ Incarnationis millesimo centesimo septuagesimo primo, quem manuscripta exemplaria meliora notæ, & ipsa ejus tumuli epigraphæ extinctum testatur anno **m. c. lxxv.** Sic erratum est à libellionibus, in Vitâ Sancti Ansberti, ubi data scribitur Fontanellensibus quædam privilegii auctoritas *in Synodo generali Rotomago urbe habitâ*, cum esset sancti Ansberti Rotomagensis Præsulis *annus quintus*. De anno quinto sancti Ansberti librarius in culpâ est, ut dixi: non enim excidisse id potuit Aigrado, quod his rationibus persuadeor.

1. Eam Synodum assignat Aigradus anno Theoderici Regis **xiii.** vel **xvi.** quod utrumque (ut jam monui) diversâ ratione verum est. Annus autem Ansberti quintus, fuit Christi 693. Theoderici in regno Neustrico **xx.** in monarchiâ **xvii.**

2. Hanc Synodum prius describit Aigradus, quàm sancti Audoëni translationem è primo sepulcro, à sancto Ansberro celebratam, annis tribus & mensibus sex à sancti Audoëni transitu elapsis. Huic igitur Synodo quintus Ansberti annus adnotari non debuit.

3. Legatur attentè Aigradus in Vitâ sancti Ansberti. Denique, inquit, cum sanctorum Sacerdotum, & omnium civium Rotomagensium electione, & gloriosi Regis Theoderici consensu in

Pontificem consecratus fuisset, primio dilectionis fervore, quem erga prædictum venerabile Canobium semper habuerat, privilegii sup. auctoritatem eidem edidit. Tum post paucos veisus: Facta est autem hæc privilegii auctoritas sub anno Domini Incarnationis sexcentesimo octogesimo secundo, Indictione decimâ, qui erat annus

* al. xvi. *præfati gloriosi Regis Theoderici xxi. * & præfati venerabilis Præfatis Pontificatus annus quintus, in Synodo generali Rotomago urbe habitâ, ubi plurima Deo accepta, & sancta Ecclesia utilitatibus profutura disputata sunt. Annum quidem Christi 682. Indictioni decimæ benè junctum, sed à Theoderici Regis anno xiiii. seu xvi. longè aberrantem Aigrado condonamus: at pro anno quinto Ansberti, primum reponimus ex mente ipsiusmet Aigradi, qui hanc Synodum statim ab Ansberti electione celebratam manifestè profitetur, ut ex dictis patet.*

4. *Ecquid juris fuisset Rotomagensi Episcopo suam in Metropolim convocandi Ratbertum Turonensem, & Regulum Remensem Archiepiscopos? Ansoaldum quoque Pictavensem, Aimardum Carnotenum, Arnonium Catalaunensem, Desiderium Redonensem, & Silvium Ambianensem, non suæ provinciæ Episcopos? Sed alia eos causa Roromagum traxit: nimirum ut soluto conventu Ordinum Clipiacensi, in quo Audoënus diem obierat, & in ejus locum Ansbertus successerat; qui tum aderant Episcopi, collegam suum Ansbertum, virum pietate insignem, Regique à Confessionibus, recens ordinatum Pontificem, honoris causâ suam in sedem deducerent, ejusque in suam civitatem ingressum sollemnem præfentiâ suâ cohonestarent. Nunc de Pippino Heristello pauca.*

Hujus quemdam inter Francos principatum adnotant vetusti Annales ad annum æræ Dionysianæ 687. Breve Chronicon Remense ad hunc annum: Pippinus senior, primus regnare cepit in Franciâ. Breve Chronicon Bibliothecæ Thuanæ, apud Duchesinium, tomo 3. pag. 357. Franci primum habuere Regem Ferramundum, cujus proles regnavit usque ad DELXXXVII. annum Verbi incarnati: tunc enim Pippinus, filius Ansegili, Princeps Francorum fuit. Nec repugnant Annales Metenses, & alia tria Chronica tomo eodem tertio Du-

chesnii, pag. 349. 354. & 504. quæ hunc Pippini principatum anno adscribunt Christi 688. Hic enim annus in illis Chronicis à xxv. Martii, vel à Paschate deductus, planè idem est cum Dionysiano 687. à Christi Natali derivato, quem nomenclaturâ tenens novem circiter mensibus præcedit. Et hoc evidenter probat periodus principatûs Pippini, quæ fuit annorum viginti septem, ac mensium sex; & anni 687. Junio mense exorta finem habuit in ejus obitu, ad diem xvi. Decembris anni 714. ut in compluribus Chronicis adnotatum est; expressius autem in Annalibus Metensibus, secundum quos Pippinus in pace obiit xvii. Kalendas Januarii. *Rexit autem populum Francorum annis xxvii. & mensibus sex.*

Quantum ex antiquis & probis Scriptoribus colligere est, fuit hic Pippini principatus, aliquid supra Majordomatum. Chronicon jussu Childebrandi Comitis Fredegario adjectum: *In Austria quoque, mortuo Wlfoaldo Duce, Martinus Dux, & Pippinus filius Ansigisili quondam Franci nobilis dominabantur. Defunctis Regibus, commissis invicem Principibus, Ebroïno, Martino atque Pippino, adversus Theodericum Regem excitantur ad bellam. Commoto exercitu, ad locum cui vocabulum est Locofico, interim commissi prælium ineunt, ibique magno certamine dimicantes, plurima pars populi ex utrisque partibus corruit. Devicti cum sociis Martinus atque Pippinus in fugam lapsi sunt; persecutusque eos Ebroïnus, maximam partem de illâ regione vastavit. Martinus autem Laudunum Clavatium ingressus, &c.* Pergit narrare ut Martinus è Lauduno, quo se receperat, per Ebroïni fraudem egressus, ab eo trucidatus sit cum suis, còque solus Pippinus Heristellus in Austrasiâ Majordomatu reliquus fuerit: ac demum ut Ebroïnus occisus sit ab Ermenfrido Franco, qui post facinus, ad Pippinum in Austriam perfugerit. Atque hæc eadem referuntur in Gestis Francorum, cap. 46. & 47. ex quibus colligere est, *defunctis Regibus* (Austrasiæ nimirum propriis, Childerico III. ad annum 677. & Dagoberto II. ad annum, ut mox dicemus, 680.) & Wlfoaldo, qui sub utroque Rege Majordomus fuerat, Martinum & Pippinum à paribus Majordomatum gessisse in Austrasiâ: ac sublato per proditorem Martino,

anno, ut videtur, 682. Pippinum eâ dignitate positum esse in solidum, invitis licet Theoderico & Ebroino. Tandem anno 684. interfecto æmulo Ebroino, Pippinum id dignitatis pleno jure obtinuisse. Quid ergo est quòd Pippinus, qui ex annis 680. 682. & 684. Majordomus fuerat, ex anno deinde 687. principatum in Austriâ, sive in Franciâ Orientali inchoasse dicitur, nisi quia hic principatus Majordomatu dignius aliquid fuit? Nemo Historicorum Erchinoaldum, aut Ebroinum, aut Wlfoaldum, aliòsve Majores-domus regnasse in Franciâ dixit, nisi fortè abusivè, si quando præfecturam suam in tyrannidem verterent. Erant Majores-domus, Regni dumtaxat Administratores, ad nutum Regum, aut Regni Procerum constituti: neque illorum officia ab'lis in posteros jure hereditario transibant. Pippinus dominium habuit primùm Australiæ, ex anno 687. tum quadriennio post totius Francorum monarchiæ ex anno 691. sub Regis tamen clientelâ: ferè sicut postmodum Duces & Comites Aquitaniæ, Burgundiæ, Provinciæ, Campaniæ, Turonenses, Tolosani, Arverni, & alii complures, suarum toparchiarum verè domini, (quantvis fiduciarij sub Regibus) & cum jure illas ad heredes suos transmittendi. Et verè Pippino Heristello successit in paternos honores filius Karolus, cognomento Martellus, ipso etiam patre rerum gestarum gloriâ illustrior: Karolo deinde Pippinus junior, qui post solidi decennii principatum, tandem pleno jure Regnum auspicatus est ex anno 752. & secundam Regum familiam duxit.

Longè à vero aberrare mihi videntur qui Heristelli principatum anno 687. ceptum, à prælio Textriciensi arcessunt. Fuit pugna Textriciensis toto quadriennio posterior, quippe anno 691. commissâ, ad quem annum Chronicon pervetus S. Dionysij, apud Duchesnium, tomo 3. pag. 127. *Bellum Pippino in Textricio, ubi superavit Francos.* Item in procinctu ad Textriciensem pugnam: *Theodericus Rex, Kalendis Aprilis, anno XIV. regni Carisiaco palatio confirmavit testamentum Amalfridi pro Hunonis curte, ut refert ex membranis Siti-vensis Malbrancus lib. 4. de Morinis, cap. 19. Annus XIV. Theoderici monarchiæ fuit Christi 691. deductus ex anno 677: quo cæsus est Childericus. Scitè igitur Annalium Meten-*

sium Auctor, principatus Heristelli duo distinguit exordia; sic dicens ad annum 688. (quem ipsum esse Dionysianum 687. suprà monuimus) *Pippinus successibus prosperis, Orientalium Francorum, quos illi propriâ linguâ Olterlindo vocant, suscepit principatam.* Tum ad annum 691. narratâ Textriciensis victoriâ: *Pippinus singularem Francorum obtinuit principatum.* Tunc enim Theodericum quoque recipiens, ne tyrannidem videretur exercere, nomen illi Regis inestimabili pietate reservavit: ipse verò totius regni gubernacula, thesaurósque regios, & universi exercitus dominationem, propria facultatis jure disponenda retinuit.

En Pippini principatus initia duo, & posterioris quidem illustre monumentum fuit anno 691. parâ insignis victoria ad Textricium Veromanduorum villam: at prioris anno 687. cœpti paulò est origo obscurior interfecto Ebroiño ad annum 684. *Franci, accepto consilio, Waradonem illustrem virum loco ejus in honorem Majdris-domus constituerunt.* Idcirco *præfatus Warado obsides à Pippino Duce accipiens, pacem invicem patraverunt.* Hæc Appendix, jussu Childebrandi, Fredegario addita, cap. 98. & Gesta Francorum, cap. 47. *Acceptis itaque Waratto inter hæc obsides à predicto Pippino, & pacem cum eo iniit.* Hæc pax anno 685. parâ, Pippini principatum non redolet, & cum biennio antevertit. Interim filius Waratonis Gislemarus, Theoderico Rege circumvento, patris Majordomatum invadit, nequicquam dehortante, & divinam vindictam intentante S. Audoëno. *Fuerunt igitur inter Pippinum & præfatum Gislemarum discordie multe, bella civilia plurima,* (ait Auctor Appendicis Fredegarii, capite illo 98. & post eum Gesta Francorum) quæ demùm Gislemari miserabili interitu terminata sunt. Tunc, opinor, victor Pippinus principatum iniit anno 687. dans (ut moris est) jura victis: modestè nihilominus utens victoriâ, satisque habens Waratonem Absalone suo exoneratum dignitati suæ restituere, & Austrasiam sibi à Neustrasiorum dominatu immunem vindicare, salvo tamen jure, seu potiùs titulo regis clientelæ.



CAPUT XIX.

Sancti Filiberti Abbatis chronologia, suâ restituta periodis.

SEPTIMUM à Christo sæculum sanctitate suâ, & miraculis plurimum illustravit S. Filibertus Abbas; de quo multa diximus in Historiâ nostrâ Trenorciensi, præsertim capite ix. & inter cætera fuisse illum ex Aquitania in Neustriam revocatum à S. Audoëno, anno Christi 685. post Ebroïni necem proximo: ac deinde ad annum 686. mortuo S. Audoëno, reductum esse in Aquitaniam ab Ansoaldo Pictavensi Episcopo. Verum, ut sunt secundæ cogitationes plerumque saniores, dilato in anno 689. S. Audoëni obitu, eò appulsus sum, ut de S. Filiberti chronologiâ, ac rerum gestarum momentis haud paulò diversâ sentirem.

Primum igitur quærendum tempus increpiti ab eo Ebroïni: quod factum (ut ait anonymus Auctor Vitæ S. Leodegarii ad Ermenarium) cum Luxovio egressus Ebroïnus, *(spiritu malignitatis armatus cepisset fremere rabidis dentibus super nobiles Sacerdotes & Francos; atque consentientiis plurimis, contra mandatum Dei recepisset locum honoris.* Hæc refero in annum 679. quo S. Leodegario exsecta lingua, & labia ferro excisa sunt, fraterque ejus Gerinus lapidibus est obrutus. Nam cum Ebroïnus S. Leodegarium oculis privavit, nondum apud Theodericum Regem suam Majoris-domûs dignitatem receperat.

Revocatus est porro S. Filibertus in suum Gemmeticense Monasterium (ut refert Ermenarius in ejus Vitâ) *anno peracto octavo, incipiente nono*, ex quo inde recesserat, secundum ejus prædictionem; hoc est, ut opinor, anno Christi 687. ad finem vergente, aut incunte 688. Interfecto enim Ebroïno anno 684. cum adhuc bellis arderet Neustria, & Gislemarus paterni Majordomatûs invasor Pippinum Heristellum ex Austrasiâ in se provocasset, prius debuit armis domari, & è medio tolli Gislemarus, quàm vir pacificus Filibertus in suum Gemmeticum revocari. Fuit annus 687. Pippini prin-

cipatûs Austrasiensis post profligatum Gislemarum primus, ut proximo capite ostendimus. Hoc ipso anno exeunte, aut incunte 688. S. Filibertum opinamur fuisse in Neustriam revocatum, fuisseque redditum Gemmeticensibus alumnis.

Revocatus autem ad sedem pristinam, haud diù in eâ perstitit. Nam anni 689. mense Augusto, translato ad cœlites sancto Audoëno, cujus maxime ille nitebatur amicitia, & consuetudine utebatur, cum eum invisisset Ansoaldus Pictavenſis Episcopus, alter ejus Mœceſas, ab hoc haud difficulter persuasus est Herenssem suam eremum, in quam singulari affectu ferebatur, hoc ipso Christi anno 689. post Rotomagenſem Synodum ad finem vergente repetere. De S. Filiberti ætate, ac de anno felicitis ejus ad superos transitûs nihil hæcenus mihi certi compertum est.

CAPUT XX.

Dagoberti ſecundi Regis temporum ratio.

PRINCIPEM hunc sancti Regis Sigiberti filium non degenerem, & ipsum in vulgatis Francorum Annalibus ſilentio prætermiſſum, ex Hiberniâ ad nos revexit Godefridus Henſchenius, libro de tribus Dagobertis, edito Antwerpæ anno 1655. tum anno 1658. Hadrianus Valeſius, tomo tertio rerum Francicarum, libro xxii. Carolus *le Coïnte*, Annalium ſuorum tomo tertio; & denique Mabillonius, non uno loco, præſertim in Præfatione IV. Sæculi Benedictini, §. ix. Facem hîc prætulerunt Willelmus Malmesburienſis, libro 3. de geſtis Pontificum Anglorum, in Vita S. Wilfridi Eboracenſis Archiepiſcopi, ab Heddio Stephano, Wilfridi ipſius coxtaneo, conſcriptâ, & à Malmesburienſi in epitomem redacta: quam Vitam nunc integram protulit Mabillonius, ad finem ejusdem voluminis IV. Sæculi Benedictini, & ejusdem ævi Auſtor, qui sanctæ Sadlabergæ Abbatiffæ Vitam in ſcriptis reliquit. Sed Valeſio & Coïntio non aſſentior, exiſtimantibus, non niſi extincto Childerico, Dagobertum ejus patruelem in Auſtrasiâ revertiſſe. Etenim Beda

in Historiâ Gentis Anglorum, lib. 4. cap. 11. Anno, inquit, Dominica Incarnationis sexcentesimo septuagesimo septimo, qui est annus imperii Regis Ecgfridi octavas, apparuit mense Augusto stella quæ dicitur Cometa, & tribus mensibus permanens, matutinis horis oriebatur, excelsum radiantis flamma quâsi columnam præferens. Quo etiam anno orta inter ipsum Regem Ecgfridum, & reverentissimum Antistitem Wilfridum dissensione, pulsus est idem Antistes a sede sui Episcopatus. Et ad finem Operis: Anno DCLXXVII Cometa apparuit. Wilfridus Episcopus à sede suâ pulsus est ab Ecgfrido Rege. Utrobique lego ex codice Trevirensi optimæ notæ, & vetustissimo, annum 677. non (ut in vulgatis) 678. & fuisse hunc Ecgfridi Regis octavum affirmat Beda; & ego capite 5. hujus Diatribæ clarè ostendi, agens de Cometâ illo qui sub eadem Childerici spectatus est. Sed excurrerat annus Ecgfridi octavus usque ad xv. Kalendaras Martias anni 678. atque ut edictum illud Ecgfridi Regis prodierit labente anno 677. debuit tamen Wilfridus Archiepiscopus expectare vernas etefias, ut se mari tutò committeret. Hoc igitur anno 678. cum Romam pergeret, ventis felicibus delatus est in Frisiam, ubi ejus regionis barbaros populos Christo acquisivit. Ibi transactâ hieme, sequentis anni 679. vere novo trajecit in Transrhenanam Austrâliam; (Anglis, inquam, & Frisonibus Transrhenanam, sed nobis Gallis Cisthenanam, ut sciè observat Valesius) venitque ad Dagobertum ibi imperitantem, quem quondam hospitio exceperat, & ad suum Regnum repetendum armis virisque instruxerat.

Malmesburiensem audiamus. Jamque se verna temperies aperiebat in flores, cum Wilfridus itinere reincapto, ad Dagobertum Regem Transrhenanorum Francorum venit. Is non immemor quòd cum quondam factione Magnatum pulsum, & de Hiberniâ ad se venientem hospitio receperit, & equis sociisque adjutum patriâ remisisset, benignè habuit, multisque precibus fatigavit, ut provinciam remanentiâ suâ dignaretur, Episcopatum Strateburgensem accipiens; cum ille rogantem ad reditum suum Româ distulisset, cum Deodato Episcopo suo ire laxavit. Romam venit S. Wilfridus anno 680. & in Synodo sub Agathone Papâ, ab ejus anni mense Novembri inchoatâ, contra Monothelitas

litas sententiam dixit : præcedente anno 679. inviserat Dagobertum in parte Austrasiæ Adrhenanâ imperitantem , quem quondam ad suos revertentem hospitio exceperat. Particulam hanc quondam , quis non videt commodè referri non posse ad annum 677. quo occisus est Childericus ? Sursum igitur aliquot annis submovendus est iste Dagoberti ad suos reditus , atque (ut videtur) in anno 674. defigendus , quo mortem Clotarii III. discordiæ Francorum , & trium Regnorum civiles tumultus consecuti sunt : tunc enim iis qui Dagoberto legitimo suo Regi per summam injuriam exauctorato studebant , apertior fuit via ad rem ejus gerendam , piscandumque (ut vulgò dicitur) in aquâ turbidâ : nec videtur invito Childerico patriele regnasse Dagobertus , saltém in parte Austrasiæ Adrhenanâ , cùm ille Theoderico fratre in S. Dionysii Monasterium recluso , toti reliquæ monarchiæ imperaret. Sed Childerico post triennium interfecto , cùm sub illo tyrannidem arripuisset Ebroinus , tum verò Dagoberto pio Regi negotium fuit. Huc pertinuit bellum illud civile inter patrieles , de quò sic Auctor Vitæ sanctæ Sadlbergæ : *Cenobium puellarum in suburbio Lingonica urbis , in hereditate vel successione paternâ conatur extruere : ad quod opus peragendum venerabilis Walbertus solamen , artificisque , ac viros industrios præbuit atque commisit. Qui locus , licet Austrasiorum finibus immineres , vicinus tamen Burgundiæ erat , distans à Luxovio Monasterio paulò minùs millibus quadraginta ; ibique adunatis centum seu ampliùs , tam ex Nobilium liberis , quàm ex proprio officio puellis , illum Christo Domino dicavit. Sed cùm jam pars maxima fabrica Monasterii instructa esset , caput famula Christi præfata , utpote Spiritu Dei repleta , sagaci cum viro trutinare animo , non esse in eodem loco puellarum Cenobium tutum , nihilque stabilitatis habere , munitionisque locum. Nam licet barbaries procul abesses , Regum tamen limitibus hinc inde admixtis , periculi indicium futuris temporibus erat : quod periculum nos deinceps vidimus. Denique nuper civile bellum inter Reges Francorum Theodericum & Dagobertum circa illos fines est actum : loca vicina quoque depopulata , agri , villa , ades ; & ipsa (quod gravius est) Sanctorum corpora igne sunt cremata. Unde liquido patet divino eam Spiritu fuisse imbutam , quæ pridem anticipavit discrimen.*

Suburbium Lingonenſe intellige locum pagi ſeu territorii Lingonenſis, quod ſcilicet ſubeſſet urbi Lingonenſi, quamvis ab ipſâ urbe longiuſculè diſtaret; quippe à Luxovio quadraginta paulò minùs milliaribus diſtitum in confinio Lingonum & Eliſatii. Hoc verò Cœnobium Sadlaberga exſtruxerat conſilio & ope Walberti Luxovienſis Abbatis, atque adeò ante menſem Maium anni 665. quo conſtat vivere deſuiſſe Walbertum: bellum porrò illud inter Theodericum & Dagobertum Reges à S. Sadlabergâ prophetico ſpiritu prænunciatum, ad annum pertinuiſſe videtur 680. quo S. Wilfridus Concilio Romano ſub Agathone Papâ interfuit: inde ad amicum ſuum Dagobertum Regem, ſecundùm datam illi fidem reverſurus, ſi fuiſſet ille adhuc ſuperſtes. Româ autem digreſſus, & ab Eboracenſi ſuo Archiepiſcopatu ſemper extorris, ad provinciam Auſtraliùm Saxonum prædicandi Evangelii cauſâ ſe contulit, ut refert Beda, lib. 4. Hiſt. Anglorum, cap. 13. Hæc ferè Henſchenius, tum in libro de tribus Dagobertis, tum in Exegeſi quam ſui Martii tomo 3. præfixit; tum denique in Exegeſi præliminari ad tomum tertium de Sanctis menſis Aprilis, ubi tandem Alexandro Wilhelmo concors effectus, hunc ipſum eſſe fateatur Dagobertum Regem & Martyrem, cujus ſacræ reliquiæ Satanaci ad Moſam in veneratione ſunt. Ego verò Monafterium illud à ſanctâ Salabergâ ædificari cœptum, opinor eſſe ipſum *Andlow*, ſive *Andelabene*, de quo Bruſchius in Chronologiâ Monafteriorum Germaniæ: neque enim potuit illud ab Auctore Vitæ S. Salabergæ meliùs designari, quàm à ſitu in finibus regnorum Burgundiæ & Auſtraliæ, & ab ejus diſtantiâ à Luxovio milliariorum ferè quadraginta. Quod verò Bruſchius, Raderus in Baviâ ſanctâ, in S. Richarde Imperatrice, Joannes Ruyr, in Antiquitatibus Voſagi, parte 3. lib. 1. cap. 10. & paſſim alii ſcribunt fundatum fuiſſe hoc Cœnobium à Richarde conjugii vinculis ſolutâ; non ſic accipias, quòd illa ſacram hanc domum prima crexerit; ſed quòd jam olim fundatam, ac poſteà dereliſtam & ſemidirutam reſtituerit, locupletaverit, & ædificiis proventibùſque auxerit, ad piarum ac nobilium Virginum commodam ſtationem. Innuere hoc viſus eſt Hermannus Caniſii ad annum 887. ubi ait, Richar-

data in *Andelahnense Cœnobium Virginum à se constructum* scēssisse. Non dicit *fundatum*, sed *constructum*: quam vocem etiam de instaurato Monasterio accipere possis.

Cæterum, turbavit hic calculos suos Cointius: nam anno 680. num. 2. *Dagoberti*, inquit, *Regis obitum hoc anno consignamus, quia Childebertus tricesimo primo post anno vitam clausit.* Et rursus anno 692. num. 33. dicit, Anonymum, qui *Francorum Historiam jussu Childebrandi retulit in litteras, Opus suum ordiri à cæde Dagoberti Regis Austrasiæ: & ab illâ,* inquit, *necesse usque ad Childeberti III. mortem, recenset annos unum ac triginta, quos in partes tres ita dividit, ut quatuordecim Theoderico, quatuor Clodoveo, Childeberto tredecim assignet.* Atqui certum est, illum Childebrandi Scriptorem, cædis Dagoberti Austrasiæ Regis nusquam meminisse. Librarii igitur oscitantæ tribuebam, quod eadem Dagoberti pro Childe-rici cæde posuisset; sed ne hoc faciam, vetat auctor Cointius, cum subdit: *Similiter annos unum & triginta numeramus à necesse Dagoberti, quem anno Christi sexcentesimo octogesimo interfectum diximus, usque ad Childeberti mortem, quæ anno Christi septingentesimo undecimo contigit.* Ne enim hoc quoque loco imputemus typographo, quod pro Childerico Dagobertum scripserit, facit quod Cointius Childerici necem non anno 680. sed totis antè annis septem, nempe anno 673. adscribat. Hunc igitur, non præli, sed calami aut memoriæ lapsum viro erudito per viarum lubrica properanti ultro condonamus.

CAPUT XXI.

Theoderici III. exitus, & ejus filiorum Clodovei III. & Childeberti III. regna suis redduntur temporibus.

TEXTRICIENSI prælio profligatum fuisse à Pippino Heristello Theodericum III. ejusque Subregulum Bertharium anno Christi 691. suprà docuimus ex Annalibus Metensibus, aliisque Chronicis. Ille victoriâ modeste usus, non modò Theodericum regio titulo atque honore non pri-

vavit; sed etiam duos ejus filios Clodoveum III. & Childebertum III. Reges esse jussit.

Clodoveum III. opinatur Malebrancus obiisse ante Theodericum patrem, cum duobus annis regnasset, quantum illi tribuunt Gesta Francorum, cap. 49. Aimoinus lib. 4. cap. 48. Engolismensis, & anonyma duo jam aliquoties à nobis laudata Chronica. Idem fortasse Benignianus & Besuensis Chronographi nullà factà Clodovei III. mentione, *Theoderico Rege defuncto*, inquiunt, *Childebertus filius ejus successit in Regnum.*

Childeberto III. certum est duo fuisse regnandi initia. Primum à pugnâ Textriciensi, & ab anno 691. alterum ab obitu Theoderici patris, & ab anno 694. Prius illud initium probat inscriptio quædam, quæ refertur in secundo Sæculo Benedictino, ad finem Vitæ S. Ansberti, ex quodam appographo Chronici Fontanellensis; habetque obiisse S. Ansbertum in Altomonte, *anno quarto Childeberti, qui erat octavus ducatus Pippini Majoris Ducis, & annus Dominice Incarnationis DCXCv. Indictione octavâ, v. Iduum Februariorum.* Nam si annus IV. Childerici hujus fuit Christi 691. mense Febuario, certe anno 692. mense eodem numeratus est annus ejus primus, qui nimirum cœperat ex anno 691.

Alterum verò Childeberti initium fuit à morte patris Theoderici, quam in anno 694. desigat epigraphæ titulo ejus indita ad S. Vedastum Atrebatensem, his octo hexametris:

*Rex Theodericus ditans ut verus amicus
Nos ope multimodâ, jacet hic cum conjuge Dodâ.
Regis larga manus, & Presul Vindicianus
Nobis regale dâns & jus pontificale.
In decies nono cum quinquagies duodeno
Anno defunctum scies hunc, qui quatuor addet.
Quâ legis hac horâ, Dominum pro Regibus ora,
Muneribus quorum stat vita Dei famulorum.*

Scio mentiri interdum etiam æta & marmora, quæ scilicet ævo recentiore, antiquiorum hominum adjecta sunt monumentis, qualia observavimus nonnulla. Sed verus est hoc Theoderici epitaphium; & ægrè mihi persuaserim aut errasse, aut (quod gravius est) mentitos esse Monachos Vedastinos,

quibus incubuit regio mausolæo ad omnium posterorum memoriam hos versus inscribere. Hunc porro annum obitus Theoderici Regis confirmat Chronicon Vedastinum, apud Franciscum de Bar, ubi refertur hic obitus *in annum quintum regiminis Hatto I. Abbatis, quem electum tradis anno 690. sequenti 691. Theoderici xlii. à S. Vindiciano sollemniter benedictum*. Ita Henschenius, de tribus Dagoberti lib. 2. cap. 17. Confirmat & inscriptio vetus quam refert Pontacus in Apparatu ad Chronicon Eusebii, pag. 27. & Josephus Scaliger in Animadversionibus ad Chronologica Eusebii, ultimâ ante Indicem paginâ. *In annum quintum Childeberti Regis Francorum, Pippino iubente, fuit Pascha x. Kalendas Aprilis, Ascensio Domini Kalendis Madiis*. Qui characteres annum indicant æræ Christianæ 699. Itaque primus annus Childeberti agebatur ex anno 694. & sequentis anni 695. verno tempore erat in cursu. Addo & argumentum aliud ex annis regni, & ex obitu Childeberti III. Hic enim vivere desiit anno Christi 711. sive xviii. Kalendas Maii, ut notatur in quodam S. Medardi Chronico; seu potius xxiii. Novembris, juxta Kalendarium Monasterii S. Luciani, à Childeberto ipso fundati. Annum autem obitus 711. præter Benignianum ac Besuense, habent & alia plura Chronica, quæ colligit Duchesnius; quem & regnasse notant annis xvii. idemque asserit Aimoinus, lib. 4. cap. 49. Engolismensis, & alia duo nostra Chronica sæpè citata. Numera ergo ab anno 694. annos xvii. incides in annum septingentesimum undecimum.

Ex his apparent Childeberti duo regni exordia: primum à prælio Textriciensi, adeoque ex anno 691. alterum à morte Theoderici patris anno 694. vitâ functi. Clodoveo III. plerique duos regni annos tribuunt; verisimilius quatuor Annales Metenses, & Chronicon post Fredegarii Collectionem, Childebrandi jussu conscriptum: partem etiam quinti addit breve Chronicon Tillianum, in Collectione Duchesniana, tomo 1. pag. 781. C. Primum illi regni initium fuit prælii Textriciensis annus 691. uti & Childeberto. An hi duo fratres conjunctim regnarint, an verò Clodoveus in Austrasiâ, & Childebertus in Burgundiâ, non est usquequaque certum. Alterum à morte patris ex anno 694. & hoc fuisse indistin-

ctum, aded ut per tria regna (nempe per Neustriam , Austrasiam , & Burgundiam) uterque simul Rex agnosceretur , videtur colligi ex illis verbis , quæ ex Chronico manuscripto Collegii nostri Trevirensis refert Labbeus anno æræ suæ Christianæ 699. *Clodoveus, filius Theoderici, cum fratre Hildeberto regnare capit.*

Ex illo dissidio Pippini Heristelli à sancto Ansberto Rotomagensi Episcopo, propter quod illum Pippinus in Altummontem Hannoniæ Cœnobium relegavit , pronum est suspicari turbatum nescio quid inter Pippinum & Reges , patrem cum duobus filiis ab eo regnare iussos. De his turbis Aigradus in Vitâ S. Ansberti. *Cum, inquit, inter Principes Francorum secus esset exorta discordia ob multiformem regni divisionem, callidus humani generis hostis, malignorum contra Dei famulum seuire fecit invidiam, qui Pippino Principi fraudulenter suggererent, præfatum virum sanctum adversus eum contraria tractasse consilia. Decedente enim de ordine principatus Waratone illustri, & ejus filio ac supplantatore nefando Gisemaro, Pippinus Præfectoriæ administrationem, Domino largiente, adeptus est. Quo tempore accusatus apud ipsum Principem præfatus Pontifex sanctus, jussu ejusdem exilio deportatur in Alatummontem Monasterium, quod est situm in territorio Hagnawo, super Sambra fluvium.*

Apertè hic annus designat Textriciensis victoriæ , qui fuit, ut ostendimus, Christi 691. quo ex tempore cum suspectus fuerit Ansbertus de agitatâ contra Pippinum consiliis, (non utique cum Clodoveo & Childeberto ejus filijs juvenculis) cadit suspicio in Theodoricum, cui tunc præter Regis titulum nihil superesset. Hinc opinari licet, ex illo anno 691. sic exauctoratum fuisse Theodoricum, ut non magis Rex haberetur quàm duo filij, hosque aded cum patre per triennium cladi suæ superstitè dictos à Pippino Reges, non re, sed solo nomine; atque hujus umbraticæ majestatis ductum initium ex anno illo 691. quæ tamen patre è vivis exempto, in ejus filijs heredibus novum quoddam exordium habuisse visa est.

Hæc tantum nobis in præsentia per illorum temporum nebulas, Scriptorumque inopiam deprehendere licet; atque

hæc facis pro instituti nostri brevitate. Nunc quia in Chil-
deberti III. obitu , & in anno Christi DCXXI. cum iis con-
venimus , qui Dagobertum eo nomine primum solido mo-
narchiæ suæ sexennio spoliaverant, finem tandem huic Opus-
culo imponamus : si prius tamen capita chronologica hic à
nobis sancita , sub unum veluti aspectum collegerimus.

CAPUT XXII.

*Hujus Dissertationis capita chronologica , in modum Indicis ,
temporum ordine digesta.*

ANNO ætæ Dionysianæ 420. nascitur S. Johannes Ab-
bas Reomaensis.

540. obiit S. Johannes Reomaensis XXVII. Januarii , cen-
tum & viginti annos natus.

541. per Canonem primum Concilii Aurelianensis IV. in-
vectus est in Gallias mos triplex. 1. Civiles annos à Pas-
chate inchoandi. 2. Numerandi per annos Christi. 3. In-
dictiones adhibendi.

615. S. Columbanus è Bobio migrat ad superos XI. Kal. De-
cembris.

619. S. Arnulfus fit Episcopus Metensis.

622. vel 623. Dagobertus à patre Clotario Rex Austrasiæ
constituitur.

626. Dagoberto Regnum ampliatur XII. Procerum ar-
bitrio.

627. VI. Idus Martias obiit S. Attalus , Bobiensis Abbas :
successit S. Bertulfus.

628. die Septembris XXVIII. è vivis abiit Rex Clotarius II.

629. S. Arnulfus , Metensis Episcopus , ex aulâ Dagoberti
secedit in eremum.

635. Nascitur S. Sigibertus Rex , mense Januario.

638. S. Sigibertus triennis Rex Austrasiis datur.

640. XI. Augusti , obiit S. Bertulfus Abbas Bobiensis : suc-
cessit S. Babolenus.

641. vel 642. aggreditur Jonas sanctorum Columbani &

Eustasii Vitæ conscribere , quibus post aliquot annos ultimam manum adhibet.

644. Moritur Rex Dagobertus xix. Januarii.

645. S. Babolenus ex Abbate Bobiensis præficitur Monasterio Fossatenfi.

646. SS. Eligius & Audoenus ordinantur Episcopi xiv. Maii , Dominicâ ante Litanias.

652. S. Wandregisilus à S. Audoëno Abbas instituitur.

653. S. Wilfridus , novemdecim annorum juvenis , Lugdunum venit , & à S. Dalfino , sive Annemundo Archiepiscopo benignè excipitur.

654. cœptum est opus Monasterii Fontanellæ , Kalendis Martiis.

655. S. Wilfridus Romam proficiscitur.

657. S. Wilfridus Lugdunum redit , ubi apud Dalfinum Archiepiscopum per sex annos commoratur.

659. S. Romaricus , Habendensis Abbas , transit ad cælites Dominicâ die , vi. Idus Decembris.

660. S. Sigibertus , Austrasix Rex , moritur Kal. Februarii. Clodoveo II. regnante , transfertur in Gallias corpus sancti Benedicti.

Relegatur in Hiberniam Dagobertus II. sancti Sigiberti filius.

De Grimoaldo supplicium sumitur.

Hoc ipso anno , vel initio sequentis , obiit Clodoveus II.

661. Hujus anni Kalendis Decembribus , S. Eligii Episcopi felix anima ad superos evolavit.

663. S. Annemuridus (qui & Dalfinus , & Sigobrandus) Lugdunensis Episcopus , martyrio coronatur xxviii. Septembris.

Childericus Rex Austrasiis datur.

S. Leodegarius ex aulâ emittitur , & Augustodunensis Episcopus consecratur.

Balechildis Regina , abdicatâ Regni administratione , in Kale , quod sibi præparaverat , Monasterium secedit.

664. Solis defectio Kalendis Maiis.

Agilbertus Episcopatu Parisiensi donatur.

Wilfridus primum Presbyter , deinde Episcopus ordinatur.

667. Theodericus III. Rex Burgundiæ constituitur.

671. Obiit S. Wandregisilus xx i. Julii.

674. Mortuo Clotario III. successit in regnum Neustriticum Theodericus, ejus frater, ad aliquot dies : huic in S. Dionysii Monasterium relegato sufficitur à Regni Proceribus Childericus jam tum Austrasiæ Rex.

S. Audoënus Vitam S. Eligii à se conscriptam mittit ad Rodobertum Turonensem Episcopum.

Hoc (ut videtur) anno, vi. Idus Novembris, S. Leodegarius, adstantibus tredecim alijs quàm Episcopis, quàm Archiepiscopis, consecravit Ecclesiam Monialium Castrî Karoli, diœcesis Bisontinæ, in pago Scodingorum fundatam à Nordeberto Patricio, & Eusebiâ ejus conjugē.

Dagobertus, S. Sigiberti Austrasiæ Regis filius, in paterni Regni partem recipitur; ac tum à Wilfrido Eboracensi Archiepiscopo equis & viris juvatur.

677. Cometa ex mense Augusto in tertium usque mensem totius Europæ apparet. Childericus III. interficitur.

S. Leodegarius oculis privatur.

678. S. Wilfridus Episcopatu suo dejectus, dum Romam navigat, in Frisiam defertur.

679. S. Wilfridus Dagobertum in Austrasiâ Adthenanâ imperantem visit, atque ab eo perhumaniter excipitur.

S. Leodegario lingua & labia præscinduntur. Gerinus ejus frater lapidibus obruitur.

Ebroinum in Regni Proceres sævientem S. Filibertus publicè increpat.

680. S. Wilfridus Romam venit, ubi mense Novembri interest Concilio adversus Monothelitas, sub Papâ Agathone.

Bellum in Lingonibus inter Theodericum & Dagobertum Reges; ubi Dagobertus cum Wlfoaldo Subregulo profligatur.

681. S. Leodegarius in quadam Synodo damnatur rei capitalis, decalvatur, & rescissâ veste exauctoratur: nec multò post in Atrebatibus, haud procul Sarcingo villâ, capite truncatur vi. Nonas Octobris.

682. Martinus & Pippinus, post Wlfoaldum in Austriâ. Majores-domûs, bellum inferunt Ebroïno, à quo & vincun-

tur, & Martinus Laudun' quo se receperat, per fraudem
eductus interficitur.

S. Genesius, Lugdunensis Episcopus, moritur Kalendis
Novembris; cui succedit S. Lantbertus ex Abbate Fon-
tanellæ.

684. Ebroinus ab Ermenfrido occiditur.

687. Profligato ac sublato Gislemaro, paterni majordomatus
invasore, Pippinus in Austriâ principatum accipit.

688. S. Filibertus in suum Gemmeticense Monasterium ex
Aquitaniâ revocatur.

689. Obiit S. Audoenus Clipiaci xxii. Augusti, die Domini-
câ; cujus depositio xxiv. Augusti, quo die ad Pontem Isaræ,
præsente Rege & Reginâ, & regni Procerum magno cœtu,
sollemnes ei persolutæ sunt exequiæ.

S. Ansbertus, S. Audoëni successor, Rotomagi Concilium
celebravit.

S. Filibertus ab Ansoaldo, Pictavensi Episcopo, in Aquit-
taniâ reducitur.

691. Post victoriam Textriciensem, Pippinus, à regio licet
titulo abstinens, etiam in Neustriâ, adeoque in totâ Fran-
corum monarchiâ, principatum sibi vindicat; & Theode-
rico Regis Neustriæ titulum relinquens, Clodoveum III.
& Childeberrum III. ejus filios, (illum, ut videtur, in Bur-
gundiâ, hunc in Austrasiâ) Reges esse jubet.

693. Clodoveus III. cum ad duos annos regnasset, moritur,
patre adhuc superstite.

694. Moriens Theodericus Rex, Childeberrum filium in
monarchiâ reliquit.

709. Obiit S. Wilfridus.

711. Rex Childeberrus III. è vivis excedit.



APPENDIX
DE
S. DIONYSIO AREOPAGITA
ET DE S. GENOVEFA,
PARISIORUM PATRONIS.

P R Æ F A T I O.

VIRI PARISIENSES,

Sextum jam annum hospitiiis vestris perhumaniter exceptus, unum nunc Vos posco. Si sanctam Genovesam agnoscitis popularem vestram, in suburbanis vestris natam atque educatam, vestris exinde mœnibus receptam: si adversus Burgundiones, Gothos, Alanos, Hunnos, Nortmannos, aliósque hostes quondam vestros auxiliatricem: si regiae Francorum Sedis in Leucotetiâ vestrâ constitutæ quasi Fundatricem: si in laxandis ad frugum ubertatem, aut continendis imbribus altricem vestram fatemini; ejusdem erga Dionysium Areopagitam, Apostolum & Martyrem vestrum, singularem religionem sectari ne dedignamini. Illa divino quondam admonitu, super Dionysii vestri, & lociorum Martyrum tumulos in Catuliaco basilicam prima imposuit, ducentis admodum annis ante regii Dionysiani Monasterii inchoatam à Dagoberto foundationem. Hujus rei assertorem Vobis profero gravem ac disertum Scriptorem, qui Vitam S. Genovesæ à mille & ducentis ferè annis conscripsit. Librate hujus testimonii pondus, & quod æquitas vestra ne extraneis quidem negaverit, patriæ vestræ, & concivibus vestris nolite abjudicare.



V I T A
S. GENOVEFÆ
V I R G I N I S.

Auctore qui ter senis ab ejus obitu annis scribebat.

*Ex codice pervetusto inclytæ Basilicæ, in quâ illa
monumentum habet.*

In Christi nomine incipit libellus de vitâ & moribus, sive
conversatione beatissimæ virginis GENOVEFÆ,
quæ obiit III. NONAS Januarii.

1. **T**EMPORE quidem quô ad describendam beatæ virginis Genovefæ Vitam accessi, operæ pretium duxi, ut tempus locumque nativitatis, ac nomen patris ejus & matris, quin etiam gratiam Dei, quæ ipsi à primævâ ætate præstita est, brevi stylo notarem. Licet enim certum diem nativitatis ejus ignoremus, tamen conjicimus ex historiis veterum, quod tempore Imperatorum, Honorii videlicet imperantis in Occidente, & Theodosii minoris in Oriente, in Nammetodorensē parochiâ, ubi pater ejus, nomine Severus, ac mater, nomine Gerontia, morabantur, felicissimæ nativitatis diem assecuta est. Nec potuit multo à sancto Germano Antislite Autisiodorensē, proficiscente in Britanniam, Dei nutu patefactum est multis, quod Christo inviolato corpore, necnon mente, perpetuum exhibitura esset famulatum. Mansit verò cum parentibus, crescens tam corpore quàm rectis moribus, à tempore supradictò, usque Valentiniiano, qui Romanum Imperium in finibus Galliæ rapuit, summentibus Francis dynastiam in eâ per tyrannidem, noménque patris de suo nomine dantibus.

2. Deinde, nempe jam adolescentula, consecrata à Vilico Episcopo

Carnotensi, claruit innumeris virtutibus ac miraculis, adhuc vivente Nicasio, qui sub Hunnorum tyrannide martyrio coronatus est; Remigioque deinde Præsulibus sanctis Durocordarum: sub Regibus Francorum, videlicet Childerico, Clodoveo, usque ad tempus Clotharii Regis, & Childeberti, quando meruit deposita fragilis sarcinâ corporis, ejus anima paradisi januam penetrare.

*Prima Germani in
Britanniam
profectio
anno 429.*

3. Omnis Galliæ Antistitum decreto, proficiscentes in Britanniam sancti ac venerabiles viri, scilicet Germanus & Lupus, Pontifices, sub Imperatoribus taxatis, ad Pelagianam hæresim, quæ in jamdictam insulam maximè pullulabat, superandam; ad basilicam Nammetodoro vico sitam, manendi, vel maximè orandi gratiâ, se contulerunt. Quibus cum vulgi multitudo haud procul ab Ecclesiâ, benedictionem expectans, obviam venisset, & catervatim uterque sexus virorum ac mulierum & parvulorum occurreret, in medio occurrentium cœtu, eminens sanctus Germanus intuitus in spiritu magnanimam Genovesam, illic ad se deduci præcepit: cui caput osculatus, sciscitabatur à turbâ nomen puellæ, & cujus esset filia diligenter investigabat. Exempli nomen Genovesæ à circumstante populo edictum est; & pater & mater acciti astiterunt. Vidensque eos vir apostolicus, ait: Hæc infans vestra est filia? At illi: Nostra, inquit, Domine. Quos idem sic affatus est: Felices vos tam venerandæ sobolis genitores; in hujus nativitate magno gaudio & exultatione celebratum mysterium in cælo noveritis ab Angelis: erit enim hæc magna coram Domino; & multi ejus vitam, propositumque sanctum mirantes, declinabunt à malo; atque postpositâ improbâ conversatione, conversi ad Dominum, ac religiosi effecti, & remissionem peccatorum, & præmia Christi erunt percepturi.

4. Nam allocutus patri & matri ejus de mysterio nativitatis ipsius in cælo ab Angelis celebrato, confestim ait Genovesæ: Filia mea. Quæ respondit: Audio, Pater sancte, & quæcumque jubes, mente sagaci percipio. Cui sanctus Germanus dixit: Quælo, ne veneris mihi profiteri si vis in sanctimonio consecrata Christo, usque ad tuæ mortis diem, immaculatum & intactum corpus, quemadmodum sponsa ejus, conservare. Cui Genovesa respondit: O benedixte mi Pater, quia quod desidero inquiris, quod & ambio adipisci: solum hoc superest, ut devotionem meam, intercedentibus tuis orationibus, Dominus adimplere dignetur. Ait ei dehinc beatus Pontifex: Confide, filia, viriliter age; & quod corde credis, & ore profiteris, operibus comprobare studeto: dabit enim Dominus fortitudinem & virtutem decori tuo. Quo dicto, præfatus Præsul tamdiu manum super caput ejus tenuit, quoadusque ad jamdictam basilicam pervenerunt; ibique benedictione populo datâ, & manûs celebratâ missionem, quæ solis Episcopis competit, de quâ Cyprianus Martyr, & Cornelius Apostolicus altercati primum, deinde sibi consentientes,

*Manus
missio solis*

evicit Cyprianus, ut secundum auctoritatem evangelicam manus missio post Baptismum celebraretur: cursuque spiritali celebrato nona vel duodecima, necnon secundum morem cibo sumpto, ac hymno dicto quieverunt. Jubens præscius futurorum Germanus, Severum unum cum filiâ suâ in suo se receptare tabernaculo, primoque diluculo ad se reverti. Quæ cum fecisset, lustrante jam Solis jubare terras, ita ut jusserrat, à genitore suo adducta, nescio quid in eâ deinceps cæleste sanctus Germanus conspicatus ait ad eam: Ave, filia Genovesa, reminisceris quid hesternâ die de corporis tui integritate mihi sis pollicita? Cui Genovesa respondit: Reminiscor quod tibi, Deoque, Pater sancte, promisi, quoniam vitæ hujus propositum me avidissimè desiderare dico, Deoque cernente molimina cordis profiteor. Cui statim Antistes nummum æreum Dei nutu allatum, habentem signum Crucis, à tellure colligens, pro magno munere dedit, inquisiens ad eam: Hunc transformatum pro memoriâ ejus, & collo suspensum semper habeto, nulliusque metalli, neque auri, neque argenti, seu libet margaritarum ornamento collum digitosque tuos onerare patiaris. Nam si sæculi hujus vel exiguus decor tuam superaverit mentem, profectò æternis & cælestibus carebis. Et valedicens ei, obsecransque ut sui memor tantum in Christo esset, ac commendans eam genitori suo Severo, proficiscentes, suffragante Christo, in Britanniam perrexerunt.

*Episcopi
permissa,
Sacramen-
tum Confir-
mationis.*

5. Nam supradicta hæresis zizania super triticum disseminans, inter alia contra fidem catholicam asserēbat, natos ex duobus baptizatis, sine baptismo posse salvari, cum omnino divinum eloquium clarâ voce per Johannem intonet, dicens, nullum posse habere vitam æternam, nisi renatus fuerit ex aquâ & Spiritu sancto. Hanc Scripturarum testimoniis, & virtutum miraculis triumphantes, sed etiam Scholorum ac Pictorum infestationem, quæ illi regioni instabat in Paschæ festivitate, quando adhuc in albis erant quos baptizaverant in nomine sanctæ & individue Trinitatis, cantantes voce excelsâ, Alleluia, effugarunt. His igitur prætermisiss, ordo deposcit ut profequamur de Genovesa.

Joan. 3. 3.

6. Factum est autem post dies aliquot, cum mater ejus ad ecclesiam die sollempni pergeret, & Genovesam quam domi remanere præceperat, nequaquam posset retinere, clamantem cum lacrymis, & dicentem: Ego fidem quam sancto Germano pollicita sum, adminiculante Christo, servabo, & Ecclesiæ limina frequentabo, ut sponsa Christi esse merear, quatinus margaritis ac vestibus ejus digna repariar. Illic mater ejus iracundiâ repleta, ut filiz alapam dedit, statim ultione divinâ videndi amisit pulchritudinem. Tribus namque mensibus minus à biennio, nutu divinæ majestatis, ad manifestandam gratiam Genovesæ, hanc perpessa est cæcitatem: quâ nimium adtrita mater ejus, reduxit ad memoriâ quid testimonii de filiâ suâ sum-

mus Antistes dedisset; vocansque eam ad se, ait ei: Accipe hauritorium, & properè perge ad puteum, ut exhibeas aquam, obsecro te, filia mea. Cùmque lummâ festinatione ad puteum venisset, & super marginem putei staret, eo quod mater ejus lumen amiserat, impleto vasculo, detulit aquam matri suæ: mater verò ejus extendens manum ad cælum, cum fide & veneratione aquam à filiâ suâ allatam, & ab ipsâ signo Crucis notatam, accepit: de quâ ablucens sibi oculos, quamvis non integrum, tamen aliquid luminis recepit: cùmque hoc bis, terque fecisset, lumen amissum, pristinumque usquequaque resumpsit.

7. Deinde verò accidit ut cùm duabus puellis multum se majoribus secundum ætatem, ad consecrandum Vilico Episcopo traderetur: quæ cùm juxta numerum annorum ad consecrandum offerrentur, mox instar beati Germani comperit divinitus prædictus Pontifex, Genovesam virginibus quæ illi proponebantur, sublimiorem, & ait: Illa quæ pòst sequitur, anteponatur, quoniam hæc cælitus jam est sanctificationem adepta. Sic itaque benedictionem consecutæ, ab obtutu Pontificis discesserunt.

8. Parentibus defunctis, accessit à matre suâ spiritali, in Parisium urbem transivit; & ut virtus Domini in infirmitate ejus probaretur, & gratia Christi in eâ collata plus cresceret, per aliquod tempus ita est ibi corpus ejus obsessum paralyti, ut laxatis artubus, nulla compages membrorum adherere suo crederetur loco. De quâ infirmitate nimium profligata, triduo corpus ejus jam ferè exanime, solis paululum genis rubentibus custodiebatur. Quæ cùm denuò corporalem fuisset adepta sanitatem, profitebatur se in spiritu ab Angelo in requiem justorum, & supplicium impiorum deductam, & ibi se vidisse parata diligentibus Deum præmia, quæ incredibilia apud infideles habentur. Pluribus namque deinceps in hoc sæculo viventibus, velut edocta à sancto Spiritu, secretas conscientias manifestissimè declarabat; quod propter arrogantes, qui ingentem devotionem habent detrahendi, & dum bonis invident, suam supersticiosam indicant conscientiam, silere magis, quàm propter bonos & humiles describere malui.

9. Proficiente igitur sancto Germano secundâ vicè in Britanniam, unà cum Severo, Trevirensi Præsule, imperante jam minore Valentiniano, filio Placidie, contigit recti lineæ callis iter facere per Parisium. Quo audito, ferè universus populus egressus ab urbe, obviis ei hilari animo cucurrit. At ille illicò, postpositis omnibus, sollicitus de Genovesa, quid ageret inquisivit. Sed vulgus, qui parator est ad detrahendum bonis potiùs quàm ad imitandum, assererat omnibus studiis hæc esse inferiorem, quam cavillantes, potiùs dignam laude prædicabant quàm vituperatione: nam sicut non justificatur quis alienâ laude, ita nec læditur infamiâ. Quorum gar-

*Secundâ
Germani ad
Britannos
profectio an-
no 446.*

rulam

tulam vocem parvipendens sanctus Germanus, in civitatem ingressus, ad hospitium Genovefæ usque pervenit : quam cum tantâ humilitate salutavit, ut omnes mirarentur. Et oratione factâ, ostendit his quibus despectui habebatur, terram aridam de suis lacrymis irrigatam : & residens disposuit eis, quasi ignaris, vitæ ejus exordium, & quemadmodum Nammetodoro primum Deo electam divinitus compererat ; commendansque eam populo, viam cœpti itineris pergit.

10. Famâ divulgante (quæ tam verî quàm falsi nuncia refertur) quod Attila, Hunorum Rex, sævitia superatus, Gallias decrevisset populari, ac suæ ditioni subicere : terrore perculsi Parisiaci cives, bona facultatum suarum in alias tutiores civitates deferre nitebantur : quorum matronas convocans Genovefa, suadebat, ut j-juniis, & orationibus, & vigiliis insisterent, quatinus possent (sicut Judith & Hester) superventurum inimicorum impetum evadere. Consentientes ergo Genovefæ, in baptisterio vigilias exercentes, j-juniis & orationibus soli Deo vacaverunt. Viris quoque earum pariter suadebat, ne bona sua à Parisio auferrent : nam illas civitates, quas esse tutiores credebant, gens irata vastaret, Parisium verò incontaminatam ab inimicis, Christo protegente salvandam. Insurrexerunt autem, propter hoc, in eam quidam cives Parisiorum, dicentes, pseudoprophetiâ suis temporibus apparuisse, eod quod prohiberentur ab eâ, quasi à non peritura civitate, in alias tutiores urbes bona sua transferre. Tractantibus ergo civibus jam sæpeditæ urbis, ut Genovefam aut lapidibus tunsam, aut vasto gurgiti missam punirent ; defuncto jam sancto Germano, advenit ab Autisiodorensi urbe, annuente Domino, Archidiaconus, qui olim audierat eum de eâ magnificum testimonium dedisse : nactusque est eos per diversa loca conventicula facere, ac de interemptione ejusdem concionari : qui cum consilium eorum cognovisset, dixit ad eos : Nolite, ô cives, tam nefandum admittere facinus, quia hanc de ejus interitu tractatis, didicimus, narrante sancto Germano Antislite nostro, ex utero matris suæ à Deo electam : & ecce eulogias illi ab eodem relictas exhibeo. Comperientes ergo supradicti cives, Genovefam testimonio sancti Germani, Dei esse fidelissimam famulam ; & jam videntes eulogias quæ illi, deferente Archidiacono, fuerant allatæ : metuentes Deum, & ea quæ ab Archidiacono dicebantur, mirantes, dissipato pravo consilio insidiandi finem fecerunt ; impletumque est in die illâ dictum Apostoli quo ait : Non enim omnium est fides ; fidelis autem Deus semper suos conservat & custodit à malo. Summi Antistes Martinus & Anianus, pro virtutum suarum admiratione valde laudati sunt, eod quod unus eorum apud Vanglodium civitatem postmodum in bellum inermis offerendus, utriusque exercitus sævitia sedatâ sœdus obtinuit ; alter verò Aurelianensium urbem ab exercitu Hu-

Obiit 5.

GERMANUS

31. Julii

448.

2. Theff. 3.

2.

norum circumseptam, auxiliantibus Gothis, meritis orationum suarum, ne periret, promeruit. Porro Genovesam nonne dignum est laudibus honorari, quæ prædictum exercitum barbarorum, ne Parisium populans intraret, procul abegit?

- Gal. 5. 14.* 11. A quindodecimo namque usque ad quinquagesimum ætatis suæ annum, ut crucifigeret (juxta dictum Apostoli) membra suæ cum vitiis & concupiscentiis, exemplumque foret imitabile per omne sæculum, jejuniis ac vigiliis Deo dicatis, in die Dominico tantum, & in quintâ feriâ jejunium solvebat: nullusque tamen alius cibus ei erat omni tempore, nisi panis hordeaceus, & faba, quam post duas vel tres hebdomadas in olla coctam, pro omnibus deliciis recommiscens edebat. Vino verò, necnon omnis liquoris usu, quo inebriatur homo, per omne vitæ suæ tempus abstinuit. Quinquaginta autem annis tali in abstinentiâ ductis, dein suadentibus Episcopis, quibus contradici execrabile reputatur, secundum illud Domini dictum: Qui vos audit, me audit; & qui vos spernit, me spernit) piscem & lac cum pane hordeaceo, pro recreandis tam abstinentiâ quàm senio fessis viribus, edere cepit. Et quotiens hæc edebat, totiens cælum conspiciens, lacrymas fundebat. Et cum esset mundo corde, (quemadmodum Lucas Evangelista describit de beatissimo Stephano) ita & hæc credebatur cælis apertis Dominum nostrum Jesum Christum stantem à dextris Dei videre; quoniam irritum non est promissum Domini, quo ait: Beati mundo corde, quoniam ipsi Deum videbunt. Duodecim enim virtutes perhibentur esse bonorum, quas Hermes, qui & Pastor nuncupatur, describit, ac virgines nominat; sine quibus nulla virginum, nullusque pœnitentium, in Hierusalem supernam, quæ ædificatur ut civitas, coaptari potest; quæ etiam nominantur ita: fides, abstinentia, patientia, magnanimitas, simplicitas, innocentia, concordia, caritas, disciplina, castitas, veritas, & prudentia: quibus & hæc, veluti sibi semper sociatis, fruebatur tam opere, quàm verbo, faciendo scilicet, & docendo.

- Prov. 11. 29.* 12. Multa quoque sub frequentatione egrediens Parisium, præ omnibus adire solebat Catoliacensem vicum, ed quod ibi primus Episcopus Parisii, videlicet sanctus Dionysius, cum sociis suis Rustico & Eleutherio, à persecutoribus (juxta dictum Salomonis: Stultus fervet sapienti) martyrio coronatus, & à piis habitatoribus ejusdem loci, sepulturæ est traditus, distantem à sæpeditâ urbe milliariis sex. Qui Dionysius ortus Athenis, Sacerdosque primum, more Gentilium, Arcopagi effectus, deinde abrenunciatis idolis, conversus ad prædicationem Pauli, credidit in Christum; amissisque civium consortio, nunc terræ, nunc maris itinere perfundus, per multa pericula Romam usque tetendit. Ubi statim, ut vir eruditus tam Philosophorum disciplinis, quàm etiam divinarum litterarum eloquiis, à sancto

Clemente, successore beati Petri Apostoli, filiisque secundum Baptismatis gratiam, conlati in remissionem peccatorum, super hanc provinciam, quæ nullum veritatis præconem antea habuerat, quasi quasdam novales perficiendo, ad imbuendas nationes adhuc superstitionibus & ritibus paganorum deditas, fidei dogmatibus, legationem indeptus est. Creberrimis dictis instituitur, quod Petrus veniens Romam, Linum & Cletum Sacerdotii socios assumpsit, quatenus in urbe multorum deorum cultibus dedita suffragatores divinæ prædicationis haberet. Ad ultimum ante aliquot dies passionis suæ, Clementem in omnibus studiis sui imitatore, in suâ ipsâ cathedrâ collocavit: qui certamen sancti Petri Apostoli in Cæsareâ gestum cum Simone Mago, & virtutes ac miracula ab eodem perpetrata, propter infideles pleniter descripsit. Ergo quia de sancto Clemente successore prædicti Apostoli, ac de sancto Dionysio cum multis aliis ab ipso in Gallias destinato breviter disserui, ad propositum redeam.

13. Devotio & intentio erat ipsi Virgini Dei Genovæ, ut in honore trium Martyrum, videlicet Dionysii Episcopi, Rustici Presbyteri, & Eleutherii Diaconi, basilicam construeret; sed virtus deerat. Cui cum solito Presbyteri occurrissent, ait ad eos: Venerabiles in Christo sancti Patres, ac seniores mei, obsecro vos, ut faciat unusquisque vestrum, prout potest, collationem, tam de materiâ lignorum, quàm etiam calcis, quatinus ædificetur ecclesia in honore supradictorum Martyrum. Nam terribilem & metuendum esse locum ipsum ubi requiescunt, qui antecessoribus nostris dogmata fidei primùm tradiderunt, nulli habetur ambiguum. At illi responderunt: Est nobis voluntas ædificandi; sed inter alia quæ desunt, maximè calcis copia deest. Quibus Genovæ Spiritu sancto repleta, claro vultu, mente præclariore vaticinans, manifestum dedit eloquium, dixitque ad eos: Egrediatur, quæso, sanctitas vestra, & deambulate per pontem civitatis, & quæ audieritis, renunciate mihi. Qui cum egressi fuissent in plateam, stupore & admiratione repleti stabant attoniti: & ecce duos custodes porcorum non longè ab eis stantes, cum inter se sermocinarentur, ait unus ad alterum: Dum suis vestigium ob partum vagantis legerem, inveni fornem calcis miræ magnitudinis. Alter verò pastor è contrario respondit: Item & ego inveni in silvâ arborem radicibus à vento evulsam, & sub radicibus ejus similiter fornem calcis, de quo nec quicquam credo aliquando esse sublatum. Hæc audientes Presbyteri, attoniti stupore & admiratione, Deum benedixerunt, qui tantam gratiam simulæ suæ Genovæ dignatus est conferre. Perquirentes ergo loca in quibus siti erant forni calcis, de quibus custodes porcorum sermocinabantur, regressi Presbyteri, quæ à pastoribus didicerant, renunciaverunt. At illa extemplò præ gaudio sinum lacrymis implevit. Egredisque de domo suâ Presbyteris, poplitibus impicatis, genibusque

in terrâ fixis, noctem totam in lacrymis & oratione consummavit, obsecrans sibi à Domino opitulationem atque auxilium conferri, quatinus posset in honorem summi Antistitis ac Martyris sancti Dionysii basilicam construere. Quæ luce primâ, licet vigiliis afflicta, ad Genesium Presbyterum celeri gressu pervenit, laceffitque eum, ut aliquam domum in supradicti Martyris honore construerent: cui & de calcibus quas Deus providerat, indicavit. Etenim Genesius Presbyter ubi de calcibus audivit, metu superatus, Genovesam protinus terræ prostratus adoravit, atque promisit, tam die quam nocte obnixè quæ jusserat, se impleturum. Universis denique civibus, Genovesâ implorante, auxilium ferentibus, in honorem sæpediti Martyris inchoata est basilica.

14. Operæ pretium duxi etiam illud indicare quid miraculi tunc per eam Dominus fecit. Cum collectis carpentariis, qui ea quæ ad crebrò dictum ædificium de lignis opus erant in saltu, alii inciderent ac dolarent, alii in plaustra conveherent: contigit ut potus deficeret. Sed Genovesæ incognitum erat quòd defecisset; affarique Genesius Presbyter Genovesam cœpit, quatinus opifices cohortaretur, quousque ille ad civitatem pergeret, potumque velociter exhiberet. His auditis, Genovesa vas in quò potus delatus fuerat, quod cupam nuncupamus, sibi petiit monstrari. Quæ cum fuisset ostensa, exposulavit à se omnes seorsum discedere; & illa genibus in tellure fixis, lacrymas fundens, ubi se sensit obtinuisse quæ precabatur, surgens oratione completâ, signum Crucis super vas poculi fecit. Mirabile dictu! statim cupa usque ad summum potu impleta est, adeoque ex eo qui ad operandum acciti fuerant; quamdiù omne opus basilicæ consummatum est, uberimè bibentes, maximas Deo gratias retulerunt.

15. Fuit illi devotio ut noctem Sabbati quæ lucefcit in primâ Sabbati, secundum consuetudinem, & statuta antiquorum Patrum, pervigilem duceret. Unde accidit, ut vice quadam, post intempesta noctis, jam proximum diem Dominicum, gallorum plausu & cantu indicante, egressa de receptaculo suo, ad jamdictam basilicam sancti Dionysii pergeret. Dum autem illuc properaret totâ intentione cordis, contigit ut cereus qui ante eam deferbatur, exstingueretur, Turbatis verò virginibus quæ cum eâ erant, ab errore tetæ noctis, & à nimio cœno & imbre qui ab æthere fundebatur; cernensque hunc cereum exstinctum, statim sibi dari petiit. Quem cum manu accepisset, continuò illuminatus est; eumque in manu gestans, ad basilicam usque pervenit, & ibi ante eam lucens cereus ipse consumptus est igne. Similiter eodem tempore ingressa ecclesiam, cum more solito prostrata orationem compleisset, exin à pavimento surgens, cereus qui necdum ab igne contactus fuerat, divino nutu succensus, in manu ejus illuminatus est. Item in cellulâ suâ aiunt

cereum in manu ejus sine succensione ignis illuminatum : de quo etiam cerco multi infirmi, fide instigante, paululum cum reverentia auferentes, pristinam receperunt sanitatem.

16. Namque quodam tempore, instinctu diaboli, qui semper bonis scandala præparat, quædam femina furtim abstulit ejus calciamenta : quæ ut ad domum pervenit, continuè oculorum lumen amisit. Ergo ut cognovit furuncula cælitus in se ulcisci injuriam Genovesæ, alterius ducatu ad eam revectans calciamenta, ruensque ad pedes ejus, ignosci sibi pariter, & lumen restitui ululans exorabat. Genovesa verò, ut erat benignissima, manu eam ab humo subridens levavit, & signans oculos ejus, pristinum lumen restituit.

17. In Laudunense urbe, ubi Præsul Remigius sanctitate plenus præerat, quid miraculi per eam Dominus fecit, edicere series lectionis exposulat. Adveniente Genovesâ, haud procul à jamdictâ urbe, maxima pars populi in occursum ejus venit ; inter quos, & parentes cujusdam puellæ venerunt, quæ novem annis ita erat paralytis ægritudine afflicta, ut nequiverit quisquam judicare compagem membrorum. Supplicantibus ergo eis, & cæteris senioribus populi, ad domum puellæ pervenit, orationeque ibidem secundum consuetudinem peractâ, contrectans dissolutos actus, propriis manibus eam vestire & calciare præcepit ; adeoque restituit sanitati, ut incolumis cum populo ad ecclesiam pergeret : quod miraculum cum viderent turbæ, benedixerunt Dominum nostrum Jesum Christum, qui tantam gratiam diligentibus se præstare dignatus est : & remeante Genovesâ, ab ipsâ urbe psallentes & jubilantes populi eam deduxerunt.

Erat Laudunum in provinciâ Remensi.

18. Operæ pretium videtur inferere quâ veneratione Childericus Rex Francorum, licet adhuc paganis ritibus deditus, pro miraculis quæ ab eâ in nomine Christi perficiebantur, cum omnibus Comitibus suis dilexerit ; adeò ut vice quadam, ne vincos qui ab eo tenebantur multandi, exigentibus meritis Genovesa abriperet, egrediens urbe Parisiorum, portam claudi præcepit : at ubi, per fidos internuncios videlicet, Regis deliberatio aures Genovesæ pulsavit, confestim ad liberandas animas concito gradu perrexit : nec minimum populi admirantis fuit spectaculum, quodd tunc porta civitatis inter manus ejus, sponte suâ sine clave patefacta est ; sicque Regem consecuta, ne vincorum capita amputarentur, obtinuit.

19. Fuit quidam Sanctus in partibus Orientis, valde contemptor sæculi, nomine Symeon, in Syriâ Ciliciæ eminus ab Antiochiâ, constitutus in columnâ annis ferè quadraginta, quem aiunt sedulè negotiatores cunctes ac redeuntes, de Genovesâ interrogasse, ac eam veneratione profusâ salutasse, & ut eum in orationibus suis memorem haberet, etiam poposcisse fertur. Admirabile istud apud nos celebratur. Nam nec calidus, nec frigidus Christianus habetur, qui ambigat quòd fidelissimi famuli Christiani, voluntatem ejus ex parte

cognoscentes, semetipsos non comperiant, licet ab administratione sua multis regionibus inter se interjacentibus; quemadmodum Ambrosius & Severinus sancti Anstites; quorum unus Mediolani consistens, alter vero Agrippinæ, notum Martino & in militia, & post militiam, jam in Episcopatu constituti, ejus transitum de hoc mundo meruerunt agnoscere; Ambrosius scilicet dum celebraret Missam, Severinus autem peractis Matutinis. Necnon Benedictus Abbas, cujus vita velut speculum emicat bonorum Monachorum, cognovit exisse de corpore animam beatissimi Germani Capuani Episcopi, licet absens esset funeris ejus exequiis.

20. Puella quædam jam nubilis, & jam desponsata, nomine Cilinia, ut comperit gratiam Christi Genovesæ conlatam, petit sibi ab ipsâ vestem mutari: quod cum adolescens cui fuerat promissa, audisset, protinus indignatione repletus, Meldis urbem ubi Cilinia cum Genovesâ morabatur, advenit. Genovesa autem ut advenisse juvenem furibundum didicerat, unâ cum Cilinia summâ cum festinatione ad ecclesiam perrexit. Magni miraculi res fuit, quia eisdem fugientibus, baptisterium quod interius erat, se sponte reservavit. Sic itaque prædicta puella ab hujus mundi naufragio & contagione liberata, usque ad finem vitæ suæ in abstinentiâ & castitate perseveravit. Per idem tempus supradicta Cilinia obtulit Genovesæ puellam de ministerio suo, cui biennio ferè ægrotanti, etiam pedum usus fuerat ablatum: quam ut manibus Genovesæ contrectavit, confestim ex integro sanitati reddidit.

21. Aliquando vero contigit ut Parisius offerrentur ei inter viros & mulieres, duodecim animæ, quæ à dæmonibus gravissimè vexabantur; super quibus indolens Genovesa, perfusa lacrymis ad orationem recurrit, postulans ut in nomine Christi à jamdictâ peste liberarentur. Adhuc eâ perseverante in oratione, inergumini suspenduntur in aëra, adeo ut nec manus eorum cameram, nec pedes terram tangerent. Quæ cum ab oratione surrexisset, jussit eos ad sancti Dionysii Martyris basilicam pergere. E contrario inergumini querebantur nequaquam sibi gradiendi facultatem resumere, nisi ab eâ dissolverentur: quæstibus quorum Sancta Dei adtrita, jussit ac permisit eos ire junctis post tergum manibus ad prædicti Martyris basilicam sub silentio. Ipsa nempe post duas ferè horas subsecuta eos, ad præfatam basilicam venit: quæ cum illic orare more solito adhærens pavimento cum fletu cœpisset, vociferabantur inergumini cum ingenti clamore, prope sibi jam esse eos quos advenire in solatium precabatur: nec dissidendum esse eum qui per pythonissam loquebatur, etiam nunc cernentem expulsionem suam de jamdictis inerguminis fieri; ut vel sic adhuc à fatuis coleretur, significare voluisse quoddam Apostoli & Martyres, & reliqui justi, tribuente Christo, qui prope est omnibus invocantibus eum in veritate, & voluntatem timentium

se facit, Genovefæ in adminiculum venirent. His auditis, surgens ab oratione, notânsque singillatim eos signo Crucis, omnes spiritibus immundis obseſſos curavit. Subitò verò omnium aſtantium nares nidor ac ſætor graviffimus in tantùm attigit, ut nullus eorum dubitaret animas à vexatione dæmonum emundatas: benedicebântque Deum pro tali ſigno.

22. Perceptâ ejus opinione, nescio deinceps curiositate an zelo amoris permota, venit quædam puella à Bituricenſe urbe Pariſium, cujus poſt conſecrationem corpus violatum fuerat, ſed adhuc ab hominibus ſine criminis nævo eſſe putabatur, ut colloqueretur cum Genoveſâ: quæ mox interrogata ab eâ, utrùm ſanctimonialis, an vidua eſſet, reſpondit ſe in ſanctimonio conſecratam, intacto corpore Chriſto dignum præbere famulatum. E contrario Genoveſa locum ac tempus, & hominem eundem qui corpus ejus violaverat, expoſuit. At illa, quæ incaſſum ſe Chriſti ſponſam profitebatur, conſcientiâ convicta, protinùs ad pedes Genoveſæ corruit, expoſcens veniam pro eis quæ d' liquit, ſibi dari. Multa quidem de ſimilibus jamdictæ puellæ, convictis conſcientiâ propriâ narrare potui; ſed propter eos qui deſidiâ torpentes, plurima legere ſaſſiunt, ſilentio ceſſi.

23. Poſtea verò non longè intercapedine temporis acta, erat cum eâ mulier quæ ab ipſâ fuerat à vexatione diaboli emundata; cujus filius jam quatuor annorum ætate percepit, caſu decidit in puteum. Ex eo poſt tres ſerè horas ſublatus à matre crines lacerante, pectus, mamillâſque manu tundente, necnon lacrymarum fonte oculis madente, ad pedes ejus mortuus delatus eſt. Quo viſo, ſacra Genoveſa, palliòque proprio cooperta, ad orationem cum ſletu recurrit: miròque ordine, illà ceſſante à ſletu, morte fugiente, puer redivivus apparuit. Erant quippè eodem tempore obſervantiæ dies Quadrageſimæ, & infans ipſe jam catechumenus factus fide imbuebatur catholica, qui & in proximâ Paſchæ vigiliâ baptizatus, Cellomeris eſt nuncupatus, eò quòd in cellulâ ſæpeditæ Genoveſæ vitam quam amiſſerat, recepit.

24. In Meldorum urbe occurrit ei homo cubito tenùs habens manum aridam, optans ſibi per eam ſanitatē reſtitui. Apprehenſa igitur Genoveſa manu ejus aridâ, atreſſatiſque digitorum compagibus, ac munitis ſigno Crucis, in ſemihorâ, Magiſtri inſtar, qui ſuis ſequicibus promiſit, quia majora horum facietis, omnem ſoſpitatē reparavit. 7^{AN.} 14^{11.}

25. Namque ſciens quòd Dominus Jeſus baptizatus à Johanne in ſollemnitate, quæ Græco ſermone Epiphania nuncupatur, conſeſtim eremum expectivit; ſcilicet ut mortalibus documentum daret, qui renati ſunt ex aquâ & Spiritu ſancto, quòd poſt baptiſmum j: junius ac vigiliis aſſiduè ſupplicare debent, ut perſiciant opere quod percepunt baptiſmo. Et ipſa à primo die Dominico jamdictam feſtivi-

tatem, usque ad diem consecrationis calicis, (qui & Domini Cœna vocatur) instar anachoritarum in cellulâ suâ constituta, soli Deo orationibus & vigiliis vacabat. Adveniens autem quædam femina, curiositate potius quàm fide permota, quidnam Genovesa in cellulâ suâ ageret, clandestinè discere voluit. Quæ ut foribus ejus appropinquavit, mox quia sine dubio plena dolo venit, ultione divinâ corporis lumine caruit. Cui dehinc oculos in consummatione Quadragesimæ, procedens à cellulâ suâ, oratione & signo Crucis illuminavit.

* *Mamm-*
scriptus co-
dex vocen-
tior addit,
à Francis.

16. Tempore igitur quodam obsidionem Parisius per bis quinos, ut aiunt, annos perpessa est *, ejusdem urbis cives ita inedia afflixerant, ut nonnulli fame interiisse noscerentur. Quapropter Genovesa compulsâ est, ut Marcianense oppidum navali evectiōe ad emendam annonam per fluvium Sequanæ proficisceretur. Quæ cùm pervenisset ad locum ubi erat in jamdicto amne arbor quæ naves mergere solebat, paululū navigantes, ad ripam appropinquare præcepit, & oratione factâ, arborem incidi jussit: quam cùm ictibus securium navigantes ejusdem socii cœpissent incidere, ultrò orante Genovesâ, ruit avulsâ, protinūs duo monstra fuerunt vario colore ab eodem loco egressa: de quorum nidore duabus ferè horis navigantes, fœdissimo flatu percussi sunt, nullūque deinceps in eodem loco naufragium passus è navigantibus fertur.

17. Deinde cùm Arciacum oppidum fuisset ingressa, situm in pago Tricassino, occurrit ei Tribunus, nomine Passuvius, deprecans ut uxorem suam, longo jam tempore paralysis languore detentam, suâ visitatione sanaret. Perseverante ergo illo in obsecratione, & senioribus loci illius, in domum ejusdem ingressa, ad lectum ægrotantis feminæ accessit. Adprimè verò, ut sibi moris erat, & ibi oratione expletâ, roboratam mulierem solummodò signaculo Crucis, de lecto consurgere jussit. Illa verò, quæ quatuor ferè per annos (ut asserbant) sic fuerat ægritudinis dolore aterita, ut nequaquàm se propriis viribus vegetaret, surgente jam incolumi de lecto, omnes astantes magnificaverunt mirabilem Deum in Sanctis suis.

18. Cūmq; ad civitatem Trecaſſium perveniſſet, occurrit ei multitudo populi, offerens innumeros utriusque sexūs homines diversis infirmitatibus afflitos; quos illa signans & benedicens, absque ullo interſtitio incolumes reddidit, mirantibus cunctis qui aderant. Oblatusque est ei in eadem urbe dein homo, quem Dominico die operantem ultio divina excæcaverat; necnon puella annorum ferè duodecim ſimiliter cæca, quorum illa oculos, facto ſigno Crucis, invocans individua Trinitatem, priſtino luminī reſtituit.

19. Quidam Subdiaconus, ut vidit tanta miracula per eam fieri, obtulit ei niliū ſuum, quem bis quinis menſibus febris acerrima modò frigore, modò calore torquebat. Extemplo autem virgo Dei Genoveſa aquam ſibi aſſerri juſſit, ſignatāmq; vexillo Crucis puero

inſimo

infirmo bibendam contulit: mox ipse, propitiante Domino Jesu Christo, omni febre velociter fugiente, sanitatem indeptus est. Multi & illis diebus febre repleti, auferentes sinabrias vestimenti ejus, à diversis infirmitatibus sanati, plerique etiam & à dæmonibus obsessi, extiterunt mundati.

30. Incipiens verò regredi de jamdicto oppido Arciacense, ubi dies aliquot commorata fuit, Parisium, uxor Tribuni, quæ per eam sanitatem adepta extitit, quousque navem ascendit, prosecuta est: sicque navali deinceps evectioe, Genovesâ remeante ad propria, contigit ut naves ejus, vento flante, inter scopulos & arbores periclitarentur, & castellamina navalia, videlicet vasa quacunque materie compactâ, in quibus annona deferebatur, in tantum à proprio statu inclinata & versa fuerunt, ut etiam naves aquâ impleri ferè cernerentur. Illicò Genovesâ manibus ad cælum expansis, adèò optulâ promeruit à Deo, ut naves ejus undecim numero, procul abeunte naufragio, pristinum cursum obtinèrent. Quo factò Bessius Presbyter hilaritati redditus, (cui præ timore paulò antè calor ossa reliquerat) & omnes qui cum eo erant, lætitiâ refecti, canticum Exodi in modum celestium clarâ voce cecinerunt: Adjutor & protector factus est nobis Dominus in salutem; magnificantes eum, per quem sunt, famulâ ejus Genovesâ deprecante, salvati.

Exodi 15.

31. Pervenientesque Parisium, quibusdam annuonam, quibusdam panes integerrimos; nonnumquàm verò perficiens laudabile furtum, panes clanculò de clibano sublatis pauperibus tribuebat, adèò ut puellæ quæ in obsequio ejus erant, recurrentes ad clibanum, cernentisque imminutum numerum panum quos in eo posuerant, nimium tristitiâ afficerentur, nisi reperissent egenos, panes calidos deferentes per urbem, ac nomen Genovesæ benedicentes, quæ sibi eos contulerat. Erat enim illi spes, non de his quæ videntur, sed quæ non videntur, credens divinum eloquium quod ait, quoniam qui pauperibus erogat, Deo etiam fœnerat. Cui etiam patria illa in quâ fœneratores egentium requirunt thesaurum suum, olim per revelationem Spiritûs-sancti fuerat ostensa: & idcirco sine intermissione orans, flere consuevit, quia sciebat se in corpore positam peregrinari à Domino.

Prov. 19. 17.

32. Defensor quidam, ex Meldorum urbe, nomine Fronimius, annis quatuor pedibus claudus, carènsque auditu, Parisium, ubi Genovesâ morabatur, expetiit, obsecrans auditum sibi restitui tactu manûs ejus. Cujus manu cum aures ejus essent contrectatæ, ac signatæ, continuò gressûs redditici auditusque capax, benedixit Dominum nostrum Jesum Christum.

33. In Aurelianense urbe quid miraculi per eam Dominus gessit, ordo lectionis scribere poscit. Erat enim id temporis mater-familias, nomine Fraterna; cujus & filia, nomine Claudia, jam propè in li-

mine mortis posita, mœstitiam solummodò parenti præstabat : cui eùm adventus Genovefæ illuc venientis delatus esset, mox iter profiliâ rogatura arripuit ; inveniēsq̃ue eam in basilicâ sancti Aniani Antistitis orantem, ruit ad pedes ejus ; prostratâq̃ue solo tali voce p̃poscit : Redde mihi, domina Genovefa, Claudiâ filiam meam. Genovefa ut vidit fidem ejus, constanter alloquens ei respondit : Parce injuriæ tuæ, ac molestiæ quam pateris : nam filiz tuæ redintegrata est incolumitas. Hoc audito, Fraternalis surrexit tripudians, certâq̃ue de salute filiz, rediit ad domum suam : quam ita mirabili Dei potentiâ ex faucibus inferi revocatam extemplò Genovefa sanavit, ut sospes ei in auditorio domûs occurreret. Magnificavitq̃ue ibi universa turba quæ aderat, Dominum pro repentinâ incolumitate Claudiæ, meritis Genovefæ collatâ.

34. Factum est exin in eadem urbe, cùm cuidam pro famulo culpabili supplicaret, & ille superbiâ & calliditate obduratus, nequaquàm famulis ignosceret, his eum verbis allocuta dixit : Si tu me supplicantem despectui habes, non me despicit Dominus meus Jesus Christus, quoniam clemens & pius est ad ignoscendum. At ubi in domum suam homo ille rediit, mox ita febre accensus est, ut nocte totâ anhelans & æstuans, requiescere nequiverit : quin etiam in crastino, cùm prima aurora mundum suo jubare irradiavit, apertore ore sicut urus (quem Germania bubalum vocat) cursu fatigatus, linguâ salivam distillans turpiter, venit, & ad pedes Genovefæ provolutus, veniam quam pridie famulo non dederat, sibi dari precabatur. Sancta verò cum pietate mota signans eum vexillo Crucis, omnem febris ægritudinem fugavit ab eo, reddiditq̃ue dominum mente & corpore sanum, & servum excusatum. Absq̃ue dubio Angelus Domini eum afflixit, quemadmodum judicem pertinacissimum, ante cujus januam sanctus Martinus intempestâ nocte pro victis rogaturus advenisse legitur : quem etiam colasizatum ab Angelo lectio tradit, & ante fores domûs suæ sancto Martino occurrisse, & omnia quæ petierat, præstitisse fertur.

35. Inde verò navigatio Turonis profecta, multa Ligeris discrimina fluvii perpeffa est. Ab Aurelianensi quippe urbe ulque Turo-num civitatem (quæ tertia Lugdunensis nuncupatur) perhibentur esse stadia sexcenta, milliaria septuaginta quinque, leugæ, quæ adhuc veteri Gallorum linguâ nuncupantur, quinquaginta. Pervenientisq̃ue ad portam Turonicæ urbis, occurrit ei de basilicâ sancti Martini incensum multitudinem, per quorum ora clamabant nequissimi spiritus, quodd dignis, sancti Martini meritis ac Genovefæ exorerentur flammis : quin etiam & pericula quæ in Ligere Genovefa habuerat, ob æmulationem sui se profiterentur perpetrasse. Interea Genovefa basilicam sancti Martini ingressa, multos dæmonibus obfessos oratione & signaculo Crucis emundavit. Verùm illi à quibus immundi

spiritus exhibant, in horâ cruciatûs sui, quoddâ digiti manuum Genovefæ singillatim velut cerei divinitûs cælesti igne flagrarent, & circa se arderent, fortidissimè debacchantes profitebantur.

36. Audientes etiam hoc tres viri, quorum matronæ in domibus eorum clam à dæmonibus vexabantur, continuò petierunt ut visitatione suâ conjuges eorum ab obsidentibus nequissimis spiritibus emundaret. At illa, ut erat clementissima, secuta est eos. Ingressâ uniuscujusque domum, matronæ eorum, oratione & benedictione olei unctæ per eam, à vexatione dæmonum sunt curatæ.

37. Perendie denique cùm sancti Martini interesset vigiliis, in angulo basilicæ orans, ac benedicens & laudans Dominum, ac mediâ incognita staret catervâ, unus ex plallentibus arptus à dæmone, lanians proprios artus, quos mente captus alienos esse credebatur, ab absidâ ad Genovefam properavit: cùmque Genovefa spiritum immundum à corpore hominis juberet exire, & spiritus nequam per oculum se progredi minaretur, imperante Genovefâ, fœda relinquens vestigia, fluxu ventris ejectus est, dictûque citiùs persona mundata est. Multis honoribus tum eam euntem ac redeuntem quidam Turonici, ipsâ nolente, sublimaverunt. Enimverò similis fuit meritis Genovefa Evurtii peregrini advenientis de partibus Beneventi, necnon stantis in extremâ parte ecclesiæ Aurelianensis urbis, eâ die quâ post mortem prioris Episcopi eligebatur à populo successor ejus: jamjamque de Clero duo coram altari assidebant, eo modo quatinus Dei misericordia, invocante plebe, patefaceret, quem eorum Antistitem assumerent. Sed exaudita oratione eorum, duobus jam dictis scilicet repulsis, Evurtius sanctus, adveniente Spiritu-sancto, ac residente in specie columbæ super caput ejus, ab Episcopis ibidem congregatis electus est Præsul, non solùm Christicolis, sed etiam gei tibus profuturus. Ideoque suis operibus promeruit Genovefa, ut nullum in ecclesiâ sancti Martini spiritus immundus metueret; non scilicet Episcopum, non Presbyterum, non Diaconem, non Exorcistam, nisi ipsam ad quam perduxit hominem, quo quasi suo malè abutebatur.

38. Eodem tempore stans in aditu domûs suæ, vidit quandam prætereuntem puellam, ampullamque manu gestantem, quam cùm ad se vocasset, interrogavit quid ferret. At illa inquit: Ampullam cum liquamine olei, quod mihi à negotiatoribus venundatum est. Genovefa verò conspicata generis humani adversarium in ampullæ ore sedentem, comminanter insufflans in eam, statim pars de ore ipsius ampullæ fracta ac dilapsa est; signatôque dehinc signo Crucis oleo, abire puellam jussit. Videntes hæc qui aderant, valdè mirati sunt, quoddâ nequaquam se diabolus eidem occultare quiverit.

39. Quidam puerulus dehinc, nomine Marovechus, à parentibus suis oblatus est eidem Genovefæ, cæcus, surdus, mutus & clau-

dus: quem cum de oleo benedicto perunxisset, mox recepto visu, auriumque meatu, necnon loquelâ, pedumque cursu, ex integro discedentibus vitiis, sanitati restitutus est.

40. Quodam namque tempore, dum in territorio Meldenium congregatis operariis, propriam messem meteret, accidit, ut imminente pluvîâ cum turbine, messores turbarentur. Illa autem ingressa territorium, soloque adhærens (quod sine intermissione facere consueverat) cum sletu orare cœpit. Admirabilem tunc cunctis mentibus Christus ostendit virtutem; adeo ut dum in circuitu omnium segetes pluvia rigaret, nec messem, nec messores Genovesæ saltem ullus guttarum humor contigerit.

41. Factum est deinceps cum per annum Sequanz navali proficisceretur itinere, ita ut solet fieri, cæli decepta fraude sereni, ortâ tempestate, ut navicula ejus vento conlisa penè fluctibus operiretur. Procinde Genovesa suspiciens in cælum, manibus extensis, auxilium ad Dominum precabatur; tantâque continuo reddita est tranquillitas, ut sine dubio Christum affuisse, & ventis ac fluvio imperasse, qui adfuerant, crederent.

42. Insuper etiam ægros jugiter oleo benedicto delibutos, sospites reddebat; unde factum est, ut quodam tempore quemdam à dæmonio vexatum vellet perungere, oleumque juberet afferri: cui cum secundum præceptionem sui, ampulla quâ oleum benedictum habuerat, vacua fuisset allata, vehementissimè Dei famula Genovesa turbata quidnam ageret, hæsitabat. Nam Pontifex qui oleum benediceret, deerat. Interea solo recubans, opitulationem sibi de cælo ad solvendum infirmum vinculis satanz conferri precabatur: mox ut ab oratione surrexit, in manibus ejus ampulla oleo impleta est. Sicque statim geminæ in unâ horâ virtutes Christo cooperante, per eam apparuerunt, ut & ampulla vacua, quæ oleum benedictum habuerat, inter manus ejus impleretur, inergumenusque eodem oleo delibutus à vexatione dæmonum fatigatus, incolumis redderetur: non dispar beati Martini studiis, qui quandam puellam paralytici ægritudine detentam, ex integro sanitati restituit, dum in os ejus olei liquorem infudit.

*Hinc ag-
nosce avum
hujus Scri-
ptor.*

43. Post ter senos namque ab obitu ejus annos, oleum cum ipsâ ampullâ, quod in oratione ejus creverat, vidi. Confiteor autem quod ignavia nimium & inertia ductus, de excessu vitæ ejus, ac de obsequio funeris, necnon miraculis quæ in basilicâ ubi corpus ejus requiescit, post mortem ejus patrata sunt, licet innumerabilia maneant, exceptis duobus, brevitate secutus, silere studui. Vixit autem non solum corpore pudico semper, sed animo scilicet fidei, caritatis ac spei vinculis inretita in sæculo amplius octoginta annis: defuncta est verò plena dierum, sub die tertio Nonarum Januariarum, humatâque in pace, in basilicâ in monte sitâ, juxta novæ mœnia Parisi, nomine Leucotitio;

44. Nec dubium est quoddam Sancti post obitum, quo amissa sarcinâ corporis transierunt ad requiem, pluribus claruere virtutibus quàm in hac vitâ omni ærumnâ plenissimâ manentes; sic & hæc post transitum de hoc mundo, quamvis multis miraculis claruisset, tamen (ut prædixi) per incuriam prætermisâ videntur, de quibus duo non absurdum arbitror, fidelibus ad memoriam reducere.

45. Adprimè scilicet, qualiter quidam vir nomine Prudens, apud sepulcrum ejus adeptus est sanitatem. Nam cernentes eum parentes ejus calculi infirmitate nimis profligatum, desperantesque de vitâ ejus, ad tumulum beatæ Virginis cum fletu & gemitu adduxerunt, implorantes ut eâ intercedente à prædictâ infirmitate eriperetur. Quo factò, illicò secundum petitionem illorum, ab eodem, lapide egrediente, veluti numquam tale aliquid pateretur, omni sospitate recreatus est.

46. Deinde cuidam semper Dominicâ die volenti operari, manus meritò contraxerunt; ut nec aliis diebus quicquam posset perficere. Ille verò abrenunciato tali studio, ductusque pœnitentiâ, ad sepulcrum prædictæ Virginis, perfusus lacrymis decurrit: ibique pernoctans orationibus deditus, in crastino ante sepulcrum ejus de lignis compactum, viribus manuum receptis incolumis recessit.

47. Dum adhuc vivente in corpore, & peregrinante à Domino, Clodoveus bellis creberrimis gloriosus Princeps, Rêxque Francorum, fidei Christianæ subditus, & regulis imbutus, sæpe pro dilectione suâ, in ergastulo reclusus, (sicut & genitor ejus Childericus) necnon alijs multis criminibus involutus, aded ut diversis pœnis judicaretur damnari, liberos abire permisit, & securitati restituit. Quin etiam dum iret adversus Alaricum Regem Gothorum in prælium, deceptum hæresi Arrianâ, qui propè omnem Aquitaniam suæ ditioni subdiderat, ea exhortante, in honore Apostolorum (scilicet Petri & Pauli) Ecclesiam ædificare jussit: quam uxor ejus Chrodochildis nomine, verè Christianissimâ, jam defuncto eo regnantibus filiis ejus, Chlothario, Childebarto, necnon Clodomero ad fastidium perduxit. Dedicatôrque ejus cum alijs extitit Remigius Durocorderum Antistes; qui & prædictum Regem fide primùm instruxit, baptismoque deinde ab omni peccatorum labe præteritorum purgavit.

48. Quapropter jam dignum est ut dignis eam laudibus glorificemus, suppliciter postulantes ut eâ intercedente, à peccatorum nostrorum vinculis in sæculo sic absolvamur, quatenus tribuenste Christo, requie perenni perfrui mereamur, qui vivit & regnat in sæcula sæculorum, Amen.



NOTÆ ALIQUOT

ad Vitam sanctæ Genovefæ.

CAPITE I. *Licet certam diem natiuitatis ejus ignoremus.*] Poterat tamen facili ratiocinio investigare diem natæ Genovefæ: nam cum in quodam veteri hymno vixisse dicatur *decades per oïlo*; in Vita autem *amplius octoginta annis*; si obiit, ut verisimile est, quo die colitur, tertio Januarii, assignari potuit ejus dies natalis haud procul Calendis Januariis: sed maluit accuratus Scriptor rem in dubio relinquere, quàm conjecturæ suæ indulgere.

Honorii & Theodosii Minoris.] Imperavit Theodosius Minor in Oriente post patrem Arcadium, ex anno æræ vulgaris 408. in 450. obiit porro Imperator Occidentis Honorius xv. Augusti, anno ejusdem æræ 423. in quem ipsum annum, Genovefæ ortus commodè potest referri: sic enim fuerit sexennis, aut septennis, quando S. Germano primùm in Britanniam proficiscenti oblata est, nempe anno Christi 429. Florentio & Dionysio Consulibus, ut notat in Chronico Prosper. De utraque S. Germani ad Britannos profectio, quæ Genovefam spectant, accuratè profecutus est, ipsa adhuc superstite, Constantius Presbyter in Vita S. Germani Autiodorensis.

Per tyrannidem.] Agnosce ævum Scriptoris Romani sive Galli indigenæ. Illis enim senescentis & defluentis in interitum Romani Imperii temporibus, Franci, Burgundiones, Gotthi, Vandali, aliique in Gallias advenæ pro tyrannis habebantur.

CAP. 2. *A Vilico Episcopo Carnotensi.*] Memoratur idem Vilicus capite 7. quem in tabulis Carnotensibus hætenus prætermissum nemo rejiciet, qui cogitaverit asseri illum à gravi Scriptore, qui de Genovefâ quæcumque refert, vel vidisse ipse potuit, vel ab oculatis testibus accepisse.

Durocordarum.] Sic & capite 47. Remensem Urbem appellavit, quasi à recto *Durocorda*. Hæc ipsa Ethico *Durocordorum*, aliis plerumque *Durocoriorum*.

CAP. 17. *In Laudunense Urbe, ubi Præsul Remigium sanctitate plenus præerat.*] MS. Codex Ripatorii: *In Lugdunensi oppido quid miraculi, &c.* Consultò declinasse hunc scopulum videntur recentiorum aliquot Monasteriorum Fratres scriptores, cum non caperent quâ ratione Præsul Remensis Remigius Laudunensi episcopatu, suæ metropoli obnoxio præesse dici posset. Id quidem præter morem priorum sæculorum fuit. Sed cogitare potuerunt venisse Genovefam Laudunum per illud septennium quo Genebaldus vir nobilis Laudunensem Episcopum ordinari se passus, conjuge in sororem versâ; postmodum tamen ejus illecebris captus, & ad ejus amplexus re-

dux, geminam ex eâ prolem susceperat: eâque de causâ, Remigii Metropolitani sui sententiâ atque hortatu, ad septennium angustissimo tugurio inclusus pœnitentiam agebat, ut testatur auctor Vitæ S. Remigii, non Hincmarus, sed Anonymus, quem mihi ex illis Sarracenicis, Hungaricis, ac Normannicis tumultibus, velut ex naufragio receptæ membranæ pervetustæ obtulerunt. Sic enim ille: *Pœnitentiam indixit, (Remigius Genebaldo) satiatque mansuetudina, cum lecto in modum sepulcris, & parvissimis fenestrellulis, ac oratorio, (qua hodieque manent secum Ecclesiam sancti Juliani) Genebaldum in ea inclusit: & clerum, ac parrochia ipsius populum, per septem annos, ut & propriam parrochiam gubernavit: & unam Dominicam Remis, alteram apud Laudunum celebrabat.*

In eadem S. Remigii antiquâ Vitâ, eadem lego de ejus ætate quæ apud Hincmarum & Flodoardum; nempe vixisse illum in clericali ordine annos viginti duos, in episcopatu verò septuaginta quatuor, obiisse Idibus Januariis, nonagesimo-sexto ætatis suæ anno: & præterea causam reperiō cur ipse abdicatus successorem reliquerit Flavium Remensem Episcopum, subscriptum Concilio Arvernensi, post Consulatum Paulini junioris, anno æræ vulgaris 535. nempe propter cæcitatem quæ in ultimâ ætate S. Remigio evenit, quia, ut scriptum est, (inquit citatæ ejus Vitæ antiquus auctor) *verius agricola omnem vitæ veræ palmitem fructum ferentem pluvie purgat, ut fructum pluvie afferat, oculorum corporalium lumine aliquandiu est privatus, quatinus mentis oculis intentius, quæ superna sunt, ad quæ toto desiderio anhelabat, contemplari valeret.* Igitur Flavius anno 535. fit Remensis Episcopus, adhuc superstite Remigio, qui propter cæcitatem episcopatu cessabat, nihilominus tamen propter characterem indelebilem Episcopus censebatur usque ad felicem obitum qui anno ætatis nonagesimo-sexto ipsi evenit. Hæc fuit igitur S. Remigii totius vitæ series. Natus anno Christi 449. fit Episcopus anno æræ vulgaris 471. cùm esset annorum 22. Scripsit ad tres Episcopos anno Christi 523. sui episcopatus anno 1111. natus annos 175. Duodecimo exinde anno, Christi 535. amisso oculorum usu, abdicat, & Flavium sibi successorem constituit, ætatis suæ anno 175. Paulò ante obitum recepto visu migrat ad Superos anno Christi 541. ætatis suæ anno 201. à suscepto episcopatu 175. ab episcopatu in Flavium refuso, anno septimo.

CAP. 19. *Ambrosium dum celebraret Missam.*] Non ergo primus hoc de Ambrosio narravit Gregorius Turonensis, quo antiquiorem fuisse constat hujus Vitæ S. Genovefæ Scriptorem. De Ambrosio, qua ratione, S. Martini exequiis interfuerit, dixi in Dissertatione de S. Martini temporum ratione, à paginâ 251. Potuit auctor Vitæ S. Genovefæ, etiam nonnullis vulgi erroribus esse afflatus.

472 APPEND. DE SS. DION. ET GENOV.

CAP. 43. *Post ter senos ab obitu ejus annos.* His verbis Auctor apertè significat se vixisse anno post S. Genovefæ obitum octavo-decimo, qui (ut probabilissimè) annum spectat Christi 521. Nata enim Genovefa anno 423. octogenaria annum Christi attingit 503. His adde annos ter senos, in annum incurris quingentesimum vigesimum primum.

FINIS.



INDEX

I N D E X.

Littera a primam partem pagine, b secundam, c tertiam designat

A

A D A M T R O N U M & Deoderi-
corum ordo inter Episcopos Me-
rentes. 337. a
Adulti qui censentur. 409. c
Etherium Arelatensem pro Lugdunensi
posuit Beda deceptus à Nothelmo:
311. a

Agilbertus Paris. Episc. 398. c
Aidanus Episcopus. 324. c
Albericus. 10. a
A L E X I N U S . 5. c
Aldricus Senonensis Archiep. 329
Alfordus. 8. ab
S. Ambrosius quomodo interfuerit ex-
quis S. Martini. 471. c
Anastasiu Bibliothecarius. 391. b
Anatolius. 8. 9. 13. c
Andisegum monasterium. 112. a
Annales S. Nazarii. 3. c
S. Annemundus. 398. 403
A N N O B E R T U S Senonensis. 385. c
Apposta. 314. b
Archiepiscopi appellatio. 373. c
S. Arnulfus Metenus Episc. 334. c, 336.
c seq.

B

S A N C T U S Babolenus. 356. c seq.
Bagaudarum castrum Fossatense. 361.
Balaeus. 3. c
Baldericus. 418. c
Baltildis Regina. 325. 326. 393. 394.
400. 403. 416
Baronii lapsus occasio in aetate Bedae. 4.
b, 8
Beda annus natalis. 3. b
Beda plures distinguendi. 10
Beda inter Sanctos relatus, eut. dictus
Venerabilis. 9. c
Beda Soli Orienti comparatus. 3. b
Beda obitus annus, dies, & hora. 4.
11. 12
Beda locus sepulturae. 9. 10.

Bellarminus. 3. d
S. Bonifacii epistolis junctae quatuor
epistolae, lucem afferunt ad Bedae
aetatem. 4. 8
Brunethildis posita pro Baltilde. 398.
399
Bruscius. 323. c
Bucelinus. 2. c

C

C A M O Z A T U S . 395. c
Castri Caroli basilicam consecrat S.
Leodegarius. 426
Censorinus. 392. b
Chariberti regnum. 335. 334
Chronicon Augiense. 3. c
Chronica, Benignianum, Bezurense,
& Virdunense. 331. c
Chrotildis Regina. 323
Clarii Chronicon S. Petri Vivi. 416. b
Clodoveus II. 397. b
Clodovei III. & Childeberti III.
regna. 445
Clotarli III. anni regni xiv. 393.
413
Coimrius. 393. b, 415
Cometa anni Christi D c l x x v 11.
326. c, 369. 392. 396. 440
Comitellinus. 3. c
Conciliu Koromagenis epocha. 471.
Conradus Abbas Urspergensis. 3. c
S. Cuthbertus. 7. a
Cuthbertus qui morienti Bedae adfuit.
11
Cuthbertus Abbas. 6. c

D

D A B I N U S de Altaferria. 330. c
Dagoberti diploma. 387. 392
Dagoberti II. regnum. 439
Dallinus Episc. Lugdunensis. 337. 398
Destina. 324. c
S. Donatus Vesconsidensis. 355. 367. a
385

INDEX.

Dorniacum , seu Birtillense monasterium olim ad muros Vefontionenfes.	Honorii imperii periodus.	321. a
354	Hugonis Flaviniacensis locus restitutus.	407
Duchefnius.		393

E

E BROYNUS.	410. 416
Eclipsis Solis die non suo posita à Bedà & ab Hermanno Contracto.	406. a
S. Eligii chronologia.	410. 412. 415. 417. 418
Epitaphium Bedæ.	5. a
Erchambertus.	397. c
Erchinoaldus.	417
Eutropius.	384. c

F

F LORENTIUS Vvignoniensis.	406. c
Floriacensis Anonymus.	3. c
Fossiacensis monasterii fundator Blidegisus.	361. 377. 379
Fredegarius in Burgundiâ & pro Burgundionibus scripsit.	332. a. Malè intellectus ab Hermanno Contracto, & à nonnullis recentioribus.
	331. b

G

G ALLI canrus nocturni.	371. 372.
392	
Gandericus Lugdunensis.	385. c
Geaebaldus Laudunensis Episc.	470.
471	
S. Genovefa Dionysio Arcopagite, Patriscusum Apostolo, primam excitat basilicam.	452. & seq.
Gerinus S. Leodegarii frater.	405
S. Goerici Merensis Episcopi Vitz auditor quàm antiquus.	336. 317
S. Gregorii Magni annus & dies obitus. a. b. Ejus epistola data anno	DXCVI.
	6. b

H

H ADRIANUS Valesius.	322. b
Hector Patricius Massiliensis.	395. c
Helinandus.	20. c
Henschenius.	393. c
Hepidannus.	3. c
Heraclii duo.	322. 3
Hermannus Contractus. j. b. 10. c. 312. c	

I N D I C T I O N I U M & annorum	
Christi calculus quando in Galisia recepit.	330
S. Joannis Reomacensis vera chronologia.	358
Jonæ ætas & libri ab eo conscripti.	345
Josias Simierus.	9. b
Iperius.	396. b

L

L A M B E R T U S Schafnaburgensis.	4. a
S. L. odegarius.	395. 414
Ludovicus Junior.	412.
Lullus pallam holoserisam mittit ad reliquias sancti Bedæ.	6. c

M

M A R I L L O N I U S .	407. 408.
415. a	
Malebrancus.	444. a
Marthæus Vvestmonasteriensis.	3. c
Melchior Regnaldus.	396. c
Misiorum aureum.	335. c

N

N I C O L A U S Serarius.	6. c. 8. a
Nomina plura nobilibus Romanis.	408
Nordeberus Patritius.	416. c

O

O R D I N A T I O SS. Eligii & Audoeni.	340. & seq.
--	-------------

P

P A U L U S Orosius.	385. b.
P. C. Post Consulatum.	321. c
Petrus Rouerius.	363
Philander.	324. c
S. Philiberti res gestæ.	438
Philippus Labbeus. 330. c. emendatur.	
407	
Pippini Heristelli principatus plura exordia.	436. 437
Pomponius Lætus.	384. c

INDEX.

Præstelendus Bituricensis.

385

T

R

RADERUS. 323. c
Ranulfus Castrensis. 406. c
S. Remigius Remensis præfuit etiam
episcopatus Laudunensi annis septem.
471.] Ejus vitæ totius periodus. 471
Richarda Imperatrix. 321. 323
S. Romaricus. 415

S

SANCTA Salaberga. 323. c
Salvianus. 384. c
Sigebertus Chronographus. 3. c.
S. Sigibertus Rex. 415
Sigobrandus, idem cum Dalfino & An-
nemundo. 400. 401.] Non fuit Epi-
scopus Parisiensis. 411
Simeon Dunelmensis. 4. a
Sirmondus. 321. a. 418
Sicnandus Hispaniæ Rex. 355. a
Spicilegium Dacherianum. 325. c
Stephanus Voyrin. 322. c. 323

THODERICI III. plura re-
gnorum exordia. 418. 445
Translatio S. Benedicti in Gallias. 342
Translatio S. Arnulfi, ab ejus obitu di-
tinguenda. 339. 340

V

UGHELLUS. 321. 382
Victorii Cycles. 335
Victor Capuanus. 351. c
Wilfridus Episcopus. 403
Vindicianus. 419
Virruvius. 324. c
Ulpericus Computista, qui & Helperi-
cus. 9
Volarettanus. 10. b
Ursinus. 395
Uuardus Cartusianorum Colonien-
sum. 5. 6. c
S. Vvalbertus Abbas Luxoviensis. 406.
424
Vvillmus Malmesburienfis. 3. c
Vvion. 4. c. 323. b. 382

Errata sic corrige,

Paginâ 335. versu 23. dedius, lege dejectus.] Pag. 331. v. 27. Fredegatii,
lege Fredegatii.] Pag. 23. v. 30. Vvichedæ, lege Vvichredæ.] Pag. 330. v.
30. Viguierius, lege Vignierius.

FACULTAS SUPERIORUM.

EGO infra scriptus Provincialis Societatis Jesu in Provincia Franciæ, po-
testate mihi factâ à R. admodum P. N. Joanne Paulo Olivâ, ejusdem So-
cietatis Præposito Generali, permisso, ut Libros qui inferibitur Bedæ Presbyteri &
Fredegarii Scholastici Concordia ad senioris Dagoberti definendam Monarchia pe-
riendum, atque ad prima totius Regum Francorum Stirpis Chronologiam stabilien-
dam, à Petro Francisco Chiffletio compositus, & à tribus nostræ Societatis
Theologis approbatus, in lucem edatur. In quorum fidem has ei litteras manu
nostrâ subscriptas, & sigillo nostro munitas dedi. Blesis 25. Augusti anni
M. DC. LXXX.

PETRUS DE VERTHAMON.

SUMMA PRIVILEGII REGIS CHRISTIANISSIMI.

LUDOVICI XIV. Francie & Navarre Regis Christianissimi diplomate
cavetur, ne quis in ipsius regno, aliisque locis ejus ditioni subiectis, in-
tra proximos sex annos à die impressionis perfectæ inchoandos, excudat, ven-
dat, vendendum aut excudendum, quovis modo ac ratione curet, Librum qui
inscribitur *Beda Presbyteri & Fredegarii Scholastici Concordia ad sensum Dagoberti*
desiniendam Monarchia periodum, atque ad prima totius Regum Francorum
stirpis Chronologiam stabiliendam, à Petro Francisco Chiffetio, Societatis J. S. U.
Sacerdote, compositum; sub pœnis in originali diplomate contra delinquentes ex-
pressis, præter illum Typographum aut Bibliopolam quem Auctor elegerit.
Lucetia Parisiorum 22. Julii anno M. DC. LXX.

Sic signatum, JUNQUERES.

Ipse verò Auctor P. F. Chiffetius hoc Privilegium transfudit in Gabrielem
Martinum, Typographum-Bibliopolam.

Hoc Diploma regium velatum fuit in Alia Typographorum & Bibliopolarum
Parifensium, die 22. Maii 1681.

Sic signatum, G. ANGOT, Syndicus













D.6.

